

1812 წელს
ახმეტაში ავარდნილი ნაპერწკალი
ალად მოედო კახეთს,
მთელ საქართველოს.
თუ რა დიდი მნიშვნელობა
ჰქონდა ქართველთათვის
ამ ისტორიულ ამბავს
მოგვითხრობს
ალექსანდრე ფრონელი.

ალექსანდრე ფრონილი

აგროსეზა კასეთისა

(1812 წ.)

ისტორიული აგზავი

.ბუილინი

ელექტრონის სტამბა წიგნების გამომცემელ ქართველთა აზნაგობისა.

1907

© გამომცემლობა "ამირანი" 1992

ამბოხება კახეთისა

(1812 წ.)

ისტორიული ამბავი

ნაწილი პირველი

შფოთისა და მღელვარების ნაპერწკალი პირველად ამოვარდა ს. ახმეტას 31 იანვარს 1812 წ. აქედან ამბოხების ალი მოედო კახეთს, გადავარდა შუაგულ ქართლში, დასავლეთით უწია ოსეთს და მოუახლოვდა ტფილისს. მღელვარების ცეცხლსა და ბოლში გაეხვია ქიზიყი, შეიტრუსა დღევანდელი ზაქათალა და თითქმის შექის სახანოს მიაღწია აჯანყებამ.

უბედური იყო პირველი ხანა რუსის მთავრობის დამკვიდრებისა საქართველოსა და ამიერ-კავკასიაში. მღელვარებითა და დრტვინვით მიეგება კნორრინგს საქართველოს წარჩინებული თავადიშვილობა. დიდად იუცხოვეს თავადიშვილებმა კნორრინგის უცნაური საქციელი, რომელმაც სალდათები გარს შემოავლო სადგურს, სადაც 8 მაისს 1802 წ. რუსის იმპერატორის ერთგულობის ფიცი მიიღო ქართველმა თავადიშვილობამ და მოქალაქეთ. ყველაზედ მეტად გულნაკლულად იყო კახელობა. მათში გაატარა სიყმაწვილე და სიჭაბუკე სახელოვანმა მეფემ ერეკლე მეორემ, მათთან იღწოდა ქვეყნისათვის და მათშივე მიებარა საფლავს. ალბად, ეს იყო მიზეზი, რომ უწინარეს ყოვლისა ამბოხებამ კახეთში

იჩინა თავი. არ გასულა დიდი ხანი ნაძალადევი ფიცის შემდეგ და იმავე 1802 წ. კახეთში დაიწყო ამბოხება. მთავრობამ მალე ჩააქრო მღელვარება თავად-აზნაურობისა, ბევრნიც დასაჯა, მაგრამ ვინც გადარჩა სასჯელს, ადვილად არ ურიგდებოდა ახალს რეჟიმს და ჰფანტავდა საქართველოში უკმაყოფილების თესლსა. უფრო საშიშო და სავალალო იყო რუსის მთავრობისათვის აჯანყება მთიულეთისა 1804 წ. ათას რვაას ორს წელს პროტესტს აცხადებდა ფეოდალობა, 1804 წელს კი ამხედრდა თვით ერი, შეჰკრა საქართველოს სამხედრო გზა და მთლად მოსწყვიტა მეტროპოლიას საქართველოსა და ამიერკავკასიაში გაბნეული მხედრობა.

თუ ამ დროს თ. პავლე ციციშვილი არ ყოფილიყო საქართველოში მთავარ-მართებლად, ეგები რუსეთი სამუდამოდ გამოსთხოვებოდა ამიერ-კავკასიაში ბატონობას. ამ შესანიშნავმა სარდალმა მცირე მხედრობით მოახერხა და ჩააქრო აღგზნებული ცეცხლი და რუსეთის გვირგვინს შეუნარჩუნა ჩვენი ქვეყანა.

1812 წლამდე მთავარ-მართებლობდნენ საქართველოში ციციშვილის სიკვდილის შემდეგ გუდოვიჩი და ტორმასოვი. არც ერთს მათგანს ერთი ბედნიერი დღე არ უნახავთ ჩვენს ქვეყანაში. ან ოსმალეთსა და სპარსეთს ებრძოდნენ, ან შინაურ ამბოხების ჩაქრობას უნდებოდნენ. ტორმასოვმა მთელი თვისი ძალდონე იმერეთის უკანასკნელ მეფე სოლომონთან ბრძოლას მოანდომა.

წარსულ საუკუნის განმავლობაში მღელვარება და შფოთი თითქმის არ შეწყვეტილა საქართველოს სხვა-და-სხვა კუთხეს. 1810-1811 წელს ბატონიშვილმა ლევანმა ააჯანყა ოსეთი, 1813 წელს ბატონიშვილმა ალექსანდრემ ფეხზედ დააყენა ხევსურეთი. დიდი ამბოხება მოედო იმერეთს 1820 წ. და ბევრი სისხლიც დაიღვარა. დიდმა უკმაყოფილებამ იჩინა თავი ქართლში 1830-32 წ. ყველას ეხსომება აგრედვე გლეხთა აჯანყება სამეგრელოში ეკატერინე მთავრინას დროს.

თუ არ ვიანგარიშებთ წვრილ-წვრილ მღელვარებას გურიასა, სვანეთსა და აფხაზეთში, უკანასკნელ ამბოხებლად

უნდა მივითვალათ მღელვარება აბხაზეთისა წარსულ რუს-ოსმალოს ომის დროისა 1878 წ. სიწყნარე და მშვიდობიანობა ამ დროიდან თითქმის აღარ შერყეულა საქართველოში. ამბოხების ცეცხლი რომ მოედო კახეთს 1812 წ., ჩვენში მთავარმართებლობდა მარკიზი პაულუჩჩი. როგორც 1804 წ. თ.ციციშვილმა იხსნა რუსის მხედრობა გაწყვეტისა და განადგურებისაგან, ისე მარკიზ პაულუჩჩიმ გაუწია პატრონობა რუსის ჯარსა და მოხელეობას. ამბოხებამ რომ იფეთქა, მარკიზი ქართლში არ იყო. აღმოსავლეთ კავკასიაში ჯარებს ათვალეიერებდა და თადარიგს იჭერდა სპარსელების შემოსევის წინააღმდეგ. გაიგო თუ არა კახეთის ამბები, ფიცხლავ გაჩნდა ტფილისში და სულ რაღაც ორი-სამი თვის განმავლობაში ჩაანელა აგიზგიზებული ცეცხლი. ძნელი დრო იყო რუსის მთავრობისათვის ეს დრო. იმპერია ემზადებოდა ნაპოლეონის დასახვედრად და თავი ვისა ჰქონდა ეზრუნა საქართველოში დაბანაკებულ ჯარისათვის. ჯარის მომატებაზე მთავარ-მართებელი კრინტსაც ვერა სძრავდა. მომატება-კი არა, კიდევაც შეუძვირეს. ჯერ ისევ 1811 წელს სამხედრო მინისტრმა მოსთხოვა ტორმასოვს - დააბრუნე რუსეთს ორი დრაგუნის პოლკი: ტაგანროგისა და ვლადიმირისა და ორიც ქვეითა ჯარის პოლკი: სევასტოპოლის მუშკეტერისა და 46 ეგერებისაო. ტორმასოვმა დრაგუნთა პოლკები დააბრუნა რუსეთს და ითხოვა ქვეითა ჯარის პოლკები მაინც დაეტოვებინათ, მაგრამ თხოვნა უყურადღებოდ დასტოვეს, შინ რომ ბავშვი ტიროდეს, ტაბლას გარედ რა ხელი აქვსო.

ტორმასოვი გაიბუტა, მცირე მხედრობით რას გავხდები ამ შფოთიან ქვეყანაშიო და სამსახურს დაეთხოვა. 1811 წ. 6 ივლისის რესკრიპტით ავადმყოფობის გამო ტორმასოვი დაითხოვეს სამსახურიდან და იმის აღვილზე დაინიშნა იმავე რესკრიპტით მთავარ-მართებლად მარკიზი პაულუჩჩი.

1812 წ. გაზაფხულზე სრულიად საქართველოსა და ამიერკავკასიაში რუსის მხედრობა არ აღემატებოდა 28,000 ჯარის კაცს. აქედან ხუთი ბატალიონი და ერთი ყაზახთა პოლკი იყო დაბანაკებული იმერეთსა, სამიგრელოსა, გურჯისტანსა და

აფხაზეთში; ქართლში შვიდი როტა, სამი ესკადრონი და ყაზახთა ერთი პოლკი; ჭავჭავთში სამ ნახევარი ბატალიონი და ყაზახთა ერთი პოლკი; ბამბაკში გუმბრისაკენ ხუთი ბატალიონი და ორი პოლკი ყაზახებისა; შამხორის მხარეს სამი ბატალიონი და ყაზახთა პოლკი; ყარაბაღში ექვსი ბატალიონი და ერთი ჩარეჟი და ერთი ც ყაზახთა პოლკი.

აქ მოხსენებული არაა, თუ რამდენი ჯარი იდგა კახეთში, ეს იმითი აიხსნება, რომ ჯარი მაშინდელ შფოთიან დროს ხშირად იცვლიდა ბინას და, ალბად, როცა გენერალი რტიშჩევი ამ მოხსენებას ჰგზავნიდა პეტერბურგს, კახეთიდან, ალელვების დაცხრომის შემდეგ, სხვაგან სადმე თუ გადაუყვანია იქაური მხედრობა. როგორც ქვემოთ დავინახავთ, ამბოხების დროს კახეთში ისე მცირე ჯარი იდგა რომ სათქმელადაც არა ღირს.

ღიას, ჯარი რომ ცოტა იყო, მოშველების იმედიც არა ჰქონდა მარკიზ პაულუჩჩის, მტერი კი ურიცხვი, ეხვია გარს. სპარსეთი და ოსმალეთი მოდარაჯებულნი იყვნენ, რომ როგორმე გაეძევებინათ საქართველოდან რუსები და მოსვენებას არ აძლევდნენ. როგორც ლახვარი, ისე მოხვდათ ერთსაცა და მეორესაც ამბავი რუსობის დაბუღებისა საქართველოს მიდამოებში. ინგლისის წაქეზებით ოსმალეთმა და სპარსეთმა კავშირი შეჰკრეს, რათა თანხმობით ემოქმედნათ რუსების წინააღმდეგ. ინგლისმა 20,000 თოფი გამოუგზავნა სპარსეთს, ინსტრუქტორები ჯარის გასაწვრთნელად, ციხეების ასაგებად და ზარბაზნების ჩამოსასხმელად. ფულს აუარებელს უგზავნიდა ინგლისი სპარსეთს ჯარის საჭიროებისათვის, ოქროს არც ოსმალეთი იშურებდა სპარსეთისათვის, ოღონც-კი ხელი არ აეღო რუსეთის სამტროდ. სპარსეთის შაჰის ფირმანებით იფინებოდა საქართველო, ემისარები დაძრწოდნენ და ალელვებდნენ ქართველებს რუსების წინააღმდეგ.

ამას ისიც უნდა მიუმატოთ, რომ დაუძინებელი მტერი რუსეთისა, ტახტის მამდიებელი ბატონიშვილი ალექსანდრე ერეკლეს ძე, სპარსეთის საზღვარზე იდგა და ელოდდა მოხერხებულს დროს შემოსეოდა საქართველოს სპარსელთა

მხედრობით, და ან სულ გაეწყვიტა რუსის ჯარი, ან გადაერეკნა კავკასიის უღელ-ტეხილს იქით. ბატონიშვილის წერილებით სავსე იყო საქართველო. ერთგულნი მხლებელნი როგორღაც უსხლტებოდნენ რუსის დარაჯებს და მრავლისაგან მრავლად აბნევდნენ მის პატარა ლაკონიურ ბარათებს. სიყვარულით აღსავსე წერილები გულს უთუთქავდა ქართველობას და აძულებდა რუსობას. ასე გასინჯეთ, დალესტანი, რომელიც ჩვენის მოყვრობით თავს ვერ გამოიღებს, ისიც კი მზად იყო ხელი შეეწყო ტანტის მადიებელისთვის და ბევრჯერ გაუწევია მასპინძლობა ალექსანდრესთვის. ტანჯვა-ვაება და კაემანმა, დაუსრულებელმა წოწილ-ხეტიალმა მთასა და ბარსა, შინ და გარედ, ზღაპრულ გმირად გარდაქმნა ბატონიშვილი ალექსანდრე ქართველთა და მთიულთა თვალში. ტუჩ-მოკუმული სახე სამეფო მომთა-ბარესი შეიმოსა შარავანდედით და სადაც კი მივიწოდოდა ხოლმე, იქ უსათუოდ ამბოხება იფეთქებდა რუსობის წინააღმდეგ.

ასეთი იყო გარეშე ვითარება საქართველოში, კახელე-ბმა რომ აჯანყების დროშა ააფრიალეს. შინაური საქმენი უარესად იყო აწეწილ-დაწეწილი. გლახ-კაცობა ისე იყო გაბეგრილ-აკლებული, რომ მოთმინების ფიალა აევსო და იარაღს წამოაავლო ხელი.

მასალად ამ ისტორიულ ამბის დასაწერად გვაქვს მეოთხე და მეხუთე ტომი არხეოგრაფიულ კამისიის მიერ დაბეჭდილ აქტებისა და მეორე ტომი გენერალ პოტტოს რედაქციით დაბეჭდილ წიგნისა, სახელად "რუსთა მფლობელობის დამკვიდრება კავკასიაში".

სულით და გულით ვსწუხვართ, რომ ამ უამად შეუძლებელია მიუღდომელის, მეცნიერულად დამუშავებულის ისტორიის დაწერა. ძვირფასი მასალაა შეკრეფილი აქტებში, ცოტა რამ სხვაგანაც მოიპოვება, ასე რომ ადვილად მონერხდებოდა პირუთვნელი გამოკვლევა წარსულთა დროთა და უამთა. მაგრამ, ვიმეორებთ, დრო მეტის მეტად უხერხულია და ფუჭად ჩაივლის აღნიშნულ ხასიათის შრომა. ამის გამო იძულებული ვართ ზედა პირზე ვიაროთ, გაბნეული ფაქტები

რიგზე დავაწყობთ და ამ გვარად როგორმე მოვახერხოთ პერსპექტივის გაჩენა. დოკუმენტებში მოყვანილი ფაქტები ძალა-უნებურად კრიტიკის ქარცეცხლს ასცდებიან, მაგრამ რა ვუყოთ, უსარგებლოდ არც ეს შრომა ჩაივლის. უეჭველია, იგი დიდად შეუწყობს ხელს ერის თვით-ცნობიერებას. კარგი და ავი, ბნელი და ნათელი ხელის გულზე გადიშლება და მხოლოდ ბრმა თუ ვერ გაიკვლევს ცხოვრების გზას, თორემ თვალთა მხედველს არ გაუძნელდება გზის პოვნა და მასზე სიარული.

აქტების შემდეგ ფრიად საყურადღებოა დასახელებული პოტტოს წიგნი. ზოგი ამბავი ისეთის სითამამითაა აღნიშნული, რომ ჩვენ სრულიად კმაყოფილი დავრჩებით, თუ უცვლელად შევძელით მისი თარგმნა. სიტყვასაც აღარ მიუმატებთ ჩვენ თავად. წიგნი დაფუძნებულთა აქტებისა, სამხედრო შტაბთა და არქივთა მასალაზე. წიგნი შედგენილია საგენერალო შტაბის. კაპიტან ნ. ს. ანოსოვის მიერ, ხოლო რედაქცია ეკუთვნის გენერალ პოტტოს. დაბეჭდილია სახელმწიფო ხარჯით.

რადგან მოთხრობას პოპულიარულს ხასიათს ვაძლევთ, ამის გამო ტექსტს არ ავაჭრებთ გადამეტებულის შენიშვნებით და სხოლიოებით. ვისაც სურვილი, ან დრო და მოცალეობა ექნება, იმან უნდა იშოვნოს ორთავ წიგნი და დასტკბეს თავის ქვეყნის ამბავთა კითხვით. მართალია, კილო ბევრჯელ ეუცხოვება, შეიძლება ბევრჯელაც გაწიწმატდეს, მაგრამ ვინ უშლის მონათლული გადანათლოს და ფაქტსა და ამბავს ჭეშმარიტი ელფერი მისცეს. საწყენი მხოლოდ ერთია, აქტებიცა და ანოსოვის წიგნიც ძნელი საშოვნელია და თითქმის ხელმიუწვდენელი, განსაკუთრებით აქტები.

I

ქვეყნის დაპყრობა და შექმნა ხმლითა და იარაღით არც ისე ძნელია, როგორცა ჰგონიათ. საქმე დაპყრობა და დამონება-კი არ არის, საქმე მოვლა-პატრონობაა ერისა, დადგენა სამართლისა და შემოღება დაპყრობილის ერის ზნისა და ხასიათის შეფარდებულის მართვა-გამგეობისა. ვერც ერთი და ვერც მეორე ვერ მოახერხა მაშინდელმა რუსის მთავრობამ. ღვთის წინაშე, ვერც მოახერხებდა. შინ რომ არა ეყარა რა, გარედ რას გაიტანდა. ბევრი იყო ჩვენში უნამუსო, ყაჩაღსავით თავზე ხელადებული მოქრთამე მოხელე, მაგრამ ნიჭიერი, პატიოსნებით სავსე მმართველებიც მოიპოვებოდნენ, აი თუნდ თავადი პავლე ციციშვილი და მარკიზი ფილიპე ოსიპის ძე პაულუჩიჩი. სულითა და გულით ჰსურდათ ორთავეს საქართველოს დაწყნარება, გაბედნიერება, მაგრამ დახეთ ბედსა, ყველაზე მეტი მწუხარება და სევდა-ვარამი ამათ ხელში გამოიარა ჩვენმა სამშობლომ.

მიზეზი სულ უბრალოა. თავიდანვე ახალი მთავრობა მრუდე გზას დაადგა. არ შეიწყნარა საქართველოს ერის ისტორიული უფლებანი, დასთრგუნა იგინი და ისე ეპყრობოდა საქართველოს, როგორც ველურს ტომს, როგორც უმნიშვნელო და გათახსირებულს სახანოს. საქართველო მიეკედლა რუსეთს მზა-მზარეულ სახელმწიფო მექანიზმით, ჯარით, მოხელეობით, კანონმდებლობით, პოლიცია-ადმინისტრაციით, განვითარებული წოდებრივი უფლებებით, - თავად-აზნაურობით, სამღვდლოთი, გლეხ-კაცობით. მიწის მფლობელობაც კელაპტარისავით ჩამოსხმული იყო და საკუთარი, გარკვეული ფორმა ჰქონდა. დარღვევას ვერავინა ჰბედავდა,

რადგან დარაჯად ჩვეულება ედგა. ჩვეულება, ადათი დაწერილ კანონზე უფრო სასტიკი და ულმობელი იყო. იგივე ჩვეულება-ადათს განსაზღვრული ჰქონდა ხარჯი და ბეგარა. ორივენი მძიმე ტვირთად არ აწვა ერსა, რადგან პოლიტიკური და სოციალური ცხოვრება სადა და მარტივი იყო. ძველს ცხოვრებას ახალთან შედარებით ის უპირატესობა ჰქონდა კიდევ, რომ გლეხ-კაცის ხელში და ხმარებაში იყო მამულ-დედული, ტყე და წყალი. კანონი და ჩვეულება სიმარტივისა გამო ყველასათვის მისაწდომი იყო. ქართველობას პირველობითაც მოჰქონდა თავი მთელს კავკასიაში. საბუთიც ჰქონდა. მარტო ის რაღა ჰლირდა, რომ კავკასიის სხვა-და სხვა კუთხიდან ელჩი ელჩზე მოდიოდა ტფილისსა და თელავს ერეკლესთან რჩევა-დარიგების საკითხავად. დღევანდელის ლექსით რომ დავასურათოთ ეს აზრი, ასე უნდა ითქვას: მეფე ერეკლე კავკასიის საერთო, საზოგადო მედიატორობას ეწვეოდა. თუ არ ასეთი ბუნებრივი პირველობა ქართველის ერისა, შექმნილი კულტურის წყალობით, მაშ რითი აიხსნება თითო-ოროლა საოცარი ფაქტი წარსულისა? უსუსური ბავშვი, რაღაც 18-19 წლის ჰაბუკი ბატონიშვილი ლევან თვეობით თავს აფარებს თოვლიან-ყინულიან ოსეთს და მთელს ამ მხარეს ფეხზე აყენებს და აბრძოლებს რუსობის წინააღმდეგ. ან კიდევ ასეთი ამბავი. ყაბარდო გარემოცულია რუსის მხედრობით, აჯანყება აღვილი საქმე არ არის. ყაბარდოს თავადიშვილები წერილით ატყობინებენ სპარსეთში გადახვეწილს, ბატონიშვილ ალექსანდრეს:

ჩვენ, ყაბარდოელებს, სახლ-კარი მაგარსა და მიუვალ ადგილებში გვაქვს აშენებული. თვით უფალი იფარავს ჩვენს ბინასა. იალბუზის აქეთ მობინადრე მთიელნი კასპის ზღვამდე მაჰმადის რჯულისა ვართ. იმედი გვაქვს, ჩაჩნებსაც შემოვიერთებთ. - ბარათიდან ვსცანით თქვენი სურვილი. გნებავთ დაიპყრათ საქართველოს პროვინციანი და ადარბეიჯანი, რაიცა გეკუთვნით სამფლობელოდ მეფე ერეკლეს

შემდეგ¹⁾. დრო უკვე მოვიდა. ამის გამო თქვენის მოწოდების-
ამებრ ჩვენ მზადა ვართ ხელი შევეუწყოთ თქვენს განზრახვას.
ვიდრე ამ წერილის პასუხი მოგვივა, ჩვენ საერთოდ აქაურნი
მოსვენებას არ მივსცემთ თქვენს მტერსა და ღუშმანს და
იარაღით ყოველგვარ ზარალს მივაყენებთო.

არ დაგმალავთ, საპოლიტიკო სხეული საქართველოსი
შესამჩნევად გაიბზარა უკანასკნელ ჟამს, მაგრამ არც ისე,
როგორც მეცადინეობენ აჩვენონ ქვეყანას გენერალი
ქიმშიშევი და ეზოვი²⁾. დიახ, რუსების მოსვლის წინა დღეს,
საქართველოს ჯერ კიდევ ჰქონდა პოლიტიკური იერი და
მიმზიდველობა.

მერე და რა თვალთ შეხედა ახალმა მთავრობამ საქარ-
თველოს საპოლიტიკო სახელს და პრესტიჟსა, მის წარსულსა
და აწმყოსა? გამოიყენა მისი სახელი და მზა-მზარეული
სახელმწიფო მოწყობილობა, განადიდა და გააპატიოსნა საქარ-
თველოს ჭირნახულობა, თუ ზურგი შეაქცია და ეცადა არსე-
ბულის წესისა და რიგის დაქცევასა და დამზობას? ჩვენდა
საუბედუროდ, მთავრობამ უკანასკნელი გზა ამოირჩია. რუსის
მხედრობას ჯერ ფეხი არ შემოედგა სამუდამოდ დასამკვიდრე-
ბლად, ჯერ არ გაეთავებინა საბოლოოდ დიპლომატიური
მიწერ-მოწერა, თუ რა პირობით იღებდა ხელს მეფე გიორგი
მე-13 სამეფო პრეროგატივებზე, რომ პეტერბურგს საქართვე-
ლო გამოაცხადეს პროვინციად და გუბერნიად.

შემდეგი მოქმედება მთავრობისა შედეგია პირველის
ნაბიჯისა. რაკი საქართველო გუბერნიად გამოცხადდა, საჭირო
აღარ იყო თავის მტერევა და თავის ტეხა. რისთვის უნდა
გაეწყალებინათ გული და მიპყლოდნენ არსებულის წეს-
წყობილების კვლევა-ძიებას, შესწავლას და შეკეთებას, სადაც
საჭიროება მოითხოვდა? აკი არც შეიწუხეს თავი. აიღეს

1) რუსულად: следуемъ вамъ во владѣніе по смерти царя Ираклія Адербейджанъ и
Грузинскія провинціи. იხ. Акты... т. IV, გვ. 125.

2) იხ. Послѣдніе годы Грузинскаго царства პირველისა და Сношенія Петра
Великаго съ армянскимъ народомъ. — მეორისა.

მზა-მზარეული ფორმა რუსეთის გუბერნიის მართვა-გამგეობისა და გადმონერგეს ჩვენში. ნიადაგი ქვა-კლდისანი აღმოჩნდა და ვერ იხეირა უცხოეთიდან მოტანილმა კანონმა. ფორმა-კანონს მოჰყვა მთელი ჯელგა მოხელეებისა, რომელთაც არც ზნე და ხასიათი ერისა, არც წარსული და არც აწმყო ჩვენი არ იცოდნენ და სურვილიც არა ჰქონდათ შეესწავლათ და გაეგოთ რამე. ისედაც უხეირო კანონი გლახა და ანგარებით სავსე მოხელეთა ხელში სწორედ ღვთის რისხვად გარდაიქცა. მთელი საქართველო გაიძაბრა კაპიტან-ისპრავნიკებით, "ზემსკი სუდით", "ვოენნი პოსტოით", საინტენდანტო ვახტერებით, კამისიონერებით და სხვა და სხვა კლასის ჩინოვნიკებით. ჯერ დღევანდელი მოხელე ღმერთმა შეინახოს და ამ ასის წლის წინად რაც ბძანდებოდა, ნულარ იკითხავთ. მათი საქმენი საგმირონი და საარაკონი დაწვრილებით არის აწერილი მატთანეში.

მაშინდელს ქართველობას ჯერ თვალი რიგიანად არ მოეფშენიტა, საბოლოოდ ჯერ არ გამოეტირა "პატარა კახი" და მებრძოლი ბატონიშვილი, რომ ახლად მოვლენილი მოხელეობა კალიასავით მოედო ქვეყანას და მიჰყო ხელი მკვიდრის დაწიოკებას. ერი აიმრიზა და ამბოხების გზას დაადგა. საკმარისი იყო ხოლმე მცირე საბუთი, რომ აჯანყება გაეჩაღებინა. 1802 წ. კახელები რომ აჯანყდნენ, იმას გაიძახოდნენ, მოგვატყუეს, დაგვბირდნენ - მეფე იქნება და ბატონიშვილებსაც-კი არ აყენებენ აქაო. 1804 წ. მთიულეები გარკვევით ამბობდნენ - აღარ შეგვიძლიან მოხელეთა თვითნებობის ატანაო, ამდენს ცეცხლსა და ვარამს სიკვდილი გვირჩევნიაო და თოფს წაავლეს ხელი.

თუ რა ჯურის მოხელეობა ესეოდა საქართველოს, ან რა ზნეობისანი ბრძანდებოდნენ ეს ვაჟბატონები, დაწვრილებითა გვაქვს მოხსენებული ამ ათის წლის წინად დაწერილ წიგნში "მთიულეთი 1804 წ." და აქ აღარ შევუღლებით მათ ფიზიონომიის დასურათებას. ზნე და ხასიათი მათი არ გამოცვლილა 1812 წელსაც. მარკიზ პაულუჩჩისა და გენერალ ტორმასოვს თუ დავუჯერებთ, - ან კი რა ნება გვაქვს არ დავუჯეროთ, -

უფრო გათამამებულან და თავს წასულან. აი რა თვალით უყურებდა მარკიზი მაშინდელ მოხელეობას: უნამუსობა სუფევს აქაურ რუსის მოხელეთა შორის, ღმერთი ამათ არა სწამთ და ჭვარი; მრავალს დანაშაულობას ჰკადრულობენ და ამის გამო ქვეყანა აივსო უზომო და მეტის-მეტ ბოროტ-მოქმედებით. კახეთის მღელვარებას მარკიზი რევოლიუციას ეძახდა. ეს მოხელეთა მიწერ-მოწერაში არა ჩვეულებრივი ლექსი იმითი აიხსნება, რომ მარკიზი, როგორც იტალიელი, კარგად იცნობდა ამ ტერმინს. ეგება რუსული სიტყვა "ბუნტი" არც-კი იცოდა, ან თუ ეხამუშებოდა განვითარებულს ყურსა. იმავე უქვეშევრდომილეს მოხსენებაში 1812 წ. 22 მარტისა, საიდანაც ზემოდ მოყვანილი სიტყვებია აღებული, ასე ამკობს პაულუჩჩი საინტენდანტო მოხელეებს: სასურსათო უწყების მოხელენი ათასობით სჩადიან საზიზღრობასა და ლირფობას. მცირე ხანია, რაც ჯარის უფროსად ვარ და ჯერ ვერ გამოვა-აშკარავე ეს საზიზღარი საძაგლობა და ვერ შევაჩერე ბოროტება, თუმცა გაფაციცებით ვადევნებ თვალ-ყურსა. გენერალ თავად ციციშვილის სიკვდილის შემდეგ ხელს არ იღებენ მოხელენი ბოროტებაზე ქვეყნის დასალუჰად და ხაზინის საზარალოდა³⁾. მოგეხსენებათ, რომ თვით მრისხანე ციციშვილი ვერას გახდა და ვერ აღმოფხვრა მოხელეთა ბოროტ-მოქმედებანი და რაკი მათ უნამუსობას თავი ვერ აართვა, სასოწარკვეთილი აპირობდა სამსახურისთვის თავი დაენებებინა⁴⁾. მაღლიერი მაშინდელის ადმინისტრაციისა არც მთავარ-მართველი გენერალი ტორმასოვი ბრძანდებოდა. გენერალი სურამს ასულა და მოხელეები ვერ უპოვნია, მზად არაფერი ჰქონიათ, არც სურსათი, არც ბეგრის ურმები. განზრახვა მაქვს, - სწერს სურამიდან ტორმასოვი საქართველოს გამგებელს გენერალ-მაიორ ახვერდოვს, - ბოლო მოვულო მოხელეთა დაუდევნელობას, უთაურობასა და

3) დედანი: тысяча дьямльхъ подлостей чиновникъ ми провиантскаго вѣдомства...

4) იხილე "მთიულეთი", აქტები, ტ. II და "утверждение Рус. владычества"... т. II, გვ. 340.

უსაქმურობას, რადგან, როგორც ვატყობ, სათემო პოლიციაზე გარყვნილი და გაფუჭებული სხვა არა მეგულება-რაო. იმასაც ვფიქრობო, - ამბობს ტორმასოვი, რომ აქაურ პოლიციაზე ცუდი და უვარგისი მთელ ქვეყნიერობაზე არა მოიპოვება-რაო⁵⁾.

მთავარ-მართველი ემუქრებოდა ახვერდოვს, ხელმწიფესთან დაგაბეზლებ, თუ არ ეცადე და სათემო პოლიცია არ გააუკეთესეო. მაგრამ კუზიანს მარტო სამარე ასწორებს, ბრძანება და დატუქსვა არა სჭრიდა და გათახსირებული მოხელეობა თამამად განაგრძობდა ხალხის დაწიოკებას. ეს ასეც უნდა ყოფილიყო, რადგან მარტო ოხერი და ტიალი მოდიოდა ჩვენს ქვეყანაში. რიგიანი, მადლიანი კაცი არ ეტანებოდა ცხრა მთას იქით გადაკარგულს საქართველოს. აქ წამოსულს დიდი უპირატესობა ჰქონდა სამსახურში, მაგრამ შინც პატიოსანი მოხელე ვერა ჰბედავდა გადალუპულიყო რალაც ჯანდაბა "გრუზია"-ში. "ესაა მიზეზიო, - ამბობს საგენერალო შტაბის კაპიტანი ნ. ს. ანოსოვი, - რომ კავკასიაში მოდიოდნენ მომეტებულ ნაწილად ისინი, ვინც ცხოვრებას გაერიყა, ვისაც აღარ ედგომილებოდა შუაგულ რუსეთში, საექვო ზნეობისანი, ხარბნი და გაუმაძღარნი, ვერცხლის მოყვარენი და ანგარებით სავსენი, შებლალულის სახელისა და რეპუტაციისა. ხალხით მოდიოდნენ ესენი კავკასიაში იმ იმედით, რომ დავიკმაყოფილებთ ქვენა გრძნობათა და ალლოსა ამ მოუწყობელ ქვეყანაში, საიდანაც "ღმერთი ძალიან მალა იმყოფებოდა და მეფე მიუწოდმელს სიშორებზე"⁶⁾.

თურმე ნუ იტყვით, ეს შესანიშნავი ანდაზა, მაჩვენებელი იმისი, რომ სამართლის კარს ვერ მიაგნებ, რადგან მოსამართლენი, ღმერთი და მეფე შორს არიანო, - ჩვენის კურთხეულის სამშობლოს ნიადაგზე აღმოცენებულა. დედა-აზრი ანდაზისა ჩასახულა პირველად ქიზიყში, ს. ბოლბისხევში.

5) იხ. Акти, т.IV, გვ.47; утв., П.340. დედაზნი: не шахожу шичего распутить земской полициѣ и которой хуже, я думаю, нигдѣ нѣтъ.

6) იხ. Утв... ტ.II, გვ.341.

სიღნაღის მოურავს თ. იოსებ ანდრონიკაშვილს შესჩივლეს ბოდბისხეველებმა და მოახსენეს, რომ სამართალი გაწყდა ჩვენთვისაო. სასამართლოში საჩივლელად რომ მივდივართ, კარები გამოკეტილია ხოლმეო. მივედით საჩივლელად ამის გამო კაპიტან-ისპრავნიკთან და კახეთის ოლქის უფროსთან გენერალ პორტნიაგინთან და ასე გვითხრეს: რო სჩივით, რასა სჩივით? "სამართალს ვინ გაგიჩენთ? ღმერთი და მეფე შორს არიანო"7). დასრულებული ფორმა მიუღია ანდაზას თ. ალექსანდრე გარსევანის ძე ჭავჭავაძის წერილში. სახელოვანს პოეტს ცალკე წერილით მოუხსენებია 1837 წ. იმპერატორ ნიკოლოზისთვის, რომ როცა შეწუხებული და ილაჯაწყვეტილი ხალხი მიჰმართავდა რუსის მთავრობის დაბალხარისხოვან მოხელეს და ეტყოდა, - ნუ გვაწუხებთ, ან ღმერთი, ან მეფე მოიგონეთო, თურმე მოხელენი ასე უპასუხებდნენ: გასწით, წაეთრიეთ, რას დაგვაკლებთ: "И до Бога высоко, и до Царя далеко"8).

"მოხელენიო, - გვიამბობს კაპიტანი ანოსოვი, თავიანთ თავს ისე უყურებდნენ, როგორც ქართველების "კეთილისმყოფელთ", "გამაბედნიერებელთ" და "მხსნელთა". ამის გამო რიდი და ხათრი არა ჰქონდათ, არ ერიდებოდნენ ადგილობრივ მკვიდრსა და ჰფიქრობდნენ, რომ "ტუხემცები" უნდა გაიმსჭვალნენ მაღლიერობის გრძნობით და სიტყვის შემოუბრუნებლად და ფეხის გაუნძრევლად აასრულონ მათი ჟინი, ახირება და გულის თქმა, თუნდ რომ ნამეტანი და წრეს გადასული იყვეს ჟინიანობა და გულის თქმა. მოქრთამეობას და ფულის უკანონო მობოჰქვას საზღვარი არა ჰქონდა. ქრთამის აღებაში ყოველი რიდი და თავაზიანობა მოისპოვო".

7) იხ. Акты, т. IV, გვ.62. რუსულად: кто может доставить вамъ судъ? Богъ далеко и Государь.

8) კაპიტან ანოსოვის აზრით, ამას დაბალ ხარისხის მოხელენი ამბობდნენო. თუ გენერალი პორტნიაგინი დაბალია, მაშ მაღალი ვიღაა? ყველაზე მაღალი მართებელთან ვერ გაიქცეოდა საჩივლელად.

ასე სასტიკად და უღმობელად ამკობს თანამედროვე რუსის მწერალი მაშინდელს მოხელეობას. კარგი რამ მჭირდეს გიკვირდეს, ავი რა საკვირველია, ამას თუ დავუმატებთ ჩვენა. - უცნაური არსებაა მოხელე. შეიძლება ფერი და ხორცი იცვალოს, მაგრამ სული და არსება უცვლელია. თითქოს ხანი და ჟამი, თითქოს ცივილიზაცია და კულტურა არ არსებობს მისთვის. ზოგიერთი გუშინდელი ამბავი სწორედ ასლია მაშინდელისა. ერთის სასწავლებლის უფროსს, რომელსაც, დარწმუნებული ვარ, არც აქტები წაუკითხავს და არც რუსთა მფლობელობის დამკვიდრების ისტორია, ბავშვებისთვის მიუმართავს, რას იპრანჭებით და იგრიხებით, ჩვენი "მადლობელი" და "მადლიერნი" უნდა იყვნეთ, თორემ ოსმალთა და ყიზილბაშთა ჰარამხანებში ამოგზდებოდათ სულიო. ვინ იცის, ეგება ჰარამხანაში ყოფნა კიდევ სჯობდეს დამყაყებულ, დაობებულ გულიდან გესლიანისა და შხამიანის ამონასუნთქის ყნოსვასა.

ძველის საქართველოს წეს-წყობილება უფრო ფეოდალურ-არისტოკრატიული იყო. მართვა-გამგეობა და ლაშქარი თავადობას ეკითხებოდა. მღვდელ-მთავარნი, მდივან-ბეგნი, მსაჯულნი, მოურავნი და სარდალნი მომეტებულად დიდის გვარისანი იყვნენ. ხალხიც მიჩვეული იყო თვითოეულს გვარსა. თიანელები, ფშავ-ხევსურნი ისე შეეჩვივნენ ჩოლოყაანთ გვარის მოურავობას, რომ სხვა გვარის კაცის დანახვა თვალითაც არ უნდოდათ. პოდპოლკოვნიკ ივანე ჩოლოყაშვილის სიკვდილის შემდეგ, ადათისა და ჩვეულების ძალით, მოურავობა ეკუთვნოდა ბატონიშვილის რიფსიმე გიორგის ასულის შვილებს, ზურაბსა და ალექსანდრე ჩოლოყაშვილებს. რადგან მცირე წლოვანი ზურაბ და ალექსანდრე პაჟთა კორპუსში სწავლობდნენ, მათი მოურავობა არ იქნებოდა. მარკიზ პაულუჩჩის სურდა ჩოლოყაანთ გვარი, ვითარცა მოღალატენი, მოეშორებინა თავიდან და თიანეთის სამოურავო ჩაებარებინა რუსეთის სხვა მომხრე და ერთგულ გვარისათვის.

შემდეგ ზურაბ ჩოლოყაშვილი სრული წლოვანი რომ შეიქნებოდა, მაინც მოურავობას ვერ მიიღებდა, რადგან სამოურავოს მაგიერ, რიფსიმეს თხოვნით, შვილებს სათითაოდ წლიურად 500 მ. პენსია დაუნიშნა მთავრობამ და ზურაბი თუ მოურავობას მოითხოვდა, ეტყოდნენ, - რალა გინდა, პენსიას იღებ და შენს ქერქში იყავიო. ასე ჰფიქრობდა და ბჭობდა მარკიზი, მაგრამ თიანელები და ფშავ-ხევსურნი სხვა თვალით უცქეროდნენ თავიანთს უფლებას.

სამოურავოდ მარკიზმა აარჩია თავადი მაყაშვილი, დაჯილდოვებული კოლლეჟსკი სოვეტნიკის ჩინით. მაყაშვილი ჟამთა მეფობისა სახლთ-ხუცესობდა და, მარკიზის აზრით, კახელობა დიდ პატივსა სცემდა. რუსის მთავრობისა და სამსახურისაც ერთგული ყოფილა⁹⁾.

უშველებელი აურზაური ასტეხეს თიანელებმა - არ გვინდა მაყაშვილი, 500 წელიწადზე მეტია, რაც ჩოლოყაანი გემოურავობენ და სხვას როგორ გავაჭაჭანებთ ჩვენშიო. მაყაშვილმა მარკიზზე უკედ იცოდა თვისთა თანამემამულეთა ზნე-ხასიათი და ხელი აიღო თიანეთ-ფშავ-ხევსურეთის მოურავობაზე. ასე გასინჯეთ, ისიც-კი ვერ გაჰბედა, რომ თვალით მაინც სჩვენებოდა თიანელებს. მთავარ-მართებელმა რტიშჩევმა თიანელებს მოურავად დაუდგინა თხოვნისამებრ თ. გრიგოლ ჩოლოყაშვილი¹⁰⁾. თიანელებმა თავისი გაიტანეს და მოურავად ჩოლოყაშვილი იშოვნეს. თუ ქართველთა ერის თემები ასე შეეჩვია და ერთგულობდა სათითაო გვარსა, ახლა იფიქრეთ, რა გუნებაზე იქნებოდა მაშინდელი დიდკაცობა, მიჩვეული მართვა-გამგეობას, წვრილ-ფეხა მოხელეთა ყოყლოჩინობას რომ დაინახავდა? ფეოდალურ ქვეყანაში რუსის მთავრობამ გააბატონა ბიუროკრატიული სისტემა მართვა-გამგეობისა. ეს კი ისეთი წესია, რომელიც უკარგავს ფასსა

9) იხ. АКТЫ, т. V, гл. 106-108.

10) რტიშჩევი ზურაბს ზაქარიად იხსენიებს. АКТЫ, т. V, гл. 527-528, Утв. Г. II, гл. 384-385.

და იერს გვაროვნებას და შთამომავლობას¹¹⁾. ხშირად პატარა, უთვისტომო მოხელე, დიაკვნისა, ან ნასაღდათარის შვილი, ნელ-ნელა მიცოცავს საიერარქიო კიბეზე და ბოლოს, დაჯილდოვებული ჩინ-ორდენებით, იბერება და იფხვირება ინდოურსავით. ამისთანა ბიუროკრატს ცა ქულად არ მიაჩნია და დედა-მიწა ქალამნად.

II

სასურსათო უწყების მოხელეთა მოქმედებამ ყველაფერი დაავიწყებინა კახელობას. ვიღას ახსოვდა ყოყლოჩინა კოლლეჟსკი რეგისტრატორი, ან ფუყი სტატსკი სოვეტნიკი, ინდოურსავით გაბერილ-გაფხვერილი? ეს პატივცემული მოღვაწენი სავსებით დაჩრდილა საინტენდანტოს მოხელემ. იგინიო, ამბობს კაპიტანი ანოსოვი, სწორედ ღვთის რისხვად გარდაიქცენენ ერისათვის. აქ, საქართველოში, გამოიჩინეს იგივე ბრწყინვალე ღირსება - ქველობა და მამულიშვილობა, რისთვისაც იმპერატორმა ალექსანდრე პირველმა ნაპოლეონთან ლაშქრობის გათაგების შემდეგ აპხადა პატივი და აუკრძალა ეტარებინათ აფიკრის ეპოლეტები. მათს უნამუსობა, ყაჩაღობა-ლირფობას არავითარი საზღვარი არა ჰქონდა, საკუთარ ჯიბის გასასქელებლად და უზომო მადის დასაკმაყოფილებლად არაფერსა ზოგავდნენ ეს მართლა რომ თავლათ დასხმული მოხელენი. ატყუებდნენ ხალხს წონა-ზომაში, იღებდნენ ქრთამს, აორკეცებდნენ გაწერილ ხარჯსა, არიგებდნენ მოხერხებულ კვიტანციებს, არა თაკილობდნენ "პადლოგების" ჩადენას, ოლონდ-კი ამოეყორათ უძირო და მსუნაგი მუცელი.

სწორედ აღდგომა უთენდებოდათ კამისარ-ვახტერებს, სურსათის შემზადებას რომ შეუდგებოდნენ ხოლმე ჯარისათვის. სათემო პოლიციასთან ერთად მოედებოდნენ სოფლებს

11) სიტყვა "ბიუროკრატია" ბ-ნ ანოსოვს აქვს ნახმარი, იხ. УТБ... ტ. II, გვ. 338.

კალისავეით და სულ ბღღვირს ადენდნენ ქვეყანას. მიტროპოლიტი ბოდბელი იოანნე მოახსენებს მარკიზ პაულუჩჩის: დიდია იწროება ერისა. მთავრობის მიერ გამოცხადებული ფასი პურისა უსამართლო და შეუფერებელი იყო, მაგრამ ამასაც არ იძლეოდნენო. მანათის საღირსალში ათი შაური არ მოსდიოდა ხორბლის მომტანსა. ეს კიდეც არაფერი, მთავრობა რომ მანათში იწონავდა პურსა, იგივე საწყაო ბაზარში 4-5 მანათად ფასობდა.¹²⁾

ტანჯვა-ვაება განა ამით თავდებოდა? ვსთქვათ მეურმემ მოიტანა ხორბალი მალაზიაში ჩასაბარებლად. ორი-სამი კვირა აჩერებდნენ, არ იღებდნენ მოტანილ პურსა, ვიდრე ქრთამს არ გაიღებდნენ. სასურსათო მალაზიები ივსებოდა პურით უფრო შემოდგომა-ზამთრობით. იღგნენ საცოდავი მეურმენი გულ-ხელ დაკრეფილნი თოვლსა და ჭყაპში, იტანჯებოდნენ თვითონ და ეხოცებოდნათ საქონელი შიმშილითა და სიცივი-თაო.¹³⁾

გენერალი ტორმასოვი რომ გამოეთხოვა საქართველოს, ჯარი მარკიზს ჩააბარა, თან ისიც შეატყობინა ახალს მთავარმართებელს, რომ სურსათისთვის ზრუნვა საჭირო აღარაა, რადგან ხორბალი ნაყილია და საწყობები სავსეაო. მართლაც, ტორმასოვს უკვე გაეგზავნა კომისიონერებისთვის სურსათისთვის გადაღებული ფული, კამისიონერები-კი ჩვეულებრივის ოინბაზობით მოქცეულან, დაერიგებინათ ხალხისათვის ბეები და მოახსენეს მთავრობას, - პური ნაყილია და მოზიდულიო.¹⁴⁾ ასე რომ ტორმასოვს ჰქონდა საფუძველი ეთქვა მარკიზისათვის, არხეინად ბრძანდებოდეთ, სასურსათო

12) იხ. АКТЫ, ტ. V, გვ. 82 უთვ. გვ. 343.

13) Ibid გვ. 66. რუსთველ არქივისკოპოზ სტეფანეს მოხსენება. ამ მოხსენებას კიდეულაუბრუნდებით.

14) დედანი: "съ свойственнамъ имъ проширствомъ". უთვ... ტ. II, გვ. 347.

მალაზიები სავსეა პურითაო, ნამდვილად კი შიგ არა ეყარა-რა და თავეები დაფხაკუნებდნენ. იქნება სხვა დროს ამ ხრიკს გაეჭრა, მაგრამ მაგარი ის იყო, რომ 1811 წელს საშინელი შიმშილობა ჩამოვარდა კახეთში.¹⁵⁾ მოსავალი არ მოვიდა და ალექსანდრე ჭავჭავაძის სიტყვით, ერი ტყეებში დაძრწოდა და ბალახ-ბულახით ირჩენდა თავსა.

მემატიანე ბატონიშვილი დავით ასე აგვიწერს ამ ხანას: "წელსა ამას 1812, ქ-ნს ფ, იქმნა ფრიად სიყმილი საქართველოსა შინა და იმერეთსაცა და ჰირიცა ფრიად განგრძელებულიყო, რომელიცა ტორმასოვმან შთამოიტანა ახალციხით, და ოდეს არღარა აქვდათ პური მცხოვრებთა და ვერ ძალიდვეს მოსყიდვად, ნაცვლად პურისა ევედრებოდნენ მცხოვრებნი, რათა მიიღონ დედაწულნი მათნი. მაშინ ტირანმან მარკიზმან ჩაუყენა ყოველსა სოფელსა ეკზეკუცია (ესე იგი იასაულად სალდათნი) და იყო ჰირვებაი და ვალალებაი ერთა ზედან".

შიმშილ-სიყმილის წყალობით პურის ფასმა მეტისმეტად აიწია, ერთი სამად და ხუთად სჭარბობდა თურქმე მთავრობის მიერ გამოცხადებულ ფასსა. ზოგან ისეთი ნაკლებობა იყო პურისა, რომ ბაჯალო ოქრო დაგეთვალათ, პურს მაინც ვერ იშოვნდით სასყიდლად. აბა თუ ერი ბალახ-ბულახით იკვებებოდა და პურის მაგიერ შვილებს იმეტებდა, ადვილად წარმოიღვენს ადამიანი, რა ცეცხლის ალი და გენია დატრიალებულა კახეთში 1812 წელსა.

მოულოდნელად დიდ გაჭირვებაში ჩაცვინდნენ კამისიონერები. მთავრობას თავის დროზე მოახსენეს, პური ნაყილია და ფასიც მიცემული გვაქვსო, რა ქნან ახლა, როგორ დააძვირინონ თავი ამ ხათაბალას? დაფაცურდა გაიძვერა და გაქნილი მოხელეობა და აი რა ხრიკი გამოიგონა. "ჩვეულებრივის სითამამით, მოახსენებს ალექსანდრე ჭავჭავაძე იმპერატორ ნიკოლოზს, კამისიონერებმა შეატყობინეს

15) ბატონიშვილი დავით ამბობს, რომ შიმშილობა 1812 წ. იყოო, ანოსოვი-კი 1811 წელსაო. იხ. შასალები საქართველოს ისტორიისა შეკრებილი ბატონიშვილის დავით გიორგის ძისა და შის ძმებისა. რედაქცია მ.გ. ჭანაშვილისა.

მთავარ-მართებელს, პური დიდი ხანია ნაყიდი გვექონდა თავის დროზე, ფასიც სავსებით ჩავებარეთ, მაგრამ ხალხს არა ჰსურს მოზიდოს მაღაზიებში, რადგან ანგარებით გამსჭვალულ-შეპყრობილია და სცდილობს ბაზრის ფასები გადაგვახდევინოსო".¹⁶⁾

ფრიად საყურადღებოა გავიგოთ და შევიტყოთ, თუ რა თვალით უყურებს ასის წლის წინად მოპარპაშე მოხელეთა ნავარდობას დღევანდელი ოფიციალური ისტორიკოსი ბ-ნი ნ. ს. ანოსოვი. იმდენად გულსახშიეროა ანოსოვის ნათქვამი, რომ ვერა ვბედავთ მცირედი რამ ცვლილება შევიტანოთ და სავსებით გადმოვიღებთ მის აზრსა და მსჯელობას.¹⁷⁾ "ექვი არაა, ბოლო რომ მოღებოდა ჯარისათვის სურსათის სყიდვის გამო ატეხილ დავიდარაბასა და აურზაურს, ერთად-ერთი საღსარი ეს იყო, მთავრობას ფასები უნდა აეწია და გაეთანა-სწორებინა ბაზრის ფასისათვის. მაგრამ, როგორც ყოველთვის და ყველგან არის, აქაც გამოჩნდნენ იმისთანანი, რომელთაც მოისურვეს დაემტკიცებინათ უმაღლეს მთავრობისათვის საკუთარი ერთგულება და დაუწყეს მთავრობას ჩიჩინი, ტყუილია, ვითომც საქართველოს პური აკლდეს, ქვეყანა ქადა-ნაზუქის სუნითაა დაბნედილი, ხოლო ჩვენის გაჭირვების მიზეზი სურსათის ნაკლებობის გამო იმის ბრალია, რომ ქართველობა უმადურია და გამსჭვალული ბოროტ-განზრახვით. ცხადია, ამა და ამ გვარის ჩურჩულის წყალობით შეითვისა მარკიზ ზაულუჩიჩიმ უცნაური აზრი, - თუ კი მეფე ერეკლესა და გიორგის დროს ქართველები უსასყიდლოდ ასაზრდოვებდნენ ჩვენ ჯარებსა, მაშ ეხლა რა ნაირად გაუჭი-

16) ქვეყანის სიტყვები ანოსოვსა აქვს მოყვანილი და შეუცვლელად ამოვიღეთ. უმ... ტ. II, გვ. 348.

17) Ibid გვ. 348-349.

რღებთ გვაძლიონ პური თუნდ ნახევარ ფასში. სჩანს არ აუწონია მარკისა არც ქვეყნის ვითარება და არც ის გაუთვალისწინებია, რომ მეფეთა ჟამს მცირე მხედრობა გვეყენა საქართველოში.¹⁸⁾ მოულოდნელი დასკვნა მარკიზისა იყო მიზეზი, რომ მთავრობა კოდ პურში (2 ფუთი და 10 გირვანქა) ექვს აბაზს აძლევდა ძველებურად ქართველებს, ესენი-კი იმავე კოდ პურსს ვაივაგლახით მოულოდნენ ოთხ-ხუთ მანეთად ბაზარში. ამ ჟამად სურსათის შოვნის ჩვეულებრივ წესსა - რეკვიზიციას¹⁹⁾ სასურველი ნაყოფი აღარ მოჰქონდა. ამის გამო რეკვიზიციაზე გასულ კამისიონერების შესაშველებლად იგზავნებოდა სამხედრო კამანდები. საბაბად ჯარების გაგზავნისა იმას ამბობდნენ, რომ ხაზინის ფულსა და დოვლათს პატრონობა - გაფრთხილება ეჭირვებაო. ნამდვილი საბაბი კი ისა ყოფილა, რომ გულ მოსული და გაბრაზებული მცირე ფასებით მკვიდრი ნებაყოფლობით არ უთმობდა პურსა კამისიონერებს, რაც ძალი და ღონე ჰქონდა, იცავდა საზრდოს და ვიდრე როზგს არ უცხუნებდნენ, ზორბალს არ იმეტებდა. მაგრამ მომეტებულ ნაწილად ვერც რეკვიზიცია შველოდა საქმეს, რადგან შეუძლებელია გამობერტყო თუნდ ერთი მარცვალი გლეხისაგან, როდესაც თვითონ იკვებება ბალახითა და მცენარეთა ფესვებით”.

“ამისთანა გარემოებაშიო, - ბრძანებს ბ-ნი ანოსოვი, - უმალღესი ადმინისტრაცია მოვალეა სიფრთხილით მოიქცეს, არ აპყვეს გულის თქმასა და ცხრაჯერ გაზომოს, ვიდრე გამოსჭრისო. სიფრთხილისა და მოფიქრების მაგიერ, ატყდა თუ არა აურზაური სურსათის შოვნის გამო, საქართველოს

18) მაშინ სულ რაღაც ორი ბატალიონი იდგა საქართველოში. მეფე გიორგი ისე გულუბრობდა, რომ რუსის სალდათებს კახურ ღვინოს და ზურგიელ-ღოს უგზავნიდა პირის ჩასაგემორივლებლად. გრაფ ტოტლებენმა ჩამოიყვანა 5000 კაცამდე, მაგრამ ვერც ეს რაოდენობა შეეღრება მარკიზის ღრთის მხედრობის რიცხესა—28,000-ს.

19) რეკვიზიცია—ძალდატანებით შეძენა და აღება ჯარისათვის საჭირო სურსათისა ლაშქრის მოქმედების რაიონში (ლექს. ბროკჰაუზისა, ტ. 65, გვ. 525) აბა კაი გუნებაზე რად იქნებოდა ქართველობა, თუ ანოსოვის მოწმობის თანახმად რეკვიზიციის წესით აგროვებდნენ სურსათსა ახალის მთავრობის ჩამოხიზნების დღიდან. ძალიან ქართულით რეკვიზიცია დარბევია.

გამგებლის თანამდებობის აღმასრულებელმა გენერალ-მაიორ სტალმა მოახსენა მარკიზ პაულუჩჩის: სიღნაღის მაზრის მცხოვრებნი თანახმანი არიან მარტო 10,000 კოდი მოზიდონ მალაზიებში. თან იმ პირობასაც გვიღებენ, რომ ერთი მესამედი ქერი ავიღოთ. ბევრი უჩიჩინა გაჭიუტებულ სიღნაღის მცხოვრებლებს მიტროპოლიტმა იოანე ბოდბელმა, მოურავმა თ. ი. ანდრონიკაშვილმა და ამავე მაზრის კაპიტან-ისპრავნიკმა სოროკინმა, ნუ ჯიუტობთ და მოგვიტანეთ თქვენზედ შეწერილი 40,000 კოდიო, მაგრამ ვერა შევასმინეთ რა. გენერალ სტალის აზრით, ეს ცარიელი ჯიუტობა იყო, სხვა არაფერი. სულ იმ თავადების ბრალია, ჩვენ რომ კეთილის თვალთ არ გვიყურებენ, ეგენი რომ არ აქეზებდნენ, სიღნაღელები ამას როგორ გაბედავენო და სთხოვა მთავარ-მართებელს, - ნება მომეცი ხალხს ეკზექუცია ჩავუყენო და ძალით წავართვა პური, რა კი ნებაყოფლობით არ იძლევიანო. ეკზექუცია ჭკუას ასწავლის ხალხსა და აგრძობინებს რუსის მართვა-გამგეობის ძალასა და სუსხსა, აალებინებს ხელს თვითნებობაზე, რომელმაც თავი იჩინა მას შემდეგ, რაც სამი პოლკი ჯარი გამოვიყვანეთ სიღნაღის მაზრიდან. უჩიუტობის გაძლიერებას ხელს უწყობს ბლომად მოფენილი ამრევი და ამაშფოთებელი წერილები ლტოლვილ ბატონიშვილის ალექსანდრესიო.

სრულიად, მართალია ბ-ნი ანოსოვი. დიდი სიფრთხილე, კეთილგონიერება და წინდახედულებაა საჭირო უმაღლესის ადმინისტრაციის წარმომადგენელისათვის. ამ მშვენიერ სიტყვებს იმას მიუმატებთ, რომ ნაკლებ საჭირო არაა სიყვარული იმ ერისა, რომლის გამგეობა და ბატონობა ბედმა გარგუნა. თუ ამ ღვთიური ცეცხლით არაა ადამიანის ბუნება გამსჭვალული, თუ შენს გამგეობაში მყოფი ერი შენიანად არ მიგაჩნია, თუ მისი დარდი და ვარამი არ გაკვენესებს და მისი სიხარული არ გახარებს და არ გაცინებს, ტყუილია კეთილგონიერებაც, სიფრთხილაც და წინდახედულობაც. იქნება "პაღლოგები" არ ჩაიღინო, იქნება სისხლის წყარონი არ ააჩუხჩუხო, ან შეიძლება მათრახისა და კნუტის ჟაპა-ჟუპით

მთა და ველი არ ააყივლო, მაგრამ მაინც ამისთანა გამგე-მმართველის გარჯა-სარისტიანობა ერის გულს არ ჩასწვდება. იგი ერისათვის დარჩება ყინულის სვეტად.

მარკიზი გაება მახეში. გენერალმა სტალმა დიდის მოხერხებით დაუგო მთავარ-მართველს კაკანათი, ცილი დასწამა ქართველობას, მსუნაგ ვახტერ-კამისიონერებს სასუსნავი გაუჩინა, ხოლო წამებულს ერს ჭიაკოკონას უმზადებდა - მარკიზმა ბრძანება გამოიღო - კახეთში ეგზეკუციასა ენიშნავო.

გენერალ სტალმა ზემოდ აღნიშნული მოხსენება მიართვა მარკიზს 1811 წლის აგვისტოს თვეში, მაშასადამე, სამხედრო კამანდები შეუდგებოდნენ საქმეს ესე სექტემბრის გასულს, ან ოქტომბრის დასაწყისში.²⁰⁾

მეცხრამეტე საუკუნის ევროპამ არ იცოდა ეგზეკუცია. ეს "ინსტიტუტი" ჩვენებური, აზიურია. რუსეთში თათრებმა შემოიტანეს და მას აქეთია დღესაც არ ამოვარდნილა. მარკიზი ევროპიელი იყო და როგორ იკადრა ეგზეკუციის მოხმარება, არ გვესმის. ალბად, ქართულმა ანდაზამ თუ იმოქმედა კეთილშობილ მარკიზზე - სადაც მიხვიდე, იქაური ქული დაიხურეთ.

ძველმა საქართველომ არ იცოდა, რა ხილი იყო ეგზეკუცია. რასაკვირველია, ჩვენშიაც მოიპოვებოდა დარბევა-დაწიოკება, აკლება სოფლისა, მაგრამ ყველა ამ საძაგლობას წუთიერი ხასიათი ჰქონდა. სისტემატიური დარბევა და აკლება სოფლისა, წინაღვე განზრახული და გათვალისწინებული, ჩვენმა ისტორიამ არ იცოდა.

რუსეთში მყოფ ბატონიშვილ დავითისათვის დიდად მოუკლავს გული მარკიზის განკარგულებას ეგზეკუციის ჩაყენების გამო კახეთში. მემატიანეს გულში ლახვარივით მოხვედრია სამშობლოდან მოსული სამწუხარო ამბავი. სევდა-ვაებითაა შეზავებული კილო ბატონიშვილისა, როცა ამ მართლა რომ სავალალო ამბავს მოიხსენიებს. აი თვით

20) სტალის რაპორტი ხელმოწერილია 25 აგვისტოს.

მემატიანეს სიტყვანი: "წელსა ამასვე 1811, ქ-კს უჟთ, გამოჰსცვალეს ტორმასოვი და წარგზავნეს მარკიზი პაულიჩი, იტალიელი, ღიანარალ-ლეიტენანტი, აგვისტოში; კაცი ელამი რაგვართაც თვალითა, ეგრეთვე სულითაცა და მოქმედებითა. მაშინ იყო შემქირვებაი დიდი ქართველთა ზედან მარკიზისაგან, ესრეთ: ართმევდიან ხშირად ურემთა და ხართა სახმარად მხედრობისა, რომელ კნინლა²¹⁾ დაჰშთათ ხარი სოფელთა შინა. ეგრეთვე სადაც განვლიდიან რუსნი, ამქირვებდიან სოფლებთა ცემითა, ტაცებითა და რთმევითა, თვინიერ თეთრისა, და იყო ესრეთცა სიყმილი, რომელ კოდი პური იყო ექვს მონანთულადა თეთრს ფულად. მაშინ მარკიზმან უბრძანა წარსულისა ორისა წლისა პურისა მოკრეფაი სურსათისა კახთაგან, ვინაი-დგან სიმკროისა გამო მოსავლისა ვერ ძალ ეღვათ მიცემაი, და ბრძანა ყოველსავე სოფელსა ეგზეკუციისა ჩაყენებაი (ესე იგი იასაულთა), - ორასისა და სამასისა თითო სოფელთა, და სადაც მივიდოდიან, იყო ვაებაი მათ ზედან მით, რამეთუ ჰსცემდიან დედა-კაცთაცა, და ხელითა ჰკიდებდიან და ართმევდიან პურთა ძალითა. თუმცადა კახნი ევედრებოდიან, რომელ მიიღონ ნაცვლად პურისა ექვსი მინანთული კოდში და რომელთაც არა აქვდათ თეთრი, მაშინ ძე და ასულთა თვისთა აძლევდიან, გარნა უქმ იყვის ვედრებაი მათი, და იყო ვალალებაი ერთა შორის. გარნა სხვათაცა ბოროტმოქმედებათა შორის ესეცა ჰქმნეს, რომელ თიანეთს მთვრალთა აფიცართა შეიპყრეს დედა-კაცი და საშოსა შინა შთაასხნეს ძაბრითა ღვინო. ვერლარა მოითმინეს თიანელთა ესე ვითარი სირცხვილი, და იქმნა შფოთი ქართველთა და რუსთა შორის. ხოლო პირველად მისცეს მიზეზი შფოთისა რუსთა, მით, რამეთუ

21) ძალიან ცოტა.

დაკოდეს თიანეთს ამბოხსა ამას თიანელნი რამოდენიმე. იხილეს რა ესე თიანელთა, მოსწყვიტნეს ყოველნივე რუსნი, ვიდრე ას-ორმოც-და-ათამდე და მუნით შთავიდნენ მატანსა."22)

სამწუხაროდაო, ამბობს იგივე ისტორიკოსი ანოსოვი, ჩვენ ბრწყინვალე და ქველობით განთქმულს ჯარსა, ჩამოსვლისთანავე საქართველოში, ვილასიც უპატრონობითა და უყურადღებობით მავნე სული აეკვიატა და სახელს უტეხავდაო. ურთიერთობა მკვიდრისა და მხედრობის შორის უმზგავს ნიადაგზე დამყარდა.²³⁾ მართლაც ისეთი განწყობილება ჩამოვარდა ქართველობასა და რუსის მხედრობის შუა, რომ გეგონებოდა, ჯარი საქართველოს საპატრონოდ კი არა, ასაკლებადაა მოსულიო. არც სალდათი, არც აფიცური ქართველს არ ინდობდა და სადაც-კი შესაძლებელი, ან მოხერხებული იყო, თავში უბრაგუნებდა, მასხარად იგდებდა, დოვლათსა სტაცებდა და გარყვნილების მორევში აბანავებდა. ჯერ ისევ გენერალი ლაზარევი²⁴⁾ სჩიოდა 1802 წელსა და ღონეს ღონობდა, ეგები როგორმე მოვაშლევინო ჯარს მკვიდრის დაწიოკება-განადგურებაო. აფიცრები, მარტოოდენ ჟინიანობით გატაცებულნი, თხოულობენ საბეგრო ცხენებსა და ურმებს, შაურს არ აძლევენ პატრონებს და ამით ოჯახს უღუპავენო; სალდათები პირადად შეურაცხყოფას აყენებენ მცხოვრებლებს, სტაცებენ საქონელს, ფრინველსა და ხილსა: ანადგურებენ ბოსტან-ბაღჩებსა, ვენახებს; ღვინოს რომ დალ-

22) იხ. მასალები საქართველოს ისტორიისათვის, შეკრებილი ბატონიშვილის დავით გიორგის ძისა და მის ძმებისა. 1744-1840 წ.წ. რედაქცია მ. გ. ჯანაშვილისა, ეურნალ "მოამბის" პრემია. გვ. 99-100. წინააღმდეგ ბატონიშვილ დავითის მოწმობისა, აქტებში შეკრებილი მასალა ნათლად გვიჩვენებს, რომ პირველად შეუტრეს რუსობას ს. ახმეტას, 31 იანვარს 1812 წ., და არა თიანელებმა, მაგრამ ეს წერიმალნი შეცდომა ვერ გააბათილებს თანამედროვე მოწმობის უაღრეს მნიშვნელობას.

23) იხ. утврждениі... ტ. II, გვ. 349.

24) მარიამ დედოფალმა რომ გაკვირია ხანჯლით. ეს ამბავი "მთიულეთშია" ნაჩვენები.

ევენ და გაილეშებიან, ქვევრებს მიწითა სჩურთავენ, იქამდინ მიდის მათი უგუნურობა, ავ-ზნიანობა, სიცელქე და გიჟმაყო-ბაო.²⁵⁾

უფრო მკაცრად და სასტიკად იხსენიებს დისციპლინას მოწყვეტილ სალდათის თვითნებობას პოეტი ალექსანდრე ჭავჭავაძე: "ზოგიერთა პოლკები, - ამბობს ჭავჭავაძე, - თავად ციციშვილის სიკვდილის შემდეგ, იმისთანა სასტიკს თვითნებობასა და თავხედობას იჩენდნენ, რომ სრულიად გაანადგურეს და მოაოხრეს სოფლები, სადაც ბინასა სდებდნენ. განა მარტო ის სოფლები, ახლო მაზლო სოფლებიც თავს ვერ იცავდნენ გაონავრებულ პოლკებისაგან. საკუთრება აღარა შერჩათ-რა გაოხრებულ და გატიალებულ სოფლებს. მკვიდრთა ღვინოს, ბოსტან-ბაღებსა, ფრინველსა და საქონელს, ცხენსა და ურემს, ისე ხმარობდნენ, როგორც მოისურვებდნენ. ყაზარმების გასათბობად ვენახების ღობეებს არღვევდნენ და სწვავდნენ. აშკარად, დაუსჯელად იქცეოდნენ. დამშლელი და დამტუქსავი არავინ იყო. რომ ეჩივლათ, უარესი ღლე დაადგებოდათ: სცემდნენ, დასჯიდნენ და დაემუქრებოდნენ: ეგ თუ ცოტაა, მაშ აბა იცოდეთ, შემდეგ უკეთესს ღლეს დაგაყენებთ".

მამა-კაცს ვინლა სჩივის. ღედა-კაცებსაც აწვალბდნენ და სტანჯავდნენ. ქვემოთ მოვიყვანთ მაგალითებს, თუ რა მწარე ღლეს აყენებდა მანდილოსანს გამხეცებული და გაონავრებული ჯარის-კაცი.

წინაღ, როცა ეკზეკუცია არ იყო ჩაყენებული, აუტანელი ტანჯვა-მწუხარება აღდა მკვიდრსა ჯარის-კაცისაგან. ადვილად მიხვდებით, რა შავი ღლე გაუთენდებოდა კახელობას, ეგზეკუცია რომ ჩაუყენეს სოფლად. წინანდელმა შეწუხება-შევიწროებამ, - ამბობს კაპიტანი ანოსოვი, ერთითად იმატაო. ჯარებს ნაბრძანები ჰქონდა - ძალით გამოართვით პურიო. რაც-კი რამ ებადა სოფლელსა, უძრავი და მოძრავი ქონება,

25) დელანში: "опустошают сады и огороды и, выпивая вино изъ кухниновъ, отъ безразсудной шалости запоиляют всю землю". იბ. უთ... ტ. II, გვ. 349.

საღდათების ხელში გადავიდაო. ეს კიდევ რაა, თვით ოჯახის სიწმინდე შეუბრალებლად ილახებოდა.²⁶⁾

ხალხი ემუდარებოდა და ევედრებოდა უფროსებს, ჯარი გაგვაცალეთ, ცოლშვილი წაგვიპილწეს, აღარ შეგვიძლიან მეტის ატანაო. ოღონდ მოგვაშორეთ საღდათები და საცა გვეტყვიო, იქ აგიშენებთ ყაზარმებს ჩვენის ხარჯითაო.

გამკითხავი არავინ იყო. ჩქარა მოზიდეთ პური, ეხლავე გაავსეთ მაღაზიებით, - ეს იყო ხალხის კვნესა-ვედრების პასუხი.

III

მართალია, ჩათრევით ჩაითრია და გააბა გენერალმა სტალმა მარკიზი პაულუჩჩი ბოროტების ქსელში, მაგრამ, როგორც საქმის ვითარება გვიჩვენებს, მარკიზს სავსებით არ შეუწყნარებია სტალის დაბეზლება. როგორღაც გული ეთანადრებოდა და ჰსურდა დანამდვილებით გაეგო ყველაფრის მიზეზი. დიდი კვლევა-ძიება არ იყო საჭირო გამოსაცნობად, ამას ყველა ჰხედავდა. მარკიზს უნდოდა შეეტყო, მართლა ურჩობით და ჯიუტობით მოსდიოდა კახელობას, პურს რომ არ იძლეოდა, თუ სხვა რამ დარდიც აწუხებდა. მარკიზმა ისიც კარგად იცოდა, რომ ბატონიშვილები აღელვებდნენ ქართველობას, რომ სამაზრო და სათემო სამსჯავროები ხალხში უკმაყოფილების მეტს არას იწვევდა. დიან, იცოდა ესა და მეცადინეობას არ იშურებდა, როგორმე თავიდან აეცილებინა სახიფათო მიზეზი. გაჩაღებული მიწერ-მოწერა ჰქონდა პაულუჩჩის ბატონიშვილ აღექსანდრეს ხელში ჩასაგდებად. მოსვენებით მაშინ მოისვენებდა, ხელში რომ ეგდო ეს დაუძინებელი მტერი რუსეთის მართვა გამგეობისა და სხვა ბატონიშვილებივით გაესტუმრებინა რუსეთში. ვიდრე

26) Ibid. გვ. 350 - 351. ლექსი: "семейная честь подвергалась утонченному поруганию."

ალექსანდრეს გაბაწრავდა, მარკიზი მხნედ შეუდგა სასამართლოს რიგიანად მოწყობას. გააუქმა თელავისა და სიღნაღის სამაზრო და სათემო სამსჯავრონი და დააწესა ღრობით სამსაჯულო, სადაც სამოქალაქო საქმეები ირჩეოდა ვახტანგ მეექვსის კანონების ძალით. სიღნაღის სამსაჯულოს თავმჯდომარედ დანიშნა მაიორი თ. ივანე ორბელიანი, წევრებად სამი ადგილობრივი თავადიშვილი, თელავის სამსაჯულოს თავმჯდომარედ-კი მაიორი შმატოვი, თელავის ციხის კამენდანტი და წევრებად აქაც სამი თავადიშვილი. აზრი და სურვილი მარკიზისა ის იყო, რომ სამართალი მკვიდრის ხელში ყოფილიყო, ხოლო თავმჯდომარედ სამსჯავროისა - უსათუოდ რუსის მოხელე. სამსჯავროს გადაწყვეტილება ასრულებაში მოჰყავდათ თელავისა და სიღნაღის მაზრათა მარშლებს, ან მოურავებს, თელავში თავად სოლომონ ავალიშვილს და სიღნაღში თ. იოსებ მელქისედეკის ძე ანდრონიკაშვილს.

ასე მოქმედობდა და იღვწოდა მარკიზი, მაგრამ მაინც გული-გულის ალაგას არ ეგულებოდა. მაშინდელ რუსის მოხელის ხელში გავლილი სამართალი, ბატონიშვილ ალექსანდრეს "ინტრიგები" და გენერალ პორტნიაგინის უფროსობით მისეული საეგზეკუციო კამანდები ვის არ ააღელვებდა და გააორგულებდა, მაგრამ მარკიზის თვალში არც ამას ჰქონდა ჯეროვანი ფასი. პაულუჩჩის ჰსურდა შეეტყო "პირდაპირი მიზეზი განვლილის ამბოხებისა, რომ შემდეგ ელონა საჭირო ღონისძიება ბოროტების აღმოსაფხვრელად და საუკეთესო მართვა-გამგეობის დასამყარებლად საქართველოში".²⁷⁾

პაულუჩჩი თითქმის ყველაფერში ჰბაძავდა თ.პ.დ. ციციშვილს და იმისავით ფიცხად მოახსენებს იმპერატორ ალექსანდრე პირველს: თუ ნამდვილად გსურთ და თქვენი კეთილი ნებაა, რომ საქართველო სამუდამოდ რუსეთის იმპერიის ქვეშევრდომობაში დარჩეს, მაშინ უქვეშევრდომილესად გემუდარებით, მალე და დაუყოვნებლივ ამისრულოთ ხოლმე

მოხსენებანი და მომცეთ საღსარი ქვეყნის საკეთილდღეოდ, თორემ მინისტრებთან მიწერ-მოწერაში საქმე ჭიანურდება და ველარას ვაკეთებო.²⁸⁾

თ. ციციშვილსავეთ მარკიზმა დაარსა საქართველოს სამოქალაქო გუბერნატორ მალინსკის თავმჯდომარეობით განსაკუთრებული კამისია ასეთის სახელწოდებით: საქართველოში მომხდარ ამბოხების მიზეზთა გამოკვლევა. - კამისიის წევრებად დაინიშნენ: სახაზინო ექსპედიციის უფროსი ვასილიევი, აღმასრულებელ ექსპედიციის მრჩეველი სტატსკი სოვეტნიკი ფალავანდიშვილი, მრჩეველი სისხლის სამართლისა და სამოქალაქო საქმეთა ექსპედიციისა (Экспедиция суда и расправы) თ. ზურაბ ორბელიანი; თ. სულხან, ან ეგნატე თუმანიშვილი თავმჯდომარის ამორჩევით, თელავისა, სიღნაღისა, გორისა და ანანურის მარშლები. კამისიის მდივნობა დააკისრეს სისხლის სამართლისა და სამოქალაქო საქმეთა ექსპედიციის მრჩეველს იანიშევსკის.

მარკიზს ძალიან ეშურებოდა ამბოხების მიზეზთა გამოკვლევა და საქმის დაბოლოვება. პეტერბურგს აპირებდა წასვლას სამსახურის გამო და თან უნდოდა წაეღო კამისიის დასკვნა და პირადად მოეხსენებინა იმპერატორისათვის ამბოხების ყოველი წვლილი. ადვილი გასაგებია ასეთი სურვილი პაულუჩჩისა. ამ დროს რუსეთი გაფაციცებით ემზადებოდა საეროვნო ომისათვის ნაპოლეონთან და მარკიზს ენატრებოდა გაეხარებინა იმპერატორი სასიამოვნო ამბით - ამბოხების ცეცხლი უცბად ჩავაქრე, საშიშო აღარაფერია და მხედრობის დარღი ნუღარა გაქვთო.

კამისია შეუღდა მოქმედებას 13 მარტს 1812 წ. დიდი მასალაა შეკრეფილი კამისიის მიერ. განსაკუთრებული ყურადღების ღირსია მოხსენებანი ბოღბისხველთა, მირზაანელთა და პრასიანელებისა. მარტივად, გულწრფელად უამბობენ ქიზიყელები სიღნაღის მოურავს თ.ი.მ. ანდრონიკაშვილს თავიანთ მწუხარება-გაჭირვებას. სამივე მოხსენება ძლიერა

ჰგავს ერთი მეორეს, მაგრამ ჩვენ მაინც თითქმის უცვლელად მოვიყვანთ სამთავეს. სამწუხარო მხოლოდ ისაა, რომ დედანი მოხსენებისა არაა დაბეჭდილი აქტებში, თარგმანი-კი ძველია და უვარგისი, ზოგჯერ ისე ბუნდოვნადაა ნათარგმნი, რომ სწორედ გვიჭირდება აზრის გაგება.

ვრცლად მოვიყვანთ აგრედვე მიტროპოლიტ იოანნე ბოდბელის მოხსენებას, სტეფანე რუსთველ არქიეპისკოპოზისას, თავად თამაზ ორბელიანისას, თელაველ მეამბოხეთა წერილს და სხვას. ეს წერილ-მოხსენებანი სარკესავით დაგვანახვებს კახეთის ვითარებას 1812 წ.

მთავარ-მართებლის ბრძანებით გვეკითხებიო, - მოახსენებენ ბოდბისხეველები თავიანთ მოურავს თ. იოსებ ანდრონიკაშვილს, - თუ რამ გვაიძულა გვეღალატნა ხელმწიფისათვის და აჯანყება მოგვეხდინა. ღალატი გულში არ გაგვიტარებია, მაგრამ ცამეტი წლის განმავლობაში რაც ხელმწიფემ ღირსი გაგვხადა მფარველობისა, სული ამოგვხადა უსამართლობამ. ამგვარი უღვთობა და უბედურობა არ გამოგვიცდია ლექთა, ყიზილბაშთა და ოსმანთა ბატონობის დროსაც-კი. ვითმენდით, ვიტანდით თავზე მოვლენილ ჭირსა, რადგან ერთგულობის ფიცი მივეცით ხელმწიფეს, მაგრამ როდესაც ხელიდან ცოლები წაგვგლიჯეს, ველარ მოვითმინეთ და ავიშალენით. რუსებმა მოსტაცეს ცოლი ბინობაშვილს, ორი კვირა ჰყავდათ ბოდბისხევეში და შემდეგ დაითხოვეს. ბალაშვილსა და ხობაშვილსაც წაართვეს ცოლები, თითო კვირა ჰყავდათ თავიანთსა და მერმე დაითხოვეს. ცოლთა გაუპატიურება და ნაშუსის ახდა საკუთარის თვალთ იხილეს ამ უბედურებმამო. კანონი ხელმწიფისა ისეთია, რომ თუ მამა-კაცი რასმეს დააშავებს, სასჯელიც დამნაშავეს უნდა გადახდეს. ამის მაგიერ წაავლებდნენ ხელს დედა-კაცებს, ჩახლდნენ ნიფხვებს და ჯოხებით უკან ტანს უჭრელებდნენო.

ამ სიშორიდან გაგვრეკეს ურმებით ფოთში სურსათის საზიდავად. სულ თხუთმეტი ურემი იყო ჩვენი და ერთი ხარი აღარ დაგვბრუნებია ცოცხალი. ნახევარი მეურმეც გაწყდა ლაშქრობაში, ვინც დაბრუნდა, ისიც ველარ გამოდგა, რადგან

სასტიკი ზამთრის გამო ხელ-ფეხი და ტანი დაძრული ჰქონდათ. — საითაც-კი დაიძვროდა ხელმწიფის მხედრობა, ჩვენც უკან მივღვედით ურმებით, დაგვექონდა სურსათი ერევანს, გუმბრს, განჯასა და სხვაგან. გავდიოდით საღარაჯოდ და საომრად, ასე რომ თუ სალდათები ანთხევდნენ სისხლსა, ჩვენც მათთან ვიჟლიტებოდით. პური იყო ჩვენზე გაწერილი, კოლში ექვს აბაზს იძლეოდნენ. მარტო გადატანაში ვაძლევედით თითო მანეთსა, ასე რომ კოლზე აბაზი გვრჩებოდა, მაგრამ რაოგან შიმშილობის გამო ჩვენი სამყოფიც არა გვექონდა, პურს სხვაგან ვყიდულობდით ოთხ მანეთად კოლსა. - ერთხელ, სურსათს რომ აგროვებდნენ, მარტო 350 ქათამი მოგვტაცეს; პურს, ქერსა და ღვინოს ვინღა დასთვლისო? გენერალ პორტნიაგინმა სოფელში ჯარი ჩაგვიყენა. ვიდრე თხუთმეტი ურემი ხორბალი არ გავუგზავნეთ, ჯარი არ მოგვაშორა. პურისა, ღვინისა, და საქონლის გარდა 4 ურემი ქერი დახარჯეს თვით სოფელში. ძარცვა-გლეჯისა და ცემა-ტყევის გარდა სული გაგვიმწარეს ქრთამების აღებით. ერთხელ კაპიტან-ისპრაენიკმა იასაულის პირით შემოგვითვალა, - ჩემთან ამოდითო. შეგვეშინდა და არ წავედით, რადგან ისპრაენიკი ბრალიანსა და უბრალოს არ არჩევდა, ყველას ფულს ახდევინებდა, ზოგს 20 მ., ზოგს 30 მ. შიშისაგან, ერთი ვაჭირელი კაცი სამულამოდ სადღაც გადავარდა. ბოდბელ გოგია ოთარაშვილს ცილი დასწამეს, გაქცეული შენი ნათესავიაო, დაატუსაღეს და 180 მან. წაართვეს. ლაზარე ხუნაშვილი დაატუსაღეს და ვიდრე 70 მან. არ მისცა, არ გამოუშვეს. გოგია ხუნაშვილის დაჭერა უნდოდათ, გამოუდგნენ, მაგრამ ვერ დაიჭირეს - გაჯავრებულებმა გოგიას ოჯახს 60 მან. გადაახდევინეს. სულ ტყუილ-უბრალოდ გათოკეს აბრამა ძმანაშვილი და მაშინ გაანთავისუფლეს, როცა 70 მან. ქრთამი მისცა. ასევე მოექცნენ გოგიაშვილს, ნოდარაშვილსა და დათია ბალაშვილს, რომელთაც რვა-რვა თუმნად დაიხსნეს თავი ნაობახტიდან. გოგია ბალაშვილს-კი 70 მანეთს დასჯერდნენ. ბეგრის ურმების გასაყვანად სალდათები მოდიოდნენ. ვაი ჩვენი ბრალი, თუ ერთი-ორი საათი დაგვაგვიანდებოდა და დროზე არ შევაბამდით

ხარებსა. გამორეკდნენ ხოლმე დედა-კაცებსა და ურემში აბამდნენ. ვასმევლით, ვაჭმევლით, თუ ქრთამს ვაძლევლით, სულ ერთი იყო, მაინც განუწყვეტლივ გვამათრახებდნენ.

სამართალი ხომ არ არსებობდა ჩვენთვის. ისპრავნიკი ნამდვილი ძილის გულა იყო. მომჩივანს კარებს არ გაუღებდნენ, ვიდრე ქრთამს არ დაანახებდა. ბავშვებს პურსა ჰგლეჯდნენ ხელიდან, დედა-კაცებს კისერზე ქვებსა ჰკიდებდნენო. ისპრავნიკმა უდანაშაულო რევაზს და იოსებს 140 მ. წაართვა, მამუკასა და ზურაბს ცხრა-ცხრა თუმანი. ხორბლის საწყაო მოიტანა კაპიტან-ისპრავნიკმა და გამოგვიცხადა, ფუთიანიაო. ამ საწყაოთი იბარებდა ხორბალს ჯარისათვის. როცა გამოვზომეთ ისპრავნიკის საწყაო, აღმოჩნდა, რომ შვიდ ლიტრას იწონიდა. (ლიტრა ათი გირვანქაა, ზოგან ცხრა). ჩვენი აჯანყების მიზეზი სულ გენერალი პორტნიაგინი და ისპრავნიკებია, სხვა არაფერიო. ბოლოს ამასაც ამბობენ. ნეტა ხელმწიფეს რა სარტა ჰქონდა ჩვენის ასეთის დაწიოკება-დარბევისაგანაო.²⁹⁾

ამავე სიღნაღის მოურავს თ. იოსებ ანდრონიკაშვილს მოახსენებენ პრასიანელები: ისე დაგვარბიეს და შეგვაწუხეს მოხელეებმა, რომ გამწარებული სიკვდილს ვეძებდით, მაგრამ ჩვენი მფარველი და პატრონი არსადა სჩანდა, გაუნელებელ ცეცხლის ალში გავეხვიეთ, ვიწოდით და ვიდაგებოდით, მაგრამ მანუგეშებელი ვერავინ ვნახეთ. ჯარისთვის ხორბალი უნდა გაგვეღო, როცა არა გვქონდა, რას მივცემდით, მაინც ცვილ-ულობდით, ლიტრაში 40 კაპ. ვაძლევდით, პროვიანტის მოხელენი-კი 10-ან შვიდნახევარ კაპ. ანგარიშობდნენ. ურემის ქირას 6 მანათს ანგარიშობდნენ, როდესაც ჩვენ თითონ 30 მ. გვიჯდებოდა ურემი. უღმერთოდა ჰტვირთავდნენ ურემსა, კარგ ამინდში კიდეც ჰო, ურემი დაიძვროდა, მაგრამ თოვლსა და ჭყაპში, უზომოდ დადებულს ურემს საძრავი არა ჰქონდა. გაბრაზებული სალდათები ჩვენ თითონ, მეურმეებს, გვაბამდნენ და ცემა-ტყეპით მიგვერეკებოდნენ. ეს კიდეც რა,

29) იხ. АКТЫ, ტ. V, გვ. 61-62.

უბედურება ის იყო, რომ ორი-სამი სოფლისაგან ქრთამს აიღებდნენ და ბეგრისგან ანთავისუფლებდნენ, და ამ გვარად იმათ წილ ბეგარასაც ერთს სოფელს ახლევინებდნენ ხოლმე. ორი დღით რომ წაგვიყვანდნენ ბეგარაზე, სამ თვეს გვტოვებდნენ. ნებას არ გვაძლევდნენ საქონელი ურმებიდან გამოგვეშვა საბალახოდ, ან ჩვენ წავსულიყავით საღმე საქმლის საშოვნელად. ვიხოცებოდით სიმშლით და როცა ვითხოვდით ან პური გვაჭამეთ, ან გაგვიშვით სოფლად საგზლის საშოვნელად, დედა-მიწაზე მიგვითითებდნენ ხოლმე, - სჭამეთო. გაშეშებულივით ვიდექით ზეზე როგორც მეურმენი, აგრედვე საქონელი. დიდძალი ხარ-კამეჩი იხოცებოდა ბეგარაზე. საქონლის მაგიერ ჩვენ გვაბამდნენ და მათრახის ცემით მიგველალებოდნენ.

ყველაზე მეტად სულს გვიმწარებდა გენერალი პორტნიაგინი, კაპიტან-ისპრავნიკი და ყარალაჯის უფროსი. ყველაფერი მიჰქონდათ, რაც რამ გვებადა, მაგრამ ამითაც არ კმაყოფილდებოდნენ. ზამთრობით ჯარს ჩაგვიყენებდნენ ხოლმე სახლებში და ძალას გვატანდნენ გამოგვეკვება სალდათები გაზაფხულამდინ. ღვთის რისხვა იყო სწორედ ჯარის ჩაყენება ოჯახებში. ვასმევედით სალდათებს, მაინც გვცემდნენ, ვაჰმევედით, მაინც მათრახს ვერ ავცდებოდით. ლოგინებიდან წამოგვკლავდნენ ხოლმე და თვითონ წვებოდნენ შიგა. ვინ მოსთვლის რამდენი ცოლი და შვილი გაგვიუპატიურეს და ნამუსი აჰხადეს!

სამართლის კარი ხომ დაიკეტა და დაიხშო ჩვენთვის. გაგონებითაც არა გვქონია გაგონილი, რომ ჩვენში დავიდარაბა ატეხილიყო სწყლისა და მამულის გამოტანზრახ წაჰკიდებდნენ სოფლებსა, ჩამოაგდებდნენ შურსა, შულლსა და შემდეგ 400-600 მანათ ქრთამს რომ ასწაპნიდნენ, ბრალიანსა და დამნაშავეს ამართლებდნენ. უმიზეზოდ უდანაშაულო კაცს გადაეკიდებოდნენ და იძულებულ ჰყოფდნენ იწროებას შინა ჩავარდნილი ადამიანი გადახვეწილიყო საღმე. მაშინ გადახვეწილის მეზობლობას ღალატს შეგვწამებდნენ და მოგვისევდნენ ჯარსა დასარბევად, იჭერდნენ და ატუსაღებდნენ უდანაშაულო

კაცსა და ანთავისუფლებდნენ ნაობახტიდან, თუ 400 მ. სასყიდელს მივართმევდით. სწორედ ამ ნაირად გვექცეოდნენ ლეკებიც. - საჩივლელად მისულს თუ მუშტი შეკუმშული არა ჰქონდა ნიშნად იმისა, რომ ხელში ქრთამი უჭირავს, სასამართლოში არ უშვებდნენ და ბევრსაც მიაყოლებდნენ ხოლმე. არა, ცარიელ-ტარიელი რომ მოდიხარ, სად მოდიხარო, ხუთი მანათის საღირალი საქმე რომ გვქონოდა, ხუთი თუმანი უნდა დაგვებარჯაო.³⁰⁾

ჰკითხულობ ამ გულუბრყვილო და ნაწყვეტ-ნაწყვეტად მოთხრობილს ამბავს და თვალს არ უჭერებ. ნეტა რა მოთმინება და შეძლება ჰქონია ერსა, რომ კვერცხივით ზედ არ შეასკდა ზნედაცემულს ჯარის-კაცსა და მსუნაგსა და გაწუწკებულს მოხელესა უსამართლობა, ცემა-ტყეპა, დარბევა-დაწიოკება სოფლისა, ქურდობა, განზრახ დავი-დარაბის ატეხა, უზნეობა-გარყვნილობის შეტანა, ქალწულთა და დედა-კაცთა ნაშუსის ახდა აშკარად, ქმართა და მახლობელთა თვალწინ, ქალისა და კაცის უღელში შებმა, გატიტვლებულის დედა-კაცის გაჯოხვა, - ეს რაღაც დაუჭერებელი ამბავია, ისეთი ველურობა, რომლის მზგავსი თვით თემურ-ლანგის დროსაც არ იქნებოდა. აკი სჩივიან ბოღბისხველნი და პრასიანელნი, რაც რუსობამ მწუხარება მოგვაყენა, მაგ გვარი თურქთა, ყიზილბაშთა და ლეკთა ჟამთა ბატონობის დროსაც არ გამოგვივილიაო! - იმპერატორი ალექსანდრე პირველი კურთხეული საქვეყნოდ დაჰპირდა საქართველოს პატრონობა-მფარველობას. თურმე თორმეტი წლის შემდეგ ამ პატრონობას უწევდნენ მოხელენი ერთმორწმუნე ერს!³¹⁾

ქვემოლ დაწვრილებით იქნება ნაამბობი, ესლა მარტო აღვნიშნავთ, რომ მეამბოხებმა შეიპყრეს სიღნაღში მაიორი გეინე, ქვედა-ნოვგოროდელთა ღრაგუნის პოლკის კამანდირი

30) Ibid. ტ. V, გვ. 62-63.

31) ეს ის ცნობილი მანიფესტია, ასის წლის იუბილეი ამას წინაზე რომ ვიდელსასწაულეთ. მანიფესტის თარიღი 12 სექტემბერი 1801 წ. მანიფესტის პირველი სტრიქონი ამოჭრილია სპილენძის ფიციარზე და გამოკიდულია "ღიღების ტაძრის" კედელზე, გალაგინის პროსპექტზე.

მაიორი პოტლოგი და რამდენიმე აფიცერი და ნაკუწ-ნაკუწ ასჩეხეს. ვიღრე ამას მოიმოქმედებდნენ, მემამბოხეებმა თურმე დასჭრეს ენები, ჯერ გადააყლაპეს და მხოლოდ შემდეგ ასჩეხეს. ამ ამბავს ასე მოახსენებს უქვეშევრდომილესად ალექსანდრე პირველს მარკიზი პაულუჩჩი: გამხეცებულმა მემამბოხეებმა დახოცეს აფიცრები და უსასტიკესად აწამეს. რადგან ვიცი თქვენი გულკეთილობა, ვერა ვბედავ აგიწეროთ აფიცრების ტანჯვა-წამებანი. ვერავითარი ფანტაზია ვერ წარმოიდგენს და ვერ გაითვალისწინებს ამ ტირანობას. მისი ხილვით, ან გაგონებით კაცობრიობა შეძრწუნდებაო.³²⁾ უკვირს გარიბალდის თანამემამულე მარკიზს ქიზიყელთა მართლა რომ ბარბაროსული და ველური გაბოროტება და იმას-კი არ დაგიდევს, თუ რამ გამოიწვია ასეთი ველურობა. ათვალწუნებული აზია და აფრიკა დიდი ხანია საჯირითო მოედნადაა აღიარებული. თიანელი აფიცრები როგორ გაავამტყუნოთ, როდესაც დღევანდელი ევროპიელი, კულტურით დამშვენებული, შინ ნაზი და წყნარი, დასდგამს თუ არა ფეხსა აფრიკისა და აზიის ნიადაგზე, პირუტყვად ხდება. გეცოდინებათ, რა დაუჭერებელი და შემადრწუნებელი ამბები მოდის ხოლმე კონგოდან. ისე, ვითომც აქ არაფერიაო, გულის გადასაყოლებლად, ევროპიელნი თოფითა ჰხვრეტენ ზანგებსა. აღშფოთებულის სვინდისის დასამშვიდებლად იტყვიან ხოლმე - გაგიჟებულან და აბა გიყს რა მოეთხოვებაო. კარგია თქვენმა მზემ? გიყს რა მოეთხოვებაო. გიჟი საგიჟეთში უნდა იჯდეს. ვინც კჳუაზე მწყურალადაა, განა ხალხის მოსავლელად გაიგზავნება? ევროპიელებმა მაინც ასე იციან, ღვთის ნიერი და გონიერი ადამიანი აზია-აფრიკისთვის არ ემეტებათ, რაც დამთხვეული და გადარეული ჰყავთ, აზიისკენ ელალებიან. ესენიც სულ მუშტსა და ხმალზე იყურებიან და არიან ერთ ამბავში.

32) Ibid. ტ. 5, გვ. 73; ურ. ტ. II, გვ. 336.

IV

ყოველად შემძლებელს ღმერთს გასცემთ პასუხს, - მოახსენებენ მირზაანელნი თ. იოსებ ანდრონიკაშვილს, - თუ ჩვენს ამბავს სავსებით არ მიუტანთ მთავარ-მართებელსო. ჩვენი და მირზაანელ ქევხა ღიმიტრას საჩივარი და შევიწროება ისაა, რომ ცოლებსა გვტაცებდნენ, ქმრებს ხელებს უკრავდნენ და ჩვენ თვალწინ ჩვენ ცოლებთან მრუშობდნენ. დედა-კაცი წივის და ჰკივის, კაცო, მიშველე; ქმარი-კი ლულულუღებს: რა გიშველო შეკრულ-შებოჭილმაო.

სოფლად ვილაც კაპიტანი მაყაროვი ჩაგვიყენეს ჯარით შეიღის კვირით. მტერი არ დააწიოკებს ისე სოფელსა, როგორც მაყაროვმა აგვიკლო და დაგვანელა. კაცი აღარ დარჩენილა მირზაანში, შიშით მამა-კაცობა აქეთ-იქით მიიძალა. საცა-კი მიგვასწრობდნენ, ცემით ტყავს გვაძრობდნენ. გვქონდა რამე თუ არა, სულ ერთი იყო მაყაროვისთვის, უნდა გვევაგლახნა, გვეყიდნა და ისე მიგვერთმია. მერე საქონლის ხორცითაც რომ არა კმაყოფილდებოდნენ დალოცვილები! უთუოდ ქათმებიც უნდა გვეშოვნა. ლოთობას ნულარ იკითხავთ, გაილეშებოდნენ, ბატონო, დაერეოდნენ დედა-კაცებს და ზურგზე სულ ბოლს ადენდნენ. - მეზობელს ქორწილი ჰქონდა. კაპიტანმა მაყაროვმა 40 სალდათი გაგზავნა მასპინძლისას, მეფე-დედოფალი კარში გამოარეკინა, მაყარიონი და მექორწინენი ცემა-ტყეპით დაახოცვინა. მოვითმინეთ შერცხვენა და ხელი არ გამოვიღეთ. - ზამთრობით მთელი სამი წელიწადი თითოსა, ან ოროლ სალდათს გვიყენებდნენ სახლში გამოსაკვებად. დანახარჯის ფული უნდა გადაეხადნათ, პირობა ასე იყო, მაგრამ ხარჯის დაბრუნების მაგიერ სალდათების უფროსმა კაი-კაი გვიცხუნა და ძალათი ხელი მოგვაწერინა ქალაღზე, ვითომდა, რაც გვეკუთვნოდა, ყველაფერი მივიღეთო. - ვსთქვათ, დაისაჭიროეს 40 ბეგრის ურემი. თუმცა გვპირდებოდნენ, - ქირას არ

გვაძლევდნენ, მაგრამ ქირას ვინა სჩივის, უბედურება აი რა იყო. ორმოცი ურმის მაგიერ ბარგი-ბარხანას დაუღებდნენ ოც ურემზე, რადგან საქონელი ვერ ერეოდა უზომოდ დაღებულ ურემსა, მოგვეცვივებოდნენ ხოლმე გაბრაზებული სალდათები და ცემა-ტყეპით გვალულულებდნენ. ერთი კვირის მაგიერ თვეობით ვეყარეთ ხოლმე ბეგარაზე. ან ავდარი, ან თოვლი მოგვისწრებდა, საქონელი გვექულიტებოდა და შინ ცარიელ-ტარიელი ვბრუნდებოდით. პურის მიმღები გვაჩვენებდა საწყაოს, ჩვენ თვალწინ არწყამდა, ავწონავდით და მართლაც საწყაო ფუთს იჭერდა, ასე ვრიგდებოდით, მაგრამ ხორბალს რომ მივზიდავდით ბელლებში, სხვა საზომავსა სდგამდნენ. ფუთის მაგიერ შვიდი ლიტრა ჩადიოდა და ფუთად კი გვიანგარიშებდა ხოლმე. ხაზინიდან ლიტრაში ორ შაურს გვაძლევდნენ, ჩვენ თვითონ-კი ლიტრა პურს ორ აბაზად ვყიდულობდით და ისე ვაბარებდით. ერთი-ორი ლიტრა რომ დაგვეკლებოდა ჩაბარების დროს, სულს არ მოგვათქმევინებდნენ, რომ გვეყიდნა და შეგვევსო დანაკლისი, და ცემითა გვხოცდნენ ხოლმე. გზების გასაკეთებლად, სამუშაოდ ბარ-ნიჩაბით და ცულებით გავდიოდით; მუშაობას რო გავათავებდით, შინ არ გვიშვებდნენ, ვიდრე ქრთამს არ მივსცემდით. თუ საქრთამო არა გვექონდა-რა, სამუშაო იარაღს წაგვართმევდნენ, პანდურს ამოგვეკრამდნენ და შინ ისე გავგვრეკავდნენ ხოლმე. საყარაულოდ ცხენებით გავდიოდით; ვადა რომ გვითავლებოდა, შინ არ გვიშვებდნენ, ვიდრე ქრთამს არ მივცემდით. ასეთ ტანჯვა-ვაებასა და მწუხარებაში ვიყავით, წუწუნებენ მირზაანელნი.

როდესაც ერთი სოფელი მეორეზე საჩივარს შეიტანდა და იბარებდნენ ორთავესა პასუხის მისაცემად, განზრახ წაჰკიდებდნენ ერთი მეორეს, დაწყნარება-დამშვიდების მაგიერ ერთმანეთზე ასისიანებდნენ, ქრთამებს ბლომად იღებდნენ მაგრამ სამართლიან მსჯავრს ვერც ერთი სოფელი მაინც ვერ ეღირსებოდა ხოლმე. როცა გენერალი პორტნიაგინი მობძანდა პურის საყიდლად, ქევხას პირით მოვახსენეთ ჩვენი ნაკლებულობა და შევეხვეწეთ გვიმსახუროს შეძლებისამებრ. პორ

ტნიაგინმა არც აცივა, არც აცხელა, - როგორ თუ ეს გამიბეღეო, აილო და ქვეხას ნაობახტში უკრა თავი. ვიდრე ქრთამი არ მიართვა ქვეხამ, ნაობახტიდან არ გაანთავისუფლეს. - დამნაშავესა და ბრალიან კაცს რომ მოგვთხოვდნენ ხოლმე, ვიჭერდით და მიგვყავდა მთავრობასთან. მოხელენი ქრთამს ასწაპნიდნენ და დამნაშავეს ანთავისუფლებდნენ, მერე მოგვდგებოდნენ და სულს გვიმწარებდნენ - ცული კაცებია თქვენში, აი თქვე ასეთ-ისეთებოვო.

მას შემდეგ, რაც უფალმა ღმერთმა და ჩვენმა ბატონმა (მეფე) ჩვენი თავი ხელმწიფეს ჩააბარა, ცულ-კაცობა არა ჩაგვიდენია რა და სიმრულე არ გამოგვიჩენია. ვემსახურებოდით ხელმწიფეს პირნათლად, საითაც გვიკრავდნენ თავსა, მივდიოდით, კრინტი არ დაგვიძრავს, - არა, არ წავალთო. დავდიოდით ბეგარაზე ხარ-კამეჩით და ურმებითა განჯას, გუმბრსა, ახალციხეს, ნუხას, იმერეთსა. თუ ხარ-კამეჩით არ შეიძლებოდა სამსახური, ჯარს ცხენებს ვახმარდით ტვირთის საზიდად, მაგრამ არც საქონელი და არც ურემი უკან აღარ დაბრუნებულა, ყველაფერი დაგვეღუპა. ასე გასინჯეთ, ტომრებიც-კი დაგვეკარგა.

გამოგვიცხადეს, ჯარი თვითონა ზიდავს სურსათს, ოღონდ თქვენ ხარები უყიდეთო და ბეგრისგან თავისუფალი იქნებითო. თითო ხარზე 15 მან. გამოვიდა. ხუთ-ხუთი მანათი დაუმატეთ და ჩავაბარეთ საქირო საქონელი, მაგრამ ბეგარაზე მაინც გაგვრეკეს. ჯაფისა და მოუვლელობისაგან ნაყიდი საქონელი გაილახა და ჩვენ მოგვილალეს გამოსაკვებად, ვისაც გაძვალ-ტყავებული საქონელი ხელში შემოაკვდა, თითო სულზე 15 მან. გადაახდევინეს.

ამითი თავდება მირზაანელების დარდისა და ვარამის სია. მეკითხები, - სწერს არქიეპისკოპოსი რუსთველი სტეფანე მარკიზ პაულუჩჩის, - რა იყო მიზეზი კახეთის ღრევა-ამბოხებისაო. - მღვდელ-მთავრული ფიცითა ვარ შემორკილი, დაწვრილებით ვერ აგიწერ იმ ტანჯვა-ვაებას, რაც კახელობამ გამოიარა, მაგრამ მაინც რამდენადაც ჩემი გონება მისწვდება, მოგახსენებ.

უკანასკნელ დრომდე, კახეთში დაბანაკებულ ჯარი უფროსი, აგრეთვე მისი ხელქვეითნი, უბრალო სერჟანტიც კი, გლეხ-კაცობას ისე ექცეოდნენ, როგორც ყურმოჭრილ ყმასა და ისე იმსახურებდნენ, როგორც ჰსურდათ. სამსახურს და ყმობას არა სჯერდებოდნენ, ხალხს აწვალებდნენ და სტაფჩავდნენ, ასე გასინჯეთ საქონელსაც არ ინდობდნენ. შეუბრალებლად და უღვთოდ ეკიდებოდნენ ერთსაც და მეორესაც მერე ათასში ერთხელ ხომ არა, მულმივ, განუწყვეტლივ. დღე კვირა, თვე გადიოდა, ხალხისა და პირუტყვის შეწუხებას-კ შედღავათი არ ეძლეოდა. ერის სასოწარკვეთილებას დასასრული არ უჩანდა. - გაიფურჩქნებოდა თუ არა ვაზი, მიესეოდ სალდათობა ვენახებსა და შემოაფცქვნიდა ხოლმე კვირტსა და ფოთოლს საქმლის გასამჟავებლად. ხალხი თავს იკლავდა და ბრაზით გულზე სკდებოდა, ვენახების გავერანებას რომ ხელ ვდაო.

კამისიონერები რას არა სჩადიოდნენ, ვინ მოსთვლიოც კოდიან ურემ პურს თხუთმეტად იღებდნენ, საწყაო ფეხითა, ან ღიღი კეტებით სტენავდნენ და რაც ხორბალ დაიბნეოდა, იმას აღარ ანგარიშობდნენ. - ვისაც პური არ ჰქონდა, ბეს უბრუნებდა, მაგრამ კამისიონერი არ იღებდვიდრე კოდ პურში არ დასცინცლავდა 2 მანათსა, ხან 2 მა 40 კაპ. პური მალაზიაში ზამთრობით მოჰქონდათ. ორ-სა კვირას აჩერებდნენ და ვიდრე მეურმე ქრთამს არ მისცემდ პურს არ იბარებდნენ. საქონელი და ხალხი კი სიცივითა და შიმშილით იტანჯებოდა.

მაზრის გამგებელნი ყურსაც არ იბერტყავდნენ, თითქო ამ საძაგლობის აღმოფხვრა მათი საქმე არ ყოფილიყოს.

ვსთქვათ, ხალხს შეუქვეთეს ყაზარმის, ან თავლი აშენება. მზა-მზარეულ, აშენებულ სახლს დააქცევინებდნენ ხოლმე, რა არის, კარები აქეთ უნდა დაგეტანებინათ და არ იქითაო, ფანჯარა აქეთ უნდა იყვეს და არა იქითაო. სიტყვი არ ითქმის და კალმით არ დაიწერება, თუ რა სასოწარკვეთილებას ეძლეოდა ერი ამის მნახველი და ამის გამგონე.

მაგალითი არა ყოფილა, რომ საქმე დასრულებულიყოს და ბოლო მოქვებოდა სასამართლოში, ან სათემო პოლიციაში. თუ-კი რამე გათავებულა, უსათუოდ ქრთამს უმუშავნია, უქრთამოდ ზედაც არ შეხედავდნენ საქმესა. სამსჯავრო პროცესის გაჭიანურებით მობეზრებული მომჩივანი ქრთამს აძლევდა მოსამართლეს, აჰა, შეცეცხლე, ოღონდ მოსპე ჩემი საჩივარი და თავიდან მომწყდიო.

სოფლად ჩაყენებულ ჯარის უფროსები ტაციანობით მიდიოდნენ იოლად, უსასყიდლოდ მიჰქონდათ სანოვაგე: ღვინო, პური და ყველაფერი, რაც-კი საჭიროა ადამიანის საცხოვრებლად. ათასში ერთხელ თუ გაიმეტებდნენ რასმეს, მაგრამ გამეტებული ისე მცირე იყო, რომ სათქმელად არა ღირს. ჯარის უფროსთა ასეთი საქციელი დიდად სჩაგრავდა ერს.

აფიცრები ჯერ სახელმწიფოდ მოათიბინებდნენ თივას, მერმე თავიანთთვის და უსასყიდლოდ აზიდვინებდნენ. სრული სამი თვე უნდებოდა გლეხ-კაცობა ამ გაი-ვაგლახს. ამას ხომ არა სჯერდებოდნენ დალოცვილები. საბძლებში უცვინდებოდნენ და ძალით მიჰქონდათ თივა და ბზე. საკუთარი საქონელი-კი შიმშილისაგან ძლივს დალასლასებდა და ნიათ გამოლეული წყდებოდა. დიდი მწუხარება და უბედურება ტრიალებდა ამის გამო ხალხშიო, ბრძანებს მღვდელ-მთავარი. (დედანში: великая народная скорнь.).

ოცობით, ოც და ათობით გაჰყავდათ ბეგარაზე ურმები. მთავრობას თვეში თითო ურემზე თურმე 40 მან. ჰქონდა გადადებული, ვინ იცის რამ სიშორეზე მიჰყავდათ ურმები. სიშორისა გამო საქონელი წყდებოდა, ურმებს გზაში ჰყრიდნენ და მეურმეები ცარიელ-ტარიელი ბრუნდებოდნენ შინა და გასამრჯელოს ხან 6 მან, ხან 8 მან. გადმოუგდებდნენ ხოლმე.

მიზეზი ხალხის საერთო ამბოხებისა ბევრია კიდევ. ბევრია აგრედვე სიძაგლობა, რამაც გამაწარა ერი, მაგრამ მე ვერ მოვანსენებო, სწერს არქიეპისკოპოსი სტეფანე მარკიზ პაულუჩჩის. - თვითონ ხალხს გამოჰკითხეთ; დაწვრილებით

თვით ერი მოგახსენებს, რა ცეცხლი ეკიდა და როგორ იხრაკებოდა უსამართლობის ღველფსა და ნალვერდალშიო.

პაულუჩის მიტროპოლიტ იოანე ბოდბელისთვისაც მიუწერია წერილი, გამაგებინეთ-რა მიზეზია, რომ ქახელობა აჯანყდაო.

მეკითხებით, - უპასუხებს ბოდბელი, თუ რამ გამოიწვია შფოთი და ამბოხება. რაკი ასეა, იძულებული ვარ ამ მოხუცებულობაში თვალ-ცრემლიანმა გარკვევით ვაღიარო მოყვასთა მიერ ჩადენილი ბოროტება, რათა იგი აღარ განმეორდეს. ვერ ვახერხებ, ვერა ვბედავ დავასახელო ყველაფერი, რაც მოხელეებმა მოიმოქმედეს. ღმერთო, რას არა სჩადიოდნენ იტაცებდნენ რაც კი რამ მოხვდებოდათ, სჩაგრავდნენ როგორც მამა-კაცებს, აგრედვე ღელა-კაცებს, იღებდნენ ქრთამსა, რის გამო ყველასათვის გასწყდა მართლიერება. მოხელეთაგან არავისა ჰქონდა მოსვენება არც აღამიანსა და არც პირუტყვს. პურის ფასი ექვსი აბაზი რომ ყოფილიყო, იგინი ოთხ აბაზს ანგარიშობდნენ, მაგრამ რა, ამასაც ღვთისნიერად არ აძლევდნენ, რადგან იმისთანა უსამართლო საწყაოთი ირწყამდნენ პურსა, რომ კოდი ათ შაურად არ ჯდებოდა. შარშან ჭირნახული არ მოვიდა. ხალხს კოდ პურში ექვსი აბაზი მიუყარეს, ბაზარში-კი 4 მანათად ძლივს იშოვებოდა. ვსთქვათ, რის ვაივაგლახით იშოვა სოფელმა პური, რამდენიც მთავრობამ შეაწერა და ჩააბარა მაღაზიას. ორი-სამი კოდი რომ დაჰკლებოდა, მაშინვე ეგზეკუციას თორმეტი სალდათისაგან ჩაუყენებდნენ. სადილ-ვახშამს ვეგარდა სათითაოდ თხოულობდნენ სალდათები თითო ქათამსა და თუნგ ღვინოს. ამოდენი ხორაგი და სასმელი საჭიროა ატყუო, მაგრამ ჯიბრით და ბოროტებით იქცეოდნენ, რომ სისხლი ერწყევივნებინათ ხალხისათვის.

კაპიტან-ისპრავნიკები არხეინად ბრძანდებოდნენ, ხალხისთვის ზრუნვა-ფიქრით თავს არ იხეთქავდნენ, გულს არ იწყალებდნენ, და თუ ზრუნავდნენ, მხოლოდ მარტო საკუთარ ჯიბის გასქელებაზე. უსამართლო მსაჯულნი გაივისნენ და ჩაიქცნენ ქრთამებით. ჯერ არ გაგონილა, რომ აქაურ მოსა

მართლეს სამართალი ექნას და ვინმე მართალი დაეკმაყოფილებინოს. თქვენ თვითონ შეგიძლიანთ იხილოთ, რამოდენა ხანი ყრია თელავის სამსჯავროში საქმენი განურჩეველ-განუხილველი, რა არის ბლომად ქრთამი ავილოთ და ძღვენსაჩუქრებით გავიჩურთოთო. ფიცსა სდებენ მოხელე-მოსამართლენი, რომ ქრთამს არ შეეხონ და სიმართლე წაიმძღვარონ წინ საქმის გარჩევის დროს, მაგრამ ფიცსა სტეხენ და სვინდისს ღალატობენ. ცუდად მოქმედობს ხალხის ზნეობაზე ამგვარი საქციელი და ფიცის ტეხა. გონება-დაბნეული ერი ზნეობით იხრწნება.

სწუხს და შფოთავს სული ჩემი ამ სიბერისა და მოხუცებულობის ჟამსა, არ ვიცი, როგორ გავბედო და როგორ მოგახსენო ყველა ის ბოროტება, რომელიც საკუთარის თვალთ ვიხილე, ან გამიგონია სანდო და მართლ-მოყვარე კაცთაგან? უსამართლობამ სასოება დაუქარგა ხალხსა, მიიყვანა სასოწარკვეთილებამდის და იძულებულ ჰყო იარაღისთვის ხელი წამოეგლო. ბევრჯელ ვაცნობე და შევატყობინე, ვინც მოვალეა იცოდეს, თუ რა გაჭირვება დაადგა ერსა, თქვენ კი ვერ გაცოდინეთ, ვინაილგან დრო არ მქონდა. ჯერ ერთი, რომ დიდად შეგვაფიქროვა შავმა-ჭირმა და მეორეც ისა, რომ თქვენ სხვაგან იყავით წასული. ვისაც-კი შევატყობინე ხალხის გაჭირვება, ვსთხოვედი, უპატრონობა და უყურადღებობა ცუდს ნაყოფს მოიტანს მეთქი. მერწმუნეთ, ბატონო ჩემო, დიდი ხანია ხალხს ცეცხლი წაეკიდა, მაგრამ მის ჩაქრობას და განელებას არავინ ფიქრობდა. ხალხის მიდგომით არ მომდის, ამას რომ მოგახსენებთ, — ათავებს წერილს ბოლბელი, — მიკერძება და მიდგომა არ შეფერის ჩემ ხარისხსა. სიმართლით ვიტყვი, თქვენი ნდობა რომ არა ჰქონოდა ერსა, ავიზგიზებულ ცეცხლის ჩაქრობა დიდად რომ უფრო ძნელი იქნებოდა.

საქართველოს მარშალ გენერალ-მაიორ თ. თამაზ ორბელიანსაც დაეკითხა მარკიზი პაულუჩჩი - რა მიზეზია, რომ ასე მოულოდნელად იფეთქა ხალხის აჯანყებამაო. - ორბელიანის პასუხი თითქმის განმეორებაა უკვე ნათქვამისა, მაგრამ ჩვენ მაინც საჭიროდ მიგვაჩნია სავესებით მოვიყვანოთ

მარშლის პასუხი, რადგან თითო-ოროლა ადგილი წერილისა განსაკუთრებულის ელფერისაა და მშვენიერად ახასიათებს მალალ-ხარისხოვან მაშინდელ დროის ქართველ მოხელეს. ალაგ-ალაგ წერილს მკაფიოდ ეტყობა უკმაყოფილება თავად-აზნაურობისა ახალის მართვა-გამგეობის წესითა. ჩინოსან მოხელის პასუხი დიპლომატიის პილიპილითაა შეზავებული, ტონი ფრთხილი და წინ დახედულია. უკმენს და მიუქარებელს ტორმასოვს, ეტყობა, დიდად უტკენია გული ქართველ წარჩინებულ წოდებისათვის. ალბად, ეს უნდა იყვეს მიზეზი, რომ მარშალი, ევროპიულად რომ ვსთქვათ, ფრონდიორობს, ანუ ჩვენებურად ბუზღუნებს, თან უმაღლეს კარსაც თვალს არ ამორებს.

კახეთმა და ქიზიყმა რომ იარალი იხმარა რუსეთის მხედრობის წინააღმდეგ, - სწერს მარშალი, - როგორც დავრწმუნდი ერის მითქმა-მოთქმიდან წინად და ეხლა, ჩემის ფიქრით და გონებით, ესაა მიზეზი: 1. თქვენც კარგად მოგეხსენებათ, რომ ორი წელიწადი ზედი-ზედ მოუსაველობა იყო საქართველოში. 2. ჩაცვივება და ახირება მთავრობისა, გინდა თუ არა პური უნდა მოგვიზიდოთ ჯარის გამოსაკვებადო, მაშინ როდესაც ხალხს არ მოეპოვებოდა საკუთარის ოჯახის დასარჩენად ხორბალი. 3. მთავრობა გაჭირვეულდა, უსათუოდ ექვს აბაზად უნდა გვაძლიოთ - კოდი პურიო. ხალხი იძულებული იყო, რაკი ოჯახში არა ჰქონდა რა, ბაზარში ეყიდნა ხაზინისათვის კოდი 4 - 5 მანათად. ფულის საშოვნელად მამულსა და ცოლ-შვილს აგირავებდნენ. სწორედ ამ გაჭირვების დროს მთავრობამ გაიხსენა პურის ძველი, აუკრეფავი გადასახადი და შეუტია მკვიდრს, - ძველი ახალი და შეკრიბეთ და ჩაგვაბარეთო. 4. სასურსათო მოხელენი უზომოდ ატყუებდნენ ხალხს წონაში ამ მოუსაველობით გაჭირვებულ დროსა. 5. იგივე მოხელენი განძრახ აკიანურებდნენ კვირაობით პურის ჩაბარებას, რა არის ქრთამი დავციხეცლოთო. ძალაუნებურად ქრთამს აძლევდნენ, ოღონდ-კი მალე ჩაებარებინათ პური. გაჭირვებული კაცი, რაკი მობეზრდებოდა მალაზიასთან ტრიალი, თავს ანებებდა ურემსა და ხარ-კამეჩს და შინ გარბოდა.

გაქცეულს, რასაკვირველია, ქირაც ეკარგებოდა. 6. ვერცხლმ-ოყვარე სათემო მთავრობამ მდაბიო ერი (დედანში: *верх.*) მეტის მეტად შეავიწროა და შეაწუხა. 7. საითაც კი ჭარი დაიძვროდა, აუარებელი ბეგრის ურემი გაჰყავდათ. თქვენც კარგად მოგეხსენებათ, რამოდენა საქონელი გაწყდა ბეგარაზე, თითქმის მეოცედი ნაწილიც არ დაბრუნებულა შინ უვნებელი. ძვირად ნაყიდის საქონლის დაკარგვა სამუდამოდ აღატაკებდა გლეხ-კაცობას, 8. შინაური მართვა-გამგეობა საქართველოსი ანუ მთავრობის დაწესებულებანი არ შეეფერება აქაურ ხეპრე და გაუთლელ (დედანში: *рыбнѣ*) ერის ზნე-ხასიათსა. შეუფერებელ დაწესებულებას გენერალ ტორმასოვის დროიდან საგრძნობლად შეეპარა ბოროტ-მოქმედება, რომელიც უფრო ამწვავებდა საქმეს. 9. ხალხი ღრტვინავდა, ამოდენა ხარჯი და ბეგარა ჩვეულებრივ ღალა-კულუხის გარდა არც ერთ წინანდელ მთავრობის დროს არა ყოფილაო. წელში გაეწყდით, მეტის ატანა აღარ შეგვიძლიან, გაიძახოდა ხალხი, მთავრობა-კი ყურსაც არ იბერტყავდა. 10) ძლიერი სამხედრო ეგზეკუცია, რომელიც სრულებით არ შეეფერება კავკასიის ერის ზნე-ხასიათსა და ჩვეულება-ადათსა.

შეუძლებელია არა სცოდნოდა ხალხის გაქირვება თქვენს წინა მოადგილეს, კავალერიის გენერალ, ტორმასოვს, რომელსაც მრავალჯერ მოახსენეს, რომ უზომოდაა შეწუხებული მკვიდრიო. მაგრამ ტორმასოვი თავად-აზნაურობას პატივს არა სცემდა და ყურადღებას არ აქცევდა. რალაც მიუჭარებელი ადამიანი იყო, ზიზლით ეპყრობოდა ჩვენს რჩევას და ხალხის საჭიროებას. ეს იყო მიზეზი, რომ ჯერჯერობით მეცა და სხვებიც უკან შევდექით და არ მოგახსენეთ ყველაფერი თქვენცა, ვითარცა აქაური ქვეყნის ახალს უფროსსა და მმართველს. ამასობაში სრულიად მოულოდნელად იფეთქა ხალხის აჯანყებამ. პირადად მე არავითარი მოხსენება არ მიმიღია არც ერთი მარშლისაგან, რომ ხალხი ჰღელავსო. განათუ მარშლებს, სხვებსაც არაფერი არ შეუტყობინებიათ ჩვენთვის არც წერილით, არც სიტყვიერად. ჩემის ფიქრით,

ხალხი თუ აქამდის არ აჯანყდა, მიზეზი მხოლოდ ისაა, რომ ძლევა მოსილი მხედრობა მათის იმპერატორებითის უდიდებულებობისა ხალხს იფარავდა და იცავდა გარეშე მტრის შემოსევისაგან.

უმორჩილესად გთხოვთ, - ასე ათავებს წერილს თ. თამაზ ორბელიანი, - ზემორე ნათქვამი უმაღლესს კარს აცნობოთ.³³⁾

V

ქართლ-კახეთის მარშალ თ. თამაზ ორბელიანმა ფრთხილად, მაგრამ გულწრფელად მოახსენა მარკიზ პაულუჩჩის კახეთის ამბოხების მიზეზი. მოხსენებას თხოვნაც ზედ დააყოლა - უმაღლეს კარამდის მიიყვანე ჩემი მოხსენებაო. ეჭვი არაა, გუბერნიის მარშალს იმედი ჰქონდა, რაკი ყოვლად მოწყალე იმპერატორი ალექსანდრე პირველი შეიტყობს მოხელეთა უნამუსობას, კეთილ ინებებს და ბრძანებს, დაუყოვნებლივ ბოლო მოეღოს ამ საძაგლობასაო. მეფის სიტყვა ხუმრობა ხომ არ არის. თორმეტი წლის წინად იმპერატორი მფარველობას დაჰპირდა საქართველოს მანიფესტით და როგორ ინებებდა, რომ ძლევა-მოსილ მხედრობას მფარველობის მაგიერ ქვეყანა დაერბია და აეკლო.

საბუთებიდან არა ხჩანს, გაუგზავნა თუ არა მარკიზმა იმპერატორს ორბელიანის მოხსენება. იმის საბუთი-კია, რომ ორბელიანს ტკბილი ოცნება სავსებით გაუცრუვდა. - საზოგადოდ ბობოლა მოხელეს უყვარს ხელქვეითის დაჩაგვრა, დატუქსვა. ვინც მოხელე არა ყოფილა და გულმკერდი არა ჰქონია "გაპატიოსნებული" ჯვარმენდლით, ის ვერ გაითვალისწინებს ბობოლას ნეტარებას, როდესაც იგი მრისხანედ

33) იხ. АКТЫ, ტ. V, გვ. 65, 66, 83, 84. ქეეხა, ქედხული სპარსული სიტყვაა ჩვენებურად მამასახლისი.

ფეხებს აბაკუნებს და შიშისაგან გულწასული, ცოცხალ-მკვდარი მსხვერპლი თრთის და ძრწის წინაშე მისისა.

გუბერნიის მარშლობა ღღესაც დიდი თანამდებობაა, მაშინ ხომ უფრო დიდი იყო, მაგრამ მარკიზი არ მოერიდა მარშლის სიდიდეს და თამაზ ორბელიანს ნაობახტში უკრა თავი. დატუსალების მიზეზად ის მოუღო მარშალს, როგორ თუ დროზე არ შემატყობინე, კახეთში რომ ამბოხება მზადდებოდაო. რაკი მრისხანების ძალა აჩვენა საქართველოს დიდ თანამდებობის კაცს, რაკი პირდაპირ გააგებინა, რომ ჭია ხარ, მსურს გაგსრესავ, მსურს - გაბოგინებ ქვეყანაზედა, მარკიზი მოლბა და აღერსი დაუწყო. ჭერ სიტყვიერად მოიხადა ბოდიში და შემდეგ ასეთი წერილი მისწერა: სიტყვიერად განგიმარტეთ, თუ რამ მაიძულა თქვენი დატუსალება, მაგრამ, გატყობთ, ჭერაც არ დამშვიდებულხართ. ახლა წერილით გიმეორებთ, რა იყო თქვენის დატუსალების მიზეზი. ამბოხების ალი რომ გაძლიერდა, თქვენ შემატყობინეთ, მე კარგად ვიცი რამაც ააღელვა კახელობაო. ვითარცა თავად-აზნაურობის წინამძღოლი მოვალენი იყავით დროზე გეცნობებინათ ჩემთვის, თუ რა აწუხებდა კახეთის მკვიდრსა. რაკი ეს არ მოიქმედეთ, მეტი რა ჩარა იყო, იძულებული გავხდი ნაობახტში გამეგზავნეთ და დამესაჯეთ, ვინაიდან არ შეასრულეთ თქვენი მოვალეობა. ამ გვარის თქვენის დასჯით სხვა მარშლებს მაგალითი ვუჩვენე, ისინიც სასჯელს უნდა ელოდნენ, თუ კი რიგიანად არ ასრულებენ თავიანთ მოვალეობას. მარშლებმა კარგად უნდა იცოდნენ, რომ ხალხსა და მთავრობას შორის იგინი შუა-კაცები არიან.

ანკი რა ბევრი გავაჭრელო, წინადაც გამოგიცხადეთ და ეხლაც ფორმალურად გიცხადებთ, რომ თქვენი ბრწყინვალება არ უნდა თაკილობდეს დატუსალებას. არასოდეს ექვი არ შემპარვია გულში, რომ სრული ერთგული არა ბრძანდებით ხელმწიფე იმპერატორისა. მე კარგად ვიცი, თქვენი ბრწყინვალება ყელთამდე სავსეა ხელმწიფე იმპერატორის წყალობასიუხვითა და განა შემეძლო მეფიქრა, რომ გამოიჩენდით უმადურობას, რომელიც ასე არ შეეფერება საკუთარს თქვენს

სარფა-სიკეთესა და ეწინააღმდეგება პატიოსანის კაცის სახელსა.³⁴⁾

არაფრად ეკაშნიკებოდა ქართლ-კახეთის მარშალ თ. თამაზ ორბელიანს ჯერ დატუსაღება და მერე მოქარგული ენით შემკობა, მაგრამ რას იზამდა. მარკიზ პაულუჩჩიმ დიდი ხანია შეაჩვია საქართველოს დიდებულნი მრისხანე კილოსა. 1811 წელს მოსავალი არ მოვიდა. ამ უბედურებას ზედ დაემატა ჟამი, რომელმაც მთლად შეარყია ქვეყნის კეთილდღეობა. ადვილი მისახვედრია, რომ გლეხ-კაცობა პირნათლად ვერ შეასრულებდა თავისს მოვალეობას და ხაზინას ვერ ჩააბრიდა გაწერილ ხარჯსა. ეს ამბავი მარკიზმაც კარგად იცოდა, მაგრამ მაინც ისეთი წერილი გაუგზავნა 1811 წ. 15 ოქტომბერს გენერალ-მაიორ თ. თამაზ ორბელიანს: სახელმწიფო ექსპედიციამ შემატყობინა, - თქვენ გლეხ-კაცობაზე დარჩენილა წარსული წლებისა სასურსათო გადასახადი 751 კოდი და 5 ლიტრა პური; ქერი 458 კოდი და 7 $\frac{3}{4}$ ლიტრა და ამ 1811 წლისა პური 140 კოდი, ქერი 70 კოდი. ექსპედიციას ბევრჯელ უთხოვნია გადასახადის შეტანა, მაგრამ ყურიც არ გაგიბერტყიათო. გაოცებული ვარ ამ ამბით. დიდი პატივის მცემელი ვარ თქვენი, მაგრამ ყველაზე წინ მოვალეობას ვაყენებ და პირდაპირ მოგახსენებთ, არ გეკადრებათ ასეთი საქციელი. სახელმწიფო გადასახადი დროზე უნდა იხადოთ. თანამემამულეთა შორის ყველაზე წინ თქვენ დაგაყენათ ხელმწიფე იმპერატორმა, წყალობითა და ჯილდოთი გაგავსოთ და განა ასე დაჯილდოვებული მოვალე არა ხართ სხვებს მაგალითი უჩვენოთ? საზოგადოდ ასეა მიღებული: ვინც მეტი ჯილდო და საჩუქარი მიიღო, მეტი ერთგულობაც უნდა დაუმტკიცოს ხელმწიფე იმპერატორსა. რადგან თქვენი ბრწყინვალეობა სულ უკულმა იქცევით, იძულებული ვარ უმაღლესად მინიჭებულის უფლების ძალით მოგთხოვოთ, ხმის ამოუღებლივ წარუდგინოთ ხაზინას რაც პურია შეწერილი თქვენ გლეხ-კაცობაზე. ვადას ორ კვირას გაძღვეთ. უკეთუ თხოვნას არ

ასრულებთ, მაშინ, წინაღვე ბოდიშს ვიხდი, ჩემდა უნებურად ისეთს ღონეს ვიღონებ, რომ ვაი თუ სასიამოვნოდ არ დაგრჩეთ, მაგრამ, უკაცრავად კი ნუ ვიქნები, ვინაიდან მეც მოვალე ვარ ქვეყანას დავანახვო, რომ მთავრობა დიდსა და პატარას არ არჩევს და ყველას ერთნაირად უწევს პატრონობასა და ერთნაირად ანიჭებს მართლ-მსაჯულებასო.³⁵⁾

დაუტუქსავად არც მეორე დიდი ფეოდალი დაუტოვებია მარკიზსა. გენერალ-მაიორ თ. კონსტანტინე ივანეს ძე მუხრან-ბატონს არზით უთხოვინია პაულუჩისათვის, ხუთის წლით გამინთავისუფლე დიღმელი გლეხები სახელმწიფო ხარჯისაგანანაო. არზაზე აი რა პასუხს უგზავნის მარკიზი: ხელმწიფე იმპერატორმა წყალობით აგავსოთ თქვენცა და თქვენი გვარიცა. მაინც უმადურობას იჩენთ, რამაც გული მატკინა. თითქოს საკმარისი არ იყვეს, რომ ხელმწიფე იმპერატორმა გულკეთილობისა გამო გიწყალობათ ისეთი შემოსავლიანი სოფელი, როგორიცაა დიღომი და მაინც გაბედეთ და მთხოვთ დიღმელების განთავისუფლებას სახელმწიფო გადასახადისაგან ხუთის წლით. ალბად, გგონიათ, რომ ხელმწიფე იმპერატორმა მთელი თავისი წყალობანი და რუსეთის შემოსავალი მარტოოდენ საქართველოს უნდა მოახმაროს. პირუთენელად თქვენ თვითონ განსაჯეთ: რაც უნდა დიდი იყოს თქვენი სამსახური და ღვაწლი სამშობლოს წინაშე, რას იტყვიან თქვენივე მეზობლები, გლეხ-კაცობა რომ ხარჯისაგან გაგინთავისუფლო? განა ისინი კი არ მოითხოვენ ხარჯისაგან განთავისუფლებას, უკეთუ დავაკმაყოფილებთ თქვენს შეუფერებელს სურვილსა?

ჯერ დატუქსა მუხრან-ბატონი და მერე ფიანდაზად გაეშალა მარკიზი. ნუ გეწყინებათ, სიძარტლე მიყვარს და ის მაღაპარაკებსო. კვლავ იმისთანას ნურასა მთხოვთ, რომლის

ასრულებამაც სიმართლე გამამრუდებინოსო. ჭეშმარიტსა და მართალს სათხოვარს დიდის სიამოვნებით შეგისრულებთ. სწორედ ბედნიერად ჩავთვლი ჩემს თავს, თუ-კი რამეში გამოგადგებითო.³⁶⁾

ადამიანი კარგად უნდა ჩაუკვირდეს მარკიზის სიტყვა-პასუხსა, თორემ შეიძლება ჩვენი დასკვნა და აზრი არ შეიწყნაროს. მართლაც, ქება-დიდებას მეტი რა ეთქმის ქვეყნის გამგებელს, რომელსაც წინ წაუძღვარებია სიმართლე და თანასწორობა და რომელიც დიდსა და პატარას არ არჩევს? კანონიერ თხოვნას დიდის სიამოვნებით აგისრულებთ; თუ წარჩინებულნი ხართ, მაშ მაგალითი უნდა აძლიოთ სხვებს კანონიერ მოთხოვნის აღსრულებაშიო, ეს ყველა კარგი და პატიოსანი, მაგრამ მაგარი ისაა, რომ მარკიზმა ორთავ დიდებულნი ორბელიანი და მუხრან-ბატონი საყვედურით დაახრჩო: რომ თხოულობთ, რას თხოულობთ, განა დაგავიწყდათ ხელმწიფის უხვი წყალობა და ჯილდოებთო. როგორ გეკადრებათ რაისამე თხოვნა და კრინტის დაძვრა, როდესაც ასე უხვად ბრძანდებით დაჯილდოვებულნიო. გამოდის, რომ რაკი-კაცი ჯილდოს მიიღებს სამსახურისა და ღვაწლისათვის, პირი უნდა შეიკრას, ენა მუცელში ჩაიგდოს და მარტოოდენ მთავრობის კაცებს უცქიროს თვალსა და წარბში. ეს ის დამღუპველი და გამათახსირებელი ბიუროკრატიული სისტემაა, რომელიც ახალმა მთავრობამ მოსვლისთანავე შემოიღო ჩვენში და კოფოზე წამოასკუბა უთვისტომო, ხოლო ჩინოსანი მოხელე. - მუხრან-ბატონმა შეღავათი ითხოვა დიდმეღებისთვის შიმშილობის დროს, აქ რა არის ცუდი? მაშ როდის უნდა ამოეღო ხმა, თუ არ გაჭირვების დროს? ვინ იცის, ეგები მუხრან-ბატონს პირადი ანგარიშიც ჰქონდა, მაგრამ ისეთი მწარე და გესლიანი სიტყვა - ხელმწიფე იმპერატორმა მთელი თავისი წყალობანი და რუსეთის შემოსავალი განა მარტო

36) Ibid. გვ. 3. გენერალ-მაიორი კონსტანტინე ივანეს ძე მუხრან-ბატონი, ანუ რუსულად ბაგრატიონ-მუხრანელი, შემდეგ ტფილისის გუბერნიის მარშალ იყო. ქალაქებს ხელს ქართულად აწერდა. პაპა ან წინაზე გარდაცვლილ გუბერნიის მარშალ თ. ი. ბაგრატიონ-მუხრანელისა.

საქართველოს უნდა მოახმაროსო, - ყოველნაირ მადას დაუკარგავდა მთხოვნელს და ქვეყნისთვის ხმას ველარ ამოიღებდა. აკი. წააყვედრა თ. თამაზ ორბელიანმა მარკიზს-გენერალი ტორმასოვი ერთი რაღაც პირუბანელი რამ იყო, არავის იკარებდა, ჩვენ რჩევას არ ისმენდა, მატრაკვეცობას ხომ არ დავიწყებდით და წარა-მარა არზებით ხომ ვერ ვირბენდითო. ერთის სიტყვით, მორჩილებისა და სულის გატვრენის ეპოქა გაბატონდა საქართველოში და, ვაი იმას, ვინც გაჰბედავდა და ქვეყანას ჩააგდებდა ასამღვრეველ შედეგებულ ტბაში.

ჩვენიანი თუ ადვილად ვერა ჰბედავდა პროტესტის გამოცხადებას, ახლად გამოჩეკილი მოხელენი ენერგიას არ იშურებდნენ, რომ საკუთარის ხელით აეზვირთებინათ დამღორებული ზღვა და გაბეგრილ ხალხს მოთმინება დაჰკარგოდა.

რამდენიმე მაგალითი უსამართლოებისა ზემოდ დავასახელებთ. აბა რა პატრონობას გაუწევდა კახელობას. იმისთანა მოხელე, როგორცა ბრძანდებოდა სიღნაღის კაპიტან-ისპრავნიკი, ძილის გუდად გადაქცეული, რომელიც თვალს მხოლოდ მაშინ ახელდა, როდესაც ქრთამს დაანახებდნენ. ალბად, ბატონი კაპიტან-ისპრავნიკი დიდი მოტრფიალე ყოფილა ნუნუასი, თორემ შეუძლებელია დილიდან საღამომდინ იძინოს კაცმა. პატარა მოხელენი ისე უცქეროდნენ ერსა, როგორც მწველელ ფურსა. საბუთი და უფლება ჰქონდათ ასე მოქცეულიყვნენ, რადგან დიდები უარესსა სჩადიოდნენ. "წამწყმიდა წახედულობამაო", ტყუილად ხომ არ უთქვამს ჰირნახულს ერსა. "თევზი თავიდან აყროლდება" და, მართლაც, მარკიზ პაულუჩჩის დროს მართლმსაჯულებას ისეთი მყრალი კაცი უდგა სათავეში, რომ ქართველობას უეჭველია დაავიწყდებოდა ნეტარხსენებული კავალენსკი, პოლტავაში რომ გადაზიდა, რაც-კი ძვირფასი ნივთი და სამკაული მოეპოვებოდა მაშინდელ ქართველობას. რა შვილებიცა ბრძანდებოდნენ მაშინდელი მსაჯულები, რა ზნისა და ხასიათისა იყვნენ მოსამართლენი, ბრძანებს კაპიტანი ანოსოვი, იქიდან შეიძლება გაითვალისწინოს ადამიანმა, რომ თვით დარაჯი კანონისა, საქართველოს უმაღლესის მმართველობის პროკურორი

პლახოტინი "გაუამხანაგდა ტფილისში მცხოვრებ ებრაელებს და მათთან ერთად გააჩალა მაგარ სასმელებით ვაჭრობა და შელახა კანონი ღორმუცელა, ვერცხლისმოყვარე და ანგარებით გაუღენთილმა "კანონის დარაჯმა". პლახოტინი საზოგადოებას თარის დაკვრით და უწმაწურ სიმღერებით ართობდა, თანამღებობას კი ყურადღებას არ აქცევდა, რადგან თანამღებობისა არც თავი გაეგებოდა, არც ბოლო ესმოდა."³⁷⁾

ფრჩხილებში ჩასმული სიტყვები მარკიზისაა. პროკურორი პლახოტინი ზედგამოჭრილი მოხელეა მაშინდელის უკუღმართის დროისა და ამის გამო ვრცლად გაიმბობთ ამ საარაკო კაცის თავგადასავალსა.

მარკიზის წინამოადგილე გენერალ ტორმასოვმა პლახოტინი სატუსალოში ჩააგდო. დატუსალებული პროკურორი ისე გაკადნიერდა, რომ ხელმწიფესთან იჩივლა, უკანონოდ მომექცა მთავარ-მართველიო. წარმოიდგინეთ, არყით მოვაჭრე, ბალალაიკაზე დამკვრელი და უწმაწურ ლექსების მომღერალი პროკურორი უდანაშაულოდ უცვნიათ პეტერბურგში და გაუმართლებიათ - პროკურორის დატუსალება კანონის წინააღმდეგიაო. ეს ამბავი შეატყობინა პაულუჩის იუსტიციის მინისტრმა დმიტრიევმა. ცეცხლივით აენტო მარკიზი, ეს ქალაღი რომ წაიკითხა. უფრო ადრე გამომჟღავნდებოდა პლახოტინის ავკაცობა, უპასუხებს მარკიზი დმიტრიევს, ტორმასოვი რომ თავმდაბალი არა ყოფილიყოვო - და მოუყვება. პლახოტინის ამბავს.³⁸⁾

პლახოტინს წინადაც ვიცნობდი, რა შვილიცა ბრძანდებოდა: ბრიყვი, უზრდელი, გაუთლელი. რა საპროკურორო კაცია, ცხარობს მარკიზი. ჩემდა სამწუხაროდ, როგორიც ბრძანდებოდა წინად, აქ, საქართველოშიაც, ისეთივეა.

37) Утв. Т. II, гл. 342. დედანში: *завлвлялъ публику игрой на балалайкѣ и ппндем непристойныхъ пьесъ.* დ. ჩუბინაშვილი ბალალაიკას ასე სთარგმნის: ჩონგური, თარი, საზი. ბალალაიკა არც ერთი არაა. ეგ წმინდა რუსული საკრავია.

38) Агтц, т. V, гл. 11, 12, 13.

პლახოტინს არ ესმის, რა ხილია პროკურორობა, არა გაეგება რა კანონებისა და თავიც არა აქვს გაიგოს რაში, კიდეც რომ მოინდომოს. თავხედია და უზრდელი, ამასთანავე შესანიშნავად გაწაფული დავი-დარაბის ატეხაში. ხრიკების ისეთს ქსელს გააბამს, ისე ოსტატურად მოჩმახავს ქალაქს, რომ გულუბრყვილო ადამიანი ადვილად გაებმის ბაღეში. დასამტკიცებლად იმისა, თუ რა ნიჭისა და გონების პატრონია პლახოტინი, შემდეგს მოგახსენებ, სწერს პაულუჩჩი. პლახოტინი მსახურებდა საქართველოში 1807 წლამდე. განსვენებულ გენერალ თ. ციციშვილს გამოუგზავნეს პეტერბურგიდან სამოქალაქო საქმეთა მდივნად, მაგრამ ციციშვილმა რამდენისამე თვის შემდეგ გააგდო კანცელარიიდან. ამას შემდეგ როგორღაც მოახერხა და თავი ამოჰყო ისევ მდივნად სამოქალაქო და სისხლის სამართლის საქმეთა ექსპედიციაში. აქედანაც მალე გააძევეს, რადგან აბეზარი და მოუსვენარი ხასიათისა იყო. პლახოტინი მთავრობას ეხვეწებოდა, სადმე მაზრის სამსახულოში მაინც მომეციოთ მდივნის ადგილი, მაგრამ უარი უთხრეს, ამ პატარა თანამდებობის შესაფერისი ნიჭიც არა გაქვსო და საქართველოდან სამუდამოდ გააგდეს, თუმცა-კი ატესტატში ცუდი არაფერი ჩაუწერეს. განდევნილი საქართველოდან დიდ ხანს დახეტიალობდა მოლდავიაში, მაგრამ ვერც იქ იშოვნა სამსახური. მოლდავიიდან პეტერბურგს ავიდა და, ღმერთმა უწყის, რა გზით და რა ხრიკების წყალობით, სულ მცირე დროს გაიკრა მაღალმნიშვნელოვანი ადგილი საქართველოს პროკურორისა.

დიდი დანაშაული დააბრალა პლახოტინს მარკიზმა ერთს საპოლიტიკო საქმეში. - გენერალ ტორმასოვმა დაიჭირა ტფილისში იმერელი სიმონიკა ბარათაშვილი და სატუსალოში უკრა თავი. ბატონიშვილი ლევანი ოსეთში რომ იმყოფებოდა, თან ახლდა სიმონიკა. ოსეთიდან როგორღაც გაუსხლტა ყარაულებს და ტფილისს ჩამოიპარა. სიმონიკა ბარათაშვილი და მრავალი კიდეც სხვანი დაძვრებოდნენ ქართლსა და იმერეთში, ემალებოდნენ ყარაულებს, იგებდნენ რუსის მხედრობის ამბებს და ატყობინებდნენ იმერეთში სოლომონ მეორეს, ოსეთში

ბატონიშვილ ლევანს, სპარსეთში, ან დაღესტანს ბატონიშვილ ალექსანდრეს. რუსები გაფაციცებით აღევენებდნენ თვალყურსა სიმონიკასთანა კაცებს და, თუ კი შეიპყრობდნენ, ხელიდან აღარ უშვებდნენ. მართალია სიმონიკა ბარათაშვილს გასამტყუნარი ვერა უპოვნეს რა, მაგრამ მაინც შეიპყრეს, რადგან თავის პირით აღიარა - ბატონიშვილ ლევანს ვახლდი ოსეთშიო. ამას გარდა 1810 წელს იმერეთი აჯანყების კორიანტელში იყო გახვეული. ამბოხებას იმერეთის გამგე გენერალი სიმონოვიჩი 1811 წელსაც მოელოდა. მარტო ეს ექვიანობა საკმარისი საბუთი იყო ბარათაშვილის დასატუსაღებლად. - სრულიად მოულოდნელად პროკურორ პლახოტინმა მფარველობა გაუწია მემბოხეთა ერთგულ მეგობარს სიმონიკა ბარათაშვილს და თხოულობდა განთავისუფლებას. მარკიზის აზრით, რაკი ბარათაშვილს პოლიტიკური დანაშაული ჰბრალდებოდა, ზოგად კანონს ხმა უნდა ჩაეწყვიტა, მაგრამ, როგორც ეტყობა, პლახოტინი ახირებულა და თავისას არ იშლიდა - ბარათაშვილი უკანონოა და ტუსაღებულიო. - კეთილი განზრახვა ჰქონდა ამ საქმეში მეჭიანურე და მეღუქნე პროკურორს, თუ აქაც ანგარებამ, ან უბრალო ახირებამ იჩინა თავი, ვინ მიხვდება ეხლა, ასის წლის შემდეგ.³⁹⁾

1811 წელს შემოდგომაზე, ბატონიშვილი ლევან, სამის მხლებელ ოსით, ბორჯომის ხეობით მიიპარებოდა ახალციხეს და გოგიას ციხესთან (ავალიანთ ციხეა) წააწყდა ლეკების ბრბოს. სიცოცხლით სავსე ჭაბუკი, სულ რაღაც ჩვიდმეტ-თვრამეტი წლისა, ხანჯალზე ააგეს ლეკებმა. გასისხლიანებული ტანისამოსი ლევანისა და მოკვეთილი თავი ძღვნად მიართვეს ახალციხის ფაშა შერიფ ხიმშიაშვილს. შერიფმა კინალამ თავი მოიკლა მწუხარებით, ლევანის სიკვდილი რომ გაიგო, მაგრამ ტირილით რას უშველიდა.⁴⁰⁾ ლევანის სიკვდილმა სიმონიკა ბარათაშვილს უშველა. რაკი მემბოხე ბატონიშვილი წუთის-

39) ეს ის ადმინისტრაციული "უსმორჩენიეა", რომელიც დღესაც კანონსა სჩაგრავს.

40) ლევან ბატონიშვილის თავგადასავალს როდისმე უკამბობთ მკითხველს უბელურმა ლეკებმა თურმე არ იცოდნენ, ვინ ააგეს ხანჯლის წვერზე.

ოფელს გამოესალმა, ერთგულ ყმასაც შელავათი მისცეს და ციხიდან გამოუშვეს. სიმონოვიჩმა ნათესაებს ჩააბარა სიმონიკა თავდებობით და ამანათად საკუთარი შვილი წაართვეს.

ასეა თუ ისე, ბარათაშვილის გამოქომაგება დიდ დანაშაულად ჩაუთვალა პლახოტინს მარკიზმა პაულუჩჩიმ. ამდენი საქმის ჩამდენიო, სწერს პაულუჩჩი დმიტრიევს, ღირსი იყო რომ სამსახურიდან გადამეყენებინა და გათოკილი პეტერბურგს გამომეგზავნა, მაგრამ, თქვენი პატივისცემის გამო, ასე არ მოვიქეცი და გთხოვთ გადააყენოთ სამსახურიდან და რიგინი, კანონის მცოდნე კაცი დანიშნოთ პროკურორად საქართველოშიო. დიდად საჭიროა, აქაურმა მკვიდრმა შეიგნოს-რა დიდი მნიშვნელობა აქვს პროკურორის ხარისხსა. რაკი ღირსეული კაცი იქნება პროკურორად, აღარ მეწყინება და სათაკილოდაც არ მივიჩნევ, უკეთუ კანონის უცოდინარობას მომაგონებს, ვინაიდან სიყმაწვილიდან სამხედრო საქმეს ვემსახურები და საკვირველი არ არის, რომ სამოქალაქო კანონებში მოვიკოჭლებდეთ.

ასეთი ყოფილა "დარაჯი კანონისა" მაშინდელ საქართველოში. ადვილად გაიგებთ, თუ რანაირად იკანონებდა კანონი პროკურორ პლახოტინის ხელში. ან მისი ხელქვეითი და მსაჯულნი რა სამართალს დასთესდნენ ერში, ოდეს თვით მათი უფროსი არ უკადრისობდა მაგარის სასმელებით ვაჭრობას ებრაელებთან ერთად. კავალენსკიმ ციციშვილის დროს ბევთაბეგიშვილი გაიამზანაგა ხალხის დასარბევად, პლახოტინს ებრაელები ამოურჩევია. - ერთი რამ ვერ გამოვიკვლიეთ: ბალალაიკა-ჭიანურით სად ართობდა პლახოტინი პუბლიკას - ქუჩა-ქუჩა დადიოდა, თუ თვით სამსჯავრო დარბაზში!

VI

უსამართლო მართვა-გამგეობით, სიყმილ-შიმშილით და ეგზეკუციით გაბედნიერებულ საქართველოს ახალი უბედურობა დაატყდა თავსა. მთელი ექვსი წელიწადი, დაწყ-

ებული 1809 წლიდან 1816 წლამდე საშინლად მძვინვარებდა საქართველოს ტერიტორიაზე ყამი და ჰმუსრავდა უპატრონო და მშვიერ-მწყურვალ ქვეყანასა. შეშინებული მკვიდრი ცხვრის ფარასავით დაფთხა და მთასა და ტყეს მოედო თავის საშველად. თვით დედა-ქალაქი ტფილისი დაცარიელდა, რადგან მოქალაქენი გაიხიზნენ და იმალეობდნენ ზოგი ორთაჭალის ბაღებში და ზოგი კიდევ, ვინ იცის სადა. ულმობელი სენი განსაკუთრებული ძლიერებით აოხრებდა იმერეთს, მაგრამ ხერი არც ქართლ-კახეთისათვის დაუყრია. თავი იჩინა ჭირმა აგრედვე დარუბანდს, ჩრდილოეთ კავკასიაში და ახალციხის საფაშოში.

მაშინდელი მთავრობა ხერხსა და ღონეს არ იშურებდა, რომ მხედრობა მაინც გადაერჩინა სენის ბრძკუალებისაგან, მაგრამ ვერას ხლებოდა. ჭარის-კაციც ბლომად დაიღუპა, განსაკუთრებით ყაზახობა. საკარანტინო ინსპექტორის თანაშემწე თ. თუმანიშვილი და გენერალი სიმონოვიჩი გვიამბობენ: ანანურში ყამი მოესპეთ, მაგრამ ხელმეორედ ღონის ყაზახებმა შემოიტანესო: საქმე ასე ყოფილა. არაგვის პირზე ცხენები გაერეკათ საბალახოდ; ყაზახების ბინის ახლო მგზავრ ქართველებს დამე გაეთათ. მძინარე მგზავრებისთვის ყაზახებს მოეპარათ ქეჩა და უბრალო ხალიჩა და ჩამოეტანათ ყაზახთა პოსტზე. ქურდებს ქეჩა შუაზე გაეჭრათ და მიეყიდნათ ისევე ყაზახისთვის, რომელიც ავად გამხდარიყო ჭირით და გარდაცვლილიყო. ჭირის მოსასპობად გორიდან გაუგზავნიათ ს. ჩარტალში სამხედრო ექიმი კორალლი, მხლებელად თანაჰყოლია ექიმს ანანურელი ყაზახი, რომელსაც სოფელში ორი ტყაპუჭი მოეპარა. მეორე დღესვე ქურდი ყაზახი გარდაიცვალა, თან გადაჰყვა აფიცერი და სხვა ყაზახები. ერთ ყაზახს კიდევ გაეთხარა დამწვარი, ჭირნადგომი ნასახლარი და ორი ცელი ეშოვნა. დავლა ბინაზე მოეტანა და მოსპობილი სენი ხელახლა გააჩადა. სამაგალითოდ უნდა დაისაჯოს ცელის მომტანი ყაზახი, სწერს გენერალი სიმონოვიჩი მთავარ-მარ-

თებელს, რომ სხვა ყაზახებმა აღარ გაბედონ ჭირიან ადგილებიდან ნივთების აღება, თორემ სენს ბოლო არ მოეღებო. 41)

ტყუილადა ჰქონდა იმედი გენერალ სიმონოვიჩს, რომ სასტიკი სასჯელი, ან სასტიკივე ბრძანება მოაშლევინებდა მაშინდელს ყაზახს ქურდ-ბაცაცობას. ქურდობდა და მტაცებლობდა ყაზახი განა მარტო ჩვენში, იქ, სამშობლოშიც მოტრფიალე თვალთ უცქეროდა მეზობლის დოვლათ-ზინათსა და თუ კი დროს იხელთებდა, უსათუოდ ასწაპნიდა რაცკი მოხვედებოდა ხელში. აბა რა მოსაპარია მგზავრი კაცის ქეჩა, ან ჩარტალელი გლეხის წუწიანი ტყაპუჭი (დედანი: овчина) ვინ ოხერი გასთხრის ღამე, მალულად ჭირიან ნასახლარს, (დედანი: сараи). რომ ორიოდე ჟანგიანი ცელი მოიპაროს! გლეხი კაცის გადამწვარ ქონში განა რა ოქროს ზოდები იქნებოდა ჩაფლული! ხასიათი, ბუნებაა, თორემ რა ყრია ან ქეჩა ტყაპუჭაში, ან ცელებში.

1815 წ. გენერალი დელპოცო სამწუხარო ამბავს ატყობინებს გეორგიევსკიდან მთავარ-მართებელ რტიშჩევს, დონელ ყაზახთა ბინაზე, მიხეილის პოსტზე, მცირე აბაზიის პირდაპირ, ჟამი გაჩნდაო; ერთი კვირის განმავლობაში გარდაიცვალა 2 ურიადნიკი და 14 ყაზახი; ერთი ურიადნიკი, 5 ყაზახი და ერთი დედა-კაცი ავად არიანო. საიდან შემოიტანეს სენი მიხეილის პოსტზე, დანამდვილებით ვერ შევიტყვე, რადგან პოსტის უფროსი ასისტავი ლიახოვი და ჯოგის ყარაული ყაზახი, რომელზედაც ეჭვი მქონდა, თუ შემოიტანდნენ, სწორედ ესენიო, ჟამისაგან დაიხოცნენო. - გენერალი დელპოცო ასე ახასიათებს ლიახოვს და საზოგადოდ ლინიის ყაზახობას: მე მგონია, მოახსენებს დელპოცო რტიშჩევს, რომ ამ უბედურობის თავი და თავი მიზეზი ყაზახობაა. ვის არ მოეხსენება, რაწნაირად ეტანება ყაზახი დავლას. ძვალსა და რბილში აქვს გამჭდარი ტაციობის სენი. ცხადია, რომ ასის თავი ლიახოვი და ყაზახთა ჯოგის ყარაული ხელთ იგდებდნენ საზღვარგარეთიდან შემოტანილ აზიის საქონელს, მიარიგ-

41) Акты, т. V, гл. 349, 350, 351.

მოარიგებდნენ და ამგვარად სიხარბით დაბრმავებულებმა თავიანთი თავიც დალუპეს და სხვანიც თან ჩაიყოლიეს. დამნაშავეის აღმოჩენა შეუძლებელია, რადგან ყველანი წუთი-სოფელს გამოესალმნენ. ჟამის შემოტანის მიზეზი ეგები ისაა, რომ ყაზახი, ვითარცა გაუთლელისა და ველური კაცის წესი და ადათია, სულ უბრალოდ თავს წაიხდენს, ოღონდ რამე იშოვნოს. საშოვარის მოტრფიალე აღარ დაგიდევს, რა ზარალი მოჰყვება მის საქციელს. ღვთის წინაშე, ისიც უნდა სთქვას კაცმა, რომ ლინიის ყაზახი იძულებულია ისაძაგლოს და იქურდოს. აგერ მეორე წელიწადია და ჯერ ცხენების საკვები არ მიუღიათ. წელიწადში სულ 12 მანეთი ჯამაგირი აქვს და როგორ დაირჩინოს თავი, ან ცხენი როგორ გამოკვებოს თორმეტი მანეთით? ბევრს ცხენი მოუკვდა და ღონე არა აქვს მეორე იყიდოს. ბევრი გაკეთებული ოჯახი დაილუპა, რადგან ოჯახის მომვლელად მარტო მოხუცებულები და ბავშვები რჩებიან შინ. ზნემაღალი ადამიანი ქურდობას არ იკადრებს, რაც უნდა გაჰკირვება მიადგეს კარსა, მტკიცე ხასიათი დროზე შეაჩერებს, შეაკავებს და საძაგლობაზე ხელს აალებინებს, მაგრამ საქმეც ისაა, რომ ყაზახს ზნე-ხასიათი ძალიან სუსტად აქვს განვითარებულიო.⁴²⁾

ფრიად საყურადღებო ამბავს გვატყობინებს გენერალი დელბოცო. სწორედ რომ დაუჯერებელი ამბავია და გონებას ვერ გაუთვალისწინებია, როგორ უნდა ირჩინოს თავი ცხენიანმა კაცმა წელიწადში თორმეტ მანეთად? ეს ხომ იმასა ჰგავს, დედინაცვალმა მწყემსი ობოლი რომ სამწყსოდ გაგზავნა, ერთი პური გაატანა და ასე დააბარა: შენცა სჭამე, გამვლელ-გამომვლელსაც აჭამე და შინაც მთელი მოიტანეო. - ლინიის ყაზახს, ბრძანებს დელბოცო, ზნეობა ნაკლებად აქვს განვითარებულიო. ანგელოზიც რომ იყოს ადამიანი, თავს ვერ დაირჩენს და ცხენს ვერ გამოკვებავს წელიწადში 12 მანეთად. მაშინდელი მანეთი დღევანდელ სამსაც რომ უდრიდეს, მაინც შეუძლებელია 36 მანეთად თავის გატანა და ცხენის შენახვა.

ძალა-უნებურად თვალი აქეთ-იქით უნდა აცეცო და საზრდო მოიპოვო კანონის მიერ აღკრძალულის გზით. დელპოცოს მოწმობა საბუთს გვაძლევს ვიფიქროთ, რომ მაშინდელი ღროის ყაზახთა რაზმები რეგულიარულ ჯარად არ ითვლებოდა და მთავრობა, ალბად, იძულებული იყო თვალი დაეხუჭა და ყური მოეყრუა, როცა შეატყობინებდნენ, - ყაზახებმა სოფელი აიკლეს, ესა და ეს გაძარცვეს, ესა და ეს დაარბიესო.⁴³⁾

ბატონიშვილ დავითმა გენერალ ტორმასოვს დააბრალა, ახალციხიდან მაგან ჩამოიტანა ყამი ქართლ-კახეთშიო. მართლაც, პირველად რუსის მხედრობაში ახალციხესთან იჩინა სენმა თავი. ტორმასოვმა 1810 წ. შემოდგომაზე ალყა შემოარტყა ახალციხეს და ნოემბრის მიწურულეებში იმედიცა ჰქონდა, რომ ბოლოს მოუღებდა შარიფ-ფაშას და თვით ახალციხეს. მაღალი კლდე ყაია-ბაში, რომელიც თავს დაჰყურებდა ციხეს, რუსებმა ხელთ იგდეს და სეტყვასავით აყრიდნენ აქედგან შუაგულ ციხეს ტყვიასა და ყუმბარას. 19 ნოემბერს ტორმასოვმა ბატარეია მოაწყო კოკოლა-საყდრის მაღლობზე, ზედ აიტანა ორი მძიმე თორმეტ გირვანქა ყუმბარიანი ზარბაზანი და ორი ფილთა (მორტირა)⁴⁴⁾. 22 ნოემბრიდან დაწყებული ოთხის დღის განმავლობაში თითქმის აამტუტა ტორმასოვმა ახალციხის ციხე, თუმცა ალებით მაინც ვერ აიღო. ხის შენობანი მთლად დაიწვა, ქვისა ნახევრად დაინგრა. შარიფას პალატებს ცეცხლი გაუჩნდა, მეციხოვნენი დაწიოკდნენ, მაგ-

43) ამ თვით დელპოცოს სიტყვები: "Всѣ казачьи войска другой годъ не получаютъ фуража; должны содержать и себя и лошадей своихъ изъ одного жалованья, состоящаго изъ 12 р. въ годъ".

44) უგემურად იციან ხოლმე დამახინჯება ჩვენებურის სიტყვა-სახელისა. სუფთა ქართული "კოკოლას საყდარი, ასეა დოკუმენტებში მოხატოლული: კოკოლა სერდარი. სად ყიზილბაშური სერდარი, ანუ სარდალი და სად საყდარი-ეკლესია. ოსმალურთან მწყურალად გახლავართ, მაგრამ რამდენადაც გვსმენია "Кая-паша" კი არა ჰქვიან კლდეს, არამედ Кая-паша ბაში თავია.

რამ ტორმასოვმა მაინც იერიში არ მიიტანა და შარიფ-ფაშას შეუთვალა, ციხე დამანებო. ვერ მოგართვით, შემოუთვალა შარიფმა.⁴⁵⁾ მაშ ლტოლვილი იმერეთის მეფე სოლომონ მეორე მაინც მომეცი და ციხიდან განდევნე ლეკებით. - ლეკები დიდი ხანია გაიქცნენ, მეფე სოლომონი-კი ერევანს წავიდაო, შემოუთვალა შარიფმა. - ამ პასუხის შემდეგ ტორმასოვი აიყარა და ტფილისს წავიდა აწყურის გზით.

მიზეზი ასე უსახელოდ დაბრუნებისა ახალციხიდან სულ უბრალო იყო. ტორმასოვის ლაშქარში ყამი გაჩნდა და პირველად ექვსი ქართველი მილიციონერი იმსხვერპლა. ტორმასოვის მხედრობას შეუერთდა იმერეთიდან მოსული ზეკარის უღელტეხილით სიმონოვიჩის ჯარი და ალბად, ამ ჯარმა თუ გადმოიტანა მმუსრავი სენი. ტორმასოვს შეეშინდა ჭირისა, საჩქაროდ წამოვიდა და ფიცხელი ბრძანება გაუგზავნა საქართველოს გამგე გენერალ-მაიორ ახვერდოვს და პოლკოვნიკ სტალს - საქართველოს ყველა შესავალ გზებზე კარანტინები დააწესეთო.⁴⁶⁾

საიდან შემოვიდა საქართველოში ჭირი, დარწმუნებით ვერ ვიტყვით. თვით ტორმასოვმა ვერ გამოარკვია, საიდან შემოეპარა ტფილისს სენი. "ღმერთმა უწყის, რა გზით შემოვიდა ქალაქში სენიო". კაპიტანი ანოსოვი ჰფიქრობს, რომ ყამი საქართველოში 1811 წ. გაჩნდა დარუბანდიდან, უფრო კი იმერეთიდანაო.⁴⁷⁾

ჩვენთვის სულ ერთია, საიდან გვესტუმრა ყამი, იმერეთიდან, ახალციხიდან, თუ დარუბანდიდან. საყურადღებო

45) დანამდვილებით არ ვიცით-რა გვარისაა შარიფი. ბატონიშვილი დავით ათაბაგის გვარისად სთვლის, სელომს-კი ნიშნისაშვილად. იხ. მასალები... გვ. 64, 69. ბროსივც გადაწყვეტილს არას ამბობს. "ძნელია იმის გამორკვევა, ვისი შთამომავალი არიან საათაბაგოს უკანასკნელი მმართველნიო". იხ. მარი ბროსივს საქართველოს ისტორია, ნაწილი II, გვ. 154.

46) გენერალი ახვერდოვი, გვარით ბუბულაშვილი, ქრცხინვალელი მოსახლე სომეხია. მასალები... გვ. 106.

47) უნ. ტ. II, გვ. 268.

ისაა, რომ ისედაც შეწუხებულს ქართლ-კახეთს ცალკე შიმშილით და ცალკე უხეირო მართვა-გამგეობით და საეგზეკუციო კამანდებით ახალი უბედურობა დაატყდა თავსა. მარტო 1811 წ. ჟამმა იმსხვერპლა 2042 მამა-კაცი, 1646 დედა-კაცი, 567 ბავშვი; მორჩენილა: 514 მამა-კაცი, 531 დედა-კაცი და 155 ბავშვი. კარანტინებში ჰყოლიათ გაჩერებული როგორც საექვო ავადმყოფნი: 266 მამა-კაცი, 276 დედა-კაცი და 89 ბავშვი. იმავე კარანტინებში გაუჩერებიათ ჯან-სალნი: 393 მამა-კაცი, 410 დედა-კაცი და 31 ბავშვი.⁴⁸⁾

კარანტინები იყო დაწესებული ს. ჭალას, მცხეთას, დმანისს და ტფილისში სამი: აბანოებთან, ავლაბარში და წავკისის გზაზე. სხვა გზით ხალხს არ უშვებდნენ ქალაქში. თითო კარანტინში უსათუოდ იყო ერთი კამისარი, ერთი ექიმი და თარჯიმანი, რომელსაც, თუ რუსულად ვერ მოახერხებდა გამვლელ-გამომვლელის სახელისა და გვარის დაწერას, შეეძლო ქართულად შეედგინა სია. კარანტინებში ხმარობდნენ ხალხისა და ნივთების საპკურებლად დოქტორ გიტონ-დემორვოს რაღაც გაზსა. წესი და რიგი ამ გაზის ხმარებისა შეემუშავებინა სამხედრო ექიმს, მედიცინის დოქტორს კრეიტონს. მარკიზი პაულუჩჩი დიდად აფასებდა დე-მორვოს გაზსა და კრეიტონის წამლობას, სასწაულსავით მოქმედობსო, მაგრამ ქართველობას არა სწამდა არც მორვოს გაზი და არც კრეიტონის ჯანაოზობა. ტყესა და მთას უფრო ენდობოდა და ქუდ-მოგლეჯილი გარბოდა ჭირიან ქალაქიდან ორთაქალის, და ღირსიქალის ბაღებში და უფრო შორს, სადაც, მისის ფიქრით, ჭირი ვერ უწევდა. ლტოლვილთა რიცხვი 1811 წლის შემოდგომაზე 10,000 სული იყო. ხალხი სიცივიტ კანკალეზდა, ბავშვობა იყლიტებოდა, მაგრამ ნებით არა ბრუნდებოდა ქალაქში, ვიდრე მარკიზმა ძალად არ შემოარეკინა.

მაშინდელი ბრძოლა ჟამთან იგივე იარაღის ჩხარუნი იყო, სხვა არაფერი. კავკასიის გუბერნიის სამხედრო გუბერნატორი ბრისკორნი ასე გვისურათებს ბრძოლას. გაჩ-

ნდა თუ არა ს. ობილნოეში ჟამი, სამხედრო ყარაული შემოვარტყი, არც არავინ შევეუშვი შიგა და არც არავინ გამომიშვიაო. თვით სოფელში მოვსპე მისვლა-მოსვლა ერთის ოჯახისა მეორესთან. იმ სახლს, სადაც ჟამია, ყარაული შემოვარტყიო; ნივთები და ავეჯი ცალკე შენობაში დავალაგებინე. ვისაც სოფლიდან გასვლა ესაჭიროება, სასტიკ კარანტინში უნდა დარჩეს რამდენიმე დღე, ნივთებსა და ტანისამოსს აპკურებენ და მხოლოდ მერმე გაუშვებენ სხვაგან წასასვლელადო. - თუ საყარაულოდ გუბერნატორმა ბრისკორნმა დონის მშვიერი ყაზახები მიუჩინა ობილნოელუბს, კაი ხეირსაც დააყრიდნენ "ცალკე შენობაში" დალაგებულს ნივთსა და ავეჯსა.⁴⁹⁾

ტფილისში ჟამის მოსასპობად მარკიზ პაულუჩჩიმ განსაკუთრებული კამიტეტი დააწესა, სახელად "მცხოვრებთა ჯანმრთელობაზე მზრუნავი კამიტეტი". თავმჯდომარედ გაუჩინა კამიტეტს თ. დარჩია ბებუთაშვილი. წევრებად დაინიშნენ: ტფილისის კამენდანტი პოდპოლკოვნიკი ლევენცოვი, საექიმო გამგეობის ინსპექტორი ექიმი რიზენკო, სამხედრო დოქტორი პრიბილი, დახელოვნებული გადამღებ სენთან ბრძოლაში, ტფილისის ნაცვალი, ანუ პოლიცემისტერი და ერთიც საპატიო მოქალაქე. - კამიტეტის დაარსების ამბავს მოახსენებს მარკიზი პოლიციის მინისტრს ბალაშოვს და ამგვარ ატესტაციას უკეთებს დარჩია ბებუთაშვილს: ტფილისის მკვიდრთა შორის ყველაზე საპატიო კაცი დარჩია ბებუთაშვილია, ზედ მიწევნით იცნობს დიდსა და პატარას, ყველასაგან პატივცემულია და დიდი გავლენა აქვს ქალაქელებზეო. მეფობის დროს ქალაქის საქმეებს დარჩია განაგებდა, რუსის მთავრობის ერთგულია, რაიცა არა ერთგუობით დაუმტკიცებიაო.⁵⁰⁾

კამიტეტის თავმჯდომარე ჩვენი კაცია და, როგორცა სჩანს საბუთებიდან, დარჩია ბებუთაშვილს ქართული, შინაური წამლობა უფრო სწამდა, ვიდრე ექიმ ღე-მორვოს

49) Ibid. გვ. 347.

50) Ibid. გვ. 31.

გაზი და ღოქტორ კრეიტონის დარიგებანი. კარანტინებში დარჩიამ უპირატესობა ძმარსა და მარილ წყალს დაუთმო. ქალაქში შემოსასვლელ კარებებთან გამართულ კარანტინებში ბებუთაშვილმა დაადგმევინა ხარხები. საკმელ-სასმლის მომტანი სოფლელობა ხარხებს იქით იღვა, აქედან კიდევ მოქალაქენი. აღკრძალული ჰქონდათ ერთმანეთის მიკარება და შეხება. საქონლის ფასში რომ შერიგდებოდნენ მსყიდველ-გამსყიდველი, ნავაჭრ საქონელს ხარხების ქვეშ გამ-ოახოხებდნენ და მსყიდველები ჩაიბარებდნენ. მერმე ფულებს თეფშებზე დაალაგებდნენ, ამოავლებდნენ ძმარში და მხოლოდ ამის შემდეგ ხარხსას ქვეშ გაახოხებდნენ. ჩაიბარებდა გამყი-დავი გარეცხილ ფულს და შინ მიდიოდა. სჯეროდა სოფელს უებრობა ამ წამლისა, თუ არა, ღმერთმა უწყის, ან რა თვალით უყურებდნენ კარანტინის ექიმები დარჩიას ოსტატობას, საბ-უთებიდან არა სჩანს.

ასე იკვებებოდა ტფილისი 1811 წელსა და 1812 წ. გაზაფხულზე. ხუთ აპრილს 1812 წ. მარკიზმა სიხარულით აუწყა ბალაშოვს, ჟამი სრულიად მოისპო, შიში აღარაფრისაა, ფულიც აგრე რიგად ბევრი არა დახარჯულა რა, სულ რაღაც 3000 მ. თეთრი, ლტოლვილი ქალაქელობაც ბალებიდან ოჯახებში დაბრუნდაო.⁵¹⁾

ტყუილად დაიტრაბახა მარკიზმა, სენი მოისპოვო. ჟამი იფეთქებდა ხოლმე საქართველოს სხვა-და-სხვა ადგილს თითქმის 1816 წლამდე. მაგალითად, ქართლში 1815 წ. აი სადა და სადა ყოფილა ჭირიანობა: ვარიანში მომკვდარა ერთი დედაკაცი და 10 სული საექვო ავადმყოფობით გამხდარა ავად. ქვემო-ნიქოზში ხუთი მომკვდარა და 17 სული საექვო აღმო-ჩენილა, ს. ერედვიში ჭირი აუტანია ქვემო-ნიქოზიდან ოსის დედა-კაცს, სულ რაღაც ორიოდე საათი გაჩერებულა ერთ ნაცნობ ოჯახში, მეორეში ღამე გაუთევია და მერმე ოსეთში წასულა. მოსდებია ამ ოჯახებს ჟამი და მუსრი გაუვლია, გაწყვეტილა 12 სული. საექიმოდ ღივიზიის ღოქტორი

51) Ibid. გვ. 32.

მინერვინი რომ მისულა, კიდეც ყოფილა ამ ორ ოჯახში ორი ღელა-კაცი ავადმყოფი და 5 საეჭვო. მინერვინს ერთ ქოხმახში სამი ჭირიანი მიცვალებული უნახავს. რადგან ერედველები დამფრთხლან და ზედ არავინ ეკარებოდა, მინერვინს ცეცხლი მოუკიდებია სახლისთვის და მკვდრებთან ერთად დაუწვავს, ს. ზერტში 10 გარდაცვლილა, და ავადმყოფი უნახავს მინერვინს 28 საეჭვო. ჟამს უჩენია თავი აგრედვე კირბალში, გორში, სასირეთში, ქვემო-ხანდაკში, სადაც შემოუტანიათ სენი მათხოვარა ჭავახებს, დოესში, ქვაყრილში, წილკანში და მქალის-ჭვარში.⁵²⁾

დაწვრილებით ჟამის ამბავი განძრახ მოვიხსენიეთ. მრავლად დამართულმა კარანტინებმა თითქმის შესწყვიტეს მისვლა-მოსვლა ტფილისსა და სოფლებთა შორის, სადაც სანაქებოდ პარპაშობდა საეგზეკუციო კამანდები. აღეღება რომ ჩააქრო კახეთში მარკიზმა, ხალხსა და თავად-აზნაურობას უსაყვედურა, რატომ დროზე არ მატყობინებდით მოხელეთა საძაგლობასა, რატომ საჩივარი არ შემოგქონდათ ჩემთან, ხომ კარგად იცოდით, რომ ჩემი კარი ღიაა მთხოვნელ-მომჩივარისთვისაო. - სიტყვით ადვილი სათქმელია, კარი ღია მაქვს, თამამად შეგიძლიანთ საჩივარი მომართვათო, მაგრამ საქმით სულ-სხვა იყო. ჯერ ერთი ადგილობრივი მოხელენი საჩივარსა ჰმალავდნენ და ქალაქში არა ჰგზავნიდნენ. მეორე კიდეც ისაა, რომ ვსთქვათ გამწარებულმა კაცმა განიძრახა პირდაპირ მთავარმართებლის ნახვა, აიბარგა და დაიძრა ტფილისისკენ. ადგილობრივი მოხელენი ხშირად ბილეთს არ აძლევდნენ ტფილისში თავისუფლად შესვლისას, ან ღიდის ხნით აჩერებდნენ მცხეთის კარანტინში. ცხადია ასეთივე დაბრკოლება იქნებოდა გამეფებული დანარჩენ კარანტინებშიაც. შინიდან წამოღებული საგზალ-ნუგზალი შემოეხარჯებოდა კარანტინში მომჩივარს და ხელ-ცარიელი იქიდან უკანვე ბრუნდებოდა, რადგან ტფილისში შესვლას ველარც-კი ჰბედავდა, ვაი თუ ქალაქში მშვიერ-მწყურვალნი გადვილრძო, ან

სიცივისაგან გავიფიჩხოვო. ამ მიზეზს ასახელებს გამომძიებელი კამისია იმის გამოსარკვევად, თუ რატომ არ ჩამოდიოდნენ საჩივლელად მოხელეთაგან ტანჯულ-წამებულნი.⁵³⁾

შეუძლებელია მარკიზს არა სცოდნოდა, თუ რა ხდებოდა ობობას ქსელად გადაქცეულ კარანტინებში, მაგრამ მაინც პაულუჩჩი თავმომწონეთ ატყობინებს პოლიციის მინისტრ ბალაშოვს 1811 წ. 12 ნოემბრის თარიღით: ყოველ დღე მოველი, რომ ჟამი მეც შემხვდება, რადგან ჭირიანი ადგილებიდან აუარებელი ქალაქი მომდის. მცხოვრებლებიც განუწყვეტლივ შემოდინან ჩემთან საჩივრებით და ხომ მოგეხსენებათ, რა მოუთმენლები არიან აზიელები. მეორე დღესვე თუ პასუხი არ მიეცი საჩივარზე, თავს იკლავენ და წუწუნებენ - სამართალს ვერ ველირსეთო. დიდათა ვფრთხილობ, მაგრამ რას იზამ, ჭირს სად გაექცევი. თვით კანცელარიაში შემომეპარა სენი და ხაზინდარი ხორუნიჟი ბატალშიკოვი მომიკლაო.⁵⁴⁾

ასე იცოდნენ თავის მართლება განა მარტო მარკიზმა, სხვებმაც. ორი ათასის ვერსის სიშორეზე მყოფი პოლიციის მინისტრი ბალაშოვი განა კი დაფიქრდებოდა, ეგები სიტყვა სხვაა და შეიძლება საქმე სხვა იყოსო. ქალაქზე ხომ კონტად იყო გამოყვანილი, საქართველო ბედნიერია მხნე მთავარმართებლის ხელშიო და სხვისა რილასი დარდი ექმნებოდა.

VII

რუსის მართვა-გამგეობამ იმედი გაუცრაუა ქართველობას. ან-კი როგორ აიტანდა კაპიტან-ისპრავნიკების და ვახტერების ბატონობას, ან მეჭიანურე პროკურორის ლაზღანდარობას? იმედ გაცრუებული ერი ხან-და-ხნობით ხმას

53) УТВ... т. II, гл. 341 - 342.

54) Акты, т. V, гл. 33.

იმალლებდა და იარაღით დააპირებდა ხოლმე დაკარგულ უფლების დაბრუნებას. კმაყოფილი არ იყო რუსის მართვა-გამგეობისა სამღვდულოებაც. მართალია, კათოლიკოსი ანტონი მეორე ჯერ არ ჩამოეგდოთ ტახტიდან, მაგრამ ყველაფრიდან სჩანდა, რომ ივერიის თავისუფალი ეკლესია დიდხანს ვეღარ იბოგინებდა. კილო და მოქმედება თ. პ. დ. ციციშვილისა სახეიროს არას უქადა ძველის-ძველ ავტოკეფალურ საყდარსა. ეპარქიები შეამცირეს, მრავალი სამრევლო ეკლესია დახურეს, გააუქმეს საეკლესიო მამულები და ხაზინას ჩააბარეს მათი მოვლა-პატრონობა. საეკლესიო მამულების გამგე მოურავები საეკლესიო აზნაურნი გაირიყნენ და მშვირ-მწყურვალი იხოცებოდნენ. ასეთი ძალმომრეობის გამო აიმრიზა სასულიერო წოდება და ულუკმა-პუროდ დარჩენილი საეკლესიო აზნაურობა. ასეთ გუნებაზე დაყენებული სამღვდულოება და აზნაურობა მუდამ მზად იყო აჯანყების დროშა აფერიალებინა რუსების წინააღმდეგ და მართლაც არც ერთს ამბობნებას ისე არ ჩაუვლია საქართველოში, რომ მღვდელსა და ბერსა და საეკლესიო აზნაურს მხურვალე მონაწილეობა არ მიეღო უკმაყოფილების ცეცხლის გაღუებაში. თუ კი სადმე იპრიალებდა ცეცხლი, ესენიც უსათუოდ მუგუზალს მიუმატებდნენ ხოლმე. ესაა მხოლოდ სათქმელი, რომ ერთობა არ იყო. ერთი რომ ხალხს უჩხიკინებდა და აჯანყების გზაზე აყენებდა, მეორე ენატანიაობას რჩეობდა და აბეზლებდა მრევლს მთავრობასთან ჯილდოს დასაცინცლად. ქვემოდ დაწვრილებით იქნება მოხსენებული, თუ რა უპატიოსნო ხელობა იკისრა თელავის კარის მოძღვარმა არქიმანდრიტ ელევთერ ზუკაკიშვილმა, როგორ განუდგა სამწყსოს და მაინც სულ წაწყმედილი მოძღვარი დაუჯილდოვებელი დარჩა, ასე რომ საქმე სახვეწურად გაუხდა.

სწორედ ასეთივე ბედი ზედა წილად ჩვენს მოწინავე წოდებას - თავადობას. მაღლიერი არავინ იყო რუსობისა, ვერ შეეთვისა მათს ზნე-ხასიათსა, არ მოსწონდა ახალი მართვა-გამგეობა, ოცნებობდა, ნატრობდა ძველ დროსა და ყამსა, ელანდებოდა გმირი მეფე, მისი ქველობა - ვაჟკაცობა და სულ

იმის ფიქრში იყო - როდის იქნება მალე წავიდნენ ჰროლა თვალებიანი და ქერა-თმიანი სტუმრებიო. დიად, ასეთი იყო სულის ვითარება მაშინდელის თავადისა. ამბოხების გუნებაზე დამღარი თავადი ხმალსა და თოფს არ ერიდებოდა და ოცნების განსახორციელებლად ბევრისაგან ბევრი თავს აკლავდა მტერსა, ჰკარგავდა ქონებას; ბევრს უთელია ყინულიან ციმბირის უგზო-უკვლო ველ-მინდორი და დაბურული ტყე-ღრენი, ბევრი სამუდამოდ გადახვეწილა ოსმალეთს, ან სპარსეთში, მაგრამ მაინც სიმტკიცე არა ჰქონდათ. საქმეს დაიწყებდნენ ხოლმე და ბოლოს-კი ველარ ატანდნენ. ერთი რომ პატიოსნურად ატარებდა სახელსა და ვაჟკაცურად უხვდებოდა მოქნეულ ხმალსა, მეორე მელასავით სოროში ძვრებოდა, კუდს აქიცინებდა და მტრის სარდალს გზასა და კვალს უჩვენებდა მოძმისა და სამშობლოს დასანიავებლად. ორთავე ჯურის თავადებს ბლომად ვიხილავთ ქვემოდ, თვით აჯანყების და თოფ-ზარბაზნის გრიალის ამბავს რომ მოგახსენებთ 1812 წელს კახეთში. ტყუილად კი არ გვაყვედრიდნენ მაშინდელი მოხელენი, ჩვენ რომ არ მოგშველებოდით, მტერი ისე წაგახდენდათ, რომ თქვენი სინსილა გაწყდებოდაო. შინ, საქართველოში, თუ ნაკლებად ჰყავდა რუსობას მოკეთე, არც მეზობლობაში მოეპოვებოდათ მოტრფიალენი. სპარსეთი და ოსმალეთი დიდი ხანია აღმაცერად უცქეროდნენ რუსების ჩამოთესლებას საქართველოში. ოსმალეთის მოსაზღვრე ფაშებმა, სპარსეთის ბატონმა ბაბა-ხანმა და მისმა მემკვიდრე აბას-მირზამ ძილი დაჰკარგეს თითქმის და ათას ხათაბალას უტეხავდნენ საქართველოს მთავარ-მართველებს. საყვედურით ახრჩობდნენ ქართველობას რუსების დაპატიჟებისათვის და თან ჯავრსა ყრილობდნენ, საცა-კი მოასწრებდნენ სიცოცხლეს უსპობდნენ. რა კი ცალ-ცალკე ვერა დააკლეს-რა რუსეთსა, განიზრახეს შეერთება და 1810 წელს ოსმალეთმა და სპარსეთმა შეჰკრეს ფორმალური კავშირი რუსეთის წინააღმდეგ. სული და გული კავშირისა გახლდათ ინგლისი, რომელმაც ამ დროს მოიმაგრა ფეხი სპარსეთის ტერიტორიაზედ ბენდერ-ბუშირში. ინგლისი ბზესავით აბნევ-

და ოქროს სპარსეთის შაჰის კარზე, სპარსელებს აგულიანებდა რუსების წინააღმდეგ და სულ იმას ჩასჩიჩინებდა, თუ რუსეთმა ფეხი არ ამოიკვეთა საქართველოში, სპარსეთი სამუდამოდ დაიღუპებაო. ღონე მიხდილი სპარსეთი კარგადა ჰგრძნობდა, რომ რუსები სპარსეთს ხეირს არ დააყრიდნენ და საომრად ემზადებოდა, მაგრამ უბედურობა ის იყო, რომ რიგიანი ჯარი არა ჰყავდა და იარაღი არ უვარგოდა. ინგლისი უმალ დაეხმარა გამგონე სპარსეთს. ოცი ათასი თოფი ჩამოუტანა და უბრალო საპოლიტიკო აგენტის მაგიერ გაამწესა თეირანში უფლება მოსილი მინისტრი, რომელსაც თან გამოაყოფეს ინსტრუქტორები ჯარის გასაწაფად, ზარბაზნების ჩამოსასხმელად, ციხე-სიმაგრეთა ასაშენებლად და სხვა. გულმხურვალედ შეუდგნენ ყიზილბაშები სამზადისს და ელოდნენ მოხერხებულ დროს რუსებზე თავ დასასხმელად.⁵⁵⁾

ფორმალური საბაბი ომის გამოცხადებისა მუდამ მზად გახლდათ - რუსებმა უკანონოდ აპხადეს გვირგვინი ბაგრატიონთა გვარსაო. უკანონობის მომქმედნი უნდა დაისაჯნენ და საქართველოს ტახტი დაუბრუნდეს კანონიერ მემკვიდრეს ალექსანდრე ბატონიშვილს, რომელსაც სპარსეთის მთავრობამ ათას ორასი თუმანი როჭიკი (ჯამაგირი) გაუჩინა წელიწადში.⁵⁶⁾ დაუძინებელი მტერი რუსის მთავრობისა ბატონიშვილი ალექსანდრე არწივივით თავს დასტრიალებდა მღელვარე საქართველოს, ნადვერდალს აღუებდა და ამბოხების კიაკოკონას ამზადებდა. მოუსვენარი ტახტის მაძიებელი ხან ერევნის სახანოში ამოჰყოფდა თავსა, ხან თვით სპარსეთში, ხან დაღესტანსა და ლეკეთში და ხან ახალციხის საფაშოში. ყველგან, საცა-კი გაჩნდებოდა რუსების მოძულე ბატონიშვილი, სასურველი და სანეტარო სტუმარი იყო. მისი სტუმრობა და შფოთის ატეხა რუსის მართვა-გამგეობის წინააღმდეგ ერთი და იგივე იყო, ასე ვსთქვათ სინონიმი. ეტყობა, ან

55) იხ. Ахты Т. IV გვ. 761. утв. т. II გვ. 287.

56) მასალები... გვ. 117.

ქართველ კაცის სახელს, ან ბატონიშვილ ალექსანდრეს რაღაც უცნაური, მიმზიდველი და ანდამატური ძალა ჰქონია. ამ დღეებში (1904 წ.) რუსის სამსახურის პოლკოვნიკ, ანწუხელ ლეკმა⁵⁷) ღიმილითა და თავმოწონებით მიამბო, ბატონიშვილი ალექსანდრე დაღესტანს რომ ამოვიდოდა ხოლმე, ჩვენს ოჯახში თურმე დასდებდა ბინასაო. კარგად მახსოვს, - ბავშობა - სიყმაწვილეში ზღაპარსავეთ მიამბობდნენ, თუ სად ისვენებდა და რომელ ოთახში იძინებდაო. დრო და ყამმა თავისი გაიტანა, ალექსანდრეს ნადგომი ოთახები დაინგრა. სიძველისა გამო დაიფუშა ის ორი ხის ყუთიც, სადაც ბატონიშვილის ნივთები ელაგაო. ეს კი ლამაზად მახსოვს, რომ ღიდის მოწიწებით და სიყვარულით ინახავდნენ ჩვენს ოჯახში ამ უბრალო ყუთებსა და აუფრთხილდებოდნენ ნიშნად პატივისცემისა ძვირფასის სტუმრის ნაქონარ ნივთებსაო.

1812 წელს, არეულობის დროს, ბატონიშვილმა ალექსანდრემ გაავსო კახეთი, ხევი და მთიულეთი პროკლამაციის წერილებით.

ფრიად საყურადღებოა ტონი, კილო და შინაარსი წერილ-პროკლამაციებისა. მნიშვნელობას არაა მოკლებული აგრედვე სტილი წერილებისა. დასახასიათებლად მაშინდელის დროისა და თვით ტახტის მაძიებელ ბატონიშვილისა მოვიყვანთ რამდენიმე წერილს მცირედის შემოკლებით.

აი რა წერილი გაუგზავნა ბატონიშვილმა 16 მაისს 1812 წელს საენდრონიკო და სავაჩნაძოში დაბინავებულ თავადობას, აზნაურობას, ერსა და მოხელეობას სპარსეთიდან. მრავალს ძმურის სიყვარულით აღვსილ მოკითხვას მოახსენებს და შემდეგ ბრძანებს; "თქვენმა ეგეთმა სახელგანთქმულმა და ნამუსიანმა სიმხნემა ოთხსავე მხარეს, აღმოსავლეთს, დასავლეთს, სამხრეთს და ჩრდილოეთს მიაწია და ყოველნი ერანისა ხალხნი თქვენის ძლევისა და ქებისა გვირგვინისა შემოხზველნი არიან. დღეს იდიდნენ საქართველოსა შინა მცხოვრებელნი და დღეს დაგვირგვინდა დიდებისა დაგვირგვინებითა. რა

57) გვარსა და სახელს სხვა, უფრო მოხერხებულ დროს, მოგახსენებთ.

ქება მოგიძღვანოთ ანუ რა წყალობა აღგიტყვათ, რომელნიც უმაღლეს ღირსეულობისა და პატივისა ღირსნი ხართ, ესრეთ დაცემულის სახლის აღმმართველნი, მეფის ირაკლის შვილების მომძიებელნი, იმის თქვენზე მამაშვილურის პატივისცემისა არა უგულვებელს მყოფელნი. აფერუმ თქვენს გულისხმიერებასა და ბარაქალა თქვენს კეთილის - გამოარჩევასა და შაბაშ თქვენსა ეგრეთსა სიმხნესა და მამაცობასა! რავეო? თუ გხალოთ შვილად, მამაზე უმეტეს გამოაჩინეთ მოწყალეებიანი მომგონებლობა, და თუ გიწოდოთ ძმად, არავეინ ძმათაგანმან უყო ძმასა ესე ვითარი კეთილნი. გარნა თვალნო, რომელ გონება თვალისაგან ნათობს და მეფის ირაკლის ოჯახის ფრთენო; ქეშმარიტად თუმცა ჩვენ შვილნი ვახლდით სანატრელს მეფეს, მაგრამ უმეტესი მამობრივი მოწყალეობა და სიყვარული თქვენთვის არ მოუკლია, - ზოგნი შვილურად, ზოგნი ძმურად და მოხუცებულნი მამობრივის პატივისცემით იზრდებოდით ჩვენს სამეფო პალატში და განსვენებული მეფეც თქვენთვის ზრუნვისაგან არ განისვენებდა. აწე ძმანო, თქვენ უმეტესს მაგიერი აღასრულეთ, რომელ იმის დაცემული ოჯახი ერთის სარწმუნოების მტერთა და უცხო თესლთაგან*) თქვენ სვეტნი ძლიერებისა შეიქმენით და მიზეზნი ჩვენის სამეფოს სახლის აღდგინებისა. მზეებრ თქვენ სახელი ყოველსა ქვეყანასა მოჰფინეთ და განსვენებული, თქვენ მიერ საყვარელი მეფეც აღიდეთ და იმის შვილებსაც თავისუფლებისა გიხაროდენისა ხმასა გვცემთ. დასაბამითგან ეგ ბატონყმობის სიყვარული არავეინ ქმნა ვითარ თქვენ. ამისათვის ყოველთაგან ქებულნო პატივით და სასურველად საყვარელნო და მეფის ირაკლის მადლითნო პირმშნო შვილნო და ჩვენნო უსაყვარელესნო ძმანო! თუმცა წერილით გეხმაურებით, მაგრამ ასე მგონია თქვენში ვზივარ და პირის-პირ საყვარლად შემოგფრფენთ და გეხმაურებით; ღმერთმან უმეტესად გადი-

*) ესე იგი რუსებისაგან. სარწმუნოების ერთგვარობას დღად ვაფასებდით და ვებღაუბებოდით. ალექსანდრეს წერილი გვიჩვენებს, რომ მამიხდელ ქართველობას მალე შეუენია, რა შვილიცა ყოფილა ქებული ერთსარწმუნოება.

დღსთ ყოვლის სახელის აღმატებით და ჩვენც სინარულით მაგიერი ასრულება გვღირსებოდეს ღვთით.

შემდგომად ამისა აქაურს ვითარებას იუწყებთ, ღვთის მოწყალეობით შაჰზადა მობრძანდა ღიღის ჯარებით და ხაზინით გოგჩაზედ და ყაზახის მთაზედ ვაპირებთ მოსვლას ზარბაზნებით, თორმეტის ათასის ქვეითის სარბაზით და ოცდაათის ათასის სხვის ჯარით. იქით ოსმალოსა ხრიდან კიდევ სარასკარი მოღის ღიღის თადარიგით, თოფხანით და სამოცდაათი ათასის კაცით, რომ ნახევარი ჯარი ახალციხის მამულში გადმოვიდა;⁵⁸) ქვეილამ კიდევ ერთი შაჰზადა განჯის მხარეს უნდა მოვიდეს ოცდაათის ათასის კაცით. ღიღრონი თადარიგები არის და აქ რომ სარდალი არის, ამას გუმბრზედ ისტუმრებს შაჰზადა. მაგრამ თქვენის ამბის მაყურებელნი ვართ, როგორცა მანდეთგან თქვენი ამბავი მოგვივა, ისე საჩქაროთ გამოვწევთ; რა გვარსაც თქვენ შემოგვითვლით და მოგვწერთ საჩქაროთ, იმისი პასუხი გვაცოდინეთ. სხვა აქაურს თადარიგისა და ჯარების ამბავს ამ წიგნის მომტანნი მოგახსენებენ და რაც ამათ მოგახსენონ, ჩვენი სიტყვა არის და თქვენც ისე მოიქეცით და ღვთის შემწეობით ჩვენი საქმე რიგიანად წარემართება". ბექედი მეფის ძის ალექსანდრესი. ქ. „შაჰზადას რაყამი თიანეთზედ გავისტუმრეთ და იქილამ მოგივათ და ნახამთ".⁵⁹)

ამ გვარისავე შინაარსის წერილები დაუგზავნა ბატონიშვილმა ალექსანდრემ ქიზიყელებს, ანწუხელებს, ჯარელებს, მანავში ჩერქეზიანთ, საგარეჯოელებს და მათ მეზობლებს,

58) შაჰზადა-შაჰის შვილი, ტახტის მემკვიდრე. გოგჩას მოსული შაჰზადა აბას—მირზა, სარბაზი იხგლისელების შიერ გაწრთვნილი რეგულიარული ჯარია. ბატონიშვილი დავით სარბაზს სარბასტად იხსენებს. სარასკირი—ყარსის ფაშა იგულისხმება. პირობისამებრ სარასკირი და ახალციხის ფაშა ბორჯომის ზედადით, ან თრიალეთით უნდა შემოსეოდნენ საქართველოს რუსის მხედრობის ამოსაწყვეტად, სპარსელები—განჯიდან. თვით ალექსანდრე ქართლში უნდა შემოპარულყო და აეჯანყებინა ქვეყანა. შემოიპარა კიდეც ომი გაუმართა რუსობას, მაგრამ მოკავშირეთ რაღაც კინკლაობა მოუვიდათ, უღალატეს ალექსანდრეს და მარტოღმარტო დასტოვეს. წერილში მოხსენებული ნახინა, თოფხანა, ზარბაზნები სულ იხგლისელებისაა. რაყამი ფირძანია.

თიანელებს და ფშავლებს. იცოდა ბატონიშვილმა რითი მოეგო ფშაველის გული და ხატისათვის საჩუქარი გაუგზავნია.

სწორედ ცის ნამივით მოვევლინებოდა კახელობას ეს შესანიშნავი და სანაქებოდ დაწერილი უსტარი, ზომიერად და მარჯვედ შეზავებული დიპლომატიის მარილ-პილპილით. ერთი დახედვით, რა ჰანგს არ აყდარუნებს დიპლომატი ბატონიშვილი! სანატრელ მეფე ირაკლის მალმალ იგონებს, რადგან, მარტო სახელი პატარა კახისა ყრუანტელს ჰგვრიდა კახელსა. თქვენ ქველობა-ვაყვაცობას სპარსეთის აშუღნი და მოშაირენი დამდერიანო; მზეებრ თქვენი სახელი ქვეყანას მოეფინაო; ქება-დიდებით ამკობს და მეფე ირაკლის ოჯახის ფრთას უწოდებს კახელობას. შხამიანი და გესლიანი კილოთი იგონებს ერთმორწმუნე სტუმარსა და თითქოს დოქტორი რეინგესის აღზრდილი კი არა, შატობრიანის მოწაფეაო, მელანხოლიურის, გულჩაწყვეტილის კილოთი იგონებს დანგრეულ, "დაცემულ" სამეფოსა და ოჯახს ირაკლისას, რომლის სამეფო სრა-პალატებში აღზრდილან კახელები, ზოგნი შვილურად, ზოგნი ძმურად და მოხუცებულნი მამობრივის პატივის ცემით. დაგვამახინჯა უგემურმა სწავლა-განათლებამ და დავკარგეთ გრძნობა "კეთილის გამორჩევისა", შინაური რომ არა ვიცით რა, სხვისას ვებოტინებით და ქურციკივით ვბტუნაობთ სხვისა ნიჭისა და ტალანტის გაგონებაზედ, აი თუ გინდ ტალეირანისა. რა მოსატანია ამ ქლესა დიპლომატის დასნეულებული, უკბილო დიპლომატიური მიწერ-მოწერა ბატონიშვილ ალექსანდრეს გონიერებით სავსე წერილთან შედარებით. ყოველი ფრაზა, ყოველი სიტყვა ლახვარივით გაგპირავდა მსმენელსა. მარტო ეს რადა ღირს: საყვარელის მეფის შვილებს "თავისუფლების გიხაროდენის" ხმა გაგვაგონეთო, ან ეს: თუმცა წერილით გეხმაურებით, მაგრამ ასე მგონია თქვენში ვზივარ და პირის-პირ საყვარლად შემოგფრფუნთ, ესე იგი ფარვანასავით თავს გვევლებით და გეხმაურებითო.

მაშინდელი ქართველი, მალულად წამკითხავი ბატონიშვილის უსტარისა, უნებლიედ მოიგონებდა უკვე განსვენებულს . თ. პ. დ. ციციშვილსა და თანამედროვე

მთავარმართებელს მარკიზ პაულუჩჩის. უცნაური და გაუგებარი იყო მათი ლექსთა კონა, მართალია სურნელოვანი და დამბნელი, მაგრამ რაღაც უცხო სუნი უდიოდა. შტიალი, დატუქსვა, ხიშტი, როზგი, ლალატი, ბუნტი, უმადურობა, ნიელომკა, კარანტინი, კამანდა, ეგზეკუცია, პრავიანტი, ბეგარა და სხვა, სულ ამისთანები. სადაც მუხრან-ბატონი და ჯუბერნიის მარშალი თამაზ-ორბელიანი არ დაინდეს და დასტუქსეს, პატარა თავადებს რაღას მოერიდებოდნენ. ძილის გულდა მოქრთამე მოხელე, მეჭიანურე პროკურორი, გაღეშილი ჯარის კაცი, ხეპრე, ბრიყვი, ღორმუცელა და უღვთო კამისიონერი, გაბერილი, გაბღენძილი უთვისტომო ჩინოსანი, აივისა ჰხედავდა მუდამ ჟამს მაშინდელი ქართველი. სულისა და გულის შემხუთავი ატმოსფერა დააწვა საქართველოს, გააბრუნა და, თითქოს მძიმე ლოდიაო, ჯერ დაანარცხა დედამიწაზე და მერე ლაზათიანად მიჰქეპა. ამისთანა გარემოებაში თოფის წამალსავით მოქმედებდა ალექსანდრეს პროკლამაცია, მაღალ კილოსა და ჰანგზე დაწერილი, და ოცნების მორევში ალივლივებდა გათახსირებულ ქართველსა. წარსული ხომ ჯერ რეალური ფაქტი იყო, ის წარსული, როდესაც ქართველი ნამუსიანად ქუდს ატარებდა და ვახტერების ასაქირდავად არ გამხდარიყო.

ზემოთ გაკვრით მოვიხსენეთ და ხელ-ახლა ვიტყვი, რომ მარკიზი პაულუჩჩი თვალს არ აშორებდა ბატონიშვილ ალექსანდრეს. ვინ იცის, რა ჯილდოს არ გაიღებდა მთავარმართებელი, ოღონდ კი ალექსანდრე გათოკილი ენახა, მაგრამ არ იქნა, ვერ დაიჭირა ავტორი "ცეცხლის მომდებ წერილებისა".⁶⁰) რომ ვერა გააწყო რა და ვერ შეიპყრო მაშფოთარი, მარკიზმა გული გაივეთა და დამშვიდებული კილოთი მოახსენა უქვეშევრდომილესად იმპერატორ ალექსანდრე პირველს, - არა ღირს ბატონიშვილის დასაჭერად განსაკუთრებულის ღონის ძიების მიღება, თავისთავად რა ფასი აქვს ბატონიშვილს, ჩვენ თუ არ გავაზვიადებთ მის ძალა-მნიშვნელობასაო.

VIII

ამბოხების მეთაურნი და სულის ~~ჩამსვლელნი~~ დიდს ყურადღებას აქცევდნენ საქართველოს ხაზმედრო გზას და იქ მობინადრე ქართველობას და ოსობას. რუსის მხედრობას და მთავრობას გზად და კვალად ჩვენში დასამკვიდრებლად მარტო ვიწრო დარიალის ხეობა ჰქონდა, რადგან შავი ზღვა ოსმალეთს ეჭირა და კასპიისა სპარსეთს. დარიალის ხეობა თუ შეიკვროდა, რუსობას საქმე ისე გაუჭირდებოდა, რომ ეგები სამუდამოდ გამოსთხოვებოდა "საქართველოს ტურფა ხეობა-ველმინდორსა". ესაა მიზეზი, რომ ბატონიშვილ-ალექსანდრემ წერილი მისწერა ხევის ბატონს და რუსობის ერთგულს ყმას, გაბრიელ ყაზბეგს, - გზა გააფუჭე და რუსობას ნულარ გამოატარებ მაგ გზითაო. მხარი დაუჭირე ფშავ-ხვესურებსა, ეგენი ხომ შენი სისხლი და ხორცია. დიდ სამსახურს გამიწევ, თუ თხოვნას ამისრულებ, დამიჯერე, ჩემო გაბრიელ, რუსების წყალობა წარმავალია, ვითარცა ქარი, ჩვენი-კი უცვლელი და საუკუნო. ათას წილად გირჩევნია მიენდო მეფე ირაკლის შვილსა, ვიდრე რუსეთის სიტყვა-წყალობასაო.⁶¹⁾ გაბრიელმა არ უღალატა რუსის მთავრობას, არ შეისმინა ალექსანდრეს სიტყვა და ძველებურად მხნედ ეხმარებოდა რუსის სარდლებს ამბოხების ჩაქრობაში, აჯანყების ნაპერწკალი კახეთიდან არაგვზე რომ გადმოვიდა. ალექსანდრემ, ალბად კარგად იცოდა, რომ ვერას გახდებოდა ყაზბეგთან და ისევ მთიულებთან და არაგველობასთან ამჯობინა დაეჭირა საქმე. 1812 წელს თექვსმეტ მაისსავე მიწერილი წერილი იმნაირადვე ძლიერი და აზრიანია, როგორც ზემოდ მოყვანილი. წერილი იმდენად ნათელია, რომ განმარტებას არა საჭიროებს, ხოლო თითო ოროლა ფრაზა ხაზს გაუსმელადაც მკითხველს გულის ფიქარზედ მოხვედბა და მკერდს აუტოკავს. "ქ. საქართველოს

61) იხ. АКТЫ, т. V, стр. 360.

მეფეს-ძე ალექსანდრე ძმურის სიყვარულით მოგიკითხავთ, ერთობით მთიულეთის მოხელენო და სრულიად არაგვის თემის მთიულეთის ხალხნო, ჩვენ მიერ მრავალი სიყვარულით აღსავსე მოკითხვა გეუწყოსთ. მერმეთ თქვენი ეგეთი სიმხნე და ვაჟკაცობის ხმა ყოველს ქვეყანაზე განითქვა და ჩვენის ოჯახისათვის აგრე თავდადებულნი ხართ, მთელი ერანის ხალხნი თქვენ გაქებენ. ჭეშმარიტად, ბაგრატიონთ ოჯახის ერთგულნი და უნჯნი ყმანი ხართ.⁶²⁾ თუ ღმერთმა მოგხვედა, ჩვენი ღიღება თქვენი იქნება და ყოვლის თქვენ მიერის სათხოვრისა წყალობით გულ-შესრულებულნი იქნებით და ძმებსავით საყვარელნი.⁶³⁾ რომელნიც დღეს ამისთანას ჩვენ დაცემულს სამეფოს სახლს შეეწევა, მამანიც ისინი იქნებიან და ძმანიცა. ყოველთვის თქვენ ჩვენთან პირნათელნი ხართ და ღმერთმან სულ აგრე პირნათლად გატაროსთ. ახლა არის შემწეობის დრო, ახლა არის სამსახურის ჟამი და წყალობის მიღებისა, თქვენ ეს ვალი დაგვდევით და ყოვლის თქვენის წადილის სათხოვრით გული შეისრულებთ. ხეცს უნდა ჯარით გარდახვიდეთ, გუდამაყრელთ და ხეცსურთათვისაც მოგვიწერია, ეგრეთვე მოხევეთათვის, რომ ჩვენი ოჯახის მტრისა და თქვენის მტრის რუსთ მოსასვლელი გზა წაახდინოთ, რომ ჯარმა ველარ გამოიაროს და საქართველოში მყოფის რუსისა, ღვთის შემწეობით ჩვენ ვიციოთ. ვინც მაინთ მხარეს ჩვენი მუხანათი არის და ახლა თქვენთან მოვა და გაირჩება, იმას თქვენ არწმუნებთ, რომ ჩვენგან არა გარდახდეს რა და თქვენ იმისნი თავდებნი იყავით ერთიანად თემნი და იმ საქმეზედ იმხნევეთ და კვლავ როგორც ლომურათ ყოფილხართ, ისე

62) უნჯი—საუნჯე, ძვირფასი. დ. ჩუბინაშვილის აზრით უნჯი სომხური სიტყვა ყოფილა.

63) თურმე ალექსი პეტრეს ძე ერმოლოვი (ჩვენში მთავარ-მართველობდა 1816-1827 წ.) პირველი ყოფილა, რომელსაც გაუბედნია და ოფიციალურ პრიკაზებში სალდათებს „ამხანაგები“ დაუძახა. ქებით აღნიშნავენ ამ გარემოებას რუსის ისტორიკოსნი. შეიძლება ერმოლოვმა ნაპოლეონს ნიჰაბა, მაგრამ ბატონიშვილი ალექსანდრე რომ მეომარ ფშავესურებს და არაგველებს ძმებად და ამხანაგებად იხსენიებს, ნეტა ვის მიჰბამა? ნაპოლეონის ამბები ჩვენამდის კანტი-კუხტად მოდიოდა.

ლომურად გაისარჩენით, ბაგრატოვანთა და ლაშარის ჯვრისა და გულანისჯვრისა, მოძმის სამეფოს ოჯახის მტრისა და საძირკველით ამომღების მტერის სისხლი თქვენც უხვად, ღვარად და ღვარად აღინეთ. სანატრელი მამა ჩვენი მეფე ირაკლი ამისთვის გღებდათ დიდ პატივს, რომ ამისთანას დროში იმის შვილებს გამოგვდგომოდით. თქვენი ჩვენს ოჯახზედ მრავალ რიგად სახელოვნად გარჯილი ძველი ხმალი მოიგონეთ და რჯულისა და თქვენის საყვარელის მეფის ირაკლის შვილებისათვის თქვენს ნამუსიანს სახელსა და თავს ნუ დაზოგავთ, საუკუნოთ თქვენი გულოვნებაც ასახელებთ და მეფის ირაკლის ოჯახი და სახელი აღიდეთ, რომ ყოველმა ცას ქვეშეთ კაცმა თქვან: მეფეს ერეკლეს ამისთანა ერთგულნი ყმანი დაუგდია თავის შვილებისათვისო. თქვენ ამ ხმით იდიდნეთ და განსვენებულს მეფესაც საფლავში პატივი ეცეს და რაღა მოგახსენოთ მამანო, ძმანო და შვილნო, - ეს არის სიმხნისა და გამოჩინებისა ყამი და ჩვენის სამსახურისა და ახლა თქვენ იცით და თქვენმან მრავალ რიგად სახელიანმან ხმალმან".⁶⁴⁾

ფშავლებს რომ საჩუქარი გაუგზავნა ხატისათვის, არც არაგველები დაივიწყა ალექსანდრემ. აი რა მოწიწებით ათავეებს ბატონიშვილი წერილს: "ქ. მაგათს უდიდებულესობას ლომისისა მთავარ-მოწამეს წმინდას გიორგის მცირე რამ შესაწირავი მოვართვით და თქვენ შესწირეთ უძლეველსა მაგას ჩვენდა წარსამატებლად ყოველსა ზედა საქმესა და მტერსა ჩვენსა საძლეველად". ზურაბა გაბილაური ფშავში გაუგზავნია ალექსანდრეს. ჯერ მოიკითხავს ძმურის სიყვარულით ფშაველ ხევის ბერებს: ხაზა ბერიძეს, ხადილა გიჯურაშვილს, ცარიას და ლაშქარასა, მოუწონებს მხნეობა-ვაყვაცობას და შემდეგ შეატყობინებს, რომ სხვა და სხვა მხრიდან შემოესევინა საქართველოს სპარსეთისა და ოსმალეთის ჯარები რუსების გასაწყვეტად. ჩვენი მოუსვლელობა შეუძლებელია, სწერს ბატონიშვილი და სთხოვს იგინიც მზად იყვნენ მტერთან საერთო ბრძოლისათვის. სთხ-

ოვს აგრედვე ხევის ბერებს გაუგზავნოს მისი წერილები, გაბიდაურს რომ გამოატანა, თუშებსა და გაბრიელ ყაზიბეგი-შვილსა. ჩემი ამბავი, ან რა სამზადისში ვარ, ზურაბ გაბიდაურს გამოჰკითხეთო, უთვლის ბატონიშვილი თუშეთის თავ კაცებს. ყველაზე უფრო ერთგული ბაგრატიონთ ოჯახისა თქვენ იყავით და განა საფიქრებელია, რომ ამისთანა დროს არ იელვოს მრავალ გზის განთქმულმა თქვენმა ხმალმაო. ლაშრის-ჭვრისა და თქვენის თავის იმედით იყავით, ბაგრატიონთაც სანატრელად მიაჩნდით, მაშ მიეკედლეთ ფშავლებს და საერთოთ გაისარჩეთ მტრის დასამხობად და დასაქცევადო.⁶⁵⁾ საყურადღებოა აგრედვე ვილაც სომეხ ავეტიქას წერილი, სპარსეთიდან გამოგზავნილი აბელ ჩოლაყაშვილის სახელობაზე. ვინაა ეს ავეტიქა, ცნობები არა გვაქვს, მაგრამ ეტყობა ბატონიშვილ ალექსანდრეს ამაღლაში ყოფილა და ქართლ-კახეთიდან გაჰყოლია ლტოლვილსა. ცოტა არ იყვეს, ენა-ქარტალობა ეტყობა ავეტიქას წერილს, მაგრამ მაინც გადმოვიღებთ ქართულად. ბევრი იმისთანა ამბავია ავეტიქას წერილში, რაც სხვა წყაროებში არ მოიპოვება.

ვიცი, რომ გაიმება აქაური ამბები და მოგახსენებ: შაჰი იმყოფება თავრიზში, შაჰზადე-კი ერევანშია და დიდი ჯარები ახლავთ თანა. სარდლები ყაზახის მთებზე არიან დაბანაკებულნი. ჩვენი ბატონი⁶⁶⁾ იქაა ამალით. წინად და ეხლა ჩამოსული თავადობა და გლეხ-კაცობა რომ ვიანგარიშოთ, გამოვა ესე 500 - 600 კაცი. ქართლიდან დაწყებული ქიზიყამდის სულ აქ შეიკრიბნენ. შენ რაღასა ზიხარ მანდა? შარშან, ბოლნისის გზაზე რომ შეგხვდი, გირჩიე წამოსულიყავი ბატონიშვილთან, მაგრამ არ დამიჯერე და უარი მითხარი. ეხლა მაინც ჩამოდი და დაამშვენე აქაურები. აბა რა საჭირო იყო, ომანი და იოსები რომ ჩამოვიდნენ? ბატონიშვილი წყალობის თვალით გიყურებთ თქვენა. ბევრჯელ უთქვამს - დიდი სამსახური მიუძღვით ჩოლოყაანთ ჩვენ წინაშე, ჩვენ-კი

65) Ibid. გვ. 360.

66) Ibid. გვ. 360. ესე იგი ბატონიშვილი ალექსანდრე.

ჯერჯერობით ვერაფრით გადუხადეთ სამსახურიო. თუ გგონია რომ რუსები მაგრად მოიკიდებენ აქ ფენსა, ტყუილად გარჯილხარ. მე უფრო ძალიან მინდოდა, რომ რუსები საფუძვლიანად დამკვიდრებულ იყვნენ ჩვენში, მაგრამ ეს არ მოხერხდებოდა. ჯერ ერთი აქ, საყიზილბაშოში, მრავლისაგან მრავალი და ურიცხვი ლაშქარი იკრიბება, მეორე კიდეც ისაა, რომ მანდ იარაღს ისხავს კახელი, ქიზიყელი, მთელი ქართლი, კახეთი, მთა და ველს, ლუკო, ვრთაგული და მუხანათი. ერთი სიტყვით, ყველა მზად არის მანდლთ წამოვიდეს და შამოესიოს რუსის მხედრობას შვიდი-რვა მხრიდან, ზემოდან და ქვემოდან. ერთ კვირაზე მანდ ვიქნებით. ნომ კარგათ შიცნობ, განა ცუდს რამეს მოვიწოდებ შენთვის? რაც ადრე ჩამოხვალ, ის ემჯობინება შენთვის, გეყო რაც უერთგულე რუსებს. გახსოვს, რუსებს წინ რომ მიუძლოდი საგარეჯოდან და გზას უჩვენებდი, მერე ქართველებმა რომ დაგიპირეს და შენი მოკვლა უნდოდათ! არა, განა არ იცი, რომ რუსები მალე დაივიწყებენ შენ სამსახურს? ბატონიშვილსაც რომ ისე ემსახურო, როგორც ემსახურებოდი რუსებს, ყველა სურვილს აისრულებ. ოღონდ-კი ჩამოდი აქა და მე ვიცი და ჩემმა კაცობამა.

თავს მოვიკლავ, შევეხვეწები ბატონიშვილს და მოვანიჭებინებ იმ წყალობას, რითაც შენი გული შეჭერდება. ჩვენი ბატონის წყალობა მუდმივი, საუკუნოა, რუსებისა კი დროებითი, წარმავალი. გარწმუნებ, რუსები საქართველოში ვერ იბოგინებენ, - მოდი, კარზე მომდგარ ბედნიერებას წიხლს ნუ ჰკრავ.

კარგად ვიცი, რომ ბოლოს და ბოლოს რუსები გაგაუბედურებენ. ქართველობა, ქიზიყელობა და მოქალაქენი აქ ბლომად შეიკრიბნენ.

ალექსანდრე ბატონიშვილი ერეკნიდან ქართლით კახეთს რომ ამოვიდა, თან მცირე მხედრობა ახლდა. ამის გამო საფიქრებელია, რომ ავეტიქა განზრახ აზვიადებდა ქართველების რიცხვს ბატონიშვილის ბანაკში ერეკნის სახანოში, მაგრამ ეპატივება ერთგულ ყმას გადაჭარბება - გადამეტება. გულით

სურვებია აბელ ჩოლაყაშვილის ჩათრევა რუსების წინააღმდეგ განზრახულ შეთქმულობაში და სურვილის მისაღწევად ქართველ მემბოხეთა რიცხვი გაუბერია.

ფრიად საყურადღებოა აგრედვე წერილი ბატონიშვილ ალექსანდრესი, დაწერილი 11 ივლისს 1812 წ. აზრი წერილისა ისაა, რომ რაკილას სისხლი დაღვარეთ რუსისა, ესლა მეტი ჯანი აღარა გაქვთ, რუსობას ზურგი უნდა შეაქციოთ და ჩემს მხარეს გადმოხვიდეთო. ჩვეულებრივ სალამ-ქალამის შემდეგ ალექსანდრე მოახსენებს სრულიად თელავს ზეთ თემის ხალხთ: "თქვენგან გამოგზავნილთ თავად-აზნაურთ და გლეხთ ყოველთავე ღვთის მოწყალებით მშვიდობით აქ ჩვენთან მოაწიეს და ამ თავადებს შაჰზადა რომ მობრძანდება, წინ მივაგებებთ. ჩვენც მზადებაში ვართ, რომ ამ რამდენიმე ღღეს ღვთის შემწეობით მანდა ვართ და ჩვენს სისხლსაც თქვენს სისხლში გავრევთ. ჩვენ მამა-პაპათაც მრავალჯერ დაუქცევია თქვენთვის სისხლი, ჩვენც თავი შემოწირული გვაქვს, - ღვთით ჩვენი მანდ წამოუსვლელობა არ იქნება. ამაზე სარწმუნო მექმენით, რომ ერთს კვირას თქვენთან სიცოცხლე ათასს წელიწადს სხვაგან ცხოვრებას მირჩევნიან. როგორც ჩვენს სიყვარულზედ და ერთგულობაზედ მხნედ მოქცეულხართ, ახლაც ისე სიმხნით აღიჭურვენით და მზანი იყვენით. ესეც კარგად იცით, რომ რადგანაც სისხლში გაერიენით და მაგდენი რუსი გასწყვიტეთ, ღმერთმან ნუ ქნას, რომ მაგათ ძალი მოიცენდ არას დროს არ შეგარჩენენ და მათი ფიციც დასარწმუნებელი არ არის. თუ ლბილს სიტყვას გეუბნებიან, მაინც უკანასკნელი რუსებისა სიცრუე-ორპირობა და გაუტანელობა არის: ბუნებით მუხთალნი არიან. ჩვენ რომ არა დაგვეშავებინა-რა და შემწეობის მაგიერ ასე დაგვამხეს, თქვენ რომ აგრე სისხლში მორეულნი ხართ, ხომ კარგად იცით, არც გიცოდებენ და არც შეგარჩენენ და არც ჭეშმარიტება მაგათში მკვიდრობს და თუ თქვენგანით ვისითმე მოტყუებით და ანუ ნივთის მოყვარებით გაცთუნებენ, მაინც უკანასკნელი საფრთხე არის, რომ მაგათგან უკანასკნელ ერთგულთა და ორგულთ მისაგებელი ერთი მიეგება ყოველთათვის -

ციმბირი. თქვენ მაგათ რბილ სიტყვას და სიცრუეს ნუ აპყვებით და ნუ ენდობით, როგორც მხნედ მოქცეულხართ, ისევ ისე მხნედ აღიჭურვენით და მზანი იყავით, რომ ღვთის მოწყალეობით ჩვენც მანდ მომსვლელნი ვართ და კიდევ მოვალთ. სხვას ჩვენს თადარიგსა და სიტყვას თქვენ მიერ გამოგზავნილების კაცების წერილებით და პირითა სცნობთ.⁶⁷⁾

ისტორიის ღირსება, ვითარცა მეცნიერებისა უეჭველად მოითხოვს, რომ ისტორიკოსი ფრთხილად იყვეს კვლევა-ძიების დროს და ყოველი ისტორიული ცნობა კრიტიკის ქარცეცხლში გაატაროს. ბატონიშვილის წერილი საშინელი სასტიკი ატესტაციაა მაშინდელ ძალმომრეობაზე დაფუძნებული მართვა-გამგეობისა და მის წარმომადგენელ მოხელეთა, მაგრამ არ უნდა დავივიწყოთ, რომ ალექსანდრე ტახტის მადიებელია, მონატური დამხობილის სამეფოს აღდგენისა და მაშასადამე პირადად დაინტერესებული. ამ ყოფაში ჩაყენებული ბატონიშვილი, რაღა თქმა უნდა, მტერს აღარ დაინდობს, გაათათხავს და თავზე ლაფს დაასხავს. სწორედ ასედაც იქცევა ალექსანდრე. თიანელ თავად-აზნაურობას, მოხელეთა და ხალხს ეუბნება, - რუსები ბუნებით მუხანათნი არიან, ჭეშმარიტება მაგათში არა მკვიდრობს, სწორისა და მრუდის გარჩევა არ იციან, ერთგულისა და ორგულის მისაგებელი ციმბირიაო. ეგები ბრძოლის ტაქტიკა მოითხოვდა მტრის ლაზათიანად შემკობას, მაგრამ ბატონიშვილის მიერ ბოძებული ატესტაცია მაინც საშინელია და ნამეტანი. ამ შესანიშნავის ისტორიულის ორ-პირად მოყვანილის დოკუმენტის, ქართულად და რუსულად, შესამსუბუქებლად მხოლოდ ის შეგვიძლიან ვსთქვათ, რომ საქართველოს მთავარ-მართველებმა, სხვილმა და წვრილმა მოხელეებმა მრავალი საბუთი მისცა ბაგრატიონთანა გვარის მხნე და საუკეთესო წარმომადგენელს საქვეყნოდ ეთქვა-მოგვატყუეს, სიტყვა გატეხეს, ერთი სიტყვით მუხანათები არიანო.

67) Ibid. გვ. 359 წერილის ზოგიერთი ადგილი რუსულად ასეა: *Вы и то хорошо знаете, что такъ какъ истребили столько русскихъ, то не дай Богъ, чтобы они усмьлились, - ни въ какомъ случаѣ они вамъ не простятъ...*

ალექსანდრე თუ ამკობდა ლაზათიანად რუსის მოხელეებს, არც ესენი ინდობდნენ მოსიარულე ტახტის მადიებელს. მთავარ-მართებელნი: ციციშვილი, გუდოვიჩი, ტორმასოვი, პაულუჩი და რტიშჩევი დიდ წყალობას ჰპირდებოდნენ ალექსანდრეს ოლონდ დაბრუნდი, გადასახლდი რუსეთში და რასაც მოითხოვ, აგისრულებთო.

ალექსანდრემ არ ინება რუსის მთავრობის წყალობა. კავკასიას განაგებდა 1816-1827 წ. გენერალი ალექსი პეტრეს ძე ერმოლოვი, "კავკასიის პროკონსულად" წოდებული. ერმოლოვმა იუკადრისა თურმე ტკბილი მიწერ-მოწერა ალექსანდრესთან, საჩუქარ-წყალობის დაპირება-აღთქმა და ერთ-ერთ წერილში, რომელიც მიუწერია ლტოლვილ ბატონიშვილისათვის, ასეთი აზრი გამოუთქვამს:

"ადამიანი, რომელმაც სახელი გაითქვა გარყვნილობით, ტუტუცი და მხდალი, ჰაბუკობიდანვე მოკლებული მამის ლოცვა-კურთხევას მტერთან გაქცევისათვის, შეუძლებელია საშიში იყოს. ამის გამო გახერეტილ გროშად არ მიღირს სიცოცხლე ან სიკვდილი ამისთანა ფლიდი კაცისაო.⁶⁸⁾"

ერმოლოვი რუსის საუკეთესო გენერალი იყო, დროს შესაფერი არც განათლება აკლდა და არც სიმამაცე. დეკაბრისტები ოცნებობდნენ - ერმოლოვი თვისის სახელოვანის კავკასიის კორპუსით მობრუნდება რუსეთში და თვითმპყრობელობას შეზღუდავსო. ამ ხმამ იმპერატორ ნიკოლოზ პირველამდე მიალწია, შეკრთა იგი, და "პროკონსული" სამსახურიდან დაითხოვა. - განათლებულმა და მამაცმა გენერალმა მაინც თავი ვერ შეიკავა და რაკი ქართველზე მიღვა საქმე, სრული ბარბაროსობა გამოიჩინა. მხდალი, ტუტუცი, გარყვნილიო. რაკი მტერი იყო ქართველი ბატონიშვილი ალექსანდრე, განა ასე მურდლად უნდა შეემყო იგი დეკაბრისტების მეგობარსა და იმედს, გენერალ ერმოლოვს? ჭენტლმენი თავის დღეში ამას არ იკადრებს. ან რა სათქმელია ალექსანდრეზე, გარყვნილი იყოვო. იღვით გატაცებულ ადამიანს წუთი არა

68) იხ. утг. р. владимчества на Кавказе, т. XII, гл. 98. соч. В. И. Ивансико.

ქონდა. მოსვენება; მიწის მგელივით ხან დაღესტანს ამოჰყ-
 ლდა თავს, ხან ახალციხის საფაშოში, ხან ღიმერეთ და
 ქართლ-კახეთს და ხან, ვინ იცის სადა და ჯანა ამისთანა
 მღელვარე ცხოვრების მიმდევარი მოიცილის სიბილწე-გარყვნი-
 ლებისთვის? არა, ექსპსიხოლოგიის წინააღმდეგია და ერმოლო-
 ვის აზრი მტკნარი და ხალასი ცილის წამებაა. ისტორიული
 საბუთიც არ მოიპოვება ერმოლოვის ცრუ აზრის დასამოწმ-
 ებლად.

ეს ეჭვებითს ამბოხების დროს ერევანს განაგებდა ჰუსეინ-
 ყული-ხანი, რომელმაც ორჯელ იფრინა რუსის მხედრობა,
 ერთხელ ციციშვილისა და მეორედ გულდოვიჩის უფროსობით.
 მაინც გული დამშვიდებული არა ქონდა და ყველაფრით ხელს
 უწყობდა ალექსანდრეს. ერევანში ვილაცას ხმა დაეყარა,
 ვითომ აბას-მირზას ელჩები გაეგზავნოს ტფილისს და
 შერიგებას თხოულობსო. შესმენია თუ არა ეს ამბავი, ჰუსეინს
 მაშინვე წერილი გაუგზავნია კახეთსა, არაგვისა და ქიზიყის
 თავადაზნაურთათვის და საერთოდ ერისათვის. არ დაიჯეროთ,
 მტკნარი ტყუილია ის ხმა, ვითომც შაჰ-ზადა რუსებთან
 შერიგებას აპირობსო. ძველებურად მხნედ იყავით და შესაფერ
 ჯილდოს მიიღებთ ჩვენის ხელმწიფე-ბატონისაგან, თვით ჩვე-
 ნგან და მეფე ალექსანდრესაგანაო.⁶⁹⁾

ამ წერილით მტკიცდება, რომ სხვა-და-სხვა ხანები და
 თვით სპარსეთის შაჰი ბატონიშვილ ალექსანდრეს საქართვე-
 ლოს მეფედ აღიარებდნენ.

IX

მაშ აგრე, უხეირო მთავრობა საკუთარის ხელით თვი-
 თონვე ამხადებდა უზომოდ გაბეგრილის, საეგზეკუციო
 კამანდებით დაწიოკებულის და უსამართლობის კორიანტელში
 ვაზუეულის ერის აჯანყებას. რა ჯოჯოხეთის ცეცხლად გადაე-

ქცა კახელობას მართო ბეგარა, არც-კი დაიჭერებთ, საბეგრო ურმის და ტვირთფის საზიდავ ცხენის რიცხვი რომ მოგახსენოთ. მართო ქართლ-კახეთს, ყოფილა ისეთი ღრო, გაუყვანია უსასყიდლოდ წელიწადში 112,154 ურემი და 99,780 ~~სახარგო ცხენი. ეს ციფრი აღნიშნულია თავად ალექსანდრე პავლოვიჩის წერილში და გამომძიებელ კამისიის საქმეში.~~⁷⁰⁾ ზემოდ უკვე მოვიხსენიეთ, რომ აღარც საქონელი და აღარც ურემი თითქმის აღარ უბრუნდებოდა პატრონსა. ანა რა ხეირი დაეყრებოდა საქონელსა და ურემს მაშინდელ გზებზე ქართლ-კახეთიდან გასულს ფოთსა, ყარსსა, ერევანს და ამისთანა შორეულ მანძილზე. მეურმე და ცხენის გამყოლიც ნახევარზე მეტი დააქადებულ-დასნეულებული ბრუნდებოდა შინა. ბ-ნ ანოსოვის ხიტყვით, მკვიდრი ჰკვნესოდა და ჰგმინავდა ოჯახის ასაკლებ ხალხზე ზეგარისაგანაო.⁷¹⁾

იგივე კაპიტან ანოსოვი გულისხმობს, რომ სულის-მღაფავ ერის მოთმინება უფორეს წერტილამდე იყო ასული, - სომეხი ისე დაჭიმული იყო, რომ დღე-დღეზე უნდა გაწყვეტილიყო. აი, ამ წარმოუდგენელ ვითარებაში ჩავარდნილს კახელობას ეგზეკუცია ჩაუყენეს პურის შესაკრებად. გავარვარებულს ჯოჯოხეთს მუგუზალი რომ მიუმატეს, სწორედ ასეთი საქმე დაემართა დამშეულ კახეთს 1812 წელს. მუგუზალის როლი ეგზეკუციამ შეასრულა. შიმშილით გამწარებული გაფცქვნილ-გამძარცული ერი თავს ძლივსლა იკავებდა. ან-კი რისა ეშინოდა, რაღა უნდა დაეკარგა? სასოწარკვეთილი ერი ყველაფერს მოიქმედებდა, ოღონც-კი თავი დაეღწია როგორმე მაჯლაჯუნასავით მოწოლილ უღვთო უსჯულობისაგან; საკმარისი იყოვო მცირედი ნაპერწკალი, ბრძანებს ოფიციალური ისტორიკოსი, რომ უცბად, ერთბაშად მოსდებოდა ალი ასაფეთქებელ მასალას, რომლითაც სავსე იყო მაშინდელი კახეთი.

70) იხ. უთ... ტ. II, გვ. 344.

71) Ibid. რუსულად „Население буквально истомалo подъ ярмоюъ тяжёлой раззорительной подводной повинности“.

ნაპერწყალმაც სწორედ იქ გაიღვია, სადაც ყველაზე ნაკლებად მოქლოდნენ ჰიაკოკონას გაჩენას.

ეს ადგილი გახლავთ სოფელი ახმეტა დღევანდელ თიანეთის მაზრისა.⁷²⁾

ცეცხლის ჩანელების შემდეგ, თვით მარკიზმა პაულუჩჩიმ ასე დააფასა თვის, მიერვე გაგზავნილ საეგზეკუციო კამანდების ჩაყენება კახეთის სოფლებში. "კახეთი ჰლელავდა და ჰბორგავდა. ზოგიერთი სწორედ გიყსავით იყო გადარეული. ამისთანა დროს ეგზეკუციის ჩაყენება სწორედ იმასა ჰგავდა, ცეცხლს რომ ჰქონი მოასხა. არა საიმედო კაცებმა ისარგებლეს ეგზეკუციის გაგზავნით სოფლებად, დაუწყეს ხალხს ჩიჩინი და ჩვენთვის საზარალო ჩაგონება და ხელი შეუწყეს საერთო კორიანტელის ამოვარდნასო.⁷³⁾

დაფასებით კარგად დააფასა მარკიზმა ეგზეკუციის მნიშვნელობა, მაგრამ გამოტყუებით მაინც არ გამოტყუდა და ამბოხების ატეხა არა საიმედო კაცებს მოახვია თავზე. ეჭვი არა გვაქვს, მარკიზი ამ სიტყვებს რომ სწერდა, ბატონიშვილი ალექსანდრე ჰყავდა ნიშანში ამოღებული. ისე გამოდის, ალექსანდრე რომ არ ყოფილიყო და არ ჩაეგონებინა კახელებისათვის აჯანყება, წამებული ერი კრინტს არ დასძრავდა და საეგზეკუციო კამანდების ვაჟკაცობა-გმირობას ისე მორჩილებით აიტანდა, როგორც აუტანია ბევრი სხვა უსამართლობა-შეწუხება. კეთილშობილი მარკიზი დიდადაა შემეცლარი. ჩამგონებელი და მოჩიჩინე მაშინ ჰპოულობს მომხრესა და მოკავშირეს, როცა ნიადაგი უკვე მომზადებულია ამბოხება-აჯანყებისათვის. თუ ალექსანდრე არ იქმნებოდა, სხვა ვინმე გამოჩნდებოდა. საქმე ისაა, რომ თორმეტის წლის უსამართლო მართვა-გამგეობამ და დარბევამ საქართველო ააოხრა, გაატიალა; ძველი წესი და ჩვეულება მიღეწ-მოღეწა და მის ნანგრევებზე ისეთი შენობა ააგო, რომ ჰირუტყვს არ შეესვლებოდა შიგა. რაკი ასეთი იყო ვითარება საქმისა, რაღა

72) Ibid. გვ. 351, 352.

73) იხ. АКТЫ, ტ. V, გვ. 67.

საჭიროა ხრიკების მოგონება, არა საიმედო და მავნე კაცების გამოყვანა სცენაზე ჯვარზე საცმელად. მაგრამ რას იზამ, რომ მულამ ჟამს ერთ-ფეროვანად და ერთგვარად მოქმედობს მოხელეს წყეული დაჯანგებული მანქანა. თითქოს მოსვენებით ვერ დაიძინებს, თუ მოხელემ წარა-მარად მავნე და არა საიმედო ვინმე არ გამოატყურონა ცოდვადა საზიდავად.

ვინაიღვან კახეთის აჯანყების ჯერ გაჩენაში და შემდეგ ჩაქრობაში დიდი ღვაწლი მიუძღვის მარკიზ პაულუჩჩის, საჭიროდ მიგვაჩნია გიამბოთ ამ მთავარ-მართებლის ცხოვრება და ვეცდებით მცირედად მაინც დავასურათოთ ამ გენერლის მოქმედება-მოღვაწეობა ჩვენში.

მარკიზი ფილიპე ოსიპის ძე პაულუჩჩი იტალიელია ჩამომავლობით, დაბადებულია იტალიაში, ქ. მოდენაში, 1779 წ. მაშასადამე, მარკიზი ჩვენში რომ მთავარ-მართველობდა, 1811-12 წ., სულ ახალგაზრდა ყოფილა, ასე 32 - 33 წლისა. ჩქარი ამალგება და მაღალი ხარისხის შილება ჩვეულებრივი მოვლენაა მეთვრამეტე საუკუნისა და მეცხრამეტეს პირველის ნახევრისა. ჭაბუკობაშივე მარკიზი შესულა სამხედრო სამსახურში, მონაწილეობას იღებდა სარეგოლიუციო ომებში და რადგან ნიჭი და მხნეობა გამოიჩინა, გენერლობაც მალე მიიღო. დიდ-ხანს არ გაგრძელდა მარკიზის სამსახური საფრანგეთის ჯარში. ნაპოლეონის მიერ შემოღებული წესი და რიგი იტალიაში არ ეპიტნავა ცხარე ხასიათის ახალგაზრდა მარკიზს და თავი მიანება საფრანგეთის ჯარში სამსახურს.

ომიანობასა და მღელვარებით სავსე ცხოვრებას მიჩვეული მარკიზი უსაქმობას ვერ აიტანდა, დასტოვა იტალია და რუსეთს ესტუმრა. ესეც ჩვეულებრივი მოვლენა იყო წარსულის დროისა. 1807 წელს მარკიზი მიიღეს რუსის სამსახურში პოლკოვნიკის ჩინით. რუსის გენერალ მიხელსონის უფროსობით მარკიზმა მონაწილეობა მიიღო ოსმალეთთან ბრძოლაში, ხოლო 1808 წელს შვედების წინააღმდეგ გალაშქრების დროს უბოძეს გენერლობა.

1810 წ., თიბათვეში, მარკიზი გამოგზავნეს საქართველოში და დანიშნეს აჭარის ჯარის გენერალ-კვარტირმეისტ-

რადღაც მორიგ გენერალად ამავე 1810 წ. საქართველოს მთავარ-მართებელი გენერალი ტორმასოვი ეტყობოდა ოსმალებს ჯავახეთში. ჯარს უფროსობდა მარკიზი, რომელმაც დაამარცხა ოსმალონი ქ. ახალქალაქთან და წაართვა ეს მაგარი ციხე. გამარჯვებულ მარკიზს უბოძეს გენერალ-ლეიტენანტობა და წმინდა გიორგის ჯვარი მესამე კლასისა. ჯილდო დიდზე უდიდესია, რადგან თვით გენერალ ციციშვილს განჯის აღებისათვის მხოლოდ ინფანტერიის გენერლობა მისცეს და მესამე კლასის გიორგი-კი ვერ გაიმეტეს, რამაც დიდად ატკინა გული ფიცხის-ნასიათის პატრონს სარდალსა.

კავკასიის ლინიაზე დაუსრულებელი დავი-დაარაბა ჰქონდათ გამართული სამოქალაქო და სამხედრო უწყებათა მოხელეთ. ერთმანეთში ვერა რიგდებოდნენ, შუღლისა და უთანხმოების გამო შესამჩნევად ფურხდებოდა რუსთა მფლობელობის დამკვიდრება როგორც საქართველოში, აგრედვე ჩრდილო-კავკასიაში. ესაა მიზეზი, რომ პეტერბურგის მთავრობამ 1811 წ. ასტრახანისა და კავკასიის გუბერნიები ჩააბარა გენერალ რტიშჩევს. პირველად ეს გენერალი ემორჩილებოდა ტორმასოვს, მაგრამ ტორმასოვი რომ გადააყენეს საქართველოს მთავარ-მართებლობიდან 6 ივლისს 1811 წ. და მის ადგილზე დანიშნეს მარკიზი პაულუჩჩი, რტიშჩევი სრულიად დამოუკიდებელი შეიქმნა საქართველოს მთავარ-მართებლისაგან. ამ გვარად მარკიზი უფროსობდა მხოლოდ იმ ჯარებს, რომელიც საქართველოსა და ამიერ-კავკასიაში იყო დაბანაკებული. ესეც უნდა აღვნიშნოთ, რომ მაშინდელ საქართველოსა, ასტრახანისა და კავკასიის გუბერნიების სირონად დანიშნა ვლადიკავკაზის ციხე-სიმაგრე. ვლადიკავკაზი და სამხედრო პოსტები საქართველოს სამხედრო გზაზე კობამდე გენერალ რტიშჩევის ჯარებს ეჭირათ. სურსათით დაკმაყოფილება ამ ჯარებისა რტიშჩევისავე მრავალეთნას შეადგენდა მხოლოდ სამხედრო განკარგულება. გზის შენახვა და მართვა-გამგეობა პატარ-პატარა ერებისა ვლადიკავკავიდან მოყოლებული ს. კაიშაურამდე პაულუჩჩის დააკისრეს.

მარკიზი სულ რაღაც სამიოდე წელიწადი იყო ჩვენში, მთავარ-მართველობაში-კი ერთი წელიწადიც არ შესრულებია. 1812 წ. აპრილის ოცში საქართველოში დაბანაკებულ ჯარის უფროსობა ჩაიბარა ახალმა მთავარ-მართველმა რტიშჩევმა. მარკიზი დაიბარეს პეტერბურგს და დანიშნეს პირველის ლაშქრის შტაბის უფროსად. ახალს თანამდებობაზე მარკიზი დარჩა რამდენიმე დღე, რაღაც უთანხმოება მოსვლია სამხედრო მინისტრ ბარკლაი-დე-ტოლისთან და შტაბის უფროსობიდან გადააყენეს და ჩააბარეს ლიფლიანდისა და კურლიანდიის გენერალ-გუბერნატორობა. 1826 წ. სრულიად მიატოვა მარკიზმა რუსეთი და დაბრუნდა სამშობლო იტალიაში, სადაც გაამწესეს პიემონტის ჯარის უფროსად.⁷⁴⁾

რუსებს ჩვენი არა ესმოდათ-რა, ქართველებს კიდევ რუსებისა. ერთმანეთის გაუგებრობამ დიდი ზარალი და უბედურობა მიაყენა დატანჯულს საქართველოს. ცხადია, რომ პირდაპირ ევროპიდან მოსული მთავარ-მართველი უფრო ნაკლებად იქმნებოდა მომზადებული საქართველოს მართვა-გამგეობისათვის. ვამბობთ პირდაპირ, რადგან მარკიზი გადმოსახლდა რუსეთში 1807 წელს და სამი წლის შემდეგ მორიგ გენერალად საქართველოში დაინიშნა. ამ მცირე ხანს რუსულ ენასაც-კი ვერ შეიწავლიდა ომიანობის ქარ-ცეცხლში გართული ახალგაზრდა სარდალი და ქართველი კაცის ზნისა და ხასიათის შესწავლისათვის სად მოიცილიდა. საქართველოს ისტორიის შესასწავლად არც მარკიზის წინამოდგილეთ გაუცხელებდათ თავი და მართავდნენ ქვეყანას ღვთის ანაბაჟად. ამის გამო საბუთი არა გვაქვს გადაჭარბებით დავემდუროთ მარკიზსა და ვუსაყვედუროთ ჩვენის ქვეყნის უტოლინარობა. ჩვეულობად არა ჰქონდათ მაშინდელ დიდ მოხელეებს შესწავლა და შეგნება იმ ქვეყნისა, რომლის ბედი და უბედობა ხელში უვარდებოდათ. ღვთის წინაშე, სავალდებულო ჩვე-

74) იხ. ლექსიკონი ბროკაუზისა, ტ. 45, გვ. 52, сборн. свѣд. о Георг. Кавалерахъ Кавказск. войскѣ, А. Л. Гизетти, გვ. 14, утв. ტ. II, გვ. 276. Акты, ტ. IV, გვ. 56.

ულობად არც დღესაა მიჩნეული საპატრონოდ და მოსავლელად მიცემულის ქვეყნის შესწავლა და შეგნება.

ბატონიშვილ დავითს, როგორც ზემოთაც აღვნიშნეთ, მეტის-მეტად არ მოსწონს მარკიზი პაულუჩჩი და ხშირად ტირანად იხსენიებს. კაცი ელამი რაგვარათაც თვალითა, ეგრეთვე სულითაცა და მოქმედებითა, ვინაიდან აქვდა მას სული იტალიანურიო. რა შუაშია აქ მარკიზის იტალიანობა, ბატონიშვილი არ განგვიმარტავს. ალბად, იეზუიტობას თუ სწამებს პაულუჩჩის. პაულუჩჩი შეეხმიანა ერევნის ბეგლარ-ბეგს ჰუსეინ-ხანს - ციხე დამითმე და ერევნის სახანოს მცხოვრებთ სრულიად ყმად დაგიტოვებო. ხანი შეჰპირდა, თხოვნას აგისრულებო. მარკიზმა გენერალი ლისანევიჩი გაგზავნა ერევნის ციხე-ქალაქის ჩასაბარებლად ორი ათასი მხედრობით. ჰუსეინმა შეჰკრიბა ჯარი და დამალა ეჩმიადინს. "მიიწივნენ რა რუსნი, ეკვეთნენ სპარსნი და აოტნეს რუსნი და სირცხვილეულ იქმნა მარკიზი ესე ვითარისა და უგუნურისა შეცთომისათვის".⁷⁵⁾ სულ ასე იცის გულდამწვარმა ბატონიშვილმა, საცა კი მოასწრებს მარკიზს, კარგად გაჯონავს, გესლიანი ლექსით შეამკობს და რაკი გულს მოიოხებს, დაწყნარებით განაგრძობს თავის საინტერესო მატინანეს.

მართალია, მარკიზის მთავრობის დროს კახეთი გაბედნიერდა საეგზეკუციო კამანდებით, მაგრამ რა ვუყოთ. ეგზეკუცია მარკიზს ხომ არ მოუგონია, რა იარაღიც მისცეს ხელში, სწორედ ამ იარაღს იქნევდა ნაპოლეონის სარევეოლიუციო ჯარის ნაუფროსალი. ჩრდილო-იტალიას და საფრანგეთში თუ დესპოტიას ამსხვრევდა, აქ, ჩვენში, "მორჩილების გრძნობას" ამტკიცებდა სწორედ იმ საშუალებით, რა საშუალებითაც მისი წინამორადგილენი მოქმედებდნენ. ეგზეკუცია მარკიზამდე ყოფილა და ვინ იცის კიდევ რამდენ ხანს არ გადაკარდებდა მონგოლთა ურდოთაგან გადმონერგული ინსტიტუტი...

სხვებთან შედარებით მარკიზის სანაქებოდ ბევრი რამ ითქმის. ჯერ ერთი ვერცხლი არ უყვარდა, ანგარებით არ იყო შებოჭილი მისი სული და გული. სძულდა ქრთამი და მოქრთამ-ეს არ ინდობდა. ერთ უწეტურ-აფიცურს ხუთი მანათი ქრთამი გამოერთმია ჯარის-კაცისათვის. მარკიზმა სასტიკად დასაჯა მოქრთამე შპიცრუტენით.⁷⁶⁾

აფიცრები ძალიან ეტანებოდნენ ბანქოსა და სასმელს. ჩაიბარა თუ არა კავკასიის კორპუსი, მარკიზმა სასტიკი ბრძანება გაუგზავნა ჯარის უფროსებს, არავის დაეინდობ, თუ შევამჩნიე ვისმე ლოთობა და ბანქოს თამაშიო. პაულუჩჩის არც ის მოსწონდა, რომ ჯარის-კაცებს ხასები ჰყავდათ. ხასის ყოლა სარწმუნოების წინააღმდეგიაო, ბრძანებდა მარკიზი. ვისაც სარწმუნოება არა აქვს, ხელმწიფესა და სამშობლოს პატიოსნად ვერ ემსახურება, რადგან სინილისი სუფთა არ ექნებაო. არ უყვარდა აგრედვე საჩუქრები. ჩვეულებად გადაქცეოდა მაშინდელ აფიცრობას საჩუქრის მიერთმევა მთავარ-მართებლისათვის და ამისათვის ბრძანება გასცა, ვინც საჩუქარს გამომიგზავნის, იცოდეს, რომ მაწყყინებს და ცუდის თვალთ დავეუწყებ ყურებასო. არც ის მოსწონდა, რომ სამხედრო კაცი წერილებით მიმართავდნენ ხოლმე მთავარ-მართებლის კანცელარიის მოხელეებს სხვა და სხვა თხოვნა-მუდართ. ვისაც საქმე აქვს, პირდაპირ მე მომმართოსო, მაშუალი რა საჭიროაო. ჯარის უფროსებს აფრთხილებდა, ტყუილ მოხსენებას ერიდენით, ჭეშმარიტებას ნუ აბნელებთ, ჯარის მოქმედება-მოძრაობას მტრის წინააღმდეგ ბუშტივით ნუ ჰბერავთ მოგონილ ამბებით, თორემ ხელმწიფის წინაშე გამოვამჟღავნებ ამისთანა ვაჟბატონებსო.

ამ პატარა მაგალითებიდან ცხადადა სჩანს, რა ცუდის თვალთ უყურებდა მარკიზი ჯარში გამეფებულ საძაგლობას

76) ოპტირად გამწკრივებენ ჯარის კაცებს, მათრახებს დაღრიგებენ და უბრძანებენ თითოჯერ უთუთქონ დახანაშავენ, შუაში რომ გაივლის ხშირად დახანაშავენ ბოლომდის ვერ მიადწეულა ხოლმე და დასისხლიანებული უგონოდ იქცეოდა. მათრახებს ხუზუნით რომ გაჰქონდა, ხორცის ნაფლეთები ტანიდან პანტასივით ცვიოდა ხოლმე. მოქრთამე უწეტურ-აფიცური ხუთას კაციან წრეში გაატარეს.

და რა მალლად აყენებდა ჯარის-კაცის პატიოსან სახელსა. მარტო ჯარისაგან არ თხოულობდა პაულუჩჩი ზნეობის სის-პეტაკესა. თურმე ბატონიშვილ ანასტასიას, თ. ციციშვილის მეუღლეს, სუბუქად ეჭირა თავი. საქართველოს ეგზარხოსს ვარლამს (ერისთავი) წერილი გაუგზავნა, ანასტასიას ცუდად უჭირავს თავი, ნათესავეები სირცხვილით იწვიან მისი მა-ცქერალნი, ქალაქიც გაირყვნება წამხედურობით. ურჩიე მოიშალოს ცუდი ყოფაქცევა, თორემ მონასტერში ვუკრამ თავსაო.

რა წერილები მისწერა მარკიზმა თ. თამაზ ორბელიანს და კონსტანტინე მუხრან-ბატონს, პურის დარჩენილი ხარჯი ღროზე რომ ვერ შეიტანეს, ზემოდ მოვიხსენიეთ. თ. სოლომონ არლუთაშვილმა სთხოვა პაულუჩჩის, სამხედრო კამანდები მიბოძე ჩემ სოფლებში დასაყენებლად, რადგან მტაცებელი ავაზაკები მიოხრებენ მამულსაო. "წინად, უამთა მეფობისა, შეატყობინა მარკიზმა არლუთაშვილს, მცხოვრებნი თვითონ იცავდნენ თავიანთ სოფლებსა. თუ ეხლა ხალხს სიმხდალე შეეპარა, იცოდეთ, რომ მხდალთა დასათარავად არ შევაწუხებ ჯარსა, ვინაიდან ჯარის მოვალეობა ისაა, რომ დაიფაროს სამზღვარნი სრულიად საქართველოსა მტრის შემოსევისაგან და არა მტაცებელ-ყაჩაღებისაგან".

მარკიზი სცდილობდა მოესპო ღლევიანდლამდე დარჩენილი ჩვეულება. ახალს მთავარ-მართველს ხანები ძღვენს უგზავნიდნენ. წერილით აცნობა ამიერ-კავკასიის ხანებს, ჩემი პატივისცემა თუ გიღვეთ გულში, საჩუქრის გამოგზავნაზე აიღეთ ხელი, აი თუ ჯარისათვის საჭირო სურსათს ღროზე მომაწვდით პირიან ფასებში, ნამდვილ პატივისცემად ამას მივიღებო. თქვენის დახმარების წყალობით ხაზინას სარგებლობა მიეცემა და სწორედ ეს იქნება სასიამოვნო საჩუქარი ჩემთვის. მაშინ თქვენს ერთგულობას სიამოვნებით უმაღლესს კარსაც მოვახსენებო.

მეტეჩიარა თავადიშვილები არა ჰყვარებია პაულუჩჩის. 1811 წ. პეტერბურგს ასულან ორი ჩვენი თავადიშვილი ანდრონიკაშვილი და ერისთავი და განუცხადებიათ - სპარსე-

თიდან ბატონიშვილ ალექსანდრეს ჩვენ გამოვიყვანთო. პეტერბურგიდან შეატყობინეს პაულუჩჩის, დახმარება აღმოუჩინე ანდრონიკაშვილს, რადა პირნათლად აასრულოს დაპირებაო. მარკიზს ეწყინა და როგორც შემდეგში ერმოლოვმა ამანაც დააფოლა ალექსანდრეს მნიშვნელობა, ბატონიშვილს თავის თავად არაფერი ფასი არა აქვს, ერთი რაღაც უტვინო კაციოა. რაკი საწადელი ვერ აისრულა, ესე იგი რაკი მეფობა ვერ დაიბრუნა, მნიშვნელობა დაეკარგებოდა, მაგრამ რადგან დიდად ვსცდილობდით მის დაჭერას, ანუ ვეხვეწებოდით, ოღონდ დაბრუნდი და წყალობას არ მოგაკლებთო, როგორც ალექსანდრემ, ეგრედვე თანამოზიარეთ დაიჭერეს, რომ იგი დიდად საჭირო ყოფილა რუსეთისათვის. მე კი სულ სხვა გზას დავადექიო. ქართველებს სულ იმას ჩავჩიჩინებდი, რომ სახელგანთქმულ რუსის მხედრობას არაფრისა ეშინიან. ჩვენთვის სულ ერთია, სადაც ენებოთ, იქა ბრძანდებოდნენ მეფე სოლომონი და ბატონიშვილი ალექსანდრე. - გულს იკეთებდა მარკიზი, თორემ ნამდვილად ასე არ იყო.

რაც უნდა მაგრად გაბმულიყო მარკიზი მაშინდელ ცხოვრების ბლანდებში, მაინც ევროპიელობას საცხებით ვერ დაჰკარგავდა. ევროპიელობა მარკიზისა გამოიხატა იმაში, რომ დიდის პატივისცემით მოეპყრა წარსულ დროის გმირთა და მოღვაწეთა. მეფე ერეკლესა და გიორგის ძეგლები აუგო მცხეთის ტაძარში თავისის კანცელარიის საფასით: "რათა სახსოვარ ვყო შთამომავლობისათვის, აწერია ერეკლეს ძეგლს, სახელი იმ ხელმწიფისა, რომელმაც იმეფა დიდებით 54 წ., მათის იმპერატორებითის დიდებულების ალექსანდრე პირველის სახელით აღვაშენე ძეგლი ესე 1812 წ. საქართველოს მთავარ-მართებელმა მარკიზმა პაულუჩჩიმ".

პატივით მოეპყრა მარკიზი განსვენებულ ჯავათ-ხან განჯელის ოჯახობას. ნება მისცა დაბრუნებულყო სპარსეთს და თან წაეღო გვამი ჯავათ-ხანისა და მისის შვილის ჰუსეინ-ყულიადასი. ეს ის ჯავათ-ხანია, რომელიც ზედ ზარბაზანზე აკუწეს ხმლით თ. ციციშვილის ჯარისკაცებმა 1803 წ.

დიდის წარჩინებით და პატივით გადმოსვენა მარკიზმა ტფილისს განსვენებულ თ.პ.დ. ციციშვილის გვამი ბაქოდან, მის მიერვე შეკეთებულ და გამშვენებულ სიონის ტაძარში "სამშობლოს შესანიშნავის შვილის და ღირსეულის გენერლისა". თავწარკვეთილი გვამი ამოიღეს 1807 წელს სანაგვე ხევიდან, ჩასდვეს უბრალო ხის გაფისულ კუბოში და შეინახეს ბაქოს ერთ-ერთ ეკლესიის სარდაფში. ხუთის წლის განმავლობაში, ბრძანებს გულმტკივნეულად კაპიტანი ანოსოვი, ფიქრად არავის მოსვლია, ცივ დედა-მიწისთვის მიებარებინათ ქრისტიანულის წესით და "საომარის პატივით" გვამი იმ კაცისა, რომელმაც თავი თვისი არ დაზოგა ქველობით აღსავეს სამსახურში და მტლედ დაედო იგი სამშობლოსათ. 77)

ასეთი იყო მარკიზი პაულუჩჩი, რომელსაც წილად ბედმა არგუნა უცნაური როლი, ჯერ ნებსით თუ უნებლიეთ, ხელი შეეწყო ამბოხების ასაფეთქებლად და შემდეგ "ამოწვდილი მახვილით" (manu militari) ჩაექრო იგი.

X

კახეთი რომ იწეწებოდა და იგლიჯებოდა საეგზეკუციო კამანდებით, ამ დროს თიანეთისა და ფშავ-ხევსურეთის მიყრუებული სამოურავო შედარებით განცხრომით ბრძანდებოდა. მოუსავლობა-შიმშილობამ ამ კუთხესაც გაჰკრა ბასრი კლანჭები, მაგრამ სამაგიეროდ თიანელებს ჯერჯერობით არ ეწვნიათ, თუ რა გემოსი იყო მარკიზის მიერ ჩაყენებული ეგზეკუცია. კვენესა და გმინვა ბარისა მთას ესმოდა, გარკვევით მოდიოდა ამბავი ოჯახებში ჩაყენებულ ჯარის აკაცობისა, მთა სწუხდა, მოძმე კახელის დარბევას რომ ჰხედავდა, მაგრამ რაკი თვითონ არ ეხილა და არ განეცადა ეგზეკუციის მრავალ-ფეროვანობა, კუშტად იდგა და დროს ელოდა, ვნახოთ ბედი რას მოგვიტანსო.

ოფიციალური წყარო, ესე იგი მარკიზი პაულუჩჩი და ამ მთავარ-მართებლის მოხსენებაზე დამყარებული ბ-ნი: ან-ოსოვი ასე მოგვითხრობენ ქარიშხალის ამოვარდნის ამბავს: 1811 წლის გასულს მთავრობამ გაანაწილა, რომელ ოლქს და კუთხეს რამდენი პური უნდა გამოეტანა სასურსათო მალაზიების შესავსებად. ზვედრი ფულიც, რაც ეკუთვნოდა ფშავ-ხევსურეთის და თიანეთის სამოურაოს შეწერილ პურისა, გაუზზავნეს თიანეთის მოურავს პოლპოლკოვნიკ თავად ივანე ჩოლაყაშვილს. მართალია, ჩვენ ზემოდ ვიხილეთ, რომ მთავრობის მიერ გაგზავნილი ფული სვავმა და მსუნაგმა კამისიონერებმა ჩაჭიბეს და მარტო ბეები დაურიგეს ხალხსა, მაგრამ გავყვეთ მარკიზსა, რომელმაც "ბუნტისა" და "რევოლიუციის" ამტეხად გამოიყვანა პოლპოლკოვნიკი ჩოლაყაშვილი.

ჩოლაყაანთ გვარში მემკვიდრეობით გადადიოდა ფშავ-ხევსურეთის და თიანეთის მოურავობა. სწორედ აი ამ გვარის კაცს, თ. ივანეს გაუგზავნეს ფული ხალხისთვის დასარიგებლად. მოურავ ჩოლაყაშვილს გამოგზავნილი ფული მიუთვისებია და მარკიზის მოწმობით თიანელებისა და ფშავ-ხევსურებისაგან 600 მანათი თეთრი ქრთამად გამოურთმევია, რადგან პირობა დაუდვია, გაწერილ პურს ხაზინა აღარ მოგთხოვთ, მე ვიცი და ჩემმა კაცობამაო. ხალხმა სიხარულით მიართვა მოურავ ჩოლაყაშვილს 600 მ., ვინაიდან პური თავის სამყოფი არა ჰქონდა და სასურსათო მალაზიაში რას გაიტანდა. რაკი ვალი ასე ადვილად მოიხადეს, ასე თუ ისე გულიც დაიმშვიდეს და სჯეროდათ, რომ ეგზეკუცია კარს არ მიადგებოდა.

მწარედ მოსტყუვდნენ თიანელები!

გომბორის მთის კალთებზე, მდინარე ალაზნის ხეობაზე, შეფენილია პატარა სოფელი ახმეტა.⁷⁸⁾ განთიადისას, 37 იანვარს 1812 წ., ახმეტაში, მოულოდნელად ეკკლესიის ზარი ჩამოჰკრეს. გულ-გახეთქილი ახმეტელები ეკკლესიის ეზოს მიაწყდნენ და თქვენს მტერსა და ღუშმანს, რაც იმათ ამბავი

78) დღეს კაი მოზრდილი სოფელია. თითქმის 2000 სული ორთავე სქესისა იქმნება.

შეიტყეს, - თელავიდან "ზეკუცია" მოდის პურის მოსაკრეფად.

მთავრობა დიდად ეშურებოდა ჯარისათვის საჭირო პურის შეგროვებას და რაკი თიანეთის სამოუროვოდან მარცვლი ხორბალი არ შექონდა ხალხსა, ამის გამო თელავის კაპიტანისპრავნიკმა საეკზეკუციო კამანდები მიუსია სამოურავოს. მოახლოვებული კამანდა რომ დაინახეს, ახმეტელები კვარსავით აენთნენ, გონების თვალთ წარმოიდგინეს დაწიოკება ჯალაბისა, აოხრება ოჯახისა და სახლ-კარისა და სიბრაზისაგან თვალთაგან სულ ცეცხლის ნაპერწკალი აკვესეს. თვით მარკიზი პაულუჩჩი ატყობინებს მაშინდელ პოლიციის მინისტრ ბალაშოვს, რომ ახმეტელების სიბრაზე-გამწარებამ, კამანდის მოახლოვების გაგონებაზე, უაღრესობამდე მიაღწიაო: გონებადბნეული ახმეტელობა მივარდა კამანდას, სცემა და სირცხვილ-ნაჭამი უკან გარეკა. მეორე დღეს, პირველ თებერვალს, თელავიდან წამოვიდა პატარა რაზმი ეგერებისა და დრაგუნებისა. მიუახლოვდა თუ არა რაზმი ახმეტას, ახმეტელებმა თოფები დაახალეს. ამ უამად მართო ახმეტელები არ იყვნენ, გვერდში უდგათ მატნელები და შორიდან საშველად ჩამოსულები: თიანელები, ფშავნი და ხევსურნი.

ხეირი არც სოფელ თიანეთში დაბანაკებულ კამანდას

დააყარეს. თიანელები შეიკრიბნენ ეკლესიის გალავანში და შეუდგნენ თათბირს - რა ღონე ვიღონოთ და როგორ მოვიშოროთ ფაგიდან საეგზეკუციოდ მოსული სალდათებიო. ბჭობა-თათბირში რომ იყვნენ გართულნი თიანელები, უცბად მოთათბირეთა წრე გაარღვია სახე და გონება ამღვრეულმა დედა-კაცმა და შიგ შუბა წრეში დაერქო. გახელებული მანდილოსანი მივარდა ქმარსა, მოჰგლიჯა ქუდი, გადაახურა თვისი მანდილი და დაიკივლა: "დღეიდან შენ ცოლი და მე ქმარი; ნამუსი ამხადეს; მივდივარ, მსურს შური ვიძიო შენს მაგიერო. ეს სიტყვები რომ გაათავა, წაჰგლიჯა ქმარს ხანჯალი და გაშმაგებული ადამიანი ხანჯალ ამოწვდილი გაქანდა სახლისაკენ, სადაც ბინა ჰქონდა საეგზეკუციო კამანდას".

სირცხვილისაგან გადარეულის დედა-კაცის ამბავს მოგვითხრობს თავადი ბებუთაშვილი სამხედრო ჟურნალ "ვოენი სბორნიკში" 1867 წ. მე-6 და მე-7 ნომრებში, რომელიც ამ ჟამად ხელთ არა გვაქვს, რომ შევამოწმოთ. ნამუს-ახლილი დედაკაცი ის მანდილოსანი ხომ არ არის, თიანელ გალეშილმა აფიცრობამ რომ აწამა ღვინისა და ძაბრის შემწეობით.

გაალმასებულმა მანდილოსანმა თავისი გაიტანა. თიანელები გადირივნენ, აენტენ და უკან გამოეკიდნენ გახელებულ დედა-კაცს. კამანდის ბინას გარს შემოერთყვნენ, აფიცერი აკუწუნეს და სალდათები ასჩეხეს. ორიოდ სალდათი გადარჩა სიკვდილსა და თავს უშველა გაქცევით.

პირველი სისხლი დაინთხა, ბრძანებს კაპიტანი ანოსოვი, ხალხს ვნება აეშალა და ყმად გაუხდა გულის თქმასაო.⁷⁹⁾

ქართველი ისტორიკოსი, ბატონიშვილი დავით, ცოტა სხვანაირად გადმოგვცემს პირველის სისხლის დანთხევის ამბავს. ველარ მოითმინეს თიანელთ ესე ვითარი სირცხვილი (მანდილოსნის გაბიაბრუება) და იქმნა შფოთი ქართველთა და რუსთა შორისო. ხოლო პირველად მისცეს მიზეზი შფოთისა რუსთა მით რამეთუ დაკოდეს თიანეთს ამბოხის დროს რამოდენიმე თიანელნი. იხილეს რა ესე თიანელთა, მოსწყვიტნეს ყოველნივე რუსნი ასე ასორმოცდაათ კაცამდე და შემდეგ ჩავიდნენ ს. მატანს.

საეგზეკუციო კამანდები მრავალ-რიცხოვანი არ გახლდა. ბევრი-ბევრი თითოში ყოფილიყო 10-20 სალდათი. იოანე ბოდბელი მოახსენებს პაულუჩჩის, რომ სოფლად ჩაგვიყენეს 12 სალდათიო. პურის მოსაკრებად, სოფლის ასაკლებად და დასაწიოკებლად არცაა საჭირო ამაზე მეტი. თუ ბატონიშვილ დავითის ცნობა მართალია, თიანელებმა ამოსწყვიტეს 2 თებერვალს 1812 წ. 150 სალდათიო, მაშ უნდა ვიგულისხმოთ, რომ საეგზეკუციო კამანდას თიანელებმა ზედ მიაყოლეს მეციხოვნე ჯარიც, ესე იგი ის სალდათ-აფიცრები, რომელნიც

79) Утв... ტ. II, გვ. 353 - 355; Ахтл, ტ. V, გვ. 106 - 108.

ფშავ-ხევსურეთის და თიანეთის სამოურაოში იყვნენ ჩაყენებული მშვიდობიანობის დასაცველად და რუსის მართვა-გამგეობის სახელის გასამტკიცებლად.⁸⁰⁾

აჯანყების პირველ პერიოდს ასე აღწერს მარკიზი პაულუჩჩი უქვეშევრდომილესს რაპორტში იმპერატორ ალექსანდრე პირველს:

თელავის კაპიტან-ისპრავნიკის მიერ გაგზავნილი საეგზეკუციო კამანდა მიუახლოვდა ს. ახმეტას 31 იანვარს 1812 წ. ახმეტელებმა, თვალი მოჰკრეს თუ არა კამანდას, ჩამოჰკრეს ზარი, სოფელი ფეხზე დააყენეს, ეცნენ კამანდას, კარგად მიბეჭეს და გარეკეს. შეშფოთებულმა კაპიტან-ისპრავნიკმა ეგერებისა და დრაგუნთა მცირე რაზმი გაგზავნა ახმეტას კამანდის საშველად და თვითონაც ქართველ თავადიშვილთა თანხლებით გაეშურა ახმეტისაკენ, რათა გამოეძია და გამოეკვლია, თუ რა ხდებოდა ახმეტაში. სულ რაღაც თორმეტი ვერსი არც-კი გაევიდა კაპიტან-ისპრავნიკს თელავიდან, ამბავი მოურბევინეს, -ახმეტელებმა, მატაან-თიანელელებმა და ფშავ-ხევსურელებმა ალყა შემოარტყეს ეგერთა და დრაგუნთა რაზმსაო. ნუ სჩადით კანონის წინააღმდეგ საქმესა, არიგებდა კაპიტან-ისპრავნიკი და მასთან მყოფი თავადიშვილები, მაგრამ დარიგებამ ვერ გასჭრა. მემბოხეებმა თოფები დაახალეს კაპიტან-ისპრავნიკსა და თავადიშვილებს. გულგახეთქილი კაპიტან-ისპრავნიკი ფიცხლავ დაბრუნდა თელავს და მოითხოვა ჯარები ამბოხების ჩასაქრობად.

კახეთის ოლქის უფროსი გენერალ-მაიორი პორტნიაგინი ამ დროს ს. საგარეჯოში იღვა. შეიტყო თუ არა თელავის კაპიტან-ისპრავნიკისაგან, ს. ახმეტაში ამბოხება დაიწყოვო, გენერალ პორტნიაგინმა უბრძანა გომბორზე დაბინავებულ მაიორ ვრონსკის წასულიყო თელავს სამი როტა ჯარით აჯანყების ჩასაქრობად. ვრონსკის გასაძლიერებლად გენერალ პორტნიაგინმა გაგზავნა 250 კაცი ნარველ დრაგუნის პოლკისა მაიორ ესიპოვის უფროსობით. ამავე დროს პორტნიაგინმა

შეატყობინა ტფილისს გენერალ-მაიორ ბარონ კლოტ-ფონ-იურგენსბურგს, საჩქაროდ მომაველე ორი როტა ჯარი სამის ზარბაზნითაო.

კახეთის აჯანყების ამბავმა ტფილისს მოაღწია 3 თებერვალს და, მარკიზის სიტყვით, დიდი აურ-ზაური გამოიწვია. საფიქრებელი-კია, რომ ელდა ეცემოდა მარტო მოხელეობას, თორემ მაშინდელი ტფილისი მიჩვეული იყო ამბოხება-აჯანყებას და "კახეთის ბუნტი" პირისპირ გაწუწუებულ მოხელეებისა, რომელთა ვერაგობა-მუხანათობას ტფილისელებიც კარგად იცნობდნენ, აგრე რიგად არ შეაფიქრიანებდა. ჟამსა იარალის ჩხარუნისა, ახმეტელების საქციელი - ცემა-ტყეპით გამობრუნება სადავლოდ მისულის კამანდისა, ვის გააკვირვებდა და შეაშფოთებდა? ვინ იცის, ეგები კიდევაც უხაროდათ, რომ გაუთლელმა ახმეტელებმა ჯავრი ამოჰყარეს თავგასულ ჯარის-კაცებისა.

მეამბოხეთა ძალა თანდათან იზრდებოდა. ახმეტელებს, თიანელებს, მატნელებს და მარელისელებს, 3-ს თებერვალს მიემხრნენ ახლო მახლო სოფლები და თავადიშვილები. 4 თებერვალს მეამბოხენი მიადგნენ თელავსა და თელაველ სომხების შემწეობითა და დახმარებით შეცვივდნენ ფორშტადტი⁸¹⁾, აიკლეს რუსის აფიცრებისა და მოხელეთა სადგურ-ბინები, რამდენიმე სალდათი მოჰკლეს და დაიტაცეს რაც სასურსათო ორ მალაზიაში პური შეეგროვებინათ. თელავის კამენდანტმა მაიორ შმატოვმა ძლივ-ძლივობით თავი შეასწრო ციხეში 50 ჯარის კაცით და მხნედ გაუძალიანდა კარზე მომდგარ მტერსა. გომბორიდან წასული მაიორი ვრონსკი სამი როტა ქვეითა ჯარით უბრძოლველად ვერ შევიდოდა თელავის ციხეში. მეამბოხენი ჩაუსაფრდნენ ვრონსკის ფორშტადტის ყოველ კუთხეში და თოფები დაუშინეს. ცხარე ბრძოლის შემდეგ ვრონსკიმ გაარღვია მეამბოხეთა წრეები და

81) ფორშტადტი — ციხე-ქალაქის წინ მდებარე გამაგრებული ადგილია, ანუ ჩვენებურად ვარეთ-უბანი. როტაში მშვილობიანობის დროს 100 კაცი ითვლება, ომის ჟამს 215; ესკადრონი ცხენოსანი რაზმია, ითვლება ესკადრონში 128 მხელარი და ამდენივე ცხენი.

ციხეში შევიდა. მაიორს მოუკლეს 11 კაცი, 10^ა დაატყვევეს; დაუჭრეს 2 აფიცერი და 30 ჯარის-კაცი. - საგარეჯოდან წასულს მაიორ ესიპოვებ უარესი დღე დააყენეს მემამბოხეებმა. მართალია, მაიორ ესიპოვმა ბევრჯელ მოიგერია მემამბოხენი, წინაც გაილაღა, მაგრამ ბოლოს მოიმწყვდიეს ვიწრო გასავალში და თითქმის ნახევარი რაზმი გაუწყვიტეს. მოჰკლეს აგრედვე თვით ესიპოვი, დარჩა ამ რაზმიდან ცოცხალი 148 ღრაგუნნი. რაღა თქმა უნდა, ცოცხალნი ვერც ესენი გადარჩებოდნენ, მაგრამ გაჭირვების დროს 80 მეციხოვნე ეგერი და ორი აფიცერი გამოგველნენ, დაჰკრეს ზურგიდან მემამბოხეებს, თავგანწირულად ეკეთნენ და როგორც იყო გადაარჩინეს სრულიად ამოწყვეტას. ღრაგუნები და მეციხოვნენი ციხეში ვაი-ვაგლახილ შევიდნენ. ზარალი საგრძნობელი მოუვიდათ რუსებს. ამ ბრძოლაში დაჰკარგეს 156 ჯარისკაცი. ამ რიცხვში ითვლება მაიორი ესიპოვი, არტილერიის პარუჩიკი ვრონსკი და სასურსათო კამისიონერი მეცამეტე კლასისა სობოლვევი. - დოკუმენტებიდან არა სჩანს, რა საქმე ჰქონდა ბრძოლასთან ამ თხზულელ მეცამეტე კლასის მოხელეს. ალბად, თუ დატორღილებდა სასურსათო მალაზიასთან. ამ დღესვე შემოაკვდათ მემამბოხეებს ერთი ეჯერი მალაზიის საყარაულოდ მიჩენილი.

5 თებერვალს გენერალ-მაიორ პორტნიაგინმა კიდევ მოსთხოვა მაშველი ჯარი გენერალ იურგენსბურგს, რომელმაც ხუთსავე თებერვალს ტფილისიდან გაუგზავნა ორი როტა ჯარი და სამი ზარბაზანი.

მარკიზ პაულუჩჩის უქვეშევრდომილენს მოხსენებაში 26 მარტის თარიღით 1812 წ. N85, სადაც დაწვრილებითაა აწერილი აჯანყების დროის სამხედრო მოქმედებანი,⁸²⁾ ერთი უცნაური ამბავი ეჩხირება ადამიანს თვალში და უნებლიედ იპყრობს ისტორიის მკვლევარის ყურადღებას. მემამბოხენი თავად-აზნაურთა მეთაურობით თელავს რომ გარს

82) იხ. ეს რამორტი აქტების მეხუთე ტომში, გვ. 67 - 82. რამორტი იმოდენა, რომ მთელი წიგნი გამოვა, ცალკე რომ დაბეჭდოს.

შემოდგენენ, გარეთუბანში მცხოვრები თელაველი სომხები მიემხრნენ და ამათის შემწეობით შეცვინდნენ ფორშტადტში. თითქოს სწყინს და ეთაკილება მარკიზს თელაველ სომხების მონაწილეობა "რევოლიუციაში" და სეველიანი კილოთი მოახსენებს იმპერატორს: "თვით თელავის გარეთუბანში მცხოვრებ სომხების დახმარებით აიკლეს მეამბოხეებმა რუსის მოხელეთა ბინა-სადგურნიო. არც ერთი მათგანი არ შესულა ციხეში მის გასამაგრებლად და საპატრონოდო".⁸³⁾ ვითომ რაო, განა ამბოხება- აჯანყება, ანუ, მარკიზისებურად რომ ვსთქვათ, რევოლიუცია, ქართველი კაცის პრივილეგიაა, თუ რა არის? კახელობამ უსამართლო მართვა-გამგეობას ვერ გაუძლო, ხმა ამოიღო და უკეთესი ბედი მოითხოვა. ტყუილადა ჰგონია მარკიზს, რომ კახეთის დამჩაგვრელი მართვა-გამგეობა თელაველ სომხისათვის თვალისა და გულის გამახარებელ წალკოტად, ან ოქროს მადნად გადიქცეოდა. მეჭიანურე-მოჩანგურე პროკურორი პლანოტინი ერთ-ნაირად მოახვედრებდა ჩოგანს ქართველსაც და სომეხსაც. რაკი "ზეკუციაზე" მიღგება ხოლმე საქმე, გამრჩევი ვილაა, ეს ქართველია, ეს სომეხიაო. მოსმული ცელი ერთგვარად აწვენს ძირს ყანასა. და ეკალს, დიახ, სწორედ რომ უცნაურია მარკიზის ჩივილი და საყვედური. სულ რაღაც თერთმეტმა წელმა გაიარა მას აქეთ, რაც რუსობა დამკვიდრდა საქართველოში და იქვე სათავეში უმაღლესი მოხელე ღვარძლის თესვას შეუდგა მეზობელთა შორის, ერთი რომ ერთგულია, მეორე მოლაღატეაო და ამ კილოზე მომართული მოხსენება თვით ხელმწიფეს წარუდგინა. - მოთხრობის დასასრულს ვიხილავთ, რომ მთავარ-მართველმა რტიშჩევმა უფრო ნათლად და გარკვევით აღიარა მარკიზის აზრი, - სომხებს ერთგულობის ატესტატი უწყალობა და ქართველობას მაშფოთარისა.

ოფიციალურ წყაროების მიხედვით ნაამბობი თელავის ალყის შემორტყმაზე კახელ მეამბოხეთა მიერ ძალიან განს-

83) აი დედანიც: „Бунтовщики, по содействию нѣкъ сѣмкохъ Армянъ живущихъ въ предѣльстѣмъ г. Телавъ, нѣкъ коимъ ни одинъ не вошелъ въ крѣпость для защищенія оной... ворвались въ форштадтъ“...

ხვაკდება ბატონიშვილ დავითის ისტორიიდან. სურათის შესაესებად მოვიყვანთ დავითის ნათქვამსაც, ხოლო ალაგ-ალაგ შევცვლით ტექსტის ენას, რადგან ძნელი გასაგებია და ამძიმებს აზრთა დენას. დალაგებული, მატრიანისებური კილო-კი ბატონიშვილისა ფრიად სასიამოვნოა და სწორედ ცოდვა იქნება მისი შელახვა და შებლაღვა.

”ხოლო ოდეს შთავიდნენ თიანელნი მატანს, - გვიამბობს ბატონიშვილი დავით, - შემოეყარნენ ამათ მატნელნი და ახმეტელნი სრულიად. იქ მყოფნი რუსნი და რაოდენნიმე ტუსიშვილნიცა მოჰსწყვიტნეს მით, რამეთუ ეპყრათ რუსთა მხარე. ჰსცნეს რა ესე ყოველივე კახთა, აღადგინეს შფოთი დიდი სრულიად კახეთსა შინა და იწყეს სრვა და ხოცვა სოფლებში ყოველთა რუსთა, რომელნიცა იდგნენ მათ შორის იასაულად პურის ასაკრეფად. მეამბოხენი მივიდნენ და მოადგნენ თელავს. მაშინ გადაიყვანეს კახთა მეფის ძის იოვანეს შვილი გრიგოლ ქართლიდან, და მოკრბნენ ლეკნიცა ვიდრე ოთხი ათასამდე კახთა საშველად და ჰყვეს კახთა თვისა ზედა უფროსად თავადი ქობულოვი ოთარ მდივანი”.

დავითის ისტორიის ეს ადგილი ნათლად გვიჩვენებს, რომ ამბოხებამ ამ ჟამად მაღალ-მნიშვნელოვანი ხასიათი და მიმართულება მიიღო. საშველად მოიწვიეს ოთხი ათასი ლეკი, ამოირჩიეს სარდალი თავადი ოთარ ქობულაშვილი, მდივანი, და რაც უფრო საყურადღებოა - ქართლიდან მოიწვიეს ბატონიშვილი გრიგოლ იოვანეს ძე. ეს გრიგოლი კახელებმა მეფედ გამოაცხადეს, ხოლო როდის, - არა სჩანს. ამ გვარად უმნიშვნელო აშლა საეგზეკუციო კამანდების თვითნებობის წინააღმდეგ პოლიტიკურ ბრძოლად გადაიქცა. მეამბოხეებმა მეფე იშოვნეს, დღეიდან მისის სახელით დაიწყეს ბრძოლა და სრული პროტესტი გამოუცხადეს რუსის მთავრობას, რომელმაც, კახელების აზრით, უკანონოდ და წინააღმდეგ ხელშეკრულობისა, მოშალა მეფობა და სამეფოს ნანგრევებზე ააგო კაპიტან-ისპრავნიკების, კამისიონერების და საეგზეკუციო კამანდების უფლება-ბატონობა.

„ჰსცნა რა ესე პარტნეგინმა, - განაგრძობს დაკარგულ ტახტის მემკვიდრე ბატონიშვილი, - რომელიცა იმყოფებოდა საგარეჯოს, გარდააშველა თელავს მყოფთა რუსთა სამასი სალდათი ცხენოსანი ღრაგუნნი. მივიდნენ რა ვარდის-უბანს, იქმნა მუნ ბრძოლაი და სრულიად მოისრნენ რუსნი იგი კახთა მიერ და რუსთა წინამძღოლიცა მაიორი ესიპოვი მოჰკლეს და ერთიცა სხვა მაიორი და ორნიც აფიცერნიცა. მცირედნი დანაშთნი შევიდნენ ციხესა თელავისასა, რომელიცა აქვდა რუსთა გამაგრებული. იყო მათთანა ალექსანდრე სვიმონის ძე მაყაშვილი, ეშქალსბაში მეფისა გიორგისა. გარს მოადგნენ კახნი თელავსა და მოჰკლეს რუსებმა ციხიდან პაატა ჯანდიერიშვილი“.

აქ დასახელებული მაყაშვილი, განსვენებულ მეფე გიორგის სახლთ-ხუცესი, ის ალექსანდრე მაყაშვილია, რომელიც თიანეთის მოურავად დაინიშნა პოლპოლკოვნიკ თ. ივანე ჩოლაყაშვილის სიკვდილის შემდეგ იქვე აჯანყების დასაწყისშივე და რომელიც მთის ხალხმა მოურავად არ მიიღო. ჩოლაყაშვილი სიკვდილმა იხსნა სასჯელისაგან, თორემ, რომ ეცოცხლა, უეჭველია, ციმბირის გზების სატყეპნად გაიგზავნებოდა სხვებთან ერთად. ალექსანდრე სვიმონის ძე მაყაშვილმა-კი, ვითარცა შეპფერის ერთგულ ყმას ახლადგაჩენილის მთავრობისასა, მის მხედრობას შეაფარა თავი და ჩაიკეტა თელავის ციხეში.

ამბოხების ჩანელების შემდეგ ალექსანდრე მაყაშვილი თელავის მოურავად დაამტკიცეს.⁸⁴⁾

XI

აჯანყება, ანუ ოფიციალურად "ბუნტი", რაკი დაიწყო, სისწრაფით ვრცელდებოდა. მისი ატეხა, როგორც ზემოდ მოვიხსენიეთ, პაულუჩჩიმ თ. ივანე ჩოლაყაშვილს დააბრალა.

უკვე განსვენებულს რაღას დააკლებდა და ნათესავეებს მისწვდა გაჭაგრებული მარკიზი. ივანეს ნათესავეები, ბრძანებს მთავარ-მართებელი, სხვა-და-სხვა გაიძვერაობით სცილობდნენ ხელში ჩაეგდოთ თიანეთის სამოურაო და ამის გულისათვის ხალხი წააქეზეს და მთავრობას მიუსიეს. ამ გვარად "ბუნტის" ალი მოედო მთელ კახეთსაო.⁸⁵⁾ აჯანყების მეთაურნი მიწის მგელსავით ხან ერთ სოფელში, ხან მეორეში გაჩნდებოდნენ ზოლმე და ზოგს ტკბილი სიტყვით, ზოგს ძალითაც თავისკენ იბირებდნენ. ბოდბის-ხეველებმა და პრასიანელებმა პირდაპირ გამოუცხადეს მარკიზ პაულუჩჩის თავიანთ მოურავის ანდრონიკაშვილის პირით: ამბოხება თიანეთში დაიწყო და ჩვენამდე იქიდან მოვიდაო. შეგვეშინდა აკლება-დანიავებისა, ბევრი ჩვენგანი კიდეც დაარბიეს და იძულებული ვიყავით შეამბოხებებს უკან გავყოლოდითო. რაკი კახელებმა საქმე წააგეს და რუსები თავიდან ვერ მოიშორეს, ქიზიყელებმა თავი მოიკატუნეს. ჩვენ რა, კრავები ვართ, თიანელები რომ არ ყოფილიყვნენ, ვითომც ხმასაც არ ამოვიღებდითო. გამოძიების დროს ტყუილად გაიტეხეს სახელი ქიზიყელებმა. მართალია, დაწყებით თიანელებმა დაიწყეს აჯანყება, მაგრამ ქიზიყელებმა სინსილა გაუწყვიტეს და მეტი რაღა უნდოდათ. მაინც თავის მართლებამ ვერ გასჭრა და "ბუნტოვშჩიკები" სასტიკად დაისაჯნენ.

ამბოხების ნაპერწკალი ალაზნის პირიდან გომბორის მთით ივრის ხეობას მოედო და ტფილისის მახლობელ სოფლებს უწია. რუსთა მხედრობის სუსტი რაზმები დაიბნენ და რიგიან წინააღმდეგობას ვერ უწევდნენ აღელვებულის ერის ძალას. ამავე დროს წერილი წერილზე მოდიოდა აღექსანდრე ბატონიშვილისაგან. სპარსეთის ტახტის მემკვიდრე, შაჰზადა აბბას-მირზა მაცდუნებელ ფირმანებს უგზავნიდა ქართველებს. მოვდივარ თქვენ საშველადო, სწერდა აბბასი ქართველებს, მხნედ იყავით და ებრძოლეთ რუსებსა. დიდძალი ფულიც უკვე კაიხანია, რაც გამოვგზავნეო.

85) Акты, т. V, гл. 107.

აბბას-მირზას პროკლამაცია ფრიად საყურადღებო დოკუმენტია, ამბოხებას აორკეცებდა და ქართველობას იმედს უნერგავდა, რომ ტყუილად არ ჩაივლის განწირულის სულის კვეთება და თავიდან მოვიშორებთ დაუპატიჟებელ სტუმრებსაო. ამისათვის საჭიროდ მიგვაჩნია ამ პროკლამაციის გადმოთარგმნა მცირედის შემოკლებით.⁸⁶⁾ დიდია და გძელი, მაგრამ რა ვუყოთ. მაშ სად და როგორ გაიცინოს ქართველმა კაცმა მისი შინაარსი, თუ არ ამ ისტორიულ ამბავში?

"უმაღლესი ბრძანება ქვეყანას მოეფინა"... ასე იწყება პროკლამაცია. - "გეუწყით, რომ ვიდრე თქვენი შიკრიკნი მოაღწევდნენ ერევანს და ერევნიდან ჩვენამდე თავრიზს, ჩვენ უკვე გვაცოდინა და მოგვახსენა ერევნის ბეგლარ-ბეგმა, მალალხარისხოვანმა ჰუსეინ-ხანმა: დიდ მხნეობას და ვაჟკაცობას იჩენენ ქართველები, ექვსი ათასი რუსის სალდათი ამოსწყვიტეს ქიზიყში და რამდენიმე ზარბაზანი წაართვესო. ალექსანდრე-მირზამაც მოგვახსენა, რომ ჩემდამი ერთგულობას იჩენთ და ჩემის მოსვლის მოლოდინში ხართ. ამაობაში დაფრთხს ჩამოვიდნენ შიკრიკნი ავეტიქ-ბეგი და გიორგი და მოგვახსენეს თქვენი გარუშოება⁸⁷⁾ დაფრწუდდით თქვენს ვაჟკაცობა-მხნეობაში და კეთილგონიერებაში. მივხვდით, რად ელაქუცებოდით რუსეთს და ხმას არ იღებდით. ელოდით გაზაფხულის დადგომას, რადგან სწორედ გაზაფხულზე გვქონდა განზრახული მანდეთ წამოსვლა. გამოვტყდებით და გეტყვით, რომ თქვენი სამსახური ერთი საუკეთესო სამსახურთაგანია. მაშ ესეც იცოდეთ, იმისთანა წყალობას მოგანიჭებთ, რომ სხვა წყალობა მასთან სახსენებელი არ იქნება. ნათელით შეიმოსოს სახე და პირი თქვენი ზამთარი გავიდა, გაზაფხული კარზე გვადგია. გამარჯვებას ჩვეული ჭარი უკვე

86) სახელი პროკლამაცია ჩვენი მოგონილი არ გეგონოთ. სწორედ პროკლამაცია პქვიან აბბასის წერილს. იხ. АКТЫ, ტ. V, გვ. 86 - 88. ჟერ სპარსული ტექსტია დაბეჭდილი და შემდეგ რუსული თარგმანი. ქართულიც იქნებოდა, მაგრამ ვინ იცის სადაა იგი. სტილი პროკლამაციისა სწორედ რომ სპარსულია, ფერადოვანი, გაბერული, ზვიდი.

87) ეს ის ავეტიქია, რომლის წერილიც ზემოდ იყო მოყვანილი; ვინაა გიორგი, არ ვიცი.

მზადაა. ამ დღეებში თავრიზიდან ავიყრებით, თან გვახლავს ზარბაზნები, რომელნიც ჯოჯოხეთსავე ნაპერწკალს აკვესებენ; მოგვაქვს ცეცხლმფრქვევი ზარბაზანი და მოგვყავს უშიშარი ცხენოსანი ჯარი. წამოვალთ ვითარცა ნიაღვარი, მთასა და ველს დედა-ბუდიანად რომ ჰგლეჯს. მალალხარისხოვან ერევნის სერდარს და მალალხარისხოვან ალექსანდრემირზასაც უბძანეთ ჩვენზე წინ წამოვიდნენ საქართველოსკენ გაწყობილი ჯარით. უფლის შეწევნითა და წყალობით ჩვენს მხედრობას და ქვეითა ჯარს რუსები ვერ გაუმკლავდებიან და ამ წელსვე მთელი საქართველო და ქალაქი ტფილისი გასუფთავდება მათის საძაგლობისაგან (დედანში: вся Грузія и г. Тифлисъ очистятся отъ ихъ гадостей) და ყოველი ქართველი, დიდი და პატარა, მოიპოვებს მყუდრო ცხოვრებას. სიცოცხლე, ქონება და სახელი მანდაურის მკვიდრისა ხელუხლებელი გახდება”.

პატარა შევისვენოთ. როგორღაც გენამუშება და თან გეცინება, პროკლამაციის ამ ადგილს რომ ჰკითხულობ. სასაც-ილო როგორ არაა, გეთაყვათ. ყიზილბაში აბბას-მირზა ქართველობას ჰპირდება იმას, რასაც დღეს, ბრალიანი და უბრალო ქუდმოგლეჯილი დაეძებს. სწორედ არ ეკადრებოდა დიდ ნაპოლეონის სარდალს, კეთილშობილ მარკიზ პაულუჩჩის რომ ქართველობა დაანატრულა თვით პირვანდელის კაცის უფლებას. მართალია, იმპერატორი ალექსანდრე პირველიც დაჰპირდა ქართველობას 1801 წ. 12 სექტემბრის მანიფესტით ბევრს კაი-კაებს, მაგრამ თუ რაღაც ათიოდე წლის განმავლობაში საყიზილბაშოდ გახდებოდა საქმე, ვგონებთ, ასეთს ამბავს ვიცე-კანცლერი სოლომონ ლეონიძეც ვერ წარმოიდგენდა.

შაჰზადა ბოდიშს მოიხდის, აქამდისინ ვერ წამოველიო, რადგან ჯარი და არტილერია მზად არ იყოვო. ჩვენი სურვილია ერთი შეტევით გავაქროთ რუსები, მათი სახსენებელი ამოვ-აგდოთ და მოვრჩეთ და მოვისვენოთო. ყარაბაღისაც ეხლა აღარ გვეფიქრება. ცოტა რამაა გასაკეთებელი, მაგრამ დაუ-მთავრებელს დაამთავრებს ყარაღაჯაგის საყარაულო ჯარით.

"ამ უამად, ბძანებს აბბასი, ჩვენ სარბაზებს სული უკაწკაწებთ და მშიერ ლომსავით მონატურნი არიან შეხვრიბონ საქარველოში მყოფ რუსების სისხლი. გაეჩნდებით თუ არა მანდა, საქართველოს დავიმორჩილებთ, რუსის მთავარმართველს და მის სალდათებს გავსწყვეტავთ, ან დავატყვევებთ. ამას შემდეგ თქვენ, ქართველებს, საშუალება მოგეცემათ, დასტკბეთ წყნარის ცხოვრებით და მოისვენოთ თავ-თავის ალაგას."

"რუსების საქმე რა-კი ცუდად წავიდა, წერილს წერილზე გვიგზავნიან და გვემუდარებიან, იარალი დავდოთ და ზავი ჩამოვაგდოთო. ხრიკებს მიმართეს რუსებმა, რომ თავი როგორმე დააძვრინონ განსაცდელსა. ასე მოუვიდათ რუსებს, რადგან კაი ხანია იწვნიეს თვალთაგან ცეცხლმფრქვეველ სარბაზთა დაკვრის სიმტკიცე და ჩვენდა ზარბაზნთა გრგვინვა, რომლის ძალა იალბუხსაც-კი ვერხვივით არყევს. რაკი რუსები მიხვდნენ, რომ გულნაკლული ქართველები, ყარაბაღელები და განჯელები ჩვენს მფარველობას რჩეობენ და რაკი ისიც გაიგეს, რომ ოსმალეთის სარასკირი დაიძრა ახალციხისა და იმერეთისაკენ ჩვენ მხედრობასთან შესაერთებლად, ზავის ჩამოგდებაზე გააბეს განძრახ მითქმა-მოთქმა. არ დაუჭეროთ რუსებსა, ზავი მოჭორილი ამბავია. საქართველოსაკენ გალაშქრება გადაწყვეტილი საქმეა, მოემზადეთ ჩვენ დასახვედრად და ქვეყანაზე ხმა დაარხიეთ, რომ მოვლივართ უძლეველი მხედრობით".

ქართველები არც ისე ტუტუცი იყვნენ, რომ ვერ მიხვედრილიყვნენ აბბასის პროკლამაციის ბაქიობას. კარგად იცოდნენ, რომ ყიზილბაშთა სარბაზნი თვალთაგან ცეცხლს უხეიროდ აკვესებდნენ, რომ მათის ზარბაზნების სროლისაგან იალბუხს ზანზარი არ გაუდიოდა. ბაბა-ხანისა და აბბას-მირზას დროის სპარსეთი ველარ ლომობდა. სამუდამოდ წარვიდა დრო დიდებისა და თავს ზარდამცემ ქეჩა-ქუხილისა. ლანქარანში კოტლიარევსკი ყბაში რომ მძიმედ დასტრეს სპარსელებმა, მაიორი ივანე ნიკოლოზის ძე აფხაზიშვილი ერთის ბატალიონით მიესია და სულ კუდით ქვა ასროლინა სპარსელებსა.

განა მართო ეს ამბავია საკვირველი, წარსულიდან ~~სხვა~~ უფრო ბევრ მაგალითს მოიგონებდა ქართველი კაცი, მაგრამ შაჰზადას, პროკლამაცია ~~მანც~~ დღეად მოქმედობდა ამბოხებაში გაბმულ კახელობაზე. მართო იმედიც დღის რამაა ~~მარცხლის~~ დროს და იმედს-კი უხვად აძლევდა აბბასი რუსის მხედრობასთან მებრძოლ ქართველებს.

თელავს ჩაკეტილი რუსები დიდ გაჭირვებაში ჩაცვირდნენ. კამენდანტ შმატოვის მეციხოვნენი, ძალზე შეთხლებული და შებურტყილი რიზმუხი ვარანსკისა და ~~განსვენებულის~~ ვსაძოვისა დიდ ხანს ვერ გაუძლებდნენ აჯანყებულებს ~~შაშველი~~ ქარა ვინ იცის, რადის მოვიდოდა, ან მოვიდოდა-კი? მარკიზი შორს იყო ~~შაქარაველიდან~~ უსაბაღში საქმეებს არიგებდა, კახეთის ოლქის უფროსს, გენერალ პორტნიაგინს და მარკიზის მაგიერს ტფილისში გენერალ კლოტ-ფონ-იურგენსბურგს დავთრები აერიათ, ისე მოულოდნელად მოევლინათ "ბუნტი", და არ იცოდნენ - როგორ მოეგვარებინათ წამხდარი საქმე.

უფერულად მიმდინარეობდა გულ გამაწყვალუბელი ალყა თელავისა. ვიღრუ ~~თურაშის~~ მიიტანდნენ მაიორ შმატოვის მეციხოვნე ~~ქარაზე~~ და თვით ციხეზე, შეამბოხებუბა, ~~რაგორღ~~ "განათლებულ ერთა წესი და რიგი" მოითხოვს, კამენდანტს შეუთვალეს - ჭიუტობა არას გარგებს, საშველი არსაიდანაა, ~~დაგუნდით~~ და საცოცხლეს გაჩუქებთო. ვინაილგან საშშობლო ისტორიის უოველი წვლელი საყურადღებოდ მიგვაჩნია, სავსებით მოვიტანთ კახელ. შეამბოხეთა შეუთვალს, - ციხე ჩაგვაბარეთო. აქტებში, სამწუხაროდ, მხოლოდ ძველი უვარგ ~~სა~~ რუსული თარგმანია დაბეჭდილი, დედანი კი სადღაც გაღუქარგავთ და რელაქტორს ~~არ~~ დაბეჭდია.

აი რა შეუთვალეს შეამბოხეთ კამენდანტსა და ისპრავნიკს:

"ბატონო თელავის კამენდანტო და ისპრავნიკო! საერთოდ აქ შეკრებილნი გეფიცებით უფალსა, წმინდა ჭვარსა და სახარებას, თუ ჩვენ რჩევას დაიჭერებთ და მშვიდობით გამოხვალთ ციხიდან, არას დაგიშავებთ და როგორც ძმასა და

საკუთარ მამას არ ვაწყეინებთ, აგრედვე თქვენ ცოდოში არ ჩავდებთ. კარვად იცოდეთ, საცა კი რუსის ჯარი იდგა: ქიზიყში, არაგვზე, საგარეჯოს, მტკვრის გამოღმა, კახეთში და ქართლში, ყველგან ამოწყვეტეს და მათი სახსენებელი ძირიანად ამოაგდეს. სადაც დამორჩილდნენ და ქელი მოიხარეს, სიკვდილს გადარჩნენ და განთავისუფლდნენ. ფიცით გარწმუნებთ, გამოხვალთ თუ არა ციხიდან, მშვიდობით გაგისტუმრებთ. თუ გაჯიუტდებით და რჩევას არ შეისმენთ, თქვენ იცით; ჩვენ ჩვენი ვალი შევასრულეთ იცოდეთ-კი, რომ დღეიდან მოლაპარაკებაზე ხელს ავიღებთ და ერთს სიტყვასაც აღარ მოგაწვდით. ხომ ჰხედავთ ამ შეკრებილ ჯარსა, ყველანი თქვენ საწინააღმდეგოთ შეიკრიბნენ აქა. გვერწმუნეთ. თქვენ ველარა გიხსნით რა, ან ვინ მოგეშველებათი რა სარფაა ტყუილ-უსრალოდ სიკვდილი".⁸⁸⁾

კამენდანტო შმატოვს პასუხი გაუგზავნია მეამბოხეთათვის. რასა სწერდა მაიორი შმატოვი არ ვიცით, ან რას მისწერდა მაშინდელი მაიორი თუ არა იმას, - ნუ "ბუნტობთ", დამორჩილდით კანონიერ შთავრობას, ნუ ჰლუპავთ ცოლსა და შვილსა და სხვა. შმატოვის პასუხს ძალზე გაუჩავრებია მეამბოხენი და მეორედ ასე შეუთვალეს: "კამენდანტო ისპრაენიკო და საერთოდ მანდ შუკრებილნი თქვენი წერილი მივიღეთ და შევიგნეთ - რასაც გვორჩევთ. სწორედ ტუტუცი უნდა იყვეს ამისთანა წერილის დამწერი, (დედანში: "писано по глупости"). კარგა ხანია, გიციობთ, რა შვილებიცა ბრძანდებით და მარტო ჩვენ კი არა ვართ თქვენი წინააღმდეგი, მთელი კახეთი, ქართლი ფეხზე დადგა თქვენ გასაწყვეტად, რადგან მხეცურად გვავიწროვებდით და სულსა გვხდიდით. (დედანში: "взърское притъснение"). ჩვენი და თქვენი შერიგება შეუძლებ-

ელია, კმარა: მახეში აღარ გავებმით და არ მოვტყუვდებით. ესეც იცოდეთ, რომ მარკიზი მოჰკლეს ყაზახელებმა სოფ. სალაოლლუში.⁸⁹) ქიზიყში რაც რუსის ჯარი იდგა, სულ გაანადგურეს ქიზიყელებმა და ჭარელ ლეკებმა. აგრედვე გაიჟლიტა რუსის მხედრობა ბორჩალოსა, ქართლსა, საგარეჯოსა და არაგვზე, თქვენი მაშველი და თანაშემწე აღარავინაა. რადგან ქრისტიანები იყავით, (აღბად, ცუდათაა რუსულად ნათარგმნი ეს აღგილი, თორემ განა ამბობების დროს რუსები გათათრდნენ? რუსულად ასეა: *вы были христианае*), არ გვინდოდა თქვენი სისხლის დანთხევა ტყუილ-უბრალოდ და გირჩევთ: მოკეთე აღარა გყავთ, ყველანი თქვენი მტერი და წინააღმდეგი ვართ. თუ ნებაყოფლობით გამოხვალთ ციხიდან, სიცოცხლეს გაჩუქებთ და არავითარ ზიანს არ მოგაყენებთ. უკეთუ რჩევას არ შეისმენთ, არავის დაგინდობთ და სულ გაგყლტავთ. ციხიდან ფეხს არ მოვიცვლით, აზრად არ გაიტაროთ ფიქრი, რომ ციხის აღებას ვერ მოვახერხებთ. ჩვენი განზრახვა და აზრი ისაა, რომ ვინც კეთილშობილი თქვენგანი გამოვა, კეთილშობილურადაც მოვექცევით და პატიოსნურად ვაცხოვრებთ, ტყუილად თავს ნუ ამოიჟლტავთ, - არა, სულელები ნუ კი გგონივართ, - რით ვერ გაიგეთ, რომ ჩვენის ხელიდან ველარავინ გიხსნის და რაზე უნდა მოსწყდეთ. რჩევით ამას გირჩევთ და ახლა თქვენ იცით. იყვეს ნება თქვენი".⁹⁰)

მაიორ შმატოვმა კახელ მემამბოხეთა ულტიმატუმი არ მიიღო, რჩევა არ შეისმინა და ციხეში უფრო მაგრად ჩაიკეტა. ჩაკეტით ჩაიკეტა შმატოვი ციხეში, მაგრამ გაძლება-კი ძნელი იყო. კაცს კაცზე ჰგზავნიდა საგარეჯოსა და ტფილისს, ჩქარა მომეშველეთ, თორემ გაძლების სალსარი აღარა მაქვსო.

89) ს. სალა-ოლლუ, ანუ სალახლუს ვითარება იხილეთ ა. ყ-ძეს წერილში "საქართველოს მეფეთა ბრძანებანი", "მოამბე", 1900 წ., № 6. სალახლუ ყაზახის მახრამია, რომელიც მეფეთა ერეკლე და გიორგის დროს საქართველოს ნაწილი იყო. იგი ვეჭილიანთ გუარის წინაპრებისთვის უწყალობებია მეფე ერეკლეს. ქართულად ამ სოფელს სალალი ჰქვიან.

90) *Акты*, ტ. V, გვ. 82.

გენერალ პორტნიაგინს ტფილისიდან მიუვიდა ს. საგარეჯოს ორი როტა ჯარი სამის ზარბაზნით. მოსულეებს მიუმატა ეგერთა ერთი როტა და აპირობდა თელავში გაგზავნას შმატოვის საშველად. რადგან აჯანყება თელავის მაზრიდან სიღნაღისაში გადავიდა, ორი მაშველი როტა ეცოტავა პორტნიაგინს და შეუთვალა ბარონ კლოდტს - კიდევ მომაშველე ორი როტა ზარბაზნებითაო.

რალა მოგაშველო, როცა ტფილისში სულ ექვსი როტა ჯარი მყავსო, შეუთვალა ბარონმა პორტნიაგინს. ტფილისი საქართველოს უპირველესი ადგილია და უჯაროდ ხომ ვერ დავტოვებო. ამისათვის უბრძანა კახეთის ოლქის უფროსს, წინად რომ ხერსონის პოლკის ორი როტა ჯარი მოგაშველე, შეუერთე საგარეჯოში მყოფ ჯარებსა, შემოიკრიფე აგრედვე სხვა და სხვა სოფლად გაბნეული წვრილ-წვრილი რაზმები და ტფილისს დაბრუნდიო. შეშინებულ ბარონს სრულიად დაავიწყდა ციხეში გამომწყვდეული შმატოვი, იმის ფიქრსა და ღარდში იყო, როგორმე ტფილისი შეენარჩუნებინა და საქმე ასაბარგებლად არ გახდომოდა. ქართლის ოლქის უფროსს გენერალ-მაიორ სტალს იმავე ბარონ კლოდტმა მისწერა, ქართველ გრენადერთა პოლკის ორი როტა ტფილისში გამოემიგზავნე და ორი როტაც მაგავე პოლკისა ერთის ზარბაზნით ღართის-კარში (მცხეთის ახლოა) გაგზავნე, რომ თვალ-ყური დაიჭირონ არაგვის მარცხენა პირზე მდებარე სოფელ ბულაჩაურზე და ხელი შეუშალონ მემამბოხეთა შეერთებას ქართლებთან. ბამბაკის ოლქის უფროსს გენერალ-მაიორ ლისანევიჩსაც მისწერა ბარონმა, ფიცხლავ მომაშველე ერთი ბატალიონიო.

მაიორი შმატოვი კი დახმარებას თხოულობდა. ს. ანაგას დაბანაკებული ღონელ ყაზახთა მერვე პოლკი პოზდევებისა უნტერ-შტაბ-ესაულ კუზნეცოვის უფროსობით თელავისაკენ გაემართა, მაგრამ აჯანყებულებმა გზა მოუჭრეს, ანაგის პურის მალაზიებს ცეცხლი წაუქილეს და კუზნეცოვი ისე დაამარცხეს, რომ ცოცხალი ძლივს გადაარჩა. გულ-გახეთქილი კუზნეცოვი რამდენიმე ყაზახითა და ბაირალით მიიჭრა საგარ-

ეჭოს, სადაც ბინა ჰქონდა დადებული ნარვის დრაგუნთა პოლკსა. მანავსა და კაკაბეთს იდგნენ ამავე პოლკის ესკადრონები. მეამბოხენი შემოერთყნენ დრაგუნებს და სულ გასწყვეტავდნენ, რომ მაიორ კორობსკის არ მოესწრო საგარეჯოდან ხერსონის პოლკის ერთის როტით. კაკაბეთში ერთი ესკადრონი იდგა, გადარჩა სიკვდილს მხოლოდ 17 დრაგუნი. ესკადრონის უფროსი მაიორი მარტინოვი მძიმედ დაიჭრა და მალე გარდაიცვალა. მანავისა და კაკაბეთის ყაზარმები დასწვეეს, ხოლო დრაგუნების ავეჯი, ტანსაცმელი, აგრედვე ცხენთა მოკაზმულობა ხელთ იგდეს და დაიტაცეს. საგარეჯოსაკენ წამოსულ მაიორ კორობსკის მეამბოხენი მოსვენებას არ აძლევდნენ და ფეხ-და-ფეხ მისდევდნენ თოფის სროლით, თითქოს ნეფე-დედოფალს აცილებენო.

მთავრობას გაუჭირდა. კრიტიკული მომენტიო, რომ იტყვიან, სწორედ ისეთი დრო დაუდგათ რუსებსა. გაჭირვების უამს მოიგონეს სამაზრო მარშლები, მოურავები და ქალაქლები გაუგზავნეს, ყოველი ღონე იღონეთ, ეგები როგორმე ხალხი დააწყნაროთო. კაპიტან-ისპრავნიკებს კი მისწერეს, შეაჩერეთ სასურსათო პურის მოკრეფაო. პატივცემულ თავადებს და სასულიერო გვამთ ეხვეწებოდა მთავრობა, დაგვეხმარეთ, ჩააგონეთ რამე ხალხსა და ხელი ააღებინეთ ამბოხებაზეო, მაგრამ აღარა სჭირდა ტკბილი სიტყვა და ჩაგონება. მოციქულებს ზუზუნა ტყვიას უგზავნიდნენ და ახლოსაც არ იკარებდნენ სალაპარაკოდ. თელავისა და სიღნაღის ამბების გასაგებად ბლომად გაიგზავნა შიკრიკი და ენატანია, მაგრამ ვაი თქვენს მტერს, რაც ამათ ბედი დაემართათ. საცა კი მოასწრებდა გაბოროტებული და გაალმასებული ხალხი ენატანიას, ან მთავრობის შიკრიკს, იქვე განუკითხავად ანდერძს უგებდა და წუთი-სოფელს ასალმებდა.⁹¹⁾

XII

კაპიტან-ისპრავნიკების მამა-შვილური მართვა-გამგეობა გამოურკვეველის მიზეზის წყალობით საოცრად გაიფურჩქნა ქიზიყში. საქართველოს ამ განაპირა კუთხემ არ იცოდა ბატონ-ყმობის უღელი. საქართველოს მეფენი, განსაკუთრებით ერეკლე მეორე, მოღარაჯე ქიზიყს შვილსავით უცქეროდა და დიდად აფასებდა ომში ქიზიყელის სარისტიანობას და ვაჟკაცობას. ნივთიერად ყველაზე ღონიერი ქიზიყი იყო. აი სწორედ ეს ღონიერი კუთხე ამოიღეს დვალში კაპიტან-ისპრავნიკებმა, კამისიონერებმა, სასურსათო და უთვის-ტომო მოხელეებმა და შეუდგნენ არხეინად, ღონიერ-შემოყრილნი ღუმის თლას. მართო ურიცხვი ბეგრის ურმის გამოყვანით წელში გასწყვიტეს ქიზიყი და პირქვე დაამხეს მისი დოვლათიანობა. ნივთიერ წახდენას ზედ დაერთო ზნეობრივი ტანჯვა. "პატარა კახის" მიერ გალაღებული ქიზიყელი ცას ეკოწიაწებოდა, ტოლ-ამხანაგად არავისა სთვლიდა და დახეთ ბედსა და მის უკუღმართ სამართალსა ზვიადისა და გოროზის გულის პატრონ ქიზიყელს თავზე დაასვეს ხეპრე და გაუთლელი ჯარის-კაცი, რომელიც ხიშტის ცემით და საბეგრო ურემზე წოწიალით სულს ართმევდა და ამაყობას ულახავდა. ჩვენის ფიქრით, ეს განსაკუთრებული გარემოება უნდა იყვეს მიზეზი, რომ ქიზიყში ამბოხებამ მწაბვ და სასტიკი ხასიათი მიიღო. მართალია, ქიზიყელმა ბევრჯელ ქართველი კაცის ჩვეულებრივი თანდაყოლილი გულკეთილობა გამოიჩინა და ტყვედ წაყვანილი, უკვე უმწეო ჯარის-კაცი ოჯახში დამალა და სიკვდილს გადაარჩინა, მაგრამ პირველში, ამბოხებამ რომ იფეთქა, თავი ვერ შეიკავა და სასტიკად მოიქცა. თითქოს შურს აგებდა და ჯავრსა ყრილობდა იმაზე, ვინც ოჯახს წამუსი აუხადა და ადამიანობა დაუშვირა.

ქიზიყელ მემბოხეებმა ქალაქი სიღნაღი ხელში ჩაიგდეს და მთელი რაზმი მეციხოვნეთა დაატყვევეს, სულ 70 კაცი.

ჰავჰავადიანთ სიძე, ცნობილი რუსის პოეტი ა. გრიბოედოვი, შემადრწუნებელ ამბავს მოგვითხრობს. საცოდავი მეციხოვნენი ჯერ თურმე გაუტიტვლებიათ მეამბოხეებს და მერმე ნება დართეს, საითაც გინდათ გაიქეციეთო. გაქცეულ დედა-შობილა ჯარის-კაცებს დაუშინეს თოფები და სათითაოდ ამოსწყვიტეს, სწორედ ისე, როგორც მონადირე ნადირობს ფრინველზე და მხეცზე. სიღნაღის კამენდანტი მაიორი გეინე, რამდენიმე აფიცერი და სამოქალაქო მოხელე ეკლესიაში შეეცინდნენ და ჩაიკეტნენ. ეკლესიაზე იერიშს ხომ ვერ მიიტანდნენ და ამის გამო მეამბოხეებმა ფიცით შეჰფიცეს, მანდღდან გამოდით და ხელს არ გახლებთო. გეინემ ფიცი ირწმუნა და ეკლესიიდან გამოვიდა. საცოდავ გეინეს ანდერძი იქვე, ეკლესიის კარის წინ, აუგეს. მოსკრეს ენა და გადააყლ-აპეს, შემდეგ ნაკუწ-ნაკუწად ასჩხეს. ქვედა-ნოვგოროდის დრაგუნის პოლკის კამანდირი მაიორი პოტლოგი და აფიცრები სასტიკად აწამეს. ისეთი ტირანობა ჩაიდინეს მეამბოხეებმა, ამბობდა მარკიზი პაულუჩჩი, რომ კაცობრიობა შეძრწუნდება ამ ტირანობის ამბავი რომ გაიგონოსო.⁹²⁾

ქიზიყელთა საქციელი არც ბატონიშვილ დავითს მოსწონს, ან რა მოსაწონია ბარბაროსობა. მტერი გაჰგმირე მახვილით, მოუსპე საღსარი მტრობისა და დაუმიწე ბოროტის ჩამდენი მარჯვენა. ამას იქით მტრობა აღარ უნდა მიდიოდეს. ტიტველა კაცზე ნადირობა, ან უიარაღო კაცის წამება სულს აშფოთებს და ეროვნულ ბრძოლის გამაყეთილშობილებელ იერს უკარგავს. მემატრიანე ბატონიშვილი ასე აგვიწერს ამ ფრიად სამწუხარო ამბავს. "მაშინ ქიზიყელთაცა მოსწყვიტეს რუსნი და ნაშთნი გამაგრდნენ ციხესა სიღნაღისასა ორ დღე. შემდგომად ორისა დღისა ევედრნენ რუსნი, რათა განუტევონ მშვიდობით და გარდაუყარეს ფული ციხიდან ქიზიყელთა, რომელთაცა იავარ ჰყვეს ყოველნივე ფული იგი. მაშინ ვინაიდან ქიზიყელთა ვერღარა გამოუღეს ციხე სიღნაღისა, (ესე იგი ვერ აიღეს), შემოსნეს მღვდელნი და მისცეს სახარება

და ჯვარი და შეჰფიცეს, რათა მისცენ ციხე და განუტევეონ მშვიდობით რუსნი. შეჰპირებულნი რუსნი ერწმუნენ მღვდელთა მათ და გამოვიდნენ გარეთ. მხილველთა ქიზიყელთა უყვეს ზედასხმაი და განტეხეს ფიციცა და მოსწყვიტნეს სრულიად; კამენდატიცა მუნებური მოჰკლეს და სუდიეები, ესე იგი რუსთა მუნებური მდივან-ბეგნი და კაპიტან-ისპრავნიკიცა. იავარ ჰყვეს ხაზინაი, ტყვია-წამალი და პურნი, რომელნიცა აქვნდათ ამბართა მხედრობისათვის”.⁹³⁾

ს. ბოლბისხევში ბინა ჰქონდა დაღებული ყაბარდოს პოლკსა. ჟამსა ამბოხებისასა ბოლბისხევში იღგა პოლკის მეორე ბატალიონი პოდპოლკოვნიკ სტეფანოვის უფროსობით. მემამბოხეებმა სტეფანოვს სიღნაღის გზა მოუჭრეს და ს. ბოლბისხევს ალყა შემოარტყეს. სიღნაღის კამენდანტმა და მეთე კლასის კამისიონერმა გავრილენკომ 100 ჯარის-კაცი გამოუგზავნეს პოდპოლკოვნიკ სტეფანოვს საშველად შტაბს-კაპიტან ჩიჟევსკის უფროსობით, მაგრამ ამაოდ. სიღნაღსაც ალყა ჰქონდა შემორტყმული და ჩიჟევსკი გზას ვერ გაიკვლევდა. რა დღე დააყენეს სიღნაღის მეციხოვნეთ, ზემოდ მოვიხსენიეთ, აქ ის უნდა მიუმატოთ, რომ მემამბოხეებს დახმარება გაუწიეს სიღნაღის მცხოვრებლებმაც.

ს. ბოლბისხევს მემამბოხენი ყოველის მხრიდან გარს შემოერტყნენ და გაშმაგებულნი შიგ შუაგულ სოფელში შეეცინდნენ. მემამბოხეებს შეუერთდნენ ბოლბისხეველები და ეცნენ პოლკის შტაბ-კვარტირას. პოდპოლკოვნიკმა სტეფანოვმა თავი მოუყარა ბატალიონს ბაირაღებთან და ხშირ ბინდამდე მტერს იგერიებდა. ეს იყო 6 თებერვალს. მთელი დღე თოფის ხათქა-ხუთქი არ შეწყვეტილა. დიდი ზარალი მოუვიდა სტეფანოვს. მოუკლეს ორი აფიცერი და 212 ჯარის-კაცი. მთელი ამმუნიცია პოლკისა და 470 თოფი დაჰკარგა სტეფანოვმა. დანაშთენი ჯარით სტეფანოვი გაიპარა ღამე დაბა ყარა ალაჯს, სადაც იყო ქვედა-ნოვგოროდის დრაგუნთა პოლკის შტაბ-კვარტირა.

ხეირი არც სოფელ ბოდბისხევს დაეყარა. მემბოხეებმა ცეცხლი წაუკიდეს და მთლად გადაბუგეს. დაიწვა სასურსათო მალაზიები, პოლკისა და როტის ცეიხპაუზები, პოლკის კანც-~~ულა~~ პოლკის ქარავანი (ობოზი), აფიცრების და ჯარისკ-
ათა საკუთარი ქონება და სახელმწიფო ნივთები (ესე იგი ამმუნიცია).

ლამით გაპარულს სტეფანოვს მემბოხენი გზაში წამო-
ეწივნენ და მოსვენებას არ აძლევდნენ. ყარა-ალაჯს სტეფანოვი გათენებისას ჩავიდა.

ყაბარდოს პოლკს სახელი ჰქონდა გავარდნილი ჩვენში. ეს ის პოლკია, რომელმაც 1800 წ. მდ. იორზე თავ-პირი დაამტვრია ლეკებს. ამ გამარჯვებისათვის იმპერატორმა პავლემ პოლკს უწყალობა მალტის ბაირალები და რესკრიპტი. ~~ლუდანი~~ რესკრიპტისა პოლკის კანცელარიაში ინახებოდა და ცეცხლმა ჩანთქა.

ყარა-ალაჯს იდგა ქვედა ნოვგოროდელთა დრაგუნთა პოლკის ორი ესკადრონი. ერთი როტა ეგერებისა როგორღაც დასწლეთოდა მემბოხეთ და ამანაც ყარა-ალაჯის ციხეს შეა-
ფარა თავი. ამ მხედრობას მიემატა პოდპოლკოვნიკ სტეფან-
ოვის ბატალიონის ნაშთი. მემბოხეებმა ალყა შემოარტყეს ციხეს და ახლო-მახლო ადგილებში გაიმაგრეს.

მემბოხეებს, ყარა-ალაჯს რომ შემოადგნენ, უფროსობ-
და თავადი შამაცი სვიმონ პაპას ძე ბებურიშვილი. ბრძოლაში მოიკლა სვიმონი და აგრედვე თავადი ოთარ ასლანის ძე ონანაშვილი.

ყარა-ალაჯის მეციხოვნეთ დღით გაუჭირდათ საქმე. ~~ხურსათი~~ არა ჰქონდათ და იკვებებოდნენ ქეჩით, რომელიც ~~დრაგუნთა~~ ~~უცხოებისათვის~~ ჰქონდათ მომზადებული. ელისეს სასულთნოდან ყარა-ალაჯისაკენ გამოემუშრა მთორბ ორბელ-
იანი ყაბარდოს პოლკის ოთხ როტა ჯარით. წებლებითა და დიდის გაჭირვებით ორბელიანი გაუძლურდა მემბოხეებს და ციხეში შევიდა, შავრამ დახმარების მაგიერ უფრო გაუძნელდა საქმე მეციხოვნეთ, რადგან საჭმელი თვითონაც არა ჰქონდათ და ხტუბრებისთვის რა მიერთმიათ. "შემჭირდნენ რუსნიო,

ბრძანებს მემატრიანე დავითი, და ლამობდნენ გამოსვლასა, ~~სადა~~ ლეკით წამოსულმან ყაფლან ყაფლანისშვილმან (ორბელიანი, მაიორი) ~~შოუსწრო~~ ფაქით ათასითა მხედრობითა⁹⁴) და დაუწყო ტკბილი საუბარი და ვედრება ~~შეამბოხვით~~. თუ ყარა-ალაქს გადარჩა ვინმე სიკვდილს, ამ ყაფლან ორბელიანის მადლობელი უნდა ყოფილიყვნენ, მაგრამ ზემო ნათქვამიდან სჩანს, რომ ღვაწლი არ დაუფასეს. იმის მოსვლით საქმე უფრო გამწვავდა, რადგან სურსათის ნაკლებობა იყო.⁹⁵)

ქაბეთის ოლქის უფროსს გენერალ პორტნიაგინს მთლად დაეხმარებოდა, არ იცოდა როგორ მოქცეულიყო, რა ~~ღონე~~ ვლანდა, რადგორ დაეღწია თავი ამ ხათაბალისაგან. ~~შაშველო~~ ~~ჭაბოს~~ ~~ამედი~~ ~~რომ~~ ~~შქონოდა~~, ~~ყოფივ~~ ~~პო~~, მაგრამ საქმე ის იყო, რომ გენერალი კლოდტი ~~მტყუბინუხდა~~, ჯარი მეც არა მყავს და ისა სჯობიან - ტფილისს დაბრუნდეს. პატარძეულიდან და ხაშმიდან შემოიკრიბა ნარვის დრაგუნთა პოლკის ესკადრონები ს. საგარეჯოს, სულ რაღაც 150 კაცი. პირველში საგარეჯოელები ჩუმად ისხდნენ და ხმას არ იღებდნენ, ელოდნენ, ვნახოთ ამბოხების საქმე როგორ წავაო. პორტნიაგინი კარგად ხედავდა, რომ საგარეჯოელები ხერს არ დააყრდნენ და რაც შეეძლო, ემზადებოდა მტრის დასახვედრად. ~~საკუთარ~~ სახლის წინ ღობე გაავლო სასურსათო პურიტ გატენილ ტომარებისაგან. ამ საყველ-პურო ციხეს ამოეფარნენ დრაგუნები და ელოდნენ მტერსა. ახლო-მახლო სიმაღლეებიდან ტყვია ადვილათა სწვდებოდა ციხის გულსა.

თებერვლის ხუთსა საუბრეჯოში გაჩნდა მემამბოხეთა წინამძღოლი თავადი ქობულაშვილი ოთარ და შეუტიეს პორტნიაგინს. წაუკიდეს ცეცხლი აფიცრების ბინას, ლაზარეთსა, ყაზარმებსა. ~~წინადად~~აღეფეთქებინათ თოფის წამლის სარდაფები, მაგრამ ვერ მოახერხეს, მთელი დღე თოფის ზუზუნი არ შეწყვეტილა. მეორე დღეს სროლა გამწვავდა, ტყვია უფრო

94) ორ როტაში ათასი ჯოგან იქნებოდა?

95) მასალები... გვ. 104; Актъ, т. V, гл. 72 და уѣ. т. II, гл. 37, 35, 58, 464.

იღებდა ნიშანსა. შუადღისას რუსებს დააკლდათ 25 დრაგუნი და მრავალი ცხენი. საქმე მეტის-მეტად გაუჭირდათ საგარეჯოს ციხის დამცველთ. მემამბოხენი მთებიდან ვაკეზე ჩამოვიდნენ და იერიშისათვის მოემზადნენ. სწორედ ამ სასოწარკვეთილების უამს მეციხოვნეებს ხსნა მოევლინათ. ტფილისიდან მომავალ გზიდან გაისმა ზარბაზნის გრიალი. საშველად წამოსული მაიორი ბუხვოსტოვი ხერსონის პოლკის ორი როტით მიუახლოვდა საგარეჯოს და ზარბაზნით აცნობა მოსვლა. მემამბოხეებმა დასცალეს ვენახები და მთებზე ავიდნენ. ალბად, იფიქრეს, დიდი ჯარი მოდისო. პორტნიაგინი მაინც ვერას გახდა და საგარეჯოში ვერ დადგებოდა. ბარგი-ბარხანა მთლად დასწვა და 8 თებერვლის ღამეს გამოიპარა მოსავლელ ტყის გზით. ცხენები ლაგამ-ალვირით მოჰყავდათ. გამოპარულებს მემამბოხენი აგრე რიგად არ აწუხებდნენ, ალბად, ვერ გაიგეს, რა გზით წამოვიდა პორტნიაგინი. ზარალიც აგრე რიგად დიდი არ მოსვლია საგარეჯოში გენერალს; სულ დააკლდა 35 ჯარისკაცი. ტფილისამდინ სამი დღე იაზრა და 12 თებერვალს მშვიდობით ტფილისში ჩამოვიდა.⁹⁶⁾

ბატონიშვილი დავით ცოტა სხვაგვარად აგვიწერს საგარეჯოს ამბავს. "უამსა ამას გარდვიდნენ კახნი საგარეჯოს. მოკრბნენ საგარეჯოელნი და ბრძვეს პარტნეგინს ღიანარალს, იძლივა პორტნეგინი და მივიდა ხაშმსა, ხოლო კახთა მოჰსწვნენ სადგურნი მათნი და თივანიცა რუსთანი და მიუხდნენ ხაშმზედან. იქმნა მუნ ბრძოლაი მიშველებულსა მხედრობასა რუსთასა შორის, რომელიცა მიაშველა პორტნეგინსა ღიანარალ ბარონ კლოტმან ზუთასნი მხედრობანი რუსთანი. მაშინ იძლივნენ და მოსწყდნენ მრავალნი და ნაშთნი წავიდნენ ტფილისად და კახნიცა აღვიდნენ ხაშმისა თავსა სამეხას. ხოლო ყაფლანმაცა დაუტევა ყარა-ალაჯის ციხე და წარემართა ტფილისისაკენ მხედრობითა თვისითა, რომელ არღარა დაშთა რუსი ქიზიყისა სამფლობელოსა შინა. ესე იყო თვესა თებერვალსა 5-სა".

96) ibid. გვ. 358 - 359; АКТЫ, т. V, гл. 72.

კახელები რომ სამებას ავიდნენ, მართალია; ისიც მართალია, რომ თებერვლის 10-12 რიცხვებში მთელი კახეთი გასუფთავდა რუსთა მხედრობისაგან, ივრისა და ალაზნის ხეობებზე აღარ იყო ჯარი ამ უამად, მაგრამ ნუ დაგვაიწყლებს, რომ რუსობას ჯერ-ჯერობით ეჭირა თელავის ციხე და ყარა-ალაჯისა, სხვადათავი შეათარა სიკვდილსა და ამოწყვეტას გადარჩენილმა მხედრობამ.

მაშ ესე, თებერვლის შუა რიცხვებში 1812 წ., შიდა და გარე კახეთი თითქმის გასუფთავდა რუსთა მხედრობისაგან, მათი მართვა-გამგეობა ხუხულასავით დაიფუშა ერთი შებერვით. თელავისა და ყარა-ალაჯის მშვირ-მწყურვალნი მეციხოვნენი სათვალავში არაა მისაღები. ტლანქი უღელი, გამოჩორკნილი კაპიტან-ისპრავნიკთა და კამისიონერთა მიერ, ზედ შუაზედ გადატყდა და ნატეხები შიგ თავში მოხვდა პატივცემულ სასურსათო მოხელეთა და მათს მსგავსებსა. კახეთმა ძველებურად, ქართულად ამოისუნთქა და ქართულადვე დაიწყო ცხოვრება, ფიქრიანობა და აზროვნება. გულ-შემზარავი ჭყვილი საეგზეკუციო კამანდებისა აღარ გაისმოდა "კურთხეულ კახეთის" ველ-მინდვრებში, სოფლიდან სოფლად აღარ დაძუნძულებდნენ სამგლე იასაულები უნტერ-აფიცრებით საბეგრო ურმების მოსაკრეფად. ერთის სიტყვით, კახეთი მხიარულობდა, ამაცობდა გამარჯვებით და სუსხიანი თებერვალი რომ არ ყოფილიყო, ან ღვინო რომ არ შეესვა საეგზეკუციო კამანდებს, საყვარელ გაუთავებელ მრავალ-უამიერსაც ზედ დააყოლებდა.

ზემოდ მოვიხსენიეთ, რომ კახელებმა მეფე ამოირჩიესო. ბატონიშვილმა დავითმა იძუნწა და არ შეატყობინა შთამომავლობას, როდის ამოირჩიეს, სად, ან რა ცერემონიით მეფე. მაყრიონს და ქორწილს რა ლაზათი აქვს, თუ თავში "ნეფე" არაა გამოჭიმული. კახელებიც ასე მოიქცნენ, ბევრი ძებნაც არ დასჭირებიათ მეფის საშოვნად. იქვე კახეთში ყოფილა ბატონიშვილი გრიგოლი იოანეს ძე. თვით იოანე გიორგის ძე ამ უამად მოსკოვში იმყოფებოდა და როგორ დაავიწყდათ გრიგოლი და სხვებსავით თავი არ უკრეს რუსე-

თისკენ, ვერ გავიგეთ. გრიგოლი ერთად ერთი ბატონიშვილია, რომელიც დავიწყებოდათ მაშინდელ მთავარ-მართებლებს. დავიწყებული ჰყოლიათ თვით ქართველებსაც, თუმცა ბატონიშვილ დავითის უშვილობის გამო ქართველები ამ გრიგოლს ისე უცქეროდნენ, როგორც კანონიერ მემკვიდრეს. ამბოხების მეთაურებმა გრიგოლი მეფედ რომ გამოაცხადეს, კახეთი სიხარულით ფეხზე აღარ იყო. მცირე უკმაყოფილება არავის გამოუცხადებია, იმის გარჩევაშიც არავინ შესულა; რა კაცია გრიგოლი, შესძლებს მეფობას ამ ვნება და მღელვარებით სავსე დროსა, თუ არა. ამ საგნის გარჩევასა და გამოძიებას არავინ კისრულობდა. რაკი ხმა გავარდა, მეფე ამოვირჩიეთო, ყველამ ერთხმად იწამა და შეჰფიცა ერთგულობა, მეფობისთვის სიკვდილი და სამსახური. მოგეხსენებათ, რა ძნელია ქვრივობა და კახელებსაც ბავშვივით უხაროდათ, რომ ასე ადვილად გაათხოვეს მთელი თერთმეტი წელიწადი ქვრივობაში. მყოფი საქართველო და საშუალება მიეცათ ძაძა გამოეცვალათ და გძელი წვერუბი, ნიშან-მცხოვრებისა, დაეპარსათ. კახელებს ალბად ერთი რამ ეწყინებოდათ ქორწილ-მზიარულობის დროს. აქ აღარ იყო კათოლიკოზი ანტონი. გენერალ ტორმასოვმა სწორედ უდროოდ დროს გაისტუმრა რუსეთს საქართველოს ეკლესიის უფროსი. კახელებს აკლდათ სუფრის მაკურთხებელი.

ბატონიშვილი გრიგოლი მალე შეეჩვია ახალ თანამდებობას და კარგად შეითვისა მეფობა. კახეთის ეკლესიებში გრიგოლს იხსენიებდნენ როგორც კანონიერ მეფეს.

ახლად არჩეული მეფე გრიგოლი მხნედ შეუდგა მეფობას. მთელ საქართველოს შეატყობინა ეს ამბავი და მოითხოვა მხნეობა და მამაცობა მტრის დანარჩენ რაზმების გასაწყვეტად. ყაზახი და ბორჩალო კანონიერი ნაწილი იყო მაშინდელის საქართველოსი, შესანიშნავ საერთაშორისო ისტორიულ ტრაქტატში 1783 წ. ეგენი მოხსენიებულია, როგორც განუყრელი ნაწილი სამეფოსი. მეფე გრიგოლმა ამათაც დაუგზავნა წერილები - დადგა ჟამი რუსების გაწყვეტისაო.

ყაზახელ ალაღარს, მამედ-ჰასან აღას, ჩავარდნოდა ხელში ერთი ამ ქალაქთაგანი. მამედ-აღამ ქალაქი არაგის აჩვენა, არც ალაღარებს და არც ხალხსა, აიღო და ყაზახის მოურავ პოდპოლკოვნიკ თავ. ბებუთაშვილს გაუგზავნა.⁹⁷⁾ ბებუთაშვილმა კიდევ ქალაქი უმალლეს მთავრობას წარუდგინა. მარკიზი პაულუჩჩი, ქალაქის თარგმანი რომ წაიკითხა, გულნატკენად მოახსენებს იმპერატორ ალექსანდრეს, ამ ქალაქიდან ვსცანი, რომ მარტო კახეთის უბრალო ერთი კი არ არის ამბოხებაში ჩათრეული, მთელი თავად-აზნაურობა იღებდა მონაწილეობას "ბუნტში"-ო. არც ერთი გვარი არა დარჩენილა, რომ ამ გულის ასამღვრევ და სულის შემაშფოთებელ ქალაქზე ხელი არ მოეწერაო.⁹⁸⁾

XIII

ტფილისის დაბრუნებულმა გენერალ პორტნიაგინმა, როგორც უფროსმა ჩინით, ჩაიბარა საქართველოს გამგეობა მარკიზის მოსვლამდე. შეამბოხენი მოუახლოვდნენ ტფილისის გარშემო მდებარე სოფლებს. ს. ავჭალაში შეამბოხებმა დაიპირეს ქართლიდან წამოსული ბეგრის ურემები, დატვირთული სასურსათო პურიით. შვიდი ურემი წაართვეს და მეურმეები გარეკეს. მცხეთის კარანტინს უბრძანა პორტნიაგინმა - გორიდან ალაღარავინ გამოუშვათ ქალაქში მტკვრის მარცხენა ნაპირით, თორემ ვაითუ შეამბოხებმა ხელთ იგდონო.

ბორჩალო ზედ აკრავს საქართველოს დედა-ქალაქს. აქაურმა მოურავმა პოდპოლკოვნიკ თ. ერისთავმა შეატყობინა პორტნიაგინს, კახეთიდან ჩამოვიდნენ შეამბოხეთა გამოგზავნილი კაცები და თათრობას აგულიანებენ რუსების წინააღმდე-

97) თუ არა ვსცდები, ეს ბებუთაშვილი მამა უნდა იყოს ცნობილის გენერალ ვასილი იოსბის ძე ბებუთაშვილისა.

98) Актъ, т. V, гл. 72.

ეგაო. თავს ნუ დაზოგავ, სწერდა პორტნიაგინი ერისთავს, ან როგორმე დაატყვევე მოლაღატენი, ან სიცოცხლეს გამოასალმეო.

შიში მოელოდა ქალაქს მარტყოფიდან. მღ. იორიდან მოყოლებული მარტყოფამდე მემამბოხეებმა ყველაფერი ხელთ იგდეს და ქალაქს ემუქრებოდნენ. პორტნიაგინმა მარტყოფს გაგზავნა ხერსონის პოლკის ბატალიონი ოთხის ზარბაზნით პოლკოვნიკ ტიხანოვსკის უფროსობით, თვითონ-კი ტფილისის გამაგრებას შეუდგა. საიღუმლო ადგილებში ყარაულები ჩააყენა და ზარბაზნები ბატარეებზე დაალაგა.

მარტყოფელებმა მოჰკლეს სოფელში ჩაყენებული ურიადნიკი იარკოვი და ორი ყაზახი. მარტყოფის პოსტის ხუთი ყაზახი შეიბრალეს და სიცოცხლე აჩუქეს, ესაა მხოლოდ, რომ რაც რამ ებადათ, წაართვეს და გაძარცულნი ტიხანოვსკის გაუგზავნეს. მათკენ მიმავალი პოლკოვნიკ ტიხანოვსკის ჯარი რომ დაინახეს, მემამბოხენი ხაშმის გზას დაადგნენ და ივრის ხეობისაკენ წავიდნენ. თვითონ მარტყოფელები, რაკი სიკეთეს არას მოელოდნენ მათზე, ამხედრებულ ჯარისაგან, საჩქაროდ აიბარგნენ და დედა-ბუდიანად შეეხიზნენ მთიან და ბუნებით მაგარ ხეობას: შუა-გულ თებერვალში მთაში ასვლა დიდად სასიამოვნო არ იქნებოდა მარტყოფელ წვრილ-ფეხობისთვის, მაგრამ რა გაეწყობოდა, საცა არა სჯობს, გაცლა უმჯობესია.

პოლკოვნიკი ტიხანოვსკი გატრიალდა მარტყოფიდან და გამოეკიდა მემამბოხეებს ხაშმის გზაზე. ს. ხაშმთან შეიკრიფა თითქმის 4 ათასი მემამბოხე. აქ იყვნენ თუშნი, ფშავნი, ხევსურნი და * თელავის მახლობელ სოფლები. მეთაურობდნენ მამფოთართ კახელი თავადიშვილები. ხაშმს რომ მიუახლოვდა ტიხანოვსკი, მემამბოხეებმა თოფები დაახალეს, მაგრამ არ შეუშინდა მამაცი (ასე ეძახის მარკიზი ტიხანოვსკის) პოლკოვნიკი ტყვიის-წვიმას და იერიში მიიტანა მემამბოხეთა ბანაკზე, რომელთაც ეჭირათ ვენახები და სოფლის გარეშე მდებარე სერები. ტიხანოვსკი პირდაპირ ვენახებსა და სერებზე წავიდა, უმთავრესი ძალა მხედრობისა-კი გაგზავნა ბანაკის შუაგულში, ანუ ცენტრისაკენ. გაწვრთნილ

ჯარის იერიშს ვერ გაუძლეს მემამბოხეებმა. დიდი ზარალი მოუვიდათ ხიშტებისაგან, თითქმის 200 კაცი დააკლდათ მოკლული. ორიოდ-სამიოდე ფშაველი და ხევსური ტყვედ ჩაუვარდათ რუსებსა. იძლივნენ მემამბოხენი და მაგარ მთებს შეაფარეს თავი. რუსებს სულ მცირედი ზარალი მოუვიდათ. სათქმელადაც არა ღირს ამ ზარალის აღნიშვნა. ერთი გრენადერი მოუკლეს და 10 ჯარის კაცი დაუჭრეს. სწორედ დაუჭერებელია ეს ზარალი. ოთხი ათასმა კაცმა, თუნდ შორიდანაც თოფი რომ დაახალოს ბატალიონს, ნუ თუ მარტო ერთი გრენადერი უნდა წააქციოს და 10 დასჭრას. მარკიზი პაულუჩჩი ასე მოახსენებს იმპერატორს და ჩვენც, გინდა თუ არა, უნდა ვირწმუნოთ.

ხაშმელების უბედურობა მოხდა 19 თებერვალს. პოლკოვნიკ ტიხანოვსკის სიტყვით, ხაშმთან დამარცხებამ თავს ზარი დასცა მემამბოხეებსაო. მეორე დღეს ბოდიშის მოსახდელად მისულან პოლკოვნიკთან ყარაბულახელნი, უჯარმელები, ხაშმელები, სართიჭალელები და მულანლოელები და უთხოვნიათ - ნება მოგვეცი ჩვენ ბინებზე დავბრუნდეთო. რაკი ნებართვა აუღიათ, მთებიდან ცოლ-შვილი ჩამოუყვანიათ და თავ-თავიანთ სახლებში დაბინავებულან.

ტიხანოვსკის თანა ჰყავდა ერთგული ქართველი თავადიშვილები. ამ თავადიშვილების წყალობით და აგრედვე დეკანოზ მარკოზოვისა პოლკოვნიკ ტიხანოვსკიმ მარტყოფელებს პირჯვარი დასწერა და ხელმწიფის მორჩილება-ერთგულობაზე დაითანხმა. მარტყოფელებმა შეისმინეს ჩაგონება დეკანოზისა და რუსეთის ერთგულ თავადიშვილებისა და მიიღეს ფიცი რუსეთის მთავრობის ერთგულობაზე.

რუსები რომ ეწვივნენ ჩვენს ქვეყანას, დიდ ხანს ვერ დაამყარეს საქართველოში სიწყნარე, სიმშვიდე და მორჩილება. ჭერ კიდევ ქედ-მალალი იყო მაშინდელი ქართველი, მონური მორჩილება ეხამუშებოდა და ხშირად "ბუნტობდა", ანუ, ჩვენებურად რომ ვსთქვათ, ტლინკებს ისვროდა. სამხედრო კამანდები და ზოგჯერ დიდი ლაშქარი აყუჩებდა ზარბაზნის ყუმბარით, ან ხიშტით გაავზნებულ ქართველს და

დაწყნარების შემდეგ ერთგულობის ფიცს მიაღებინებდა ხოლმე. ისე გახშირდა ერთგულობის ფიცის მიღება, რომ ბოლოს ყოველი ფასი დაეკარგა ფიცის მიღებას. ერთისა და იმავე კუთხის მკვიდრს მრავალჯერ მიუღია ფიცი ერთგულობისა და მაინც გაუტეხია იგი. ეს გარემოება უნდა იყვეს მიზეზი, რომ შემდეგ დროებში ჩვენში ჩალის ფასად გახდა ფიცი. ორიოდ გროში თუ დახარჯე, რამდენიც გნებავთ, იმდენს იზოვნით ტყუილ მაფიცარს. ყველაფერს საფუძველი ისტორიაში უნდა მოუძებნოს კაცმა. ორ-სამ დღეში არა ტყდება ხასიათი ერისა, ორ-სამ დღეში არ იხრწნება ზნე და რწმენა ერისა. დიდი შრომა და ღვაწლია საჭირო ერის გათახსირებისათვის და აკი არ იშურებდნენ არც ერთსა და არც მეორეს ერის კარგის თვისებათა შესაბლალად.

დროა ახლა ქართლს მივხედოთ. მაშინდელმა საქართველომ არ იცოდა, რა ხილი იყო დღევანდელი სტრატეგია და ტაქტიკა. მართალია, არ იცოდა სამხედრო მეცნიერების დედა-აზრი, მაგრამ ის-კი კარგად იცოდა, რომ რუსების ამოსაწყვეტად საჭიროა მასაზრდოებელი გზა მოეჭრას რუსის მხედრობას. ეს გზაა დღევანდელი საქართველოს სამხედრო გზა, ანუ დარიალის ვიწრო ხეობა. თუ დარიალის ხეობას შეჰკრავდნენ შეამბოხენი და შიდა რუსეთიდან მაშველ ჯარს აღარ შემოუშვებდნენ, თუ ამ ერთად-ერთი გზით რუსები სამხედრო მასალას ვეღარ მოზიდავდნენ, ცხადია, რომ რუსების ბატონობა ჩვენს ქვეყანაში საექვო შეიქმნებოდა. ამისათვის კახელებმა გაშალეს თუ არა ამბოხების დროში, ანანურის მაზრაში შეკრიკები აფრინეს, აიშალენით და ჩვენთან ერთად იმოქმედეთ რუსთა მხედრობის წინააღმდეგაო. რადგან არაგველობა და მთა იმავე ტაფაში იწვოდა, როგორშიაც ქართლ-კახეთი იხრაკებოდა და უფრო მეტადაც, ვინაიდან სამხედრო გზაზე მუშაობა და სამხედრო მასალის ზიდვა აუტანელ ტვირთად დააწვა ანანურის მაზრის მკვიდრსა, შეკრიკებს ბევრი ხვეწნა და მულარა არ დასჭირდათ. არაგველებმა, მთიულებმა, გუდამაყრელებმა და მთის დანარჩენ მკვიდრთ სიხარულით მოისმინეს შემონათვალი და აცნობეს

კახელობას - თქვენთან ერთად გავწყდებით და მტერს ბოლოს მოვუღებთო. სულ რაღაც ერთმა კვირამ გაიარა, რაც თიანეთსა და ახმეტას "ბუნტი" დაიწყო, და მთელი ანანურის მაზრა აჯანყების ბოლსა და კვამლში გაეხვია. თებერვლის ათს 1812 წ. ფსანაურის პოსტზე მღვარი რუსები გაუღიტეს, ანანურისა და ღართის-კარის მეციხოვნეთ ალყა შემოარტყეს და სამხედრო გზაზე მისვლა-მოსვლა სრულიად მოსპეს.⁹⁹⁾

დაწვრილებით ანანურის აჯანყების ამბავი ასეა. თებერვლის 9-ს "უსიამოვნო" ამბავი მოუვიდა ბარონ კლოტს. სოფ. ბულაჩაურს 1000 მეამბოხე შეიკრიფა და მათი რაზმი ყოველ დღე მატულობსო. თითქმის სოფელი არ დარჩენილა ანანურის მაზრაში, რომ ამბოხების გზას არ დასდგომოდა.

თვით ანანურს, საქართველოს "კარს" (რუსულად: КАРС) ალყა შემოარტყეს და ციხეში აღარავის უშვებდნენ. ანანურის სათემო ისპრავნიკმა მოსწერა ბარონს თებერვლის ათსა: არ ვიცი როგორ ვუშველო ანანურსა. ყველა ამბოხებას მიეცა და მშველელი არავინაა. ანანურს 1000 კაცი ახვევია გარსა, ყოველ დღე მატულობს მათი რიცხვი და მე-კი ათიოდე კაცი-ღა შეძრა ერთგულიო. საგურამოს მინდვრებზე თავი მოიყარა 500 კაცამდე და აპრობენ ღართის-კარს დაეცნენ. რაკი ასეთ გაჭირვებაში ჩაცვინდნენ ანანურის მეციხოვნენი, ბძანება გაეგზავნა კაპიტან საგინაშვილს, რომელიც ტფილისში მოდიოდა ქართლიდან საქართველოს გრენადერთა პოლკის ორი როტა. სალდათით, მიეშველოს ღართის-კარს, სადაც დაბანაკებული იყო ორი როტა ჯარი, შეაერთოს ჯარები და იმოქმედოს არაგველ მეამბოხეთა წინააღმდეგ. ამასთანავე კაპიტან საგინაშვილს დაევალა გაგზავნოს პატარა რაზმი ს. მუსხრანს სახელმწიფო სასურსათო მალაზიის დასაცველად და გაგზავნოს ორმოცდაათი ჯარის კაცი მცხეთის ხიდის შესანახად. მცხეთის ხიდს დიდი მნიშვნელობა ჰქონდა, რადგანაც ეს ხიდი რომ გაეფუჭებინათ, ტფილისი სავსებით მოსწყდებოდა ანანურის მაზრას და საქართველოს სამხედრო გზასა.

ანანურის სათემო ისპრავნიკის ფართი-ფურთოზიდან არაფერი გამოვიდა. შეეკრიფა რაღაც 200 სოფლელი და დააპირა ანანურის გზის გარღვევა და შიგ ციხეში შესვლა. ისპრავნიკს და მის მხლებლებს შეამბოხებებმა თოფები დაუშინეს, მიუახლოვდა თუ არა ციხეს და ორის ტყვიით ფეხში მძიმედ დასჭრეს. მხლებლები შემოეფანტნენ და აჯანყებულთ შეუერთდნენ. ფეხში დაჭრილმა ისპრავნიკმა მოჰკურცხლა და გორში ბრეგვა გააღინა.¹⁰⁰⁾

სასიამოვნო ამბავს ანანურიდან არც მუხრან-ბატონი, გენერალ-მაიორი თ. კონსტანტინე ივანეს ძე ატყობინებდა მთავრობას. მუხრან-ბატონი დიდი და გავლენიანი მემამულე გახლდა, მთავრობა ენდობოდა და ამისთვის სწორედ ეს ქართველი ფეოდალი გაგზავნეს ხალხის დასაწყნარებლად. თავადმა კონსტანტინემ შეჰკრიფა ორასიოდე წვრილ-ფეხა აზნაური და გლეხობა, თან წაიყვანა მაიორი თორნიკე ერისთავი და ანანურის ციხისაკენ გაემართა, მაგრამ შეშინდა რუსის ერთგული გენერალი, შეშინდა აგრედვე რუსების ერთგული თორნიკე ერისთავი¹⁰¹⁾ და იერიში ვერ მიიტანეს ანანურზე. ისე შიში არაა აქ მოსატანი, როგორც ისა, რომ მუხრან-ბატონი ვერ ენდობოდა რაზმსა. გაჰირვების დროს უღალატებდა რაზმი, როგორც უღალატა ანანურის სათემო ისპრავნიკსა. ამისთვის ბარონ კლოტს მოსწერა-რუსის მხედრობა მომაშველე, თორემ ჩემის ჯარით ვერას გავაწყობო.

გენერალ ბარონ კლოტმა საჩქაროდ ქალაქი გაუგზავნა ქართლიდან წამოსულ საქართველოს გრენადერთა ბატალიონის კაშანდირს პოლპოლკოვნიკ უშაკოვს - ტფილისში ნულარ ჩამოხვალ, შემოიკრიფე ღართის-კარისა და მუხრანის მეციხოვნენი და პირდაპირ ანანურს გასწიე ციხის საშველად. ჯაშუშების ხელით ბარონმა გაუგზავნა ბრძანება ვლად-

100) Ibid. გვ. 71. კარგი სიტყვაა ხმარებული მარკინის უქვეშევრდომილეს მოხსენებაში იმის გამოსახატავად, თუ როგორ აპირებდა ისპრავნიკი ანანურში შესვლას, — "покусился было пробить-ся въ крепость Анауру съвои мѣтежины тошми".

101) Ibid. 71. რუსულად: "также вѣрный и усердный къ Россіи".

იკავკავის ციხის უფროსს გენერალ-მაიორ დელპოცოს - რამე იღონე და საქართველოს სამხედრო გზა გახსენიო, ამასვე სთხოვდა ბარონი გაბრიელ ყაზბეგს.

თებერვლის თერთმეტს ტფილისში ჩამოიჭრა თვით თ. კონსტანტინე მუხრან-ბატონი. მღელვარება ძლიერდება, ხალხის დასაწყენარებლად დიდი ჯარია საჭიროვო. მუხრან-ბატონი უკანვე გააბრუნეს და დაავალეს, პოდპოლკოვნიკ უშაკოვს შეუერთდი შენის კაცებით და ეცადეთ - როგორმე ჩააქროთ ამბოხებაო. უმთავრესი დავალება კი ის იყო, რომ როგორმე გაენთავისუფლებინათ ანანური.

მუხრან-ბატონს თან გაატანა ბარონ კლოტმა განცხადება, ანუ ყბად აღებული "ობვეშჩენიე". განცხადებაში ბარონი სწერდა არაგველებს: თუ ერთგულობის ფიცს არ გასტეხავთ, წყნარად იქნებიეთ და მემამბოხეებს არ შეუერთდებით, იცოდეთ, რომ პატრონობა-მფარველობას არ მოგაკლებთ და ეს მფარველობა-პატრონობა წუთიერი-კი არა, სამუდამო იქნებაო. - ბოლოს დროს როგორღაც აღარა სჭირდა "განცხადებათა" ძალა. ამ "ობვეშჩენიესაც" ეს დაემართა. თერთმეტს თებერვალს, ღამე, მემამბოხენი დაეცნენ ღართის-ქარის პოსტსა და კინალამ გადასწვეს. ყარაულებმა დროზე შეიტყვეს მტრის განძრახვა და ხიფათს გადაარჩინეს ღართის-ქარის პატარა ციხე.

თებერვლის 12-ს პოდპოლკოვნიკი უშაკოვი მუხრანს ავიდა. შესვენებით არც-კი შეუსვენია უშაკოვს და ხუთი როტა ჯარით ღუშეთისაკენ გასწია. მკადის-ჯვარს რომ გასცდა, უშაკოვი წააწყდა მემამბოხეებს, რომელთაც უტეხ ტყით დაბურულ გორაზე სანგრები დაემართათ. ეკვეთნენ მტერნი ერთმანეთს. მარკიზი პაულუჩიჩი მოახსენებს იმპერატორს, რომ უშაკოვმა დიდად დაამარცხა მტერიო, ბევრი მემამბოხე მოჰკლა და ღუშეთამდის სდია გაქცეულ მტერსაო. ადვილი დასათვლელი იყო მოკლულთა რაოდენობა, მაგრამ არაა ცნობა, რა ზარალი მოუვიდათ აჯანყებულთ. დაღამებისას უშაკოვმა უწია ღუშეთს, მაგრამ ვერ გაბედა იერიშით მისულიყო ციხეზე. ციხიდან ღუშელეებმა თოფები დაუშინეს უშაკოვს. გათენებ-

ისას პოდპოლკოვნიკი უშაკოვი მიუხტა ღუშეთს, აიღო ფორ-შტადი და შემდეგ თვით ღუშეთის ციხე. ბრძოლა გაგრძელდა სულ ორ საათს. ციხეში თურმე 30 მეციხოვნე ყოფილიყო და ეს 30 კაცი ორ საათს ებრძოდა ქართველ გრენადერთა პოლკის ხუთ როტას, რომელშიაც სულ ცოტა ხუთასი კაცი იქნებოდა. უშაკოვის მოწმობით, ძალიან ბევრი მეომარი მოუკალით მემამბოხეებსაო ორთავ შეტაკებაში, მჭადის-ჯვრის სერებზე და ღუშეთზე, თვითონ კი ეს ზარალი მოსვლია: მოუკლეს 10 ჯარის-კაცი; დაიჭრა კაპიტანი თ. ივ. ნ. აბხაზი (რუსულად: აბხაზოვი) და 22 ჯარის კაცი.¹⁰²⁾

პოდპოლკოვნიკი უშაკოვი ღუშეთისაკენ რომ წავიდა მჭადის-ჯვრის გზით, მისწერა წიგნი ლართის-ქარში კაპიტან საგინაშვილს, ღუშეთისაკენ წამოდი და მომეშველეო. საგინაშვილმა 11 შუბერვალს წაიყვანა სამი როტა ჯარი, 40 ყაზახი და გასწია ღუშეთს. თანა ჰქონდა ერთი ზარბაზანი. გზა ტყე-ტყე მიდიოდა, გაიარა თუ არა ექვსიოდე ვერსი, საგინაშვილს წრე შემოავლეს მემამბოხეებმა და თოფები დაუშინეს. იქვე ბრძოლის დასაწყისში საგინაშვილი მძიმედ დაიჭრა; მისი მაგიერობა იკისრა პორუჩიკ ცაცკამ, მაგრამ ეს აფიცერიც დაიჭრა. დარჩა რაზმი უკამანდროთ.

ბრძოლა გამწვავდა. მემამბოხეთა რიცხვი მატულობდა და 1500 კაცამდისინ ავიდა. რაღა უნდა ექნა საგინაშვილს? მტრის გარღვევა რადგან შეუძლებელი გახდა, უბრძანა ჯარს უკან დაბრუნებულიყო და იმავე საღამოს ლართის-ქარში ჩამოვიდა რაზმი. ზარალი აგრე რიგად დიდი არ მოსვლია საგინაშვილს: მოუკლეს 6 ჯარის კაცი; დაუჭრეს სამი აფიცერი და 18 ჯარის კაცი. მოუკლავთ აგრედვე ერთი ქართველი თავადიშვილი სოლომონ მაღალაშვილი.¹⁰³⁾

სულ სხვანაირად აგვიწერს ბატონიშვილი დავით ბრძოლის ამ ეპიზოდს. აი რას მოგვითხრობს შემატყინე: "მაშინ არაგვის პირმანცა აღადგინა შფოთი პირისპირ რუსეთისა!

102) Ibid 73.

103) Ibid გვ. 73.

შთაეხმარნენ ფშაველნი და მოქსწყვიტნეს ყოველნივე მუნ მყოფნი რუსნი ფასანაურსა და ანანურსა, ხოლო კამენდანტი ანანურისა გამაგრდა ციხესა შინა. მაშინ ბარონ კლოტმან ღიანარალმან, რომელიცა იყო მოადგილედ მარკიზისა ტფილისსა, ვინაიდან მარკიზი ჟამსა მას იმყოფებოდა ბაქუს, წარავლინა არაგვიანთა ზედა პოლკოვნიკი უშაკოვი ათასითა მხედრობითა და მუხრანის ბატონიშვილი კონსტანტინე, ძე იოვანე მუხრან-ბატონისა, წარატანა თანა, რამეთუ ესე კონსტანტინე იყო ფრიად ერთგული რუსთა და არა კეთილობისა მოსურნე ქართველთა და მოვიდა კობიანთ-კარს და დაესხა კობიანთ თავსა. იქმნა მუნ ბრძოლა ძლიერი, იძლივნენ რუსნი და მოკლეს რუსი ასორმოცდა ათი კაცი და სიღამემან გაჰწყარნა. მაშინ კონსტანტინემან დაუწყო ტკბილი. საუბარი, მიიტყუა ფიცით სამოცდაათნი კაცნი არაგვის პირისანი - აი უსჯულო სვინიდისი - და სრულიად მოაშთობინა იგინნი რუსთა (ესე იგი დაახრჩეს); მოწვა კობიანთ-კარი და დუშეთი, გარდავიდა რუსთა მხედრობითა და მოწვა ანანური, პავლეური და ციხისძირი. ჟამსა ამას მოვიდა ბულაჩაურზედა სხვა ახალი სამასი კაცი რუსთა მხედრობა. იქმნა მუნ ბრძოლაი. იძლივნენ რუსნი ბულაჩაურითგან, მოკლეს წინამძღვარი მათი მალაღაშვილი სოლომონ, ძე დავითის და დაჰკოდეს კაპიტანი საგინაშვილი ზურაბ, ძე პაპუასი. ჰსცნა რა კონსტანტინემან, გარდაუძღვნა ანანურით რუსთა და მოაწვევინა ბულაჩაური სრულიად.

მარკიზი არასა ბრძანებს, მართლა დაახრჩობინა კონსტანტინე მუხრან-ბატონმა 70 კაცი არაგვის პირისა თუ არა. მემატთანე დავითი გადაჭრით ამოწმებს ამ საშინელ ამბავსა და შეწუხებულ-აღშფოთებული კილოთი ღაღადებს: აი უსჯულო სვინიდისოვო!

საჭიროა სხვა ისტორიული საბუთი, რომ ბრალიანს ბრალი დავდოთ და თუ კონსტანტინე უდანაშაულოა, ეს საშინელი მსჯავრი ისტორიისა ავხადოთ.

XIV

მეამბოხეებმა, როგორც ზემოდ მოვიხსენიეთ, შეჰკრეს საქართველოს სამხედრო გზა და ცოტა არ იყვეს, გული მოიფონეს, - რუსის მაშველი მხედრობა საქართველოში ველარ შემოვა და აქაურებს ჩვენც გავუსწორდებითო. მაინც გული ეთანადრებოდათ, ვაითუ რუსების ერთგულმა გაბრიელ ყაზბეგმა გზა გახსნას და კავკასიის ქედზე ჯარი გადმოატაროსო.¹⁰⁴) გულის მოსაგებად, ასე გაშინჯეთ, მეფობაც-კი შესთავაზეს მეამბოხეებმა გაბრიელსა, მაგრამ ყაზბეგმა სახელ გატეხილ ქართულ მეფობას რუსის ჩინ-ორდენები არჩია და ერთხელ მიღებული ფიცი ერთგულობისა არ გასტეხა.

შეატყობინეს თუ არა, რომ ფასანაურის პოსტს მეამბოხენი გარს შემოეხვივნენო, პოლკოვნიკი გაბრიელ ყაზბეგი ვლადიკავკაზს აიჭრა და პირადად სთხოვა ციხის კამენდანტს გენერალ-მაიორ დელპოცოს, ჩქარა ჯარი გაგზავნე გზის გასახსნელად, თორემ მერე გვიანლა იქნებაო. დელპოცო დაფაცურდა, ჩამოვიდა ლარსში და უბრძანა მაიორ ბარსოვს წასულიყო ანანურს ერთი როტა სუზდალის პოლკის ჯარითა და თან წაეღო ერთი ზარბაზანი. ძნელი იყო ზარბაზნის გადმოთრევა და ჯარის გადმოყვანა შუაგულ ზამთარში კავკასიონის ქედზე, მაგრამ სიძნელისა არ ეშინთდა გაბრიელსა და იმედი ჰქონდა, რომ ჯარსაც უვნებლად მოიყვანდა ანანურს მორჩილ მთიულთა დახმარებით და მთასაც მორჩილების გზაზე დააყენებდა. გაბრიელის იმედსა და დაპირებას უბრალო ბაქიობად არ მიიღებდა რუსის მთავრობა, რადგან ყაზბეგი

104) მარკიზი ყაზბეგს ასე ახასიათებს: истино усерднѣи и вѣрнѣи. იხ. Ахты, ტ. V, 83. 73.

მართლა რომ გამოცდილი და სარისტიანი კაცი იყო. ვინ მოსთვლის რამდენჯერ დაუხსნია გაბრიელს გაქირვებისაგან რუსის მხედრობა.¹⁰⁵⁾

ჟამსა იწროებისასა იმედიანი სიტყვა და დაპირება გაბრიელისა დიდი ნუგეში იყო გენერალ პორტნიაგინისათვის, კრუხივით რომ მოიკალათა ტფილისში და გარედ გასვლას რომ ველარ ბედავდა. სანუგეშო ამბები გამოუგზავნეს შეშინებულ გენერალს ქართლისა და ბამბაკის ოლქის უფროსებმაც. ბამბაკის უფროსი გენერალი ლისანევიჩი ატყობინებდა, საჩქაროდ გიგზავნი ერთ ბატალიონ ჯარსა და ბატალიონი რომ უფრო მალე ჩამოვიდეს ტფილისს გამოვისტუმრე მოკლე უზუნღარის გზით, თუმცა სასიარულოდ ძნელი და უვარგისია ეს გზაო. ამასთანავე ჩემდა მიერ რწმუნებულ დისტანციის სამზღვრები მაგრად შეეკარი, რომ საქართველოში მომხდარ აჯანყების ხმამ აქაც არ მოაღწიოსო. გენერალი სტალი კიდეც იმას იწერებოდა ქართლიდან, რომ თუმცა აჯანყება ჯერ არ დაწყებულა, მაგრამ ხალხი სიხარულით ფეხზე აღარა სდგა, კახელების აჯანყების ამბავი რომ გაიგოვო. ერისთვიანთ მადლობელი უნდა ვიყვნეთ, რომ ქსნის-პირელნი არ შეუერთდნენ მამფოთართ, თუმცა კაცი-კაცზე მოსდიოდათ და უთვლიდნენ, ერთად ვიმოქმედოთ. რუსების წინააღმდეგო. მართალია, არხეინადა ვარ, მაგრამ ვინ იცის, აუტკივარი თავი რაზე ავიტკივო და ამის გამო წინაღვე სამზადისს შევუდექი, თუ ვინიცობაა აჯანყება დაიწყოვო. გაბნეული კამანდები შეეკრიფე და იმისთანა ადგილებში ჩავაყენე, რომ ამბოხების დროს ერთმანეთს უცბად გაუწოდოს დახმარების ხელიო.¹⁰⁶⁾

ურიგო ამბავს არც პოდპოლკოვნიკი უშაკოვი იწერებოდა. დუშეთის დამორჩილების შემდეგ უშაკოვი დაუყოვნებლივ გაემართა ანანურისაკენ. დუშეთიდან ორი ვერსის მანძილზე ანანურის გზაზე დამდგარ რუსის მხედრობას წინ

105) ვინც არ დაიზარებს და თვალს გადაავლებს ისტორიულ ამბავს მთიულეთთ 1804 წ., საესეებით გაითვალისწინებს, თუ ვინ იყო გაბრიელ ყაზბეგი და რა სიკეთე მოუტანა მამინდელ რუსის მთავრობას რყევა-მომძრაობის დროს.

გადაეღობნენ აჯანყებულნი და სროლა აუტეხეს. ბრძოლა გაგრძელდა დილის 6 საათიდან საღამოს 5 საათამდე. უშაკოვმა გზა გაიკვლია, ანანურს ავიდა და შეება აჯანყებულთ, ციხეს რომ ეხვივნენ გარსა. იძლივნენ მეამბოხენი და გამარჯვებული უშაკოვი ციხეში შევიდა. მართალია, ანანური განსაცდელს გადარჩა, მაგრამ თვით მაზრა ანანურისა ჯერ კიდევ დამშვიდებულად ვერ ჩაითვლებოდა, რადგან მართო კახეთიდან მოსული მეამბოხე 1000 კაცამდე აღიოდა. ანანურში მომქმედ კახელობას უფროსობდა თ. იოსებ სიღამონოვი. ეს რაზმი დათარეშობდა არაგვის მარჯვენა ნაპირზე და ჯერჯერობით უშაკოვთან შეტაკება არა ჰქონია.

პოლბოლკოვნიკ უშაკოვის რაზმი დაბანაკდა ანანურის ციხის გვერდზე. მეამბოხენი მოსვენებას არ აძლევდნენ რაზმსა და სხვა და სხვა მხრიდან მიუხტებოდნენ ხოლმე. ამგვარმა სითამამემ ძალზე გააბრაზა მხნე და გამარჯვებული პოლბოლკოვნიკი და განიძრახა მოუსვენარ მტრის სამაგალითოდ დასჯა. ენა-ტანიებმა შეატყობინეს, რომ ანანურიდან სამი ვერსის მანძილზე დაბანაკებულია 70 კაცი მეამბოხეო. თებერვლის 17 უშაკოვმა თან წაიყვანა 159 გრენადერი, ჩუმად მიეპარა ღამე მეამბოხეთა ბანაკს, ეკვეთა და თითქმის სავსებით გაუღიტა. გადარჩა სიკვდილს 15 კაცი და ესენიც ტყვედ წამოიყვანა გულადმა პოლბოლკოვნიკმა. უშაკოვს მცირე ზარალი მოუვიდა; მოუკლეს ორი გრენადერი და დაუჭრეს ორი. ასეთი მცირე ზარალი იმის მაჩვენებელია, რომ რუსები მძინარეებს დასხმიან თავსა. უშაკოვმა ხელთ იგდო ერთი უმთავრესი მეთაური არაგვისპირელ მეამბოხეთა, სწორედ ისა, რომელმაც ლაზათიანად შეამკო ანანურის კამენდანტი და სთხოვა ციხე ჩაგვაბარეო. შიშისა და მაგალითისათვის დატყვევებული მეთაური ჩამოაღრჩეს 18 თებერვალს, დილით. მეამბოხეთა ბანაკის აკლებამ და უმთავრესად მეამბოხის ჩამოღრჩობამ თავზარი დასცა მეამბოხეებსაო, იწერებოდა უშაკოვი, გული გაუტყდათ და მორჩილება ითხოვესო. მთელი ანანურის მაზრის მცხოვრებლებმა ხელმწიფე იმპერატორის ერთგულობაზე ფიცი მიიღეს და დაყუჩდნენო. სწორედ ამ

ქამად ტყვეობიდან გამოექცათ არაგვისპირელებს ერთი ყაზახი და უშაკოვს მოახსენა ფასანაურის პოსტის ამოწყვეტის ამბავი. რუსეთიდან ფასანაურში ახლად ჩამოსულიყო ერთი როტა სალდათი და სწორედ ეს ახლად ჩამოსული როტა გაანადგურეს მეამბოხეებმაო.

ზემოდ მოვიხსენიეთ, რომ კონსტანტინე მუხრან-ბატონმა "მოაშთობინა" 70 კაცი არაგვისპირისანი. ბატონიშვილ დავითის მოთხრობა და უშაკოვის მოხსენება რომ დაუპირისპიროთ, უეჭველად უნდა ვიფიქროთ, რომ ორივენი ერთსა და იმავე ფაქტს გვიამბობენ. შორიდან სხვა და სხვაობა ეტყობა, მაგრამ არსებითად ერთი და იგივეა. ვითომდა მამაცი უშაკოვი, 150 გრენადერთ, ქურდულად თავს დაესხა მძინარე არაგველებს და უმოწყალოდ შემუსრა, ხოლო წინამძღოლი ხალხის თვალწინ ჩამოაღრჩო. უშაკოვი თავისთავად დამე უცხო და უცნობ ადგილს ვერ გაითარეშებდა. ეჭვი არაა, რომ ვინმე ქართველი წაუძღვებოდა წინა და გზას უჩვენებდა. გზის მაჩვენებლად გამოდის გენერალი კონსტანტინე მუხრან-ბატონი, ასე რომ გაოცებით ნათქვამი დავითისა: "ჰოი უსჯულო სვინიდიდსოვო", მნიშვნელობას არა ჰკარგავს.

რაკი ანანურელები მიფანტ-მოფანტა პოდპოლკოვნიკ უშაკოვმა, თავისუფლად დაიწყო სიარული სოფლიდან სოფელს, ზოგან ძალით აფიცებდა ხალხს ხელმწიფე იმპერატორის ერთგულობაზე, ზოგან-კი თავის ნებით მიდიოდა "მამაც" სარდალთან დამფრთხალი სოფლელობა ფიცის მისაღებად. მართალია, ანანურის ციხე სამწუხარო სურათს წარმოადგენდა, რადგან მეამბოხეებმა სახელმწიფო თივა მოიტაცეს, წაიღეს აგრედვე რაც პური მოეგროვებინათ რუსებს სასურსათო მალაზიაში, მრავალ მოხელეს სახლ-კარი დაუშვეს და ქონება დასტაცეს, მაგრამ ამ ზარალს ვიღა იღარღებდა, რაკი მაზრა დააწყნარეს და ხალხს ფიცი მიიღებინეს. სუზდალის როტაც გადმოვიდა მთაზე დიდის გაჭირვებით და კაიშაურში დადგა, ასე რომ საქართველოს სამხედრო გზა გაიხსნა და რუსის მთავრობამ დიდი ხიფათი და განსაცდელი აიცილა თავიდან. ერთი სიტყვით მამაცმა უშაკოვმა საქმე გაჩაღხა და

იმედით სავსე რაპორტებს უგზავნიდა ტფილისში პორტნიაგინს. ერთი რამ ვერ მოაგვარა უშაკოვმა და ეს ერთი იყო, რომ ჩრდილს აყენებდა მის გამარჯვებას. უშაკოვმა ვერას გზით ვერ მოახერხა ხელში ჩაეგდო კახეთიდან მოსული მემამბოხენი. მერე ცოტანიც ზომ არ იყვნენ თითქმის ათას კაცამდე იქნებოდა კახელების რაზმი. იგინი დაბანაკდნენ სოფ. საშაბუროს და ელოდნენ მთის პასუხს. რაზმის მეთაური და უფროსი თავადი იოსებ სიღამონოვი (ერისთავი) კარგა ხანია წასული იყო მთაში დახმარების სათხოვნელად. არაგვის ბატონ ბეჟან ერისთავის შვილი თავადი იოსებ ერისთავი გაემგზავრა გუდამაყარს და მეცადინეობდა აელეღვებიანა როგორც გუდამაყრელი, აგრედვე სხვა ხეობათა მცხოვრებნი.¹⁰⁷⁾

ნათქვამს თავი რომ მოვუყაროთ, თვალწინ ასეთი სურათი დაგვეხატება: თებერვლის ოცს შეკრული საქართველოს სამხედრო გზა გახსნა ორპირად წასულმა ჯარმა. ანანურისა და ღუშეთის მაზრათა მკვიდრნი დაწყნარდნენ, ღუშეთისა და ანანურის ციხენი ისევ რუსებს დარჩათ. არაგვზე დარჩა საბრძოლველად მხოლოდ თ. იოსებ სიღამონოვის ათასკაციანი რაზმი, ს. საშაბუროში დაბანაკებული. ტფილისის მიდამოები გასწმინდა მემამბოხეთაგან. პოლკოვნიკმა ტიხანოვსკიმ. მთელი კახეთი, ღღევანდელი თიანეთისა, თელავისა და სიღნაღის მაზრები, მემამბოხეებს ეჭირათ ხელში გარდა თელავისა და ყარა-ალაჯისა. თელავში მოემწყვდნენ მაიორები შმატოვი და ვრონსკი 300 ჯარის კაცით და ყარა-ალაჯის ციხეში შეიკრიბა: ქვედა ნოვგოროდელ დრაგუნთა პოლკის ორი ესკადრონი, ს. ფხოვლიდან ჩასული ეგერთა ერთი როტა, ს. ბოდბისხევიდან ძალზე შებერტყილი ერთი ბატალიონი ყაბარდოს პოლკისა და ელისეს სასულთანოდან მოსულ მაიორ ორბელიანის უფროსობით ორი როტა ყაბარდოს პოლკისა ერთის ზარბაზნით.

ასეთი იყო საქმის ვითარება თებერვლის ოცსა. 21 თებერვალს თვით მარკიზი პაულუჩჩი ჩამოვიდა ყარაბაღიდან ტფილისს. მარკიზი ისე ჩქარობდა მოსვლას საქართველოში,

რომ ორი დღის მეტი არ გაჩერებულა ქ. შუშაში. ყარაბაღის სახანოს საქმეების მართვა-გამგეობა და მოწყობა მთანდომამაცობით განთქმულ გენერალ მაიორ ი.ვ. კატლიარევსკის და თვითონ ქუდმოგლეჯილიო რომ იტყვიან, ისე მოეშურებოდა ტფილისისაკენ. ელდა ეცა რომ მოახსენეს, ორი კვირაა რაც აღარ ვიცით, რა დაემართა ყარა-ალაჯის ციხეში მომწყვდეულ ჯარსაო. ცეცხლივით აენთო მარკიზი, პორტნიაგინი რომ დაინახა ტფილისში გულ-ხელ-დაკრეფილი. იმის მაგივრად რომ კახეთს მოუარო, უპატრონო, იმის მაგივრად რომ რაკი კახელობა "აბუნტდა", შემწეობა მოგეთხოვა და ამბოხება მოგესპო, ჩამობრძანებულხარ ტფილისში, თან წამოგიყვანია მთელი პოლკი და ანანურისა და ტფილისის ჯარების უფროსობა გიქისრიაო. ერთი მიბრძანე, ამიხსენი და გამაგებინე, რაა მიზეზი ამ უცნაურის საქციელისაო, სწერდა მარკიზი შეშინებულს პორტნიაგინს. გენერალ პორტნიაგინმა რაპორტი მიართვა მარკიზსა, ავად ვარო და ამ გვარად სავსებით ჩამოშორდა აჯანყების საქმეს და შემდეგში აღარაფერი მონაწილეობა აღარ მიუღია საქმეთა მსვლელობა-მიმდინარეობაში.¹⁰⁸⁾

ციბრუტივით დატრიალდა პაულუჩჩი. თავად ციციშვილის მიმბაძველი იმასავით აპირებდა მოქმედებას, ესე იგი ფიცხად უნდა შეუტყო მტერსა, რომ გონებას ვერ მოვიდეს და დავთრები დაებნასო. ანანურისა და ტფილისის მაზრათა ოლქის უფროსად დაადგინა გენერალი კლოდტ-ფონ-იურგენსბურგი, პორტნიაგინის ავადმყოფობის გამო კახეთში სამოქმედო ჯარის უფროსობა თვითონ იქისრა. ბამბაკიდან მოსულ ბატალიონს უბრძანა - წადი ს. ხაშმს, შეუერთდი ტიხანოვსკის და უცადეთ ჩემს ბრძანებასაო. უშაკოვს კიდევ მისწერა, დაუყოვნებლივ დაეცი თავსა საშაბუროში შეკრებილ მეამბოხეებს, დაამარცხე და ს. ბულაჩაურში ჩადიო. ს. ბულაჩაური მნიშვნელოვანი ადგილია, რადგან აერთებს ანანურისა და თიანეთის მაზრებს. ღართის-ქარის პოსტის უფროსს მაიორ

კრუჟკოვს უბრძანა-დაუყოვნებლივ ადი სამშაბუროს 150 კაციტ და დახმარება გაუწიე უშაკოვსაჲ. ასეთ მზადება-განკ-არგულებასი რომ იყო მარკიზი, სამწუხარო ამბავი შეატყობინა ყაზახის მოურავმა, 1000 ლეკი ჩამოვიდა ალაზანზე და კახელობას შეუერთდაჲ. აქაც არ მისვენებენ მეამბოხენიო, წუწუნებდა მოურავი, კაცებსა ჰგზავნიან და აქაურ თათრობას აგულიანებენ ხელმწიფე იმპერატორის მხედრობის წინააღმდეგაჲ. მაგრამ ამისთანა გულ-გასაწვრილებელ ამბებს თავს ვეღარ დაუდებდა მარკიზი, რადგან 23 თებერვალს თვითონ აპირებდა ხაშმში ასვლას, ჯარის უფროსობის ხელში აღებას და კახეთისაკენ გალაშქრებას.

ვიდრე ტფილისიდან გავიღოდა მარკიზი, უშაკოვმა ერთხელ კიდევ დაამარცხა მეამბოხენი და ამ დამარცხებით საბოლოოდ დაამხო მათი ძალა. საშაბუროში გამაგრებულ მეამბოხეთ გარს უვლიდა უშაკოვი სამის მხრიდან. ქვემოდან ლართის-კარის პოსტიდან გაჩქარებული მიდიოდა მაიორი კრუჟკოვი, რომელსაც გზა შეუკრა ცხრა სანგარით ბულაჩაურიდან გამოსულმა კახელობამ. კრუჟკოვმა სანგრები აიღო და შეუერთდა უშაკოვს, შეერთებულის ძალით დასცეს საშაბუროს სიმაგრენი და, თუ მარკიზს დაუუჭერებთ, სამაგალითოდ დაამარცხეს აჯანყებული კახელობა და არაგველობა. ასი მოკლული ბრძოლის ველზე დასტოვეს, ვინც ცოცხალი გადარჩა, აირია, იარაღი დაჰყარა და არაგვეს მიაწყდა მარცხენა ნაპირას გასასვლელად, რადგან ბულაჩაურის მხარეს რუსობა არ იყო. არაგვეში გატოპვის დროს დიდძალი ხალხი დაირჩოვო, მოახსენებს მარკიზი იმპერატორს. საშაბუროს ბრძოლაც იაფად დაუჯდა ბედნიერ სარდალ უშაკოვს: მოუკლეს ორი ჯარის-კაცი და დაუჭრეს ხუთი.

საერთოდ უხეიროდ და უგემურად მიდიოდა აჯანყების საქმე ქართლში. რაიონი მოქმედებისა მცირე და პატარა იყო, თითქმის არ გაცილებია არაგვის ხეობას. მიზეზი უგემურობა-უფერულობისა ისაა, რომ თავად-აზნაურობა გვერდში არ ამოუდგა გლეხ-კაცობას, როგორც კახეთში, სადაც თითო-ოროლას გარდა მთელი თავადობა გაეხვია მღ-

ელვარების კომლში. ყაზახ-ბორჩალო-ბამბაკს რომ შეუთვალეს, თქვენც აჯანყდით და შემოგვიერთდითო, ქალაღზე 31 თავადმა მოაწერა ხელი. კახელები იმოდენა მხნეობას იჩენდნენ, რომ მთელი დეპუტაციაც-კი გაგზავნეს ერევანს თ. სოლომონ ბებუროშვილის ვაჩნაძედა ტატო აღათოშვილის მეთაურობით (რუსულად ტატილას ეძახიან) ბატონიშვილ ალექსანდრესთან ერევანს და ცალკე დეპუტაცია თვით სპარსეთს შაჰ-ზადა აბას-მირზასთან. ქართლში სულ სხვა იყო. უპირველესი გვარები: ერისთვიანი, მუხრანიანი, ამილახვრიანი რუსებს ერთგულობდნენ და აბა რაკი დიდი თავადიშვილები ხელს არ შეუწყობდნენ მთავრობის წინააღმდეგ ერის მოძრაობას, რა გამოვიდოდა და აკი არაფერიც არ გამოვიდა. პოლკოვნიკ გაბრიელ ყაზბეგს მეფობაც კი შესთავაზეს, ოღონდ ელაღატნა რუსებისთვის, მაგრამ ვერ გასტეხეს მთის ბატონი.¹⁰⁹⁾ თვით მარკიზი გააოცა გაბრიელის ერთგულობის სიმტკიცემ. ქართველებს ისე ძრიელ სწყუროდათ რუსების თავიდან მოშორება, მოახსენებს პაულუჩჩი ალექსანდრე პირველს, რომ ოღონც თავისი საწადელი აესრულებინათ და უკან არ დაიხიეს დიდი საქმის წინაშე, ყაზბეგს ალუთქვეს მეფობა და ყურმოჭრილ ყმობაო.

რაკი დიდებულები მოძრაობას მტრულად უცქეროდნენ წვრილფეხობამ ვერა გააწყო რა და ამის გამო პოლბოლკოვნიკი უშაკოვი ასე ადვილად იხვეჭდა გმირობის სახელსა და იმოსავდა თავსა დაფნის გვირგვინებით. ყაზბეგისა, ერისთ-

იანთ, ამილახვრიანთ და მუხრანთან ერთგულობის გამო ქართლის გამგე გენერალი სტალი სულ ადვილად იჭერდა კახეთიდან გამოგზავნილ მოციქულებს და ასაჯანყებელ ბართებს, რომელსაც ტფილისში ჰგზავნიდა.¹¹⁰⁾

ქართლიდან სულ ორმა თავადიშვილმა დაუჭირა მხარი აჯანყებას. ერთი, ზემოდ უკვე დასახელებული თ. იოსებ ერისთავი, არაგვის ბატონის შვილი და მეორე თავადი სიმონ მაჩაბელი. სიმონი წინ გაუძღვა ახლად არჩეულ მეფე გრიგოლს, უვნებლად გაატარა შუაგული ქართლი და შევიდა მტკვრის მარჯვენა მხარეს: - სათარხნოსა და საციციშვილოსა, ააჯანყა რამდენიმე სოფელი, მაგრამ ვერას გახდა. გენერალი სტალი ფეხდაფეხ დასდევდა მაჩაბელს და როგორ დაემალებოდა მდევარს, რა კი მეზობლები ხელს არ უწყობდნენ? ვერც დაემალა და ხელში ჩაუვარდა სტალს. ის-კი მოახერხა მაჩაბელმა, რომ ბატონიშვილი გრიგოლი, ანუ ახალი მეფე, ტყვეობას ღროვებით გადაარჩინა და უვნებლად გაისტუმრა კახეთს, სადაც აჯანყების ნიადაგი უკედ იყო მომზადებული. თ. სიმონ მაჩაბელი გენერალ სტალმა ტფილისს გაგზავნა საპატიმროში, სადაც ამბოხების ჩაქრობის შემდეგ გამოძიებულ კამისიასთან უნდა ჰქონებოდა საქმე.

110) მარკიზი პაულუჩჩი უკვეშეჯდომილად ხშირად მოახსენებს იმპერატორს — ამასთანავე გაახლებ წერილების დედანს და თარგმანსაც. ეს ის წერილ-ბრათებია, რომლებსაც კახეთის მეთაბოხენი ჰგზავნიდნენ ქართლსა, ყაზბეგთან, ყაზახ-ბორხალოს, ერევანს და სხვაგან, მაგრამ არც თვით წერილებია დაბეჭდილი აქტებში და არც თარგმანები. მაშ სადაა ეს წერილ-ბრათები? ვფიქრობთ, რომ სამუდამოდ დაიღუპა აღნიშნული ძვირფასი დოკუმენტები საქართველოს ისტორიისა. გამიგონია, — დიმიტრი ზაქარიას ძე ბაქრაძე, რომელიც აქტების ბეჭდვაში მონაწილეობას იღებდა, თურმე ბევრჯერ მდუღარე ცრემლებს ჰღვრიდა როცა ზოგიერთ დოკუმენტს ჰხედავდა. ნეტა ეს ის დოკუმენტები ხომ არაა, რომელთაც განსვენებული ისტორიკოსი სტიროდა და ჰგლოვობდა.

XV

თ. პავლე ციციშვილი განჯას რომ მიადგა, ჯავათ-ხანს შეუთვალა, ევროპიელთა წესი და ჩვეულებაა, ვიდრე სარდალი ცეცხლსა და მახვილს აალაპარაკებს, მოვალეა ეცადოს მშვიდობიანად გაათავოს სადავო საქმე და ამის გამო სთხოვდა ხანსა, განჯა ჩამაბარე უბრძოლველად, სისხლის დაუღვრელადო. ციციშვილის მოტრფიალე მარკიზ პაულუჩჩიც სწორედ ასე მოიქცა. ვიდრე ცეცხლითა და მახვილით მოედებოდა მემბოხე კახეთს, განცხადება (ყბად აღებული ობვეშჩენიე) გაუგზავნა ერთგულ ქართველებიან ხელით. მარკიზი ჰფიქრობდა, ეგები უფალმა ინებოს და გაკერპებული კახეთი მოქრისტიანდეს, იარაღი დაჰყაროს და კაპიტან-ისპრავნიკების მამა-შვილური ბატონობა-პარპაში არჩიოს და ხელი აიღოს მეფობის აღდგენაზე, რომელიც მაშინდელ ქართველის თვალში შინაურ თავისუფლებას მოასწავებდა. ცდა ბედის მონახვერეაო და 22 თებერვალს შიკრიკები აფრინა კახეთს და აბგებით პროკლამაციები გაატანა.¹¹¹⁾

დღევანდელ კახეთში ბევრი საამურად ჭიკჭიკებს რუსულად, თუმცა ბევრია ისეთიც, რომელიც უგემურად საუბრობს ამ ენაზე. ასე რომ რუსულად დაწერილ პროკლამაციას ადვილად გაიგებს და შეისმენს დღევანდელი თავად-აზნაურობა. მაშინ სულ სხვა გახლდა. თუ ამტვრევდა ვინმე, ისიც ორიოდე ჯახრაკი მოურავი, ან ახლად, რუსობის ყალიბზე გამომცხვარი მოხელე. ცხადია, რომ ამის გამო მარკიზის პროკლამაცია ქართულად იქმნებოდა ნათარგმნი. მაგრამ თარგმანი არაა დაბეჭდილი აქტებში და იძულებული ვართ ვთარგმნოთ იგი რუსულით.

111) პროკლამაცია იგივე განცხადებაა, ანუ ობვეშჩენიე. მაშინაც უყვარდათ უცხო ტომის სიტყვათა ხმარება.

აი რა შეუთვალა მარკიზმა აჯანყებულ კახეთს.¹¹²⁾ "კახელებო, რას სჩადინხართ! რამ დაგიბრმავათ თვალი და გონება, რას ეტრფით, რა გწადიანთ! ნუ თუ გონება ისე დაგებნათ და ისე გაღირიეთ, რომ ველარა ჰხედავთ რუსის მხედრობის ძალასა და ძლიერებას, იმ მხედრობისა, რომელმაც არ იცის, რაა დამარცხება და უკან დახევა! ნუ თუ დაგავიწყდათ ქრისტიანობა და დაბრმავებული ველარა ჰხედავთ, რომ განგება უფლისა მზადაა შეგმუსროთ ვითარცა ფიცის გამტეხელნი! სად გაგონილა, რომ ფიცის გამტეხელს ეხეირნოს. ნუ დაივიწყებთ და გახსოვდეთ, რომ იარაღი აღიღეთ მათის იმპერატორების ღიღებულების მხედრობის წინააღმდეგ, იმ მხედრობისა, რომელიც თქვენსავით ქრისტეს თაყვანის მცემელია, მფარველი და დამცველი თქვენის სახლ-კარისა, ოჯახისა და ავლა-ღიღებისა გარეშე მტრისაგან, რომელსაც სული უკაწკაწებს თქვენ ჩასაყლაპად და გასანადგურებლად! ისე როგორ დაგიყენებთ გამჩენმა თვალი, რომ გასტეხეთ ერთგულობის ფიცი მათის იმპერატორებითის ღიღებულების მხედრობისა, ის ფიცი, რომელიც მიიღეთ თვით ღვთისა პირისა წინაშე და შეისხით იარაღი წინააღმდეგ თქვენისავე მფარველ-პატრონებისა, საკუთარის სამშობლოსა და სარწმუნოებისა! მაშ ასე: ვინაიდან გულის მწუხარებით გავითვალისწინე უფსკრული, საითკენაც ბაწარალებით მიიღტვით და მიაქანებთ საკუთარ უდანაშაულო ოჯახობასაც, მოვალეობად მივიჩნიე, ვიდრე ვიღონებ, რასაც მოვალეობა და თანამდებობა მავალებს, შემდეგი გამოგიცხადოთ: კახელებო! წინ ორი გზა გიღევსთ: ერთი წაგიყვანთ ხსნა-სიკეთისაკენ, მეორე აუცილებლად დაგლუპავთ. თვითონ მე მოვდივარ კახეთს ძლიერის მხედრობით სიწყნარე-მშვიდობის ჩამოსაგდებლად თქვენში. ამა-სთანავე ხელი ჩემი გაწვილია შეივრდომოს მოწყალებით ცოდვილი, ვითარცა შეივრდომა და შეიწყალა მამამ უძღვები თვისი შვილი. მაშ აირჩიეთ გზა, რომელსაც გიჩვენებთ

112) ღვთის წინაშე რომ სთქვას აღმინაჲ, მაშინდელი მკვირცხლად დაწერილ მთავრობის განცხადებასკობიან ღღევანდელ უფერულად და უხალისოდ შეთუთხნილებს.

საკუთარი კეთილ-გონიერება. გეფიცებით პატიოსან სახელსა და გარწმუნებთ, რომ არავის დავსჯი, ვინც იარაღს აიყრის, მონინიებს ცოდოს და ჩოითხოვს პატიებას, ვინც ცოლ-შვილით ოჯახს დაუბრუნდება და ხელახლა მიიღებს ხელმწიფე იმპერატორის ერთგულობის ფიცსა. მაგრამ ესეც იცოდეთ, ვინც-კი შემხვდება იარაღით ხელში, ვინც-კი არ დაემორჩილება კანონიერ მთავრობას, ცოცხალს არ გავუშვებ, ღირსეულს სასჯელს გავუჩენ და უღმობელად მოვეპყრობი.”¹¹³⁾

კახელებმა ძალიან მალე აახლეს პროკლამაციის პასუხი. ეწყინა პაულუჩჩის, რომ არ გასჭრა მისმა სიტყვამ და ხელმწიფეს შესჩივლა, - მოწყალეობა-პატიებას დავპირდი აჯანყებულთ და მორჩილების მაგიერ რალაც მიქარვას მოპყვენო.¹¹⁴⁾

კახელების პასუხი, ანუ "მიქარვა", ან კი რად ეპიტნა-ვებოდა ბრწყინვალე მარკიზს. გულუბრყვილოდ დაწერილი წერილი სასტიკი და უღმობელი კრიტიკაა მარკიზისა და მის წინამოადგილეთა მართვა-გამგეობისა, მოკლელაა ანუსხული ყველა ის საძაგლობა და ბარბაროსობა, რასაც თამამად და დაუსჯელად სჩადიოდნენ ჯარის-კაცნი, კაპიტან-ისპრავნიკები, ვანტერ-კამისიონერები და უთვისტომო მსუნაგი მოხელენი. აბა რად ესიამოვნებოდა მარკიზს, პირში რომ უთხრეს, - თქვენც საძაგელი ხართ და თქვენი მოხელენიცაო.

"მთელი კახეთის თემი, მთასა და ბარში მცხოვრები, - უთვლიდნენ მემამოხენი მთავარ-მართველს, მოგახსენებთ, რომ წიგნის ხალხი არა ვართ,* გვაკლია გამოცდილება და ვერ გავიგეთ თქვენი მონაწერი. საიდან მოიგონეთ, რომ ჩვენ ქრისტე უარყავით, ხელმწიფეს ვულალატეთ და ფიცი გავტეხეთ. თუ რამე ჩავიდინეთ, მიზეზი და საბაბი თქვენ თვითონა ბძანდებით. რაც მანიფესტით ნაბძანებია უმოწყალ-

113) Акты, т. V, гл. 82.

114) რუსულად: отнять, наполнивший вздорными причинами, которые якобы подвигли юзь к бунту. Ibid. гл. 77.

*) რუსულად: неопытны в писемлах.

ესი ხელმწიფისაგან, არათფერი შეასრულეთ. ყველაფრის მიზეზი თქვენ თითონ იყავით, ვინაიდან ბრალიანისა და უბრალოს გარჩევა არ იცოდით, ისე ჰხოცდით ხალხსა და აღრჩობდით. ვხედავდით ამ უსამართლობას, მაგრამ ვითმენდით, რადგან შევეფიცეთ ხელმწიფე იმპერატორსა, ერთგული ვიქნებითო. ამას გარდა, ეგზეკუციისა და ხიშტების საშუალებით მიგქონდათ რაც რამ გვებადა. გვიყლეტდით ცოლ-შვილსა, საზღო პური მოგვტაცეთ და შიმშილითა გვხოცავდით და ნუგეშად გვეუბნებოდით-ბალახი სძოვეთო. არა, ქორთვამ ბალახი როგორ უნდა სძოვოს, სად გაგონილა? იმოდენა ბეგარა გაგვიჩინა მთავრობამ, რომ საქონელი გაგვიწყდა და ტყეებში ურმის საშენი მასალა გამოილია. ველარ ავიტანეთ ასეთი გათახსირება და შეურაცხყოფა და გულში გავიფიქრეთ - სჯობს კაცმა სხვას აუგოს ანდერძი, ვიდრე საკუთარის თვალთ იხილოს ცოლშვილის აწიოკება და შიმშილით სიკვდილიო. დაქვემდებარებით ვიცით, რომ ხელმწიფე იმპერატორს აზრად არ მოუვა ხალხის გაყლეტა. საბაბი არეულობისა თქვენ თითონ მოგვეცით. ჩვენ ველარ მოვრიგდებით. რაც იქნება, იქმნეს, თავი და ცოლშვილი გავწირეთ. კოდ პურში 1 მან. 20 კ. გვაძლევდით, ვისაც პური არა ჰქონდა, კოდის საფასურად 4 მ. ართმევდით. ხელმწიფისათვის არ გვიღალატნია და არც მოღალატენი ვართ. თქვენ თვითონ არღვევდით იმპერატორის ბრძანებას და ველარ ავიტანეთ ამდენი უსამართლობა და უნამუსობა. ჩვენსა და თქვენს შორის ხიდი ჩატყდა, ერთად ველარ მოვთავსდებით. ჩვენი სიცოცხლე რა სიცოცხლეა; ისედაც მკვდრები ვართ და ბარედამაც მართლა დავიხოცებით. თხოვნა გავუგზავნეთ იმპერატორს და თქვენ-კი სადღაც მიმალეთ და ხელმწიფეს არ აცოდინეთ. გვატყუებდით, თვალთმაქცობდით და ჩვენც ვითმენდით. ბასტა, მეტის ატანა აღარ შეგვიძლიან. გათავდა ყველაფერი; გადავწყვიტეთ სიკვდილი და დავიხოცებით კიდეკაც".¹¹⁵⁾

ჩვეულებრივი თხოვნა-მუდარა, ანუ დღევანდელ ტერმინოლოგიით "პეტიცია", დაჩაგრულ ერისა არა სჭრის ხოლმე. მოქსოვილ სიტყვებით დაწერილ მუდარას ან წითელ მაულს ქვეშ ამოსდებენ, ან კიდევ უღარდელად წაიკითხავენ, ერთს გულიანად გაიღიმებენ და მღაბალ ხარისხის მოხელეს გადასცემენ შესანახად შთამომავლობის საცოდნელად და მეთრორიეთა თავში საცემად. კახელების პეტიციებსაც ასეთი ბედი ემართებოდა, ან-კი რა საბუთია ვიფიქროთ, რომ მარკიზის ღროს სხვა ბედი ერგებოდა წილად დაჩაგრულის ღრმად ამონაკენეს? კახელებმა რომ წააყვედრეს პაულუჩჩის, ხელმწიფეს არ ატყობინებდი ჩვენ მწუხარება-გაჭირვებას,*) შენი ხელქვეითი მოხელენი თვით იმპერატორის ბრძანებას არ ასრულებდნენ და შენ-კი ყურს არ იბერტყავდიო და რადგან ისიც შემოუთვალეს, ჩვენ შორის ხიდი ჩაინგრა, ან ნამუსიანი სიცოცხლე ან სიკვდილიო, მარკიზი შეკრთა, რადგან კახელების სიტყვა-პასუხი ჩვეულებრივ პეტიციას, მოწიწებით და მოკრძალებით დაწერილს, არა ჰგავდა. ეს ერთი. მეორე კიდევ ისაა, რომ ქადილს საქმეც ზედ მოჰყვა. მთავრობის ბურჯი და ძალა ბატონობისა - სამხედრო კამანდები და რაზმები კახელებმა დააწიოკეს, ზოგი ძალზე შებერტყეს და ორ საცოდავ ციხე-სიმაგრეში ცხვრის ფარასავით შელალეს. ასეთი განსხვავება კარგად ესმოდა კეთილშობილ მარკიზს და სხვა რომ ვეღარ მოახერხა, ხელმწიფეს მოახსენა, კახელები ღობე-ყორეს ედებიან და რაღაებსაც მიჰქარავენო. მაინც ერთი კიდევა სცადა მარკიზმა და პასუხზე-პასუხი გაუგზავნა: სწორედ კარგი სანახავი იქნებოდა თავის ღროზე ეს უცნაური პოლემიკა! ამ საკვირველ პოლემიკის აეტორი ერთი მარკიზია, მაგრამ შეამბოხეთაგან პასუხს ვინ აძლევდა, არ ვიცით. ძუნწმა ისტორიამ არ შეგვინახა მარკიზის ლიტერატურულ მოპირდაპირის სახელი და გვარი.

"კახელებო, ხელმეორედ შეუთვალა მარკიზმა, თქვენი პასუხი მომერთვა ს. ხაშმს. იქიდან ვსცანი მიზეზი, რამაც

*) პეტიციონერების საყვედური საერთო მართვა-გამგეობის უკუღმართ სისტემას ანსაიათებს და არა მარტო მარკიზისას.

გაიძულათ იარაღი აგესხათ და ამბოხება გაგეჩაღებინათ. - თქვენ თვითონ კარგად მოგეხსენებათ, რომ თქვენი საჩივარი, რაც მე ვუფეროსობ ამ ქვეყანას, არ მომსვლია. ისიც კარგად მოგეხსენებათ, რომ საჩივარს, თუ კი ვინმე შემოიტანდა, უყურადღებოდ არ დავტოვებდი, უმაღლეს სასტიკად გამოვიძიებდი და ჯეროვან სიმართლეს მივუძღვებდი მომჩივანსა. რადგან, თუ მწუხარება ვინმე მოგაყენათ, ჩემ დროს არა ყოფილა და არც არაფერი ვიცოდი თქვენის შეწუხებისა, ამიტომ ამ უამად გიგზავნით ყოვლად სამღვდლო ნინო წმინდელსა, ჩემს საკუთარ მოძღვარს პატრ ონოფრეს და მაიორს თავად სოლომონ ავალიშვილს და მათის პირით გატყობინებთ მოწყვეტილ სიტყვას: გონს მოლით, ხელი აიღეთ განზრახვაზე, დაიშაღენით და დაბრუნდით თავ-თავიანთ სახლში. შინ რომ დაბრუნდებით, ნებას გაძღვეთ მაშინ შემოხვიდეთ ჩემთან საჩივარ-თხოვნით და მეც ყოველ ღონეს ვიღონებ სამართალი გაგიჩინოთ და ყოველ გზით შეგიმსუბუქოთ მწუხარება. ესეც იცოდეთ, თუ ახლაც არ შეისმენთ ჩემს სიტყვას, არ მიიღებთ ამ განცხადებას, მაშინ უკაცრავად ბრძანდებოდეთ, ისე მოგექცევით, როგორც შეჭფერის მუხანათსა და მოლაღატეს".¹¹⁶⁾

მოციქულები ვერას გახდნენ, აღარა სჯეროდათ მთავარ-მართებლის სიტყვა-დაპირება. ციციშვილიდან მოკიდებული ყველა ჰპირდებოდა მფარველობა-პატრონობას და მის მაგიერ მშიერ ბავშვებს ტყეში ისტუმრებდნენ საძოვრად, თქვენ ბალახიც გეყოფათ საკვებად, პური, ღვინო და სხვა რაც ზინათი და დავლათია, სოფლად, ჩვენ უფრო მოგვიხდებო. რაკი მთავრობის სიტყვას ეხტიბარი გაუტყდა ხალხში, საკვირველიც აღარაა, რომ პატივცემულმა ყოვლად სამღვდლო ნინო წმინდელმა და პატრმა ონოფრემ გამწარებული ვერი ვერ დაიყოლიეს და "ბუნტობაზე" ხელი ვერ ააღებინეს. სხვანიც ბევრი დაგზავნა მარკიზმა აჯანყებულთა დასაწყნარებლად, მაგრამ მათს საპატიო მისსიას არავითარი ნაყოფი არ მოჰქო-

ნდა. ერთი ამ მოციქულთაგანია კარის ეკლესიის არქიმანდრიტი ელევთერ.

ბერი ელევთერ ტიპიური მოვლენაა საქართველოს ძაძა მოსილ წარსულისა. ერთი რომ თავს აკლავდა სამშობლოს სახელსა, მეორე, მისივე მეზობელი, იღვწოდა და ოფლსა ღვრიდა დამჩაგვრელის გასახარებლად და სამშობლოს დასანგრევად. მათი ფიქრი და გონება ტფილისს, საქართველოს ამ ღელა-ბოძს, კი არ დაჰქროდა, მის ღიღებისა და აყვავებისათვის კი არ უძგერდა მკერდში გული, არა და არა. სატრფიალოდ ხან თეირან-თავრიზი გაუჩნდებოდა, ხან სტამბოლი და ხან კილევ ვინ იცის რა ჯანდაბა და ღოზანა.

არქიმანდრიტი ელევთერ კარის ეკლესიის მოძღვარი ყოფილა. მაშასადამე საპატიო თანამდებობა: ჰქონებია და ნივთიერადაც უზრუნველ ყოფილი უნდა ყოფილიყო. მეფობა რომ მოიშალა, უპირატესობა არ მოსპობია, მაგრამ მაშინვე თ. ციციშვილს დაუწყო ტორღიალი, მოჰყვა კულის ქიციხს და მთელი თხუთმეტი წელიწადი სწორედ საძრახის ხელობაში გაატარა. ელევთერის ჯურისანი ზოგი ბედს მალე ეწეოდა ხოლმე, ზოგი-კი გულნაკლული რჩებოდა. ასევე დაემართა კარის ეკლესიის მოძღვარსაც. რაკი არ დაუფასეს უმწიკვლო სამსახური, ადგა და გააშანშალა უშველებელი მოხსენება და მიართვა საქართველოსა და იმერეთის კანტორას 1815 წ. 29 ოქტომბერს. მოხსენებაში სულ ცხრა მუხლია, სადაც დაწვრილებითაა აღნუსხული ღვაწლი და მოქალაქობა ამ პატიოსანის ბერისა. მოხსენება ასე თავდება: "არიან სხვანიცა ჩემ მიერ აღსრულებულნი სამსახურნი ერთგულებისა ზედა მათის ღიღებულებისისა; გარნა სიგარძისათვის წარმოდგენისა დავიღუპებ. ამასთანა წარმოვადგენ ჩემდამო მოცემულთა ათესტატებთა მათ მიერ, რომელთაცა ხელის მწერანი მუნ იჩვენებინ, და ვითხოვ უქვეშევრდომილესად ამა უწმიდესის სინოდის კანტორისა მიერ, არა დადუმებულ იქმნეს ერთგულებითნი სამსახურნი ჩემნი და არა დაკლებულ ვიქმნე ღირსებითსა კმაყოფასა და ჰყოს ამან უწმიდესის სინოდის

კანტორამან წარდგენა ამა სამსახურთა ჩემთა უწმიდესსა სინოდსა შინა".¹¹⁷⁾

არქიმანდრიტ ელევთერის თვალწინ საქართველოს ჰი-რნახულ ეკკლესიას მზე და მთვარე დაუბნელდა, კათალიკოსი ანტონი მეორე მეტ ხორცსავით მოჰგლიჯეს სამშობლო ეკკლესიას, მის მაგიერ რაღაც კანცელარია შეხანხლეს და იმის მაგიერ რომ გვერდი აუქციოს, იწუხოს და იგლოვოს ობლობა და ქვერიობა ეკკლესიისა, თვალცრემლიანი ემუდარება ელევთერი, დაუჯილდოვებელს ნუ დამტოვებთო. ღვაწლისა და ამაგის აღსანიშნავად არდგენს სამხედრო კაცთაგან ბოძებულ "ათესტატებს".

მოხსენების ცხრანივე მუხლი ერთიერთმანეთზე უკეთესია და სათითაოდ ყველას მოვაქცევთ აქა, სადაც-კი მოიხდენს აქ მოთხრობილი ისტორიული ამბავი კახეთის აჯანყებისა 1812 წ. "ვინაიდან, ასე იწყობა ელევთერის მოხსენება, ვხედავ მე, უწმიდესის სინოდის კანტორას შემცვლელად ყოველთა სასულიეროთა საქმეთა და მას შინა დაწესებულთაცა სამღვდლოებითა ხარისხთა, რომლისა შორის შესრული თავის თვისთა ვითარებითა შეხდომათა ზედა, უწმიდესის სინოდის კანტორა ვალად რაცხს, რათა აჩვენოს კმაყოფილება, წინამდებარისაებრ აღმოჩინებისა საქმეთასა, ამისათვის მეცა აღსრულებულსა თანამდებობითსა ვალსა შინა გებული, ერთგულეებასა ზედა მათის იმპერატორების დიდებულეების ყოვლად უაღუსტოეს მონარხის, ყოვლად უმომწყალებსის ხელმწიფისასა და შემწირველი დაუზოგველად სისხლისა ჩემისა ვიდრე უკანასკნელს წვეთამდე, წარმოვადგენ ქვემორე შედგენილთა მოხსენებათა".

ეს მოხსენება რომ იწერებოდა, სულ რაღაც 15 წელიწადი იყო გასული კნორრინგის ჩამოსვლის შემდეგ საქართველოში და როგორც ჰხედავთ რუსულმა ენამ უკვე თვისი ძლიერი გავლენა იქონია ქართველ გონება-აზროვნობაზე და

117) არქიმანდრიტ ელევთერის მოხსენება დროებით გვათხოვა ისტორიაში ღრმად ჩახედულმა მღ. პ. კარბელაშვილმა, რისთვისაც მადლობას ვსწირავთ, თუმცა არ საკიროებს ასეთს მადლობას.

ენაზე. წინაღ თუ ქართველი ამაყობდა - სისხლი დავღვარე სამშობლოს ხაკეთილდღეოდ, მტერს მედგრად ვებრძოლე და ჩემიანებზე არ გავახარეო, ახლა სულ სხვა ჰანგი გამეფდა. სახელად და ჯილდოს მისაღებად კარის ეკლესიის მოძღვარი თამამად გაიძახის "დაუზოგველად შევსწირე მონარხის ერთგულებასა სისხლი ჩემი ვიდრე უქანასკნელს წვეთამდეო", რომელიც პირდაპირი თარგმანია რუსულისა "до послѣдних капли крови".

"დროსა განსვენებულის კნიაზ ციციანოვისა, განაგრძობს არქიმანდრიტი ელევთერ (მუხლი პირველი), უძლეველის მხედრობით ერევანს წასვლისასა¹¹⁸), აღირივა მთები, არაგვი და ფშავ-ხევსურეთი და მას ჟამსა მართვიდა წესითა ღუბერნატორობისათა კნიაზ ვოლზონცკი (ვოლკონსკი). ამას ვოლზონცკის მოეწერა ჩემთვის ესრეთ, კნიაზ ალექსანდრე მაყავეს და კნიაზ დავით ქობულოვს,¹¹⁹) გაჰყევ შესაწევნელად მას ზედა რაიცა საქმე მათთვის მიგვიწვდია და ამის სამსახურისათვის არა დაგაგდებ მე წარუდგენელსა, ღირსებისამებრ სამსახურისა, და ელოდეთა კმასა ჯილდოსაო. მე მოწერილისამებრ ღუბერნატორისა გავჰყევ ხსენებულთა თავადთა შესაწევნელად, და ავედით რა თიანეთის სოფელს და დავიბარეთ ფშავ-ხევსურთა უფროსნი კაცნი და ჩამოვაყვანინეთ და დაუდევით მათ ჩვენის მხრით საქმენი, და ამით აღრეულება იგი მათი დავამშვიდეთ და ბუნტიცა იგი მათი დავაცხრეთ. მის საქმისა აღსრულებისა მიზეზითა დავჰყავ მუნ თვე ერთი და ამას განგრძელებულსა ხანსა მყოფი კინალამ მომკლეს დამშვიდებად, და ესე რომელ ვაცნობეთ ღუბერნატორსა, (კვალადცა) გაემეორებინა ჩემთანა მოწერა, ამა შენსა ერთგულსა სამსახურსა ხელმწიფეს წარავუდგენო".

118) იხ. "მთიულეთი 1804 წ." ციციშვილის გალაშქრება ერევანს მეტად ცუდად დასრულდა. ერევანი ვერ აიღეს და ჯამი სირცხვილ ნაქამი ტფილისის დაბრუნდა. დამონებული აზრი ელევთერისა შექანიკურად, თუთიყუშსავით იმეორებს — უძლეველ ქარო.

119) ჩვენი გვარების დამახინჯებაც იქვე თავშივე დაიწყო ჩვენისავე ხელშეწყობით. გადაგვარების გზას ჩვენვე ვკაფავდით.

როგორც ჰხედავთ, მოხსენების პირველი მუხლი ისეა დაწერილი, როგორც ეხლა სწერენ ბიუროკრატ-მოხელენი თხოვნებს ჯილდოსა და საჩუქრის მისაღებად. "ხალხი აღირ-
ვიაო", "დავაწყნარეთ", "დავამშვიდეთო", "კინალამ მომკლ-
ესო", "ბუნტიო" და მრავალი ამისთანა საშინელი სიტყვანი,
რომ თხოვნამ "ქვა გახეთქოს" და სისხლის ჯვარი გამოვიდეს,
ან სხვა რაიმე წყალობა. არქიმანდრიტი ელევთერ გონებისა
და აზრის მომჭადოვებელ პეტერბურგსაც თვალს არ აშორებს.

"შემდგომად ამისა, მოახსენებს არქიმანდრიტი ელევთერ
სინოდის კანტორას, მეფის ძე ფარნაოზ მოვიდა კახეთს¹²⁰⁾ და
გაპყენენ კახთავე თავადები და შევიდნენ მთიულეთს, და ამა
მიზეზისა აღრევისა გამოცა მოეწერა მასვე ლუბერნატორს
ვოლხონცკის, ეცადე რომელ მანდ დანარჩომთა ხალხთა შორის
სხვა აღრეულობა არღარა მოხდეს-რა, და შეაგონეცა აღურ-
ველობა და დამშვიდება. მეცა ბრძანებულისაებრ სოფლითი
სოფლად ვვლე კახეთსა შინა, და ესრეთითა გულსმოღვინებ-
ითა ერთგულებითა მივეც ხალხი დაწყნარებასა, რომლისაცა
წერილები მომთხოვა მე მათმან აღმატებულებამან ღენერალ-
მაიორმან ახვერდოვმან¹²¹⁾ თვისსა ლუბერნატორობისა დროსა
და მოთხოვნისა ამის გამო წარმოვუდგინე მას იგი ვოლხონ-
ცკის მოწერილნი, რომელიც თვით მან ღენერალმან ახვერდ-
ოვმან მიიღო და იცისცა ჰეშმარიტება". (მუხლი მეორე).

"ამავე ღენერალ-მაიორის ახვერდოვის ლუბერნატორო-
ბის შინა, მქონდა მე ამის მიერ დარწმუნებული საქმენი,
პირდაპირ მოწერილითა მისითა, კახეთისა, და სადა რომელიცა
რა მომხდარ იყო, წინააღმდეგი ხელმწიფისა და მართველობ-
ისა, მეცნობებინა, და ვპყავიცა ყოველთვის, რომელ რაიცა
შეეხებოდა ჰეშმარიტსა ერთგულებასა ჩემსა, განმართვისა-
თვის მამულისა, წარმოვუდგენდი და ვეცადიცა ამისთანა

120) ფარნაოზის თავგადასავალი ნაამბობია "მთიულეთში 1804 წ.", კარი X, გვ. 246 -
286.

121) ზემოდ მოხსენებული ქრცხინვალელი სომეხი პუბლიცისტი. ქართლის
გუბერნატორად ნამყოფი.

ხალხის მრავალჯერ დამშვიდებასა, რომლისაცა სამსახურისათვის აღმეთქო მე მის მიერ წარდგენა წინაშე უმალღესისა კარისადა". (მუხლი მესამე).

ერთი კარგად დამიხედეთ, რითი მოაქვს თავი მეფე ერეკლეს კარის ეკლესიის არქიმანდრიტ ელევთერსა! გენერალ ახვერდოვს შპიონობა და ჯაშუშობა დაუვალებია, კახეთსა და ყველგან, სადაც-კი რამე მოხდეს ხელმწიფისა და მთავრობის წინააღმდეგი, შემატყობინე ხოლმეო. არ უთაკილნია სამარცხვინო ხელობა, პირნათლად აუსრულებია დავალებული საქმე, უბეზღებია სამშობლო ქვეყანა და იმის მაგიერ რომ დაემალა სათაკილო ხელობა, საჯაროდ გამოდის და ხმა მალლა დაღადებს - ესა და ეს ჩავიდინე "განმართვისათვის მამულისა" და სთხოვს უწმიდესის სინოდის კანტორას - რადგან ენატანიობისათვის ლენერალი დამპირდა - წარგადგენ "წინაშე უმალღესის კარისა" და არკი წარმადგინაო, ახლა თქვენ იცით და თქვენმა სინდისმაო. ესე გამოდის რალა! მარჯვე ენატანიას, საუბედუროდ, უბრალო რამ დავიწყებია - მურღალი ენის პატრონს კაცად არავინ აგდებს, ნასუფრალს გაღუყურიან, მორჩა და გათავდა. აკი კანტორასთან სახვეწურად გაუხდა საქმე ენამეტყველ ბერსა.

შემდეგი, მეოთხე მუხლი მოხსენებისა, უარესია. კარის ეკლესიის არქიმანდრიტს ისეთი საქმეები ჩაუღენია, ღღეს რომ ცოცხალი ყოფილიყო, სისხლის სამართლის წესით გაასამართლებდნენ და კატორღაში უკრავდნენ თავსა. აი თქვენის ყურით მოისმინეთ, რას მოახსენებს კანტორას მთავარ-მართველთა გულმავიწყობით დაუჭილდოვებელი ელევთერი. "ოღეს შემოვიდოდა დრო კახეთსა შინა პურის დაფასებისაი და კამენდანტი და ისპრავნიკი მუნებურნი დამისწრებდიან მეცა დაფასებისათვის პურისა და დააფასებდნენ კოდს ექვსს აბაზად, მაშინ სარგებლობისათვის ხაზინისა, მე დააფასებდი ხუთს აბაზად და მაშინვე ჩემის მხრით მივსცემდი ორი ათას კოდს, ანუ ათას ხუთას კოდს, და ოღესმე ათასს კოდს, შეხვედრისაებრ მოსავლისა და შემდგომად ყოველი ხალხი მისცემდა ესეთ,

ვინაიდან, მაგალითად დაეღებოდათ ერთგული ჩვენება ჩემ მიერისა გულს მოდგინებისა.”

რა სანატრელი "სამებაა" და სვაგი "კაპიტან-ისპრავნიკი", კანონის შემლახველი კამენდანტი და სულის მოძღვარი არქიმანდრიტი იკრიბებიან ერთად და ბჭობენ - რა მოაგვარონ, რა მოიგონონ, რომ ფასები დასცენ და იათად იყიდონ პური. ხალხი შიმშილით იხოცება, კოდი პური ბაზარში ოთხი-ხუთი მანათია, დამშეული ერი ცოლშვილს აგირავებს, ან ჰყიდის; თავს ბალახ-ბულახით ირჩენს და ამ დროს ქართველი კაცი, ერის სულიერი მოძღვარი, ხელს უწყობს კაპიტან-ისპრავნიკსა და კამენდანტს გალატაკებულ სამწყსოს გაფცქვნაში, მონაწილეობას იღებს ჯოჯოხეთურ საბჭოში და პირველობას თვითონ კადრულობს. დიად, ტყუილად არ დაუძახეთ ზემოდ არქიმანდრიტს ელევთერს სულწაწყმედილი მოძღვარი.

XVI

23 თებერვალს 1812 წ. მარკიზი პაულუჩჩი კახეთისაკენ დაიძრა. სოფ. ხაშმში აპირებდა ასვლას, პოლკოვნიკ ტიხანოვსკის მამველ ბატალიონით მოლონიერებულ რაზმს ჩაიბარებდა და ამ სოფლიდან შეუტევდა გათამამებულ მტერსა. მთავარ-მართებელი ისე ჩქარობდა ამბოხების რაიონში ასვლას, რომ საიმედო ამაღაზე არც-კი უფიქრია, თან იახლა მხოლოდ 40 დრაგუნი და 40 ყაზახი.

სწორედ ბედი სწყალობდა იტალიელ სარდალს, მარკიზად წოდებულს, როგორც ეძახის დავით ბატონიშვილი.

ჟამსა მის მთავარ-მართებლობისასა საქართველოს მეზობლად მყოფი მტერი ახალციხელი შერიფ-ფაშა და კარელი (Карский) აბდულა-ფაშა თითქოს განგებ ტანში მოიშალნენ, მოდუნდნენ და სულითა და ხორციით მოეშვნენ. ძალიან იყვნენ მოწადინებულნი ლაზათიანად შეეხურებიანთ მარკიზი და ვერაფერი კი ვერ დააკლეს. სულ რაღაც ორი თვის წინად

7-8 დეკემბერს 1811 წ. მარკიზმა პოლკოვნიკ კატლიარევსკის უფროსობით წაართვა შერიფ-ფაშას ახალქალაქის ციხე და შიგ რუსის მეციხოვნენი ჩააყენა. მარჯვენა რომ მოეკვეთათ შერიფ-ფაშისთვის, ის ერჩივნა, ვიდრე ამ ციხის დაკარგვა და იმის ფიქრსა და ზრუნვაში იყო, როგორმე დრო ეხელთა და ახალქალაქი უკან დაებრუნებინა.

მოსიყვარულე თვალთ პაულუჩჩის არც კარელი ფაშა აბდულა უყურებდა. საქმე ისაა, რომ აბდულას სულთამხუთავივით აეტუნა მაგიზ-ბერდის ბატონი ყარა-ბეგი.¹²²⁾ მარკიზი შეუჩნდა ჩრჩილივით ყარა-ბეგს, რაკი აბდულას დასუსტება სწაღდა და ყურში სულ იმას ჩაჰკაკანებდა, თუ შეუტევე აბდულას, ჯარს მოგაშველებო. პოლიტიკა-დიპლომატიას მოკლებულ ყარა-ბეგსაც მეტი არა უნდოდა-რა. აბდულას საფაშოდან გადავადგებ და მარკიზის დახმარებით და ლოცვა-კურთხევით კარელ ფაშობას გავიკრამო. მაშინდელი ბრწყინვალე პორტაც ხომ ფაშობას იმას აძლევდა, ვისაც მხარ-ბეჭზე ძლიერი მკლავი ება. ამის გამო ყარა-ბეგი სულ მუშტზე იყურებოდა, წვიპურტებს ესროდა აბდულას, ხან საქონელს მოსტაცებდა და ხან შიგ საფაშოში მიუხტებოდა ხოლმე.

ასეთი იყო პოლიტიკური ვითარება მაგიზ-ბერდისა და ახალციხისა, კახეთის შეამბოხეთა დეპუტაცია რომ ეწვია შერიფ-ფაშას. მოციქულებმა მოახსენეს ფაშას:¹²³⁾ თუ მარკიზის ჯავრის ამოყრა გინდა, დრო სწორედ ეხლათ. მთელი ქართლ-კახეთი აჯანყდა, მარკიზი ყარაბაღშია, შეუტევე რუსობას თრიალეთიდანაო. ჰკუაში დაუჯდა შერიფ-ფაშას მოციქულთა რჩევა და 21 თებერვალს, სწორედ იმ დღეს, რა დღესაც მარკიზი ტფილისს ჩამოვიდა ყარაბაღიდან, თავს დაეცა ახალქალაქში დაბანაკებულ რუსის მეციხოვნეთ. მცირე

122) მაშინ მაგიზ-ბერდი მდებარეობდა სპარსეთისა და ოსმალეთის სამზღვრებ შუა. ერთი კუთხით საქართველოსაც ემზრობოდა, რადგან შურაგელი, ნაწილი იმ დროისდელ საქართველოსა, რუსეთს ეჭირა. მაგიზ-ბერდი პურით იყო მდიდარი, მოსაყალი უხვი იყო. შიმშილობის დროს კახეთში აქედან მოჰქონდათ ხორბალი. ბაბბაკში (რუს. *Баббаки*; დევით ფაბაკ ესანის) დაბინავებული რუსის ჯარი მაგაზ-ბერდის პურით იკვებებოდა. იხ. *Акта*, ტ. V, გვ. 57, 191, 192.

123) აქტები არას გვეუბნება, სამოციქულოდ ვინ გავზავნეს კახელებმა შარიფსთან.

იყო მეციხოვნეთა რიცხვი, მაგრამ მაინც უკუაგდეს შერიფას ჯარი. დამარცხებული ფაშა ჩამოვიდა ხერთვისს, დაასვენა ჯარი და ხელმეორედ აპირებდა ახალქალაქზე გალაშქრებას, მაგრამ რაკი აბდულა-ფაშის დამარცხების ამბავი მოუვიდა, თავი მიანება ახალქალაქს და ახალციხეს დაბრუნდა.

მომინებლად გამოსული აბდულა-ფაშაც დროს ელოდა, რომ კისერი მოეგრიხა საქართველოს მთავარმართებლის მეგობარ ყარა-ბეგისათვის. უკეთეს დროს ვერ იშოვნო და 1000 საუკეთესო ჯარის-კაცი შეუსია ყარა-ბეგის მამულსა. ყარა-ბეგმა რუსებს აცნობა, აბდულა გალახვას მიპირებსო. ტფილისის პოლკის მაიორ თავად სავარსამიძეს გაატანეს გუმბრიდან 200 ჯარის-კაცი, 70 ყაზახი, 40 გუმბრელი მილიციონერი თათარი და უბრძანეს ყარა-ბეგს დაეხმარეო. ფიცხლავ დაიდრა თავადი სავარსამიძე¹²⁴), შეუერთდა ყარა-ბეგის ცხენოსან ამაღას და სოფ. პერტიშთან ეკვეთა აბდულას რჩეულ ჯარსა. გაბედულად და თამამად დაჰკრა სავარსამიძემ მტერსა, უკანასკნელი დაიბნა, წინააღმდეგობა ვეღარ მოახერხა და გაიქცა. გამარჯვებულთ ღიდ-ძალი დავლა იშოვნეს, თოფ-იარაღი, სამი ბაირაღი, 300 ცხენი და სამიცი დაფი. თ. სავარსამიძეს მოუკლეს 8 ჯარის-კაცი და დაუჭრეს 31. თვით თავადი სავარსამიძე დაიჭრა ბრძოლაში.

ახალქალაქის მეციხოვნეთა სიმტკიცემ და თ. სავარსამიძის გამბედავობამ (რუს. Смелость) დიდი სამსახური გაუწია მარკიზ პაულუჩჩის. ოსმაღეთის სამზღვარზე რომ დიდი საქმე გასჩენოდა, შერიფასა და აბდულას დამბლა ნაკრავივით რომ არ ებრძოლათ, ვინ გაითვალისწინებს, რა დაემართებოდა კეთილშობილ მარკიზსა.

ბედი სწყალობდაო, რომ მოგახსენეთ, მარკიზსა, სრული ჭეშმარიტებაა. მთაში გაბრიელ ყაზბეგი იღვწოდა და მუშაობდა შეურყევლად ვითარცა სალი კლდე; ყარსისაკენ თ. სავარსამიძე მენივით თავს დაეცა აბდულა-ფაშას და დაამარცხა. შინ კიდე, შიგ შუაგულ კახეთში, არქიმანდრიტი ელ-

124) სავარსამიძიანთ გვარი, ვგონებთ, სრულიად ამოვარდა.

ევთერ, აღტყინებული "მამულის გამართვისათვის" ერთგულად უზიდავდა ამბებს უფროსებს.

მაშ დაუბრუნდეთ ხაშმზე ასულს ქუდბედიან მარკიზს და მივყვით კვალ-და-კვალ აჯანყების ჩასაქრობად ამხედრებულს ლაშქარსა.

მოწყვეტილი სიტყვა შემომითვალეთო, მისწერა პაულუჩიმ ხაშმიდან მემამბოხეებს. მოციქულებად გაუგზავნა არქიელი და რამდენიმე თავადიშვილი. ორი საათის შემდეგ პასუხს გაახლებთო, მაგრამ ორი საათი კი არა, მთელი 25 თებერვალი დაილია და არავითარი პასუხი არ მოვიდა. უნაყოფო დიპლომატიური მიწერ-მოწერა დასრულდა, არქიმანდრიტ-არქიელების მიგზავნ-მოგზავნა პატრიოტურთ გათავდა. ბოლო მოელო აგრედვე "რუსთა კერძოს" მჭერელ თავადთა რაშთა ჭენებას ერთის ბანაკიდან მეორე ბანაკამდინ. იარაღს უნდა გადაეწყვიტა სადავო საქმე - ან თავისუფალი საქართველო, ან კაპიტან-ისპრავნიკების ბატონობა.

მარკიზი ბრძოლის თადარიგს შეუდგა და ყველაფერი რომ გაამზადა, დააპირა თავს დასცემოდა მტერსა დილით, 26 თებერვალს.

სოფელი ხაშმი გაშლილია ივრის ხეობაზე, ტფილისიდან 37 ვერსზე, ქებულია საუკეთესო ვენახებით და მოშხამულ-მოწამლული ჰავით. ექვსი ვერსის მანძილზე ხაშმიდან მდებარეობს მონასტერი სამება, განთქმული ისტორიაში. ვახუშტის სიტყვით, სამებას ეკუთვნოდა გარეჯის უდაბნო. ვის არ ეხსომება ტანჯვა-მღვლეზარებით სავსე ცხოვრება უკანასკნელ სამებელის მღვდელ-მთავარ იოსებისა, რომელმაც დღენი თვისი რუსეთს დალია. 1734 წ. იმპერატორიკა ანნა იოანნეს ბრძანებით იოსებ სამებელი დაინიშნა ნოვგოროდელ ეპისკოპოზ თეოფანეს მოადგილედ.

სამების ტაძარი უგუმბათოა. დ. ზ. ბაქრაძის დროს სამების ტაძარი დაურღვეველი ყოფილა, ჰქონია გალავანი და მინგრეულ-მონგრეული შენობანი. მონასტერი გაუქმებულა მეთვრამეტე საუკუნის მეორე ნახევარში, რადგან ლეკებმა

მოსვენება აღარ მისცეს და ბოლოს მოინელეს კიდევ სამეზ-
ვლთა ტახტი.¹²⁵⁾

აი სწორედ ამ ჭირნახულ და დაღესტნელ ლეკთა მიერ
აოხრებულ სამებას შეეფარნენ კახელი მეამბოხენი, მის
წმინდა კედელთა შორის დასდეს ბანაკი და ელოდნენ დიდი
ნაპოლეონის შეგირდსა. რამდენი შეიკრიბა სამებასთან კახ-
ელობა, დანამდვილებით არ ვიცით. ალბად, შეშინება თუ
უნდოდათ რუსებისა და ხმა დაჰყარეს, - ექვსი ათასი ვართო,
მაგრამ მარკიზმა არ დაიჯერა, ექვსი ათასზე გაცილებით
ნაკლები იქნებოდნენო.

დილა ადრიან 26 თებერვალს მარკიზი გაემართა სამეზ-
ისაკენ 600 ჯარის კაცით და 2 ზარბაზნით. წინ გაისტუმრა
პოლკოვნიკი ტიხანოვსკი, რომელიც დაეცა მეამბოხეთა ყარა-
ულს და დაამარცხა. მართალია, დიდად გვიშლიდა ხელსა
დაბურული ტყე, საძაგელი ამინდი და ხევ-ხუვეებიო, მოახსე-
ნებს პაულუჩჩი იმპერატორს, მაგრამ ჩვენ ჩვენი გავიტანეთ,
იერიშით მიველეთ თვით მეამბოხეთა ბუნაგზე, მივლევ-მოვ-
ლევით იგი და დამარცხებული მტერი წინ გავილაღეთ მთებსა
და ხეებში. თითქმის სამის ვერსის მანძილზეო. კახელებს
მოვუკალით 40 კაცი და ორი ტყვედ ავიყვანეთო. რაკი
მივფანტ-მოვფანტე ეს უღირსი მაშფოთარნი, ძრწოლა-
შიშისა და მაგალითისათვის ბრძანება გავეცი, რომ ტყვედ
აყვანილნი იქვე ბრძოლის ველზე ჩამოედრონოთ. ამ სისასტიკე-
ეს მარკიზი იმითი ამართლებს, რომ ტყვედ ჩავარდნილებს,
დატყვევების ყამს, იარალი ესხათო.¹²⁶⁾ ეს რა საბაბია, ვერ
გავიგეთ. საომრად წასულ კაცს იარალის მაგიერ მაშ ია-ვარლის
თაიგული უნდა სჭირებოდა ხელში?

სამების მონასტრიდან მარკიზი ს. პატარძელს ჩავიდა.
აქ ეახლა არქიმანდრიტი ელევეთერ, რომელიც მთავარ-მარ-
თებელს გაეგზავნა ს. საგარეჯოს იქაურების "მოსარჯულებლ-
ად". ვინაიდან არქიმანდრიტმა საგარეჯოელები ვერ დაიყოლია

125) იხ. АКТЫ, ტ. V, გვ. 1074. დ. ბაქრაძის თხზულება.

126) Ibid. ტ. V, გვ. 77.

და გრძნობა ერთგულობისა მონარქისადმი ვერ გაუღვივა გულში, მარკიზმა გადასწყვიტა თვითონ წასულიყო ჯარით საგარეჯოს 27 თებერვალს და მუხანათებისთვის იარაღით ჰქუა ესწავლებინა.

პირველი გამარჯვება სამების მონასტერთან იაფად დაუჯდა მარკიზსა. მოუკლეს მხოლოდ ყაზახთა პოლკის კამანდირი მაიორი დანილოვი და 6 ჯარის კაცი.

სამეხასთან ომი და ბრძოლა ისე ავსწერეთ, როგორც მთავარ-მართებელი მოახსენებს უქვეშევრდომილესად ხელმწიფე იმპერატორსა. რადგან თავისი თავის მტერი არავენაა, სამხედრო კაცინც გარდახდილ ომთა ამბავთა დიდად აზვიადებენ. ვინ არ იცის, რა ღირსებისანი არიან ბრძოლის ველიდან გამოგზავნილი რელიაციები სხვა წყარო არა გვაქვს მარკიზის ნათქვამის შესამოწმებლად და ვართ აგერ ერთ გაჭირვებაში. ბატონიშვილი დავით სრულიად არ იხსენიებს სამეხასთან ბრძოლას. ალბად არ ყოფილა, თორემ როგორ გამოეპარებოდა პირველი შეტაკება ყარაბაღიდან დაბრუნებულის მთავარ-მართებლისა მუამბოხე კახელებთან? მარკიზის გამარჯვების არ მცოდნე ისტორიკოსი ისეთ ამბავს გვიამბობს, რომ სწორედ დაუჭერებელია. აი თვით მეფის ძის სიტყვანი: "მაშინ მარკიზი მოსრულიყო ტფილისის ბაქუით. ჰსცნა რა ესე, მოიკრიფნა ყოველსა ადგილსა რუსნი, წარემართა და მივიდა ხაშმსა, შეესივა ხაშმსა და მოასვრევიდა უბრალონი ქრისტიანენი მარკიზმან ვიდრე ასამდე ჩჩვილითურთ მსგავსად იროდისა და მუნ მოკლეს ხიშტითა მონაზონი აბაშიძის ასული მარიამ, დედიდაშვილი მეფისა ირაკლისა, ოთხმეოცდა ათისა წლისა დედაკაცი. ჰსცნეს რა კახთა, სამეხას მყოფთა, ძალის მორთვა (შემატება) მარკიზისა, გარდვიდნენ მთასა და მიიქცნენ თავისადვე და მარკიზი მივიდა პატარძელს".¹²⁷⁾

საკვირველი და საოცარი ამბავია. შემატიანე ხსენებით კი ახსენებს სამეხას, მაგრამ ომზე არას ამბობს. 80 წლის ბებერ მონაზონის ხიშტით გაპობა, ან "ჩჩვილთა" ცხენის

ქუსლით გასრესა ომად როგორ მოეჩვენა ჯერ ისევ ევროპაში ბრძოლის ველზე სარდლობით სახელმორაქმულ მარკიზ პაულუჩჩის!

შეშინდა საგარეჯო და მარკიზს თავი დაუკრა. ეტყობა ხაშმელების აკლება-აწიოკება ელევთერის მჭერმეტყველებაზე ძლიერი ყოფილა. სული ტკბილია, მოგეხსენებათ, და საგარეჯომაც წუთიერი ბედნიერება არჩია ამ უამად ვაჟკაცურად მტრის დახვედრას. საგარეჯოს რომ შევიდა პაულუჩჩი, მემბოხენი იქ აღარ დახვდნენ, დაეტოვებინათ გატეხილი სოფელი და სხვაგან წასულიყვნენ. საგარეჯოს მალე სხვა სოფლებმაც წაჰბაძა, მაგალითად კაკაბეთმა, კანდაურმა და მანავმა. ამ ადგილ-მდებარეობის თავადებმაც ქელი მოიხარეს და ერთგულობის ფიცი მიიღეს, მაგალითად: ჩერქეზიანთ, მაყაანთ და ყარალაშვილმა.

27 თებერვალს მარკიზი კაკაბეთს ჩავიდა. აქ მოეგება წინ პოლპოლკოვნიკი სტეფანოვი. ყარა-ალაჯის ციხეში სურსათი გამოჰკლეოდა და შიმშილით სიკვდილს ციხიდან გამოსვლა ამჯობინა. მთელი სამი დღე იგერია კახელი მემბოხენი და ბოლოს მშვიდობით კაკაბეთს მიაღწია, სადაც მარკიზს შეუერთდა. ზარალი მცირე მოსვლოდა სტეფანოვს. რადგან სტეფანოვის მხედრობა ძალზე იყო გალახული ცალკე უსურსათობით და ცალკე სამი დღის ლაშქრობით, მარკიზმა საგარეჯოში დასტოვა იგინი და თვითონ სოფ. მალაროსაკენ გაემართა.

რამდენამე დღის წინად, ვიდრე სტეფანოვი ყარა-ალაჯის ციხეს მიატოვებდა და ტფილისისაკენ წამოვიდოდა, 400 ჯარის კაცით და ერთი ზარბაზნით გაგზავნა მაიორი ორბელიანი მემბოხეებთან, ციხეს რომ გარს ერტყნენ. ორბელიანს დააბარა, ეცადე, ეგები როგორმე დაიყოლიო აჯანყებულნი, ხელი აიღონ ბუნტობაზე და სახლში დაბრუნდნენო. ბუნტის კაცებმა არ მოისურვეს ლაპარაკი და დაუშინეს თოფ-ზარბაზანი. ეწყინა ორბელიანს ასეთი თავხედობა, ეკვეთა მემბოხეთ, განდევნა სიმაგრიდან, გაფანტა და წაართვა ის ერთად ერთი ზარბაზანი, რომლის რიგიანი ხმარება შეიძლება არც კი

იცოდნენ. ორბელიანის გამარჯვების შემდეგ სტეფანოვმა მშვიდობით დააღწია თავი ყარა-ალაქს და კაკაბეთში მარკიზს შეუერთდა.

ასე კარგად წავიდა მარკიზ პაულუჩჩის საქმე თავშივე. ერთი რამ აფიქრებდა მთავარ-მართებელს. ენატანიებმა შეატყობინეს, კახელები იმასა სცდილობენ, როგორმე ერთი თვე გაუძლონ რუსებსა და მერე ფიქრი აღარა აქვთო. მარტში გზები გაიხსნება და ყიზილბაშთა მხედრობა დაიძვრის არაქსიდან შაჰ-ზადას და ბატონიშვილ ალექსანდრეს მეთაურობითო. რაკი ესენი გაჩნდებიან საქართველოს სამზღვრებზე, მაშინვე მთელი საქართველო იარაღს აისხამს და რუსობას შეებრძოლებათო.

დარდასა და სევდას ის თუ გაუქარვებდა ამ ამბით შეწუხებულ მარკიზსა, რომ იმერეთიდან გენერალ-მაიორ სიმონოვიჩმა ყაბარდოს პოლკის ერთი ბატალიონი გამოუგზავნა საშველად. პაულუჩჩი მალაროს რომ მივიდა, ყაბარდოს პოლკის ბატალიონი ქართლის სამზღვარს უახლოვდებოდა.

მეამბოხეთა ადვილად დასამარცხებლად რიგიანი სამხედრო გეგმა შეიმუშავა პაულუჩჩიმ. უმთავრესი მხედრობით თვითონ სიღნაღის გზას დაადგა, ჭერ ქიზიყელებს გაუსწორდებოდა, დააწყნარებდა, ერთგულობის ფიცს მიაღებინებდა და აქედან ველისციხით თელავს ავიდოდა იქ გამომწყვდეულ რუსობის დასახსნელად. გომბორზე რომ წასულიყო, ათასი ხიფათი მოელოდა. უღრან ტყე-ტყე სიარული და მერე შუა გულ ზამთარს ადვილი არ იყო ქვეითა ჯარით. ვინ იცის სად ჩაუსაფრდებოდნენ მეამბოხენი და ეგები სავსებითაც გაეჟლიტათ მცირე რაზმი რუსის სარდლისა და თვით პაულუჩჩიც ტყვედ წაეყვანათ. განგებას ეს რომ ენებებინა, სამუდამოდ ჩაიფუშებოდა რუსების საქმე საქართველოსა და ამიერ-კავკასიაში. რაღა თქმა უნდა, რომ ბოლო მოეღებოდა იმ პოლიტიკასაც, რომელსაც სახელად აღმოსავლეთ აზიის პოლიტიკა ჰქვია და რომელმაც რუსეთის იმპერიის ცხოვრებაში ამჟამად სათვალსაჩინო ადვილი დაიჭირა. ქიზიყში შესვლას ის უპირატესობა ჰქონდა კიდევ, რომ მეამბოხე

რაიონს მარკიზი მოსწყვეტდა სამაჰმადიანო სახანოებს, გზას მოუჭრიდა შიკრიკ-მოციქულებს და დიდად გაუძნელებდა კახეთში შემოსევას აბას-მირზას და ბატონიშვილ ალექსანდრეს, გაზაფხულის დადგომას რომ ელოდნენ.

თვითონ რომ ქიზიყის გზას დაადგა, პოდპოლკოვნიკ უშაკოვს უბრძანა პაულუჩჩიმ, რაკი ანანურელები და არაგველები დაამარცხე და მანდაურები დააწყენარე, რაკი საქართველოს სამხედრო გზა გაიხსნა გაბრიელ ყაზბეგის შემწეობით, რაკი მანდ გადმოსულ კახთა მაშფოთართ საშაბუროსთან ჰკუა ასწავლე და ქართლი მეამბოხებმა ვერ აიყოლიესო, მანდედან აიყარე, თიანეთზე წამოდი, გზა-გზა მტერი შემუსრე და თელავს ჩამოდი, სადაც მე ქვემოდან მოვდივარო. ამ გვარად პაულუჩჩი და უშაკოვი შუაში მოიმწყვდევენ კახელებს, რკალივით გარს შემოეხვეოდნენ, და ან უნდა დამორჩილებოდნენ მთავარ-მართებელს, ან გადახვეწილიყვნენ დაღესტანს.

გეგმის სისრულეში მოყვანას ხელს უწყობდნენ ნიჟიერი სარდალნი პოლკოვნიკი ტიხანოვსკი და პოდპოლკოვნიკი უშაკოვი. უკანასკნელს შესამჩნევად ეხმარებოდა გენერალ-მაიორი თავადი კოსტანტინე მუხრან-ბატონი, ხოლო რა ნაირად იტანდა გენერალი პოდპოლკოვნიკის უფროსობას, სწორედ ვერ გაგვიგია. ასეთი ხელქვეითობა პირდაპირ ეწინააღმდეგება სამხედრო წესსა და დებულებას. გამოდის, რომ ჩვენი წინაპარნი მაშინდელ სამსახურში თავმოყვარეობაზედაც ხელს იღებდნენ.

მალაროსაკენ მიმავალ პაულუჩჩის მოახსენეს, რომ სოფ. ქოდალოს პატარა ციხისათვის თავი შეუფარებია რუსის ჯარის-კაცებსა და თუ მალე არ უშველეთ, შიმშილით გასწყვდებიანო. ქოდალოს ციხეში დამალულიყო 80 ჯარის-კაცი. პირველად ამბოხებამ რომ იფეთქა და გაბრაზებული ხალხი საეგზეკუციო კამანდებს მიესია, პურის მოსაკრეფად რომ იყვნენ დაგზავნილნი,¹²⁸⁾ სხვა და სხვა სოფლებიდან აქ

მოიყარა თავი კამანდების ნაშთმა, ციხე ძალით დაიჭირეს და ვაი-ვაგლახით მოეწყვენენ. მთელი 23 დღე გაუძღეს უბედურებმა მემამბოხეთა იერიშებს. სასმელად წყალი რომ არა ჰქონდათ, თოვლს ადნობდნენ და იმასა სვამდნენ. ბელი იმათი, რომ ციხეში მომწყვდეულთა გასანთავისუფლებლად მთავარ-მართებელმა გაგზავნა ტიხანოვსკი ორი როტა ჯარით. მემამბოხენი გაიფანტნენ, ბრძანებს მარკიზი, გაჩნდა თუ არა ციხესთან პოლკოვნიკი ტიხანოვსკიო. თუ ვერწმუნეთ პაულუჩჩის მოწმობას, ქოდალოელებს სწორედ გული გახეთქიათ შიშისაგან. ტიხანოვსკის რაზმს რამდენჯერმე დაუცლია მხოლოდ თოფი, ზარბაზანიც კი არა ჰქონიათ თანა და მარტო თოფის სროლას ისე შეუშინებია მემამბოხენი, რომ გაქცევით უშველიათ თავისათვის. ორი მემამბოხე დაუჭერია ტიხანოვსკის და პაულუჩჩის ბრძანებით იქვე ჩამოუღრჩვია, რა არის მაყურებელი შეშინდეს, გული გაუსკდეს და მთავრობის ურჩობა აღარ გაბედოსო.¹²⁹⁾

29 თებერვალი გახლდა, სოფელ ქოდალოს უბედურობა რომ დაატყდა თავსა. ტყვედ აყვანილების ჩამოღრჩობამ შიშის ზარი დასცა აჯანყებულთ. ამავე 29 თებერვალს პაულუჩჩის ეახლნენ ქიზიყის თავი კაცები (ქევხა-მამასახლისები), ბოდიში მოიხადეს და მორჩილება გამოუცხადეს. მაშასადამე მთელი ქიზიყი და სიღნაღის მაზრა დამორჩილდა რუსის მთავრობას, ქედი მოიხარა პაულუჩჩის წინაშე და მარკიზსაც დაუბრკოლებლივ შეეძლო ზევით, თელავისაკენ წასულიყო. რადგან ხელის შემშლელი აღარაფერი იპოვებოდა, მთავარ-მართებელმა გადასწყვიტა დაუსვენებლივ წასულიყო და მართლაც 1 მარტს თელავისაკენ გაემართა.

29 თებერვალს ქიზიყმა თავი დაუკრა პაულუჩჩის, 27 თებერვალს-კი ახლად არჩეულ ქართლისა და კახეთის მეფე გრიგოლმა იმედით სავსე წერილი გაუგზავნა ქიზიყის თავად-იშვილობას, მოხელეთა და ერსა. მოწიწებით სალამს გიძღვნით, სწერდა გრიგოლი, შაბათ დღეს დიდის ჯარით ხაშმზე

მივდივართ, თქვენი-კი არა ვიცი რა, რას აკეთებთ, ან რასა ჰფიქრობთ. გევედრებით, ნულარ დაახანებთ და თქვენც ხაშმისაკენ წამოდით. ყოველ გარემოებას შეგატყობინებთ წერილის მომტანი ნოშრევანა. დაგვიანება აღარ შეიძლება, რაც შეიძლება მალე დაიძარით და ლეკებიც თან წამოიყვანეთ. ქართლის ამბების გაგება თუ გასურთ, აი რა ხდება იქა. ცხინვალის მხარეს რაც რუსობა იყო, გაყლიტეს, ხილები დაანგრიეს და ყოველი ქართლელი ჩვენს მოლოდინშია. ორთავ ლიახვისპირელნი უკვე შეიკრიბნენ. რუსებს რაც ჯარი ჰყავდათ, ხაშმზე შეაგროვეს, ეს ჯარი რომ ამოუწყვიტოთ, რუსები უჯაროდ დარჩებიან. მაშინ ტფილისი, არაგვი და ქართლი ჩვენს ხელში იქნება. თხოვნა ჩვენი ესაა და ახლა თქვენი ნებაა.

ავად იყო თუ კარგად, 27 თებერვალს პაულუჩჩიმ კაკაბეთს მიაღწია, მაშასადამე, ხაშმი, საგარეჯო, პატარძეული, მანავი უკვე დამორჩილდა მთავრობასა და როგორ მოუვიდა გრიგოლს, რომ ოცდაშვიდისათვის ქიზიყელებს ხაშმში იწვევს, ძნელი გამოსარკვევია. საჭირო იყო წინიდან დახვედრა მარკიზისა და არა ზურგიდან მოქცევა.

პირველ მარტის თარიღით გრიგოლ მეფე ცხარე წერილს უგზავნის ეშიკ-ალაბაშ ნინია ზურაბის ძე ჩოლაყაშვილს. თიანეთიდან მოყოლებული ქუღზე კაცი გამოვიდა, 4000 ჯარი შეიკრიბა ჩემთან. ქუღზე კაცს დაუძახე და შენის ჯარით შემეგებე, თორემ იცოდე, ასე თუ არ მოიქეცი, ჩემსა და ჩემთან შეკრეფილ ჯარის წინაშე მოლალატედ გამოხვალო.

ქართველ თავადიშვილებს არ უყვარდათ წყრომის ბართის მიღება. შემდეგ გამოჩნდება, რომ ნინია ეშიკ-ალაბაშს არ ეპრიანა გრიგოლის ბრძანების კილო და იქნება ესეც იყვეს მიზეზი, რომ ნინიამ ჯარი გრიგოლ მეფეს-კი არ მიაშველა, მარკიზთან წარსდგა და მოახსენა: "გიჩვენო მე გზაი ვაკე, უკეთუ მომცე ნიჭი რამეო".¹³⁰⁾

130) ნიჭი—საჩუქარი. ეშიკ-ალაბაში გენერალ-ადიუტანტია (ჩუბინ). გრიგოლის წერილები იხილე АИМ, ტ. V, გვ. 44.

მზე და მთვარე ისე არ განსხვავდება, როგორც ბატონიშვილ დავითის მატთანე აქტებისაგან. წესსა და რიგსაა მოკლებული მატთანე, ესე იგი სისტემატიურად ვერაა დალაგებული მარკიზ პაულუჩჩის ლაშქრობის ისტორია, ცნობანი მცირეა, მაგრამ რაც არის, დიდად განსხვავდება მთავარ-მართველის უქვეშევრდომილეს მოხსენებიდან. ხაშმიდან მოკიდებული მალარომდე პაულუჩჩის ლაშქრის მსვლელობა, აქტებს თუ სავსებით ენლო კაცი, მოგაგონებთ უბრალო სამხედრო გასეირნებას, ჯარს სავარჯიშოდ რომ გაიყვანებენ ხოლმე, რა არის ჯარის-კაცს მუხლში წყალი არ ჩაუდგესო. დავითის ნათქვამს თუ ყური დაუგდეთ, სულ სხვა სურათი დაგვიდგება თვალწინა. აი მოისმინეთ თვით მისი სიტყვანი: "კაკაბეთით შთავიდა (მარკიზი პაულუჩჩი) ქიზიყს წინამძღვანელობითა ენდრონიკაანთათა. მაშინ ყაფლანცა (ორბელიანი, მაიორი) შეეყარა მხედრობითა თვისითა ლაქბესა ზედან,¹³¹) და თანა წარიყვანა მან ოგინი, ვინაიდან მათ (ენდრონიკაანთ) ეპყრათ კერძო რუსთა (ესე იგი რუსის მომხრენი ყოფილან) და ონანაანთაცა (ვაჩნაძე) ეპყრათ კერძოი რუსთა. ხოლო გლებთა კახელთა ჰსცნეს რა სიცბილი თავადთა, მოწვეეს სახლი სვიმონ ანდრონიკაშვილისა და მოსტყვენეს სახლიცა სოლომონ ანდრონიკაშვილისა. მუნ მოერივნენ ქიზიყელნიცა, უფროსნი კაცნი მუნებურნი და წარვიდა ქიზიყს. მისრულმან ნუკრიანს, მუნ მოაშთო¹³²) ორი კაცი ქიზიყელი, რომელიცა ყარა - დაჯს შეეპყრათ რუსთა. მხილველთა ხალხთა წინამხრისათა, შეშინებულთა, აღიყარნენ და მიმართეს ლეკთა. მხილველი ამისი მარკიზი ფრიად შეშინდა და მსწრაფელ წარუვლინა მოურავი მათი იოსებ ენდრონიკაშვილი, ძე მელქისადეკისა, რათა დაამშვიდოს ხალხი იგი და უკუნაქციოს სახლადვე თვისად, რომელთაცა მისცა პირი მტკიცე უვნებლობისა. მაშინ მისრულმან იოსებ უკუნ

131) ლაქბე მინდორია. მდებარეობს სიღნაღის ახლოს.

132) მოშთობა — გაგულვა; удавить, задуть. სიცბილი — სიგიჟე, სისულელე.

აქცივნა ხალხნი იგი და დაამშვიდა ქიზიყი, ხოლო მარკიზი აღიყარა ქიზიყით და წარვიდა შიგნით კახეთსა".¹³³⁾

პაულუჩჩის, როგორცა სჩანს, დიდი შიში გამოუვლია. ქიზიყელებს ლეკებისთვის უთხოვნიათ შველა, დაგვიხსენით სარდლისაგან, რომელმაც ხალხის შესაშინებლად თოკი და საბელი წაიმძღვარა წინა. ეტყობა, კეთილშობილმა მარკიზმა საღრჩობელა დაიშურა მემამბოხეთათვის, ღირსნი არ არიან ჩამოღრჩობისაო, და როგორც ქეციან ოთხფეხს, თოკს აბმევინებდა და სულსა ჰხუთავდა. ასეთის ტირანობით გონება დაბნეულმა ქიზიყმა ლეკეთისაკენ გაიწია, ჯერ კი ჯავრი იყარა მოლალატე თავადიშვილებზე და სახლ-კარი გადაუწვა.

ზემოდ მოვიხსენიეთ, რომ ბელი სწყალობდა მარკიზსაო. ბედნიერმა ვარსკვლავმა ამ გაჭირვების დროსაც არ უღალატა პაულუჩჩის. ქიზიყელივე მკვიდრი, სიღნაღის მოურავი, იოსებ ანდრონიკაშვილი, მისი სახლის კაცები და სხვანი, რომელთაც "ეპყრათ კერძოი რუსთა", დატრიალდნენ ხალხში, მოიგეს მისი გული დაპირებით - "მისცეს პირი მტკიცე უვნებლობისა" და აყრილი ხალხი დააბრუნეს სახლად თვისად.

დიალ, ბაჯაღლო ოქროდ ეღირებოდა იოსებ ანდრონიკაშვილის ასეთი ნამდვილი სამსახური. ქიზიყის უფროსმა კაცებმა რომ თავი დაუქრეს მარკიზსა, იოსების უნარი და გარჯილობაა. აგრე ადვილად ვერ გამოიცივლიდნენ გულსა გაბორბლებული ქიზიყელები, მოქარგულ ენით რომ არ დატრიალებულიყო მოურავი იოსებ მელქისედეკის ძე ანდრონიკაშვილი.

რაკი ასე მშვიდობით გათავდა ქიზიყის არეულ-დარეული და სახიფათო საქმე, პაულუჩჩი პირველ მარტს თელავს გაემართა. სიღნაღში დასტოვა მაიორი ორბელიანი ყაბარდოს პოლკის ერთი ბატალიონით. სიღნაღის მაზრის სამხედრო უფროსობა ამავე მაიორ ორბელიანს ჩააბარა.

გულდანდობილი გაუდექი გზასაო, იუწყება პაულუჩჩი, რას მოვიფიქრებდი, თუ სოფ. ჩუმლაყთან მტერი წინ გადამ-

ელობებოდა და გზას შემიკრავდაო. ჩუმლაცში კარგა ბლომად შეკრეფილიყენენ მემამბოხენი. ახალი მეფე გრიგოლიც ჩუმლაცის ბანაკში იმყოფებოდა. საყურადღებოა ეს ბრძოლა, რადგან აქ უნდა გადაწყვეტილიყო ბელი ამბოხებისა, აქვე იყო მეფე გრიგოლი, მაგრამ მარკიზი ძუნწობს და ამ საყურადღებო ბრძოლის შესახებ ძალიან ცოტა ცნობებს მოახსენებს იმპერატორ ალექსანდრე პირველსა. სიტყვა-სიტყვით ასე აგვიწერს პაულუჩჩი ბრძოლას: "დავადექი ველის-ციხის გზას. სრულიად მოულოდნელად მემამბოხენი დაეტაკენ ჩუმლაცის პირდაპირ ტყეში რაზმსა. გაბედულად შეუტიეს ჭარსა. აბა, რა მომადიქრებდა, რომ ეს წუწკის-შვილები, რომელთა შორის ერია ძე ბატონიშვილ იოანესი გრიგოლ, ასეთ სითამამესა და გაბედულობას გამოიჩენდნენ.¹³⁴⁾ რაზმის შუბლიდან გასული ფლანკიორები¹³⁵⁾ ეკვეთნენ მემამბოხეებს და კაი ღონიერი ზარალიც მიაყენეს. ამასობაში რაზმი წინ-წინ მიიწევდა ტყეში. საერთო მწუხარება გამოიწვია პოლკოვნიკ თ. ვახტანგ ორბელიანის სიკვდილმა. თავადი ვახტანგი გახლდა უერთგულესი და თავდადებული თქვენის იმპერატორების უდიდებულესობისაო. მოგვიკლეს 5 ჭარის კაცი, დაგვიჭრეს: ჩემი საკუთარი ადიუტანტი თ. ჭავჭავაძე, 3 უნტერ-აფიცერი და 7 ჭარის კაცი.¹³⁶⁾

რადგან შელამდა და ბრძოლის განგრძობა შეუძლებელი იყო, სოფლის სიახლოვეს ბანაკად დავდექი. ველისციხიდან ბანაკში მოვიდნენ თავი კაცები და მორჩილება გამოგვიცხად-

134) რუსულად *мятежники напали на отряд с такою отважностью, каковой ожидать нельзя было от сволочи, между коюю находилась и семья царевича Иоанна Григорьевича*. უგემურად აქვს ნათარგმნი სიტყვა სვოლაც დ. ჩუბინაშვილს, — ავი ადამიანი, არამზადაო. ჩვენ სიტყვა წუწკი ვარჩიეთ.

135) ფლანკიორს იმას ეტყვიან, გვერდიდან რომ იფარავს მიმავალ რაზმს. ფლანკერლია.

136) თ. ალექსანდრე გარსევანის ძე ჭავჭავაძე, ცნობილი პოეტი. პოლკოვნიკი თ. ვახტანგ ორბელიანი მაშაა ცნობილის პოეტ ვახტანგ ორბელიანისა. ბელის მწარე ირონია თუ გნებავთ აქაა. მამანი ხელს უწყობდნენ უიღბლო სამშობლოს თავისუფლების დაკარგვაში, შვილნი-კი თავს დასტირიან დაკარგულს თავისუფლებას.

ეს. ჩუმლაყელები დამე მოსვენებას არ გვაძლევდნენ და თოფებს ესვროდნენ ჩვენ პიკეტებს. არ მინდოდა სოფლის წახდენა, მაგრამ რაკი ჩუმლაყელები ჭიუტობას არ იშლიდნენ, მეორე დღეს დილა ადრიან ვუბრძანე ხერსონის პოლკის ბატალიონს პოლკოვნიკ ტიხანოვსკის უფროსობით იერიშით მისულიყო ჩუმლაყზე. საქმე დასრულდა საათის ერთ ჩარეჭზე. სოფელი დავწვით და გავძარცვეთ. ზარალი თქვენის იმპერატორების უდიდებულესობის ჯარისა მცირეა. დაგვიჭრეს მხოლოდ 4 ჯარის კაცი. მეამბოხეებს მოუკალით 50 კაცზე მეტი და 2 ტყვედ ავიყვანეთ, რომელნიც ჩემის ბრძანებით, სხვისა სამაგალითოდ და შესაშინებლად, ჩამოაღრჩეს. დანარჩენი მეამბოხენი გაიფანტნენ; მიმალვა მოახერხა აგრედვე ბატონიშვილმა გრიგოლმა"ო.¹³⁷⁾

უთვის ტომო მოხელე, დაბალი წოდების კაცი, ხეპრე და გაუნათლებელი როცა დაბახანურად იქცევა და მაგარ-მაგარ სიტყვებს ხმარობს ქცევა-ლაპარაკში, არ გვიკვირს ხოლმე - რა უნდა მოვსთხოვოთ ამისთანა გაუჩორკნელ ტეტისაო, მაგრამ ვერ გვიპატიებია დაბახანური მოქმედება და საქციელი ევროპიდან მოსულ მარკიზისთვის. რაზმს დიდ სამსახურს უწევს ქართველობა. აღიუტანტად ქართველი ჭაბუკი ალექსანდრე ჭავჭავაძე ახლავს, შვილი გარსევანისა, რომელმაც ბევრი იშრომა რუს-ქართველთა ტრაქტატის გაწყობისთვის, თავიანთ მემამულეს ებრძვის სიძე მეფე ერეკლესი პოლკოვნიკი თ. ვახტანგ ორბელიანი, მაინც მარკიზი უშუალოდ ლექსთა კონით სარგებლობს და ქართველობას წუწკიშვილებად იხსენიებს. თუ პაულუჩი ასე ამკობდა ქართველობას უქვეშევრდომილეს რაპორტში და იმპერატორის კეთილ სმენას არ მოერიდა, ვინ იცის აქ, საქართველოში, როგორ ამკობდა საცოდავ ქართველობას! ვგონებთ, რომ დედ-მამის გინებასაც არ მოერიდებოდა მთავარ-მართველი.

ჩუმლაყის ბრძოლა ბატონიშვილ დავითს, როგორც სხვა ამბები ამ დროისა, ცოტა სხვანაირად აქვს აწერილი. "მოვიდა

მარკიზი ჩუმლაცს; იქმნა მუნ ბრძოლაი კახთაგან, იძლივნენ რუსნი. მუნ მოკლეს ვახტანგ, სიძე მეფისა ირაკლისა, ყაფლანისშვილი, მეულლე თეკლასი და დასტრეს მუხლსა შინა ალექსანდრე, ძე გარსევანისა, ჭავჭავაძე, ვინაიღვან მათ ეპყრათ კერძოი რუსთა და პირის-პირ მამულისა თვისისა იყვნენ მტერ. მაშინ დაჰმუნდა (დაღონდა) ამას ზედან მარკიზი. წარდგა ზურაბისშვილი ნინია, მოურავი მარტყოფისა და უთხრა მარკიზსა: "გაჩვენოი მე გზაი ვაკე, უკეთუ მომცე ნიჭი რაიმეო".¹³⁸⁾ ამას ზედან მხიარულ იქმნა მარკიზი, გაუძღვა მინდვრის გზით და მიიყვანა ჩუმლაცს. მივიდა რა ჩუმლაცს, მუნ სოფელსა შინა შეიპყრა კაცნი ხუთნი და დამოკიდნა ხეთა ზედა და მოაშთუნა. იხილეს რა კახთა ტირანული საქმე ესე, შეიპყრეს მათცა ხუთნი სალდათნი და ერთი აფიცარი და მათცა მოჰკიდნეს ძელსა და მოაშთუნეს იგინი პირის-პირ მარკიზისა, რომელსაცა სჭვრეტდა თვალითა თვისითა".¹³⁹⁾

ახლა რა ნაირად უნდა დავიჯეროთ პაულუჩის მოხსენება, რომ ს. ჩუმლაცთან ზურგზე ბოლი ავადინე მამფოთართაო? თუ თვალწინ ხუთი სალდათი და ერთი აფიცარი ბოძზე ჩამოჰკიდეს კახელებმა და ჩამოაღრჩეს სამაგიეროს გადასახდელად, ეტყობა შეამბოხენი ან გამარჯვებულნი ყოფილან, ან, თუ ეს სადავოა, არც ისე დამარცხებულან, როგორც მთავარმართებელი მოიხსენიებს უქვეშევრდომილეს რელიაციაში.

პირადად მეფე გრიგოლს ს. ჩუმლაცთან დიდი უბედურობა ეწვია. დავადიშვილებმა უღალატეს და მარკიზის მხარეს გადავიდნენ.

ამ სამწუხარო ამბავს ასე მოგვითხრობს მემატიანე დავითი: "მაშინ გრიგოლიცა, ძე იოანესი, განვიდა ალაზანს და მივიდა ნაუტარს ანწუხელთა ლეკთა თანა, ვინაიდან მას თანა მყოფნი თაყვანიცა განივლტენ მისგან და მივიდნენ მარკიზისა თანა".

138) ჩვენის მოსაზრებით ნინია მოურავი თავადი ჩოლაყაშვილია. თუ გვეშლება, კარგი იქნება გაასწოროს ვინმემ შეცდომა.

139) მასალეზი... გვ. 105.

სწორედ უხვად აქვს დაბერტყილი უფლის მიერ ქართველის ბუნებას შური, მტრობა, ღალატი. მართლა რომ ეროვნული უბედურობა და ღვთის რისხვაა ძვალსა და რბილში გამჭდარი დაუდგრომელობა და ცვალებადობა ხასიათისა. ღღეს რომ ერთგულობას გეფიცება კაცი, ხვალ ურცხვად გღალატობს, მოდი და რაიმე საერთო საზოგადო საქმე გააკეთე და დაამთავრე. ეროვნული ღღესასწაული გამართეს, ბატონიშვილი გრიგოლ მეფედ რომ ამოირჩიეს რაღაც ორიოდ-სამიოდ კვირის წინად და საცოდავ მეფეს სულის მოთქმა და მობრუნება არ აცალეს და "ნიჰის" მისაღებად უღალატეს. - ნუ თუ მართალია ისტორიკოსი, ოღეს ამბობს: "ნათესავი ქართველთა ორგულ ბუნება არს პირველთაგანვე თვისთა უფალთა". არ იქნა, ვერ გვასწავლა ჰკუა მწარე ბედმა.

XVII

მარტის ორსა მთავარ-მართველმა ჯარი დაასვენა და 3-ს ველის-ციხეს ავიდა. მომეტებული ნაწილი თელავის მაზრის თავად-აზნაურობისა ჩამოეგება თელავიდან მარკიზსა, ცოდვანი მოინანია, ბოღიში მოიხალა და ერთგულობის ფიცი მიიღო.

მეორე ღღეს, 4 მარტს, სამხრობისას (3 საათი), მარკიზი თელავს მივიდა, ისე ეჩქარებოდა მთავარ-მართველს მეციხოვნეთა განთავისუფლება, რომ ქვეითა ჯარი წინანდლში დასტოვა¹⁴⁰) და მცირე ამალით, 50 ყაზახითა და რაოდენიმე თავადიშვილით, გაეშურა ციხისაკენ. შეშინებული მემამბოხენი მარკიზის დანახვაზე დაფრთხნენ და გაიფანტნენ. ციხიდან პაულუჩჩიმ მიუსია ტრანშეებში გამაგრებულ კახელებს ქვეითა ჯარი, რომელმაც თითქმის უბრძოლველად გარეკა მემამბოხენი და წაართვა ერთად-ერთი ზარბაზანი, ექვს გირვანქიან ყუმბარის მსროლელი.

140) თელავიდან 7 ვერსია წინანდლამდე.

თელავის ციხის გარემდგომნი, ნაცარქექიასავით რომ იქცეოდნენ, სად იყო ამ დროს კახელ მემამბოხეთა წინამძღოლი, მდივანი თავ. ოთარ ქობულაშვილი, რა დაემართა, რასა ჰფიქრობდა, ვერა გავიგეთ-რა. მატიაწე დავითი და არქიმანდრიტი ელევთერ კრინტს არა სძრავენ ოთარზე. არას ამბობენ აგრედვე კაპიტანი ანოსოვი და თვით მარკიზი პაულუჩჩი. სწორედ საოცარია ასეთი სიჩუმე. ცოტად თუ ბევრად, როგორც ქვემოლ დავინახავთ, შესაწყნარებელია დავითის სიჩუმე, რადგან იმის აზრით მარკიზი, თელავს არ ასულა, მაგრამ სრულიად გაუგებარია მთავარ-მართველის მიერ ასეთი უყურადღებობა. ნუ თუ ოთარის მოქმედება ჩვე უმნიშვნელო გამოდგა, რომ ხსენებითაც არ აქსენა რუსის მხედრობის სარდალმა მემამბოხეთა ჯარის წინამძღოლი? ალბად ასე იქნებოდა, თორემ როგორ არ შეიტანდნენ მის სახელს რელიაციაში.

მარკიზი გვიამბობს, ჩუმლაციდან თელავს რომ მივდიოდით, გზა-გზა არავის შეუწყუხებივარო. ახლო-მახლო სოფლებიდან გლეხები მოდიოდნენ, ცოდობს აღიარებდნენ და შენდობას ითხოვდნენო. ამგვარადვე მოქცეულან თელავის მაზრის თავადიშვილები. სჩანს, საფანელი შემოლევიათ, აფეთქების რაღაც ხუთიოდე კვირა გაუძლიათ, ცეცხლი ჩანელებულა და მშვიდობიანი, მყუდრო ცხოვრება უმჯობინებით ეკლიან გზაზე სიარულსა და წვივების დაგაზვას. ასეთი დასკვნა თითქოს სიმართლეს არაა მოკლებული, მაგრამ ხუთი-ექვსის თვის შემდეგ ერთგულობის ფიცმილებული თავადები ხელახლა გასტეხენ სიტყვას და ბატონიშვილ ალექსანდრესთან ერთად ამბოხების დროშას ააფრიალებენ და რუსის მხედრობას კიდევ შეებრძოლებიან. მიზეზი ასეთის საქციელის ისაა, რომ მოუწყობელ ჯარს დიდხანს არ შეუძლიან ბრძოლა გაწყობილ მხედრობასთან, რაც უნდა სუსტი და უვარგისი იყოს უკანასკნელი, აჯანყებულმა ერმა თუ ერთის შეტევით, პირველშივე, ვერ მოახერხა სრულიად განადგურება განწყობილის ჯარისა, აღფრთოვანება ეკარგება და, მამასადამე, ბრძოლის

უნარიც ძრიელ უსუსტდება და ხშირად და სამუდამოდ ძალმომრეობის უღელს უმორჩილდება.

თელავში დაბანაკებული პაულუჩი უშაკოვს ელოდდა. ესა და გენერალი კონსტანტინე მუხრან-ბატონი (ბაგრატიონი) ბრძოლა-გამარჯვებით მოდიოდნენ თიანეთისაკენ. მუხრან-ბატონის კაცები, 30 ოსი, თავს დაესხნენ მემბოხეთა საყარაულო პიკეტს და მიფანტ-მოფანტეს ყარაულები. რადგან ოსებმა ყარაულებს გზა მოუჭრეს, მემბოხეთა უმთავრესმა რაზმმა უშაკოვის მიახლოებისა ველარა გაიგო რა და დიდ გაჭირვებაში ჩაეარდა. გათენებისას, 5 მარტს, უშაკოვი და მუხრან-ბატონი დაეცნენ მემბოხეებს და გაჩაღდა საშინელი ბრძოლა. მთელი ოთხი საათი გაგრძელდა ჩეხა. მემბოხეებს ეჭირათ თიანეთის გზაზე აბორცვილი ადგილი, ოთხ ალაგას ხე-ტყეთი ჩაეხერგათ კლდიანი ფერდობები. ცოტა მოშორებით უფრო ძრიელი სიმაგრე ჰქონდათ, ექვს ალაგას ჩახერგილი. მემბოხე ყოფილა ასე 400 კაცი. უშაკოვმა იერიშებით აიღო როგორც პირველი, ისე მეორე სიმაგრე. იძლივნენ მებრძოლი მამულიშვილნი და გაიქცნენ თავის საშველად. გზები არ ვარგოდა, ვიწრო ბილიკები იყო კლდეებზე და, მარკიზის სიტყვით, ბევრი მათგანი გადიჩეხა კლდეზე. სიმაგრეებში რუსებს დაუთვლიათ 30 გვამი დახოცილ მემბოხეებისა. უშაკოვს მცირე ზარალი მოსვლია. მოჰკვდომია ერთი გრენადერი და 3 დაჭრილა. მუხრან-ბატონს მოუკლეს ერთი ოსი და ერთიც დაუჭრეს. ასე ადვილად გადარჩა უშაკოვი სახიფათო ადგილზე ბრძოლას. აქედან უშაკოვი და მუხრან-ბატონი დაუბრკოლებლივ ავიდნენ თიანეთს და აქაურებიც დაამარცხეს. რამდენი თიანელი გაწყდა ბრძოლაში, არა სჩანს, ხოლო ტყვედ წაუყვანია უშაკოვს 15 კაცი.

რუსებს ჯავრი სჭირდათ თიანელებისა, რადგან ყველაზე პირველად თიანელები მიემხრნენ ახმეტელებს. კაცი მუდამ კაცია და ამიტომ სამაგალითოდ უნდოდათ რუსებს მათი დასჯა. ტყვედ აყვანილ 15 კაციდან აარჩიეს რვა, როგორც მოთავე მემბოხე და შიგ სოფელში ჩამოაღრჩეს. სწორედ შეუწყნარ-

ებელ სასტიკობას იჩენდა ბატონი უშაკოვი. უღმობელად ეპყრობოდა ტყვედ წაყვანილ მემბოხეებს, მაგრამ პაულუჩჩი არ უწყყრებოდა და ხშირად ქება-დიდებათ იხსენიებდა. აფიცრობის თვალთა, ასე ამკობს უშაკოვს მარკიზი (ссы отлучивши офицера).¹⁴¹⁾

მარტო სოფელი არტანი არ იწლიდა თავისას, ჯიუტობდა და ცოდვებს არ ინანიებდა. მოსარჯულებლად და ჭკუის სასწავლებლად მარკიზმა გაგზავნა პოლკოვნიკი ტიხანოვსკი არტანში. რაზმის უფროსმა შეუთვალა, დამშვიდდით, მთაში გახიზნული ცოლშვილი დააბრუნეთ და ურჩობაზე ხელი აიღეთო, მაგრამ სრული მთელი დღე უცადა პოლკოვნიკმა და მოსვლით-კი არავინ მოვიდა ერთგულობის ფიცის მისაღებად. არა, ტყუილად რაზე იწუხებდა პოლკოვნიკი თავსა მოლოდინში. თიანელ ამბების გამგონე ვინ ოხერი მივილოდა რუსების ბანაკში! თავდებად ვინ დაუდგებოდა, რომ ამათაც თიანელებსავით ნახევარზე მეტს არ ჩამოადრჩობდნენ! ეწყინა პოლკოვნიკ ტიხანოვსკის, რომ მისი სიტყვა არტანელებმა ძირს დაუშვეს და არ ეახლნენ ფიცის მისაღებად და ჩვეულებრივ მოექცა ურჩ სოფელს, ესე იგი წაუკიდა ცეცხლი და მთლად გადაჰბუგა არტანელების სახლ-კარი. ნუგეშად არტანელებს ერთი რამ ექნებოდათ, სიცოცხლე მაინც ხომ შევიწარჩუნეთო. არტანის გადაწვით დასრულდა რუსის მხედრობის მოქმედება მარკიზ პაულუჩჩის უფროსობით მემბოხეთა წინააღმდეგ 1812 წლის გაზაფხულის პირზე.

ამ გვარადან, მოახსენებს პაულუჩჩი იმპერატორ ალექსანდრე პირველს, განგებითა ყოვლად სახიერის უფლისა, რომელიც მფარველობს თქვენის იმპერატორების უდიდებულესობის იარაღს, დაითრგუნა და დაიმსხვრა ზვაობა და კადნიერება უგუნურთა და სულელთა. მაშფოთარი სული კახეთში ძირიან-ფესვიანად ამოვარდა, მართვა-გამგეობის წესი

და რიგი აღდგენილ არს და სრულიად საქართველო დაწყნარაო".¹⁴²⁾

რა ზარალი მოუვიდა ქართველობას აჯანყების დროს, დანამდვილებით არ ვიცით. ვისა ჰქონდა თავი აღენუსხა მოკლულ, დაჭრილ, ჩამოდრჩობილ, ან ტყვედ წაყვანილ ქართველისა. რუსის მხედრობის ზარალი-კი მარკიზ პაულუჩჩიმ დაწვრილებით მოახსენა ხელმწიფეს. სულ მოგვიკლეს და უგზო-უკვლოდ დაგვეღუპაო-ნ შტაბ-აფიცერი, 13 ობერ-აფიცერი და 300 უბრალო ჯარის-კაციო. პირველად ამბობებამ რომ იფეთქა და გაალმასებული ერი სამხედრო კამანდებს მიესია, ბევრი ჯარის-კაცი დაგვაკლდა. ზოგი დახოცეს და ვინც ცოცხალი გადარჩა, მონებდ გაიხადესო. თითო ოროლა გულკეთილმა თავად-აზნაურმა, სამღვდელო კაცმა და გლებმა სამას ჯარის-კაცამდე სახლებში დამალა და გაბოროტებულ მემბოხეებს არ დაანებაო. თქვენის იმპერატორების უდიდებულესობის ძლევა-მოსილმა იარაღმა მტკრად რომ აქცია შფოთით საესე განძრახვა და გადარეულ და თავხედმა მოლაღატებმა მოწიწებით ქედი რომ მოიდრიკეს¹⁴³⁾, მე მაშინადვე მოვთხოვე დაუყოვნებლივ ჩემთვის წარმოედგინათ დამალული სალდათები. ჯერჯერობით 300 კაცი წარმომიდგინეს. ეგები, ღმერთმა ინებოს და უგზო-უკვლოდ დაკარგულად რომ ითვლებიან, ზოგი მათგანიც ვინმე ცოცხალი აღმოჩნდესო.

ფრიად საყურადღებო უქვეშევრდომილეს 26 მარტს 1812 მოხსენებას მარკიზი პაულუჩჩი იმით ათავებს, რომ მოკლედ ჩამოთვლის მიზეზებს, რამაც გამოიწვია კახეთის "ბუნტი". ეს მიზეზები, სხვა წყაროებიდან შევსებული, ზემოდ უქვე მოვიხსენიეთ და საჭირო აღარ არის მათი განმეორება.

პაულუჩჩიმ თავისი თავიც არ დაივიწყა, და როგორც მოხელეთა ჩვეულებაა, აჯანყების მიზეზი სხვას მოახვია კისერზე. - საქართველოში (რუს. Грузия) მომხდარ რევოლი-

142) *ibid.* გვ. 80.

143) რუსულად: "...подле изъясники съ покорностью преслионили будущия вс. вых."

უციის ამბები დაწვრილებით მოგახსენეთ, სწერს მეფეს. ნათქვამს ის უნდა დაუმატო, რომ ჩემი თავი უბედურად მიმაჩნია, რადგან ამბოხება დიდი ხანია, რაც მზადდებოდა და იფეთქა მხოლოდ ჟამსა აქაურის მხედრობის ჩემ მიერ სარდლობისასა: ნუგეშად მოვლენილ უბედურობაში თქვენის უდიდებულესობის მართლ-მსაჯულება მაქვს და საკუთარი ჩემი სინიღისი. დარწმუნებული ვარ, რომ თვით გესლიანი შური ჩირქს ვერ მოსცხებს ჩემს მოქმედებას ამ ქვეყანაში, ვინაიდან ჩემის მოქმედება-საქციელის ერთად-ერთი საზრუნავი საგანი იყო - სარგებლობა თქვენის იმპერატორების უდიდებულესობის სამსახურისა, საქართველოს ერის სიკეთებენიერება და აღმოფხვრა ბოროტებისაო.¹⁴⁴⁾

აპრილის გასულს მარკიზი პაულუჩჩი სამუდამოდ გამოეთხოვა საქართველოს და პეტერბურგს გაეშურა. მთავარსარდლობა და მართებლობა ჩააბარა გენერალ რტიშჩევს.

თავად-აზნაურობას ეწყინა, მარკიზ პაულუჩჩის გადაყვანის ამბავი რომ შეიტყო, წარსდგა წინაშე მისა და სთხოვა - ნება მოგვეცით გავგზავნოთ პეტერბურგს დეპუტატი და იმის პირით ვსთხოვოთ ხელმწიფეს თქვენი აქ დარჩენაო. მარკიზმა ნება მისცა. დეპუტატად აირჩიეს ნადვორნი სოვეტნიკი თ. ზაქარია ანდრონიკაშვილი. მარკიზმა დეპუტატი გაისტუმრა და თან წერილი მისწერა პოლიციის მინისტრს, გთხოვთ და გეხვეწებით, ეცადეთ, რომ საქართველოს თავად-აზნაურობის თხოვნა მონარქმა უყურადღებოდ დასტოვოსო. მე ამ დღეებში წამოსვლას ვაპირობ, დაბრუნების ბრძანებამ გზაში რომ მომისწროს, ხელ-ახლა უნდა დავტრიალდე საქართველოში. წასვლა-წამოსვლა სულით-ხორცამდე დამლუპავს და გამალატაკებსო.¹⁴⁵⁾

იმპერატორმა ალექსანდრე პირველმა პატივი არა სცა დეპუტად ზაქარია ანდრონიკაშვილის თხოვნას და მარკიზი

144) გვ. АКТЫ, ტ. V, გვ. 80 - 81: კაპიტანი ანოსოვი 13 ობერ-ოფიცერს ანგარიშობს მოკლულს, მარკიზი მხოლოდ 10. ანოსოვის ანგარიში უფრო მართალია.

145) Ibid. ტ. V, გვ. 21 - 22.

აღარ დააბრუნა საქართველოში. დეპუტატის გაგზავნა პეტერბურგს უსაღსრობისა გამო ეხლაც ძნელია და მაშინდელ დროს ერთი-ათასად ძნელიც იყო და სახიფათოც. რა მოსწონდა ჩვენ თავად-აზნაურობას მარკიზ პაულუჩჩისა და რაზე იკლავდა თავს, რომ განსაკუთრებული კაციც-კი აახლა იმპერატორს თხოვნა-მუდარით, აქ დაგვიტოვე მთავარ-მართველადო, ადვილი გამოსაცნობი არ არის. კაპიტანი ანოსოვი ფიქრობს, მღელვარებამ თვალი აუხილა მარკიზისა და ბოროტების აღმოფხვრას მხნედ შეუდგა. მარკიზი ჭეშმარიტების მოყვარე იყო და მართვა-გამგეობის გადაკეთება დაიწყოვო. მთავარ-მართველის საქმიანობის ნიმუშები ზემოდ საკმარისად მოვიხსენიეთ და ქვეყნის საკეთილო მაინცა და მაინც ბევრი ვერაფერი ვიპოვნეთ. თავიდანვე გენერალ სტალის მიერ მოხერხებულად და ეშმაკურად გაბმულ ქსელში გაება, ეგზეკუციებით დაარბია კახეთი და როცა ილაჯ-გაწყვეტილ ერმა ხმა ამოიღო, მოწყობილ ჯარით ზურგზე ბოლი აადინა და შესაშინებლად საღრჩობელანი დამართა კახეთის ირგვლივ. არც თუ თავად-აზნაურობას ექცეოდა ლმობიერად ბრწყინვალე მარკიზი. საერთოდ მოღალატეობის დიპლომი უბოძა და ამის შესაფერად ექცეოდა. მაშ რის გულისათვის ეწეოდნენ ხარჯსა და რისთვის გაგზავნეს კაცი პეტერბურგს? ალბად ამის საიდუმლო საფლავში თან თუ ჩაიტანა განსვენებულმა დეპუტატმა თ. ზაქარია ანდრონიკაშვილმა.

რაკი სამუდამოდ ვეთხოვებით ფილიპე ოსიპის ძე მარკიზ პაულუჩჩის, საჭიროდ მიგვაჩნია დავამთავროთ მისი მოქმედების ამბავი ორიოდე ცნობით და ბოლოს ისიც მოგახსენოთ, თუ რა ბედი ეწვია ახლად არჩეულ მეფე გრიგოლს.

ზემოდ დასახელებულ არქიმანდრიტ ელევეთერის მოხსენების მეხუთე მუხლი აგვიწერს პაულუჩჩის ექსპედიციას კახეთში. "დროსა, მათის მაღალ ყოვლად უსამღვდელოესობის მცხეთის მიტროპოლიტის და სრულიად საქართველოსა და იმერეთის ექსარხოსისა და კავალერის ვარლამისსა, გაიხსნა რა დეკასტირია და ინება მან მაღალ-ყოვლად უსამღვდელოესობამან ჩემიცა დეკასტირიასა შინა ჩლენად დადგენა და ამის

გამო ვიყავ აქ ტფილისსა. მას ზამთარს, თვესა თებერვალს, 1812-სა წელსა, ასტყდა ბუნტი კახეთსა შინა, მთავარ-მართველობისა მარკიზ პაულუჩჩისას, და ამან მთავარ-მმართველმან ინება კახეთს წასკლა და მეცა თავისთან წასაყვანად ვუნდოდი, სთხოვა მათსა მალალ ყოვლად-უსამღველოესობითსა მწყემსთ-მთავრობასა, და მწყემსთ-მთავარმან ამან მიბრძანა დიდის გულს-მოღვინებით, და დამარიგაცა მსახურებისათვის ერთგულებისა, და გამატანა რა, მივედით აქავ კახეთისა პირსა საგარეჯოს, მომანდო მე ვალად ხალხთა ფრიად აღრეულთა შორის მისვლა, რჩევა და დამშვიდება. მორჩილი ბრძანებისა, შეველ მათ ხალხთა შორის, თუმცა დროსა მას ჩემის შესვლისასა მრავალგან მოინდომეს სიკვდილი ჩემი, გარნა მიხსნა მე ღმერთმან და მაინც დავამშვიდე იგი, და მოვიდნენ მარკიზსა თანა. შემდგომად ამისა აქედან წარსულნი გარდავედით პირიქით, დაგვხვდნენ კახეთის ხალხნი, აგვიტეხეს სროლა და დაგვიწყეს ომი ადგილსა ჩუმლაყის ბოლოსისა და გვესროდნენ-რა, დროსა ამასთანა ვახლდი. სროლამ გასტანა სალამომდინ და მას ღამესა ფრიადისა სიცივისა და თოვლისაგან შეწუხებულმან, გავათენე ტალახს და თოვლსა შინა, ცას ქვეშე, და მეორესა დღესა რა დაამარცხა იგინი მოუმორჩილებლნი პირისპირ მბრძოლნი უძლეველმან მხედრობამან, მასვე დღესა გამგზავნა მე გაღმა მხარს დასამშვიდებლად და თვით წარვიდა თელავს. წაველ მე და აქამდისინ მოვიყვანე ცდა ჩემი, თვით ამღრეველნი გაღმამხრელნი მოვართვი თელავს, შევარიგე და დაუტევე ხალხი დამშვიდებული და თელავის კარის ეკლესიასა შინა ესენი და სხვანი დავაფიცე მე ერთგულებასა ზედა ხელმწიფე იმპერატორისასა. და შემდგომად ამისა წარმოვიდა რა ტფილისს მარკიზი, დამავდო მე განგებ თელავს, ესე ვითარის სიტყვით, კნიაზ ორბელიანი¹⁴⁶) მოვა აქ ხალხისათვის დასარწმუნებლად და უნდა ახლდე მასთანა და მასცა მისცე ერთგული შეწევნაო. მოვიდა რა მათი ბრწყინვალება

146) გენერალი დიმიტრი ორბელიანი. ეს გენერალი ასპარეზზე გამოვიდა კახეთში მთავარ-მართველ რტიშჩევის დროს.

უფალი ღენერალ-ლეიტენანტი და კავალერი კნიაზ დიმიტრი ორბელიანი, დავხვდი მუნ, და ვმსახურე მაშინცა მთლად თელავის უეზდსა შინა და მუნამდე ვახლდი, მანამ შევიდოდა კნიაზი ქიზიყს და მუნითვე უკმო ვბრუნდი და წამოველ ტფილისს. ამა სამსახურთა გამო დამიწვეს მე სახლ-კარი თელავს და ამიკლესცა ყოვლისა ნივთით ჩემით მაშინდელთა ბუნტოვჩიკთა”.

როგორც ეტყობა, გულფიცხნი ყოფილან მაშინდელი "ბუნტოვჩიკები". მათთვის მოღვაწე და მოამაგე მოძღვარს, რომელსაც სუსხიან თებერვალში, ჩუმლაყის ბოლოს, ღამე გაუთენებია "ტალახსა და თოვლსა შინა, ცას ქვეშე", რომელმაც ფიცი მიაღებინა კარის ეკლესიაში, პატივი არა სცეს, არ დაუნახეს ამაგი, ჭირნახულობა და სახლ-კარი დაუწვეს. ბარელამაც არ ეკუთვნოდა ასეთი ჭილდო, მაგრამ რას იზამ, როდესაც ასეთია ერის პსინოლოგია. საერთო ღრევა-ამბოხების უამს მეტიჩარა და ძალად-მაცხოვნების ხვედრი ხშირად ცეცხლი და სახლ-კარის გადაბუგვაა ხოლმე.

ჩუმლაყის ბრძოლა სწორედ რომ კისერ-მოსატეხი ეპიზოდი ყოფილა მარკიზ პაულუჩის ცხოვრებაში. საქმე ისე გასჭირვებია მთავარ-მართველს, რომ ოლონც-კი დაემშვიდებინა ერი და აუღია და ათას რამე სასიამოვნოს შეჰპირებია კახელებს. მეფედ ერთ-ერთ ბატონიშვილს მოგვევრითო, თავიდან მოგაშორებთ "მოსამართლეებს" და კაპიტან-ისპრავნიკებსაო. კახელებსაც ამის მეტი არა უნდოდათ რა, დიდად გახარებიათ და ნიშნად სიხარულისა მარკიზისთვის წარუდგინათ 300 ჯარის-კაცი თავიანთი აფიცრებით. მართალია თავგაპარსული, მაგრამ რა უჭირს, თმას რა ჰკუა აქვს, ერთ თვეზე უფრო უკეთესი ამოუვიდოდათ. ფრიად საინტერესოა ბატონიშვილ-დავითის ამ ამბის შესახებ მოთხრობა და ამის გამო სავსებით და სიტყვა-სიტყვით შემოვიტანთ ამ მოთხრობას. თავადიშვილებმა რომ უღალატეს მეფე გრიგოლს ჩუმლაყთან და მარკიზთან მოვიდნენ, "მაშინ ზაზა

ზურაბიშვილი, ძმა ნინიასი, რომელიც იყო მეფის ძის ივანეს სახლთუცესი¹⁴⁷) და მოსრულიყო მას ჟამს რუსეთით და იყო მარკიზის თანა, შეუჩინა ესე გრიგოლსა, რათა მოიყვანოს იგი მარკიზთანა,¹⁴⁸) თუმცაღა ანწუხელთა არა სწადდათ განტეგება მისი მით, რამეთუ არიან იგინი ფრიად ერთგულ მეფეთა თვისთა, ვითარცა თუშნი. იხილეს რა გლეხთა ღალატი თავადთაგან, განრისხნენ და დაეცნენ თავსა რუსთა ჩუმლაყის ბოლოსა, კვალად იძლივა მარკიზი, ხოლო გლეხნიცა შეეცალნენ ჩუმლაყისა სოფელსა. დღესა მეორესა მივიდა მარკიზი ჩუმლაყს. იქმნა სოფელსა შინა ბრძოლაი ძლიერი, იძლივნენ ჩუმლაყელნი და მოწვეს სრულიად ჩუმლაყი რუსთა. ხოლო იხილა რა მარკიზმან, ვინაიდგან ვერა ძალუძს პირის-პირობამ კახთა, ევედრა ზავსა და აღუთქვა კახთა, რომელ მოგვკრიო მეფის ძეთა თქვენთაო რუსეთით. ამას ზედან მხიარულ იქმნენ კახნი და ჰყვეს ზავი და მოგვარეს გაღმა მხრელთა უმეტეს სამასისა სალდათნი, შეპყრობილნი აფიცრებითურთ, რომელნიცა შეიპყრეს ამბოხსა ამას, აღპარსულნი თმათანი, მით რამეთუ კახთა აღპარსეს პყრობილთა მათ თავნი კიცხვისათვის. და მოყვანასა ზედა მეფის ძეთასა არწმუნა რა გული მარკიზმან კახთა და დამყუდროვნენ კახნი, მომლოდნელი აღთქმისა მისისანი, რომელ განპრინებთან¹⁴⁹) ხელთაგან მოსამართლეთა და კაპიტან-ისპრავნიკთა რუსთასა, უკუნიქცა მარკიზი ტფილისს და მუნით წარავლინა გრიგოლ პეტერბურხს, მისრული გრიგოლ პეტერბურდს, შეიპყრა იმპერატორმან და პატიმრად წარავლინა ციხესა შინა პეტრე ზაოდისასა და მუნ პატიმარ ჰყვეს წელი ერთი¹⁵⁰)

მარკიზ პაულუჩჩიმ თავი რომ გაიკლა და საქართველოში დარჩენა აღარ ისურვა, ეს ნაძალადევი "აღთქმანი" ხომ არაა

147) ბატონიშვილ გრიგოლის მამა იოანე.

148) მოაკლუნა — მოინადირა, შეაცდინა; ცუთნება — обидеть.

149) განპრინება — გადარჩენა, избавлять, спасать.

150) იხ. მასალეები... გვ. 105 - 106.

მიზეზი? რაკი დაპირებულს ვერ აუსრულებდა, რაკი კაპიტან-ისპრავნიკების ბატონობას ვერ მოსპობდა და რუსეთიდან საქართველოს დაობლებულ ტახტს პატრონს ვერ მოჰგვრიდა, გაქცევის მეტი სხვა რა ღონე ჰქონდა პაულუჩჩის? ასეც მოიქცა. გულა-ნაბადი აიკრიფა და პეტერბურგის გზას დაადგა, მიუხედავად იმისა, რომ თავად-აზნაურობა კალთებზე ებლა-უჭებოდა. წასვლას მარკიზი ისე აშურებდა, თითქოს აქ წყალი ამოუვიდა და რუსეთში ფაფა უცვივდებოდა. მისი მოადგილე გენერალი რტიშჩევი იგვიანებდა და ჩამოსასვლელად არ ეშურებოდა. პაულუჩჩი ცხარობდა, ცოფებსა ჰყრიდა და საყვედურით სავსე წერილებსა სწერდა რტიშჩევსა: რაღას იგვიანებთ, მალე მოხედეთ ქვეყანას და მეც გამანთავისუფ-ლეთო.¹⁵¹⁾

კახეთის ამბოხებამ სამუდამოდ მოუღო ბოლო ბატონი-შვილ გრიგოლსა. ერთი თვით მეფობის გულისათვის თორმეტი თვე პეტრეზავოლის ციხეში ბრძანდებოდა. ანწუხ-იდან ჩამოიყვანა გრიგოლი ნადვორნი სოვეტნიკმა ზაზა ანდ-რონიკაშვილმა, ვაჩნაძემ და პაატა ჭავჭავაძემ და წარუდგინეს პაულუჩჩის. გრაფ რუმიანცევს მარკიზი სწერს: რადგან გრიგოლმა ცოდვები მოინანია, ნებაყოფლობით გამოცხადდა ჩემთან და ერთგულობის ფიცი მიიღო და რადგან იმ მემბოხეთ, ვინც ცოდოს მოინანიებს, პროკლამაციით პატი-ეებას დაეპირდი, ამის გამო გრიგოლს ვისტუმრებ პეტერბ-ურგს იმ წესით და უფლებით, როგორც სხვა ბატონიშვილები გამოისტუმრეს რუსეთსაო, ყურის სადგებლად და ბოქაულად მიუჩინა გრიგოლს ხერსონის პოლკის ადიუტანტი პო-დპორუჩიკი თ. ბებუთაშვილი¹⁵²⁾ და თარჯიმნად პრაპორშჩიკი თ. ბარათაშვილი. ამ ორმა ქართველმა თავადიშვილმა წაიყვანა

151) კაპიტანი ანსოვი ასე ახასიათებს პაულუჩჩის მოუთმენლობას: "Получивши влѣдѣнія на себѣ", მთავარ-მართებელი სწერდა რტიშჩევს: ნურაფრისა გეფიქრებათ, ქვეყანა დაწყნარდა, მშვილობიანობა აღდგენილია. ბინაც მზადაა თქვენის აღმატებულებისთვის ზემ სახლში. რა წამს ჩაიბარებთ მხედრობას და ქვეყნის გამგეობას, იმ წუთშივე დავცლი სახლსაო. იხ. ტ. II, გვ. 377.

152) შემდეგ ცნობილი გენერალი ვასილ იოსების ძე ბებუთაშვილი.

მეფედ ნამყოფი ბატონიშვილი გრიგოლ პეტერბურგს 18 მარტს 1812 წ. ბატონიშვილის გზის ხარჯად და ჭამა-სმისთვის მარკიზმა უბოძა თ. ბებუთაშვილს 1500 მ. ასსიგნაციით და 125 მან. ვერცხლი. მოსამზადებლად თვით გრიგოლს ხელში მისცეს 60 მ. ვერცხლი, აგრედვე 280 მ. ვერცხლი, დღეში ხუთ-ხუთ მანეთის ანგარიშზე, ექვეს მარტიდან პირველ მაისამდე. თარჯიმანს ბარათაშვილს წელიწადში 200 მ. ვერცხლი ჰქონია ჯამაგირად და ამისთვისაც ჯამაგირი პირველ მაისამდე მიუციათ. თავადი ბარათაშვილით, მოახსენებს მარკიზი გრაფ რუმიანცევს, ერთგულად მსახურებდა ჩემ კანცელარიაში და თუ ინებებთ მანდ დასტოვეთ თარჯიმანად ბატონიშვილთან. რა ჯამაგირსაც დაუნიშნავთ ბარათაშვილს, თუ მანდ დასტოვებთ, ეგ თქვენ სურვილსა და ნებაზე მომიგლიათ.¹⁵³⁾

ბატონიშვილ გრიგოლის გადასახლებით რუსეთს, ბაგრატიონთა გასაგისი ამოვარდა საქართველოში, იმ ბაგრატიონთა, რომელთაც რამდენიმე საუკუნე იმეფეს საქართველოში.

ნაწილი მეორე

I

მარკიზ პაულუჩჩიმ უცბად ჩაანელა კახეთის ღრევა-ამბოხება 1812 წლის გაზაფხულის პირზე. ბედნიერი და ძლევამოსილი მართებელი პეტერბურგს გაეშურა, სადაც პირნათლად შეხვდებოდა იმპერატორ ალექსანდრე პირველს და პირადად უამბობდა, თუ როგორ ძირიან-ფესვიანად აღმოფხვრა თესლი რევოლიუციისა. დასამტკიცებელი საბუთიც ხომ ხელთა ჰქონდა. მეფედ აღიარებული ბატონიშვილი გრიგოლ, პეტრეზავოდის საპატიმროში განისვენებდა ცოდვათა მოსანანიებლად. იმპერატორს ალექსანდრეს და მარკიზსაც შეეძლოთ გული დაემშვიდებინათ და ნაპოლეონთან ომის სამზადისს შესდგომოდნენ. ვინაიდან საქართველოდან იმპერიას საშიშო აღარა მოელოდა-რა, იმპერატორმა საქართველოს მთავარ-მართებლად მარკიზის მაგიერ დანიშნა არაფრად გამოჩენილი გენერალი ნიკოლოზ თევდორეს ძე რტიშჩევი.

ახალი მთავარ-მართებელი ტფილისს ჩამოვიდა 20 აპრილს 1812 წ. მოსვლისთანავე რტიშჩევი დარწმუნდა, რომ ამბოხების ცეცხლი ჩაქრობით არ ჩამქრალიყო, ხოლო ნაღვერდლად ქცეულნ და ფერფლ წაყრილი, უგემურად ხრჩოლავდა, და დრო გამოშვებით, საქართველოს სხვა და სხვა კუთხეს თოფის წამალსავით იფეთქებდა ხოლმე. ნაღვერდალი კარგა ღონიერად გაღვივდა გაზაფხულის გასულს და მაისში აპრიალდა კიდეცა, მაგრამ რადგან ამბოხების სული და გული

ბატონიშვილი ალექსანდრე ჯერ შორს იყო, ნაღვერდალი მალე ჩანელდა. გაჩნდა თუ არა თიანეთს ბატონიშვილი ალექსანდრე, ეს შეუდარებელი და შესანიშნავი საბერველი ყოველგვარ ამბოხება - რევოლუციისა და პროტესტისა რუსის მთავრობის წინააღმდეგ, ამბოხების ცეცხლი კვლავ მოედო შინა და გარე კახეთს, ქიზიყს, მთიულეთს და ფშავ-ხევსურეთს; კვლავ გაისმა თოფ-ზარბაზნის გრიალ-ქუხილი, რომელმაც შესანიშნავად დააზარალა კახეთი. ამბოხების ქარბუქი დაიწყო შემოდგომის პირზე და გასტანა თითქმის წლის დამლევამდე. დიდი ვნება და ზიანი მიაყენა კახეთს, ფშავეთს, ხევსურეთს და თიანეთს რუსის მხედრობამ, უზარ-მაზარი სოფლები მტკრათა და ნაცრად აქცია გაალმასებულმა ჯარმა.

ამ სამოქალაქო შინაურ ომის დროს თავი ისახელა და დიდება მოიხვეჭა ჩვენმავე თანამემამულე, გენერალ-ლეიტენანტმა თ. დიმიტრი ორბელიანმა. ასის წლის ამბავია, შორიდან უყურებ ერის განწირულ სულის კვეთებას და გაშტერებული რჩები, ასე როგორ უნდა გასწიროს ადამიანმა თავისი დამბადებული და აღმზრდელი ქვეყანა, ასე როგორ უნდა გაქვავდეს და გაკლდევდეს, რომ დაიმსახუროს უცნაური მაშინდელ ქართველისთვის სახელი ტირანისა. ამ ლექსით მონათლა ბატონიშვილმა დავით დიმიტრი ორბელიანი სისასტიკისა გამო.

მკაცრობით და გულქვაობით არ ჩამოუვარდება ორბელიანს უკვე ცნობილი არქიმანდრიტ ელევთერ ზუკაკიშვილი. სამშობლოს აღსადგენად შეკრებილ ქართველთა მხედრობას სოფლის მოძღვარნი ლოცვა-კურთხევით ისტუმრებდნენ ბრძოლის ველზე, ჯვრითა და სახარებით აღქურვილნი დარაზმულ მხედრობას სულის და მხნეობის აღმაფრთოვანებელ ქადაგებას ეუბნებოდნენ. ბევრი მათგანი ტყვიამ გაგმირა, ბევრმა მოწამებრივ განუტევა სული და სისხლი თვისი იაზმად აკურთხა თავისუფლების მაძიებელ ერის გარჯა - მეცადინეობას. სიკვდილ გადარჩენილ მოძღვართ აფთარივით სდევნიდა არქიმანდრიტი ელევთერ და საკუთარის ხელით აბღღენიდა წვერ-ულვაშსა და ასე შერცხვენილთა და გაუპატიურებულთ

ისტუმრებდა ქალაქს გენერალ რტიშჩევთან და ექსარხოს ვარლამ ერისთვიშვილთან. დიდი ღვთის მოსავი და ქრისტეს მოყვარე გახლდაო გენერალი რტიშჩევი, ბრძანებს აფიციალური ისტორიკოსი ბ-ნი ანოსოვი. აკტებიდან არა სჩანს, როგორ თავსდებოდა რტიშჩევის გულში ღვთის მოსავობა და ქრისტეს მოსამსახურეთა წარმოუდგენელი შეურაცხყოფა, წვერ-ულვაშის გლეჯა და ხელსა და ფეხში ხუნდების გაყრა.

1812 წლის შემოდგომის ამბოხების სულის ჩამდგმელი ბატონიშვილი ალექსანდრე ერევნიდან შემოვიდა საქართველოში. საქმე გამარჯვებით ვერ დაგვირგვინდა, ვერა სძლია კახეთმა რუსეთის მთავრობას და ვერ გაანთავისუფლა ტანჯული ქვეყანა კაპიტან-ისპრავნიკების ხელიდან. ასე იცის ნაწილ-ნაწილ აჯანყებამ, ურთიერთ შორის შურმა და მტრობამ. ალექსანდრემ თავი შეაფარა თოვლიან-ყინულიან, თითქმის მიუვალ ხევსურეთს, მაგრამ ფეხ და ფეხ მიმდევარმა მტერმა იქაც არ მისცა მოსვენება. კვირაობით შიმშილს იტანდა ბატონიშვილი ალექსანდრე მწირსა და ულუკმა-პურო ხევსურეთში, გულს არ იტეხდა, მტერს არ ნებდებოდა და მარტო იმის ზრუნვაში იყო, როგორ და რა გზით უყო პირი რუსებს კავკასიის ქედს იქითაო. რაკი ხევსურეთში დგომა აღარ შეიძლებოდა, ალექსანდრე გადავიდა დაღესტანს და დაბინავდა აქაურ თავისუფალ თემებში. ანწუხმა და საერთოდ დაღესტანმა სიამოვნებით მიიღო ძვირფასი სტუმარი. დაღესტანს დაბინავებული ალექსანდრე სხვა და სხვა გეგმას ადგენდა რუსების გასაძევებლად საქართველოს მამულ-დედულიდან. დიდის ხნის ბრძოლით დაღლილ-დაქანცული ბატონიშვილი ერთხელ სასოწარკვეთილებას მისცემია და წერილი მიუწერია რუსეთის გარეშე საქმეთა მინისტრ გრაფ ნესელროდესთვის - მზადა ვარ დაგმორჩილდეთ და პეტერბურგს მოვიდეო. ათას წყალობას დაჰპირდა გრაფი, ოღონდ მოდი პეტერბურგს და ხელი აიღე რუსეთის წინააღმდეგ ბრძოლაზეო. ეტყობა, ამ აზრს ბინა ვერ უპოვნია ბატონიშვილის გულში და მიწერ-მოწერაც შესწყდა. სიკვდილამდის დარჩა შეურიგებელი

მებრძოლი ქვეყნისათვის და ჩავიდა საფლავს უცხო ქვეყანას, ქართველთაგან ცრემლ-დაუყრელი.

II

ახალი მთავარ-მართველი, გენერალ-ლეიტენანტი ნიკოლოზ თევდორეს ძე რტიშჩევი, ჩამოვიდა ტფილისს 1812 წლის ოც აპრილს. საქართველოში სულ რაღაც ოთხი წელიწადი დაჰყო გენერალმა რტიშჩევმა, მაგრამ ერთი დღე ბედნიერი არ უნახავს. საქართველო ამბოხების ქარ-ცეცხლით მოდებული მშვიდობიან გზას არ ადგებოდა, სპარსეთი და ოსმალეთი არ ისვენებდნენ, თათართა სახანოები ათას დავი-დარაბას აჩენდნენ. ამისთანა მოუსვენარ და აბოზოქრებულ დროსა და ჟამს საჭირო იყო კაცი მხნე, ძლიერის და გაბედულის ხასიათისა, ნიჭიერი სარდალი და რად მიაყუდა პეტერბურგის მთავრობამ ჯოხი ამ უჩინარ გენერალს, ადამიანი ადვილად ვერ გამოიცნობს. პირველ ორ წელიწადს მაინც საწყალი გენერალი თითქმის დაავიწყდათ პეტერბურგში და ჩვენიდან გაგზავნილ რაპორტებს და უქვეშევრდომილეს მოხსენებათ რტიშჩევისას პასუხსაც არ აღირსებდნენ ხოლმე. ან კი სად ეცალათ ჩვენთვის? ალექსანდრე პირველი დიდ ნაპოლეონს ებრძოდა, 1812 წ. შემოდგომაზე სატახტო ქალაქი მოსკოვი ცეცხლმა შთანთქა და თავზარ დაცემული მკვიდრი მოსკოვისა გაიხიზნა აღმოსავლეთის გუბერნიებში. ალექსანდრე დიდ საგონებელში ჩავარდა, ვაი თუ აქ, მეორე სამეფეო ქალაქ პეტერბურგშიც მეწვიოს მოუსვენარი ნაპოლეონიო. ამისთანა გარემოებაში მოდი და დალაგებული პასუხი, ან რეზოლიუციები უგზავნე შორეულ საქართველოში ჩარჩენილ გენერალ რტიშჩევსა! სწორედ ღვთის ანაბარად დარჩა რტიშჩევი, მაგრამ ბედი იმისი, რომ ომში გაწვრთნილი გენერლები ჰყავდა და ადგილობრივი ვითარება ხელს უწყობდა.

კაცთაგან დავიწყებულს რტიშჩევს მართო ყოვლად ძლიერი უფალი სწყალობდა ღვთის მოსავს და სათნოიან გენერალსაო, ბრძანებს კაპიტანი ანოსოვი. ღვთისა რა მოგახსენოთ, რადგან მის განგებას ჩვენ ვერ მივწვდებით, მაგრამ ეს კი კარგად ვიცით, რომ ქართველებისა და საერთოდ ამიერ-კავკასიის ხანების ზნე-ხასიათი და პოლიტიკა ყოვლად უვარგისი და დასაგმობი იყო. რუსების მოძულეთ თითქოს ვერ შეიგნეს საერთო გეგმისა და მოქმედების სიავ-კარგე, იბრძოდნენ ცალცალკე და ამის გამო ყველგან მატლსავეთ ისრისებოდნენ.

სპარსეთის შაჰმა ბატონიშვილ ალექსანდრეს თავი ჩააბარა თვის მემკვიდრე აბბას-მირზას და დაავალა ყოველგვარი დახმარება გაუწიოს "საქართველოს მეფე" ალექსანდრეს და ხელი შეუწყოს დაკარგულ ტახტის დაბრუნებაში. რასაკვირველია, ისიც არ უნდა დავივიწყოთ, რომ ბაბა-ხანი რუსების განდევნაზე უფრო ფიქრობდა, ვიდრე ქართველ ერის ბედნიერებაზე. ასეა თუ ისე, პოლიტიკური ვითარება სპარსეთისა და მის სულის ჩამდგმელ ინგლისისა მოითხოვდა რუსების გარეკას საქართველოდან. როგორ ასრულებდა აბბას-მირზა მამის ბრძანებას? აბბასი ფირმანებს უგზავნის ერევნის სარდარ ჰუსეინ-ყული-ხანს - დახმარება არ მოაკლო ტახტის მაძიებელ ალექსანდრე მირზასო და ატყობინებდა პტყელ-პტყელ სიტყვებით, აუარებელი ჯარით ამ დღეებში შემოვალ ერევნის სახანოშიო. მაშინდელი ერევნის სახანო მოსამზღვრე იყო საქართველოსი და მაშასადამე აქ გაბატონებულ რუსის მხედრობისაც. თუ დახმარება იყო ჯარით, სწორედ ერევნიდან უნდა შემოსულიყო სპარსეთის ლაშქარი რუსებთან ომის ასატეხად. ერევნელ ჰუსეინ-ყული-ხანს-კი აგრე რიგად არ ეპრიანებოდა სპარსეთის "უძლეველ" მხედრობის გაჩენა სახანოში, რადგან ასეთი სტუმრობა ხერხს არ აყრიდა მის ქვეყანას. ჯერ ერთი შემოსეული ჯარი აამტუტებდა ქვეყანას და მეორე კიდევ ისა, რომ უფლება ხანისა შეიბღალებოდა, და, ვინ იცის, ეგება ჯარის სარდალს ხანი ტახტიდანაც გადაეხდებინა. ხომ მოგეხსენებათ, რომ

თოფ-იარაღში ჩამჯდარი კაცი მუდამ მართალია და ხანის ორგულობის საბაბს იმდენს გამოსძებნიდა, რამდენიც მოენებებოდა. ასეთი თვისება აბჯარ-ასხმულ კაცისა მშვენიერად იცოდა ჰუსეინ-ყული-ხანმა და სულ იმის მეცადინეობაში იყო, რომ არც მწვადი დაეწვა და არც შამფური, ესე იგი თავიდან აეცილებინა სპარსეთის ლაშქრის მოსვლის საჭიროება სახანოში და თან ბატონიშვილისთვისაც არ ეწყენინებინა. ერთხელ ჰუსეინ-ყული-ხანმა გულ დამშვიდებით ჩაჯიბა ოცია-თასი მანეთი, შაჰმა რომ გამოუგზავნა ბატონიშვილს სახარჯოდ და სააგიტაციოთ კახეთში. ფული ვერ ჩავაბარე ალექსანდრე მირზას, შეატყობინა ჰუსეინმა ბაბა-ხანს, რადგან კაი ხანია რაც ალექსანდრე აქ აღარ იმყოფებაო, თითქოს ერევნის სარდარმა არ იცოდა, სადაც იყო წასული ალექსანდრე.¹⁾

ქართველი კაცის უპირობა, მეზობლური შური და მტრობა, განკერძოებით მოქმედება და მამლა-ყინწობა, ვინაილგან დარწმუნებულია, რომ მხოლოდ იგია რჩეული და ქვეყნის მხსნელად მოვლენილი, რომ მხოლოდ მის თავსა და ტვინშია მოთავსებული ქვეყნის სიბრძნე, რომ იგია ერთად ერთი დიდებული სარდალი და მძლეთა-მძლე, რომ მარტოოდენ მისი აზრია მართალი და უცდომელი, ხომ კარგად მოგეხსენებათ. ეს ისტორიული სენი, ქართველ კაცის ძვალსა და სისხლში ღრმად გამჯდარი და ჩაკირული, დღესაც ხომ თვალსაჩინო მოვლენაა ჩვენს საზოგადო ცხოვრებაში და აბა ჯმ ასის წლის წინად რა იქნებოდა. დიდი კულტურული და შეგნებული შრომაა საჭირო ამ ისტორიულ შხამის ძირიან-ფესვიანად ამოსაგდებად, თორემ რა ყრია, გეთაყვათ, ზიზილ-პიპილა ფრაზებში ძმობა-ერთობაზე ყრმათა და ნორჩთა ასაპილბილვებლად და გადასარეგად.

სწორედ აქ დასახელებული ჩვენი პოლიტიკური გაუწვრთნელობაა მიზეზი, რომ გამარჯვებით იმოსებოდა ისეთი

1) იხ. **АКТИ** ტ. V, გვ. 358. ეს ფული ბაბა-ხანმა გამოუგზავნა გოგია პატრულას ხელით (რუსულად: **ИЗЪ ПРУДИАНЪ ГОИЯ ПАТРЕ-ЛА**), აგრედვე ძღვნად შვილი ქორი და რამდენიმე ცხენი. **ibidem**, ტ. V, გვ. 361.

ჩლატიანი გენერალიც კი, როგორც იყო რტიშჩევი. ამ მთავარ-მართველის დროს 12 ოქტომბერს 1813 წელს რუსეთმა შეჰკრა სპარსეთთან შესანიშნავი ტრაკტატი გიულისტანისა, რომლის ძალით რუსეთს სამულდამოდ დაეთმო სახანონი: ყარაბაღისა, განჯისა, შაქისა, შირვანისა, დარუბანდისა, ყუბისა, ბაქოსი და თალიშისა, ესე იგი თითქმის მთელი დღევანდელი აღმოსავლეთი ამიერ-კავკასია ერევნისა და ისტორიულ მესხეთის გარდა.²⁾

ნიკოლოზ თეოდორეს ძე რტიშჩევმა სამსახური დაიწყო დედოფალ ეკატერინე მეორეს დროს. საოცარი ხანა იყო ეს ხანა რუსეთის ისტორიისა. ნიჟიერი და უნიჟო საარაკო სისწრაფით მიფრინავდა სამსახურის მაღალ ფარდებში და მხოლოდ ნიკოლოზ რტიშჩევი ბაჯ-ბაჯით მოჩანჩალებდა წინ და მხოლოდ 20 წლის სამსახურის შემდეგ ძლივს ეღირსა გენერალ-მაიორის ჩინს. ასტრახანს წასული კამენდანტად უკან დააბრუნეს იმპერატორ პავლეს ბრძანებით და სამსახურიდანაც სრულიად გამორიცხეს. პავლეს სძულდა დედოფალი ეკატერინე და უდიერად ეკიდებოდა დედის გამწესებულ მოხელეებს. მთელი ცხრა წელიწადი იყო რტიშჩევი დავიწყებული ამა ქვეყნის ძლიერთა მიერ და მხოლოდ, ოსმალეთთან ომი რომ იწყებოდა 1809 წ., მოაგონდათ პავლესაგან ექსორია-ქმნილი გენერალი, უბოძეს გენერალ-ლეიტენანტობა და ჩააბარეს დივიზია. 1811 წ. დანიშნეს კავკასიისა და ასტრახანის გუბერნატორად და ერთის წლის შემდეგ საქართველოს მთავარმართველად. არ უნდოდა რტიშჩევს საქართველოში მოსვლა, როგორღაც გული ეთანალრებოდა, მაგრამ რას იზამდა, აღექსანდრე პირველს როგორ აწყენინებდა უარის შეთვლით.³⁾ წინაპარნი ნ. რტიშჩევისა თათრები ყოფილან.

ასეთი იყო ახალი მთავარ-მართველი საქართველოსი.

2) Ibid. ტ.V, გვ. III.

3) УТВ. Р. ВЛАД. НА Кавказъ, т. II, гв. 381 - 382. რტიშჩევმა სამსახური დაიწყო ნავაგინის პოლკში, რომელიც კარგი ხანია ბიხადროს საქართველოში, სახელდობრ ქ. ახალქალაქში.

ტფილისში ჩამოსვლისთანავე, მესამე დღეს, ცუდი ამბები მოუვიდა რტიშჩევს. მარკიზ პაულუჩჩიმ პეტერბურგს შეატყობინა, რომ კახეთის ამბოხება დასრულდა და ხალხი დაწყნარდაო. როგორც ბევრი სხვა, ეს მოხსენებაც მართალი არ აღმოჩნდა. კახელობა სხვა და სხვა ადგილს იკრიბებოდა და რუსის მხედრობას თავს ესხმოდა. ფშავ-ხევსურნი თავისუფლად დათარეშობდნენ თიანეთის სამოურავოში, გადადიოდნენ ანანურის მაზრაში და ანანურიდან მოკიდებული ღართისკარამდე მგზავრებს თავს ესხმოდნენ და სძარცვავდნენ. ფშავლებსა და ხევსურებს მხარი დაუჭირეს ანანურელებმა და ცოტა რომ დასცლოდათ, საქართველოს სამხედრო გზას სრულიად დაუკეტავდნენ რუსეთს.

დაღესტნის მთიდან ჩამოვიდნენ ლეკები და მოედნენ კახეთის სოფლებს. თელავის კამენდანტი მაიორი შმატოვი დაფაცურდა, ლეკების ჩამოსვლა რომ გაიგო მთიდან, ფიცხლავ გაქანდა ალაზნისკენ, სოფელ ტოგნიანთან გასტოპა ალაზანი და შეება ლეკებს. ლეკები გაიფანტნენ. მაიორი შმატოვი კი ვითომც გამარჯვებული უკან დაბრუნდა. გზაში უცაბედად წააწყდა ჩასაფრებულ კახელებს და ისეთი დღე დაადგა, რომ ძლივს თავი დააღწია. ზარალი დიდი მოსვლია, თუმცა აკტებიდან არა სჩანს, რამდენი კაცი მოუკლეს და რამდენი დაუჭრეს.

ჯერ ისევ მარკიზ პაულუჩჩიმ კახელობას გამოუცხადა, წარსულ ცოდვებს გაპატიებთ, ოღონდ დაწყნარდით, თქვენ თქვენ საქმეს შეუდგეთ და ერთგულობის ფიცი მიიღეთო. მართალია ასეთი "პროკლამაცია" გაგზავნა კახეთში მარკიზმა, მაგრამ მაინც საჭიროდ დაინახა დაეარსებინა ტფილისში კამისია "ბუნტის" მიზეზის გამოსაკვლევად.⁴⁾

ეხლა რაა კამისია და ადმინისტრატიული გამოძიება და მაშინ რა იქნებოდა, ადვილი მისახვედრია. ზოგი იმას ამბობდა, რომ მთავრობა ხაფანგს გვიგებს, მიგვიტყუებს ე რალაც კამისიაა, გაგვთოკამენ და შემდეგ დაგვსჯიანო. ზოგი კიდევ კამისიის შემწეობით პირად ანგარიშების გასწორებას სცდ-

4) რუსულად: Комиссія по изслѣдованію причинъ происшедшего въ Грузіи бунта.

ილობდა. დაიწყო უაზრო დაბეზლება და ჯაშუშობა. ერთი სიტყვით ამბოხების მიზეზთა აღმოსაჩენელ კამისიამ გარიგებით ვერა გაარიგა-რა და გაფუჭებით-კი ბევრი გააფუჭა.⁵⁾

გენერალ რტიშჩევმა იფიქრა, ალბად ეს კამისია მიზეზი, რომ ხალხი არა წყნარდებაო და შეაჩერა მისი მოქმედება. მთავარ-მართველმა შეადგინა ახალი განცხადება, ამოარჩია ოთხი კახელი დავადიშვილი: დიმიტრი და მერაბ ანდრონიკაშვილები, ასლან ვაჩნაძე და როსებ ჯანდიერი და გაისტუმრა კახეთში მოსალაპარაკებლად და შეამბოხეთა დასაწყნარებლად.⁶⁾

გენერალ რტიშჩევის მოციქულნი რომ მამაშვილურად არიგებდნენ მემამბოხე კახელებს და უქადაგებდნენ მორჩილებას, ამბოხების საუკეთესო მეთაურნი ივანე ჯორჯაძე და რაფაელ ერისთავი სოფლიდან სოფელში გადადიოდნენ და ხალხს აგულიანებდნენ ასაჯანყებლად. მოქადაგენი ზოგზე ტკბილის სიტყვით მოქმედებდნენ, ზოგს უმტკიცებდნენ ამბოხების საჭიროებას და ამგვარად თავიანთკენ იბირებდნენ და, სადაც არც ერთი ეს ხერხი არ ვარგობდა, ძალის მოხმარებასაც არ ერიდებოდნენ.

ყველაზე საწყენი რტიშჩევისათვის ის იყო, რომ თვით სიღნაღის მარშალი ნინია ანდრონიკაშვილი ლალატობდა მთავრობას. ნინიას თაოსნობით კახელებმა ელჩები გაუგზავნეს სპარსეთში ბატონიშვილ ალექსანდრეს და შეუთვალეს, მზადა ვართ, მობძანდით. მოციქულები გაგზავნეს აგრედვე დაღესტანს და მოიწვიეს ლეკები საშველად.⁷⁾

მოციქულების გაგზავნა-გამოგზავნა, დაპირება და "პროკლამაციები", რა თქმა უნდა, კარგი საქმეა და ფასი აქვს, როდესაც სრული ნდობა არსებობს მთავრობასა და ერის შორის. მაგრამ თუ ამ ნდობის ძაფი ერთი გაწყდა და მთავრ-

5) იხ. АКТЫ, ტ. V, გვ. 459 - 460; УТВ... ტ. II, გვ. 386.

6) АКТЫ, ტ. V, გვ. 460.

7) ibid. ტ. V, გვ. 463.

ობას სახელი და ეხტიბარი გაუტყდა, წყლის ნაყვა გამოვა ახალ-ახალი დაპირების გამოაშკარავება. ვგონებთ, რომ თვით რტიშჩევიც ასეთისავე აზრისა იყო თავის "პროკლამაციებზე" და ამის გამო კახეთს გაგზავნა გენერალ-მაიორი სტალი და დაავალა პირუთვნელად გამოიძიე ადგილობრივ მოქმედება თავად-აზნაურობისა, ქართველ და რუსის მოხელეთა და იღონე შესაფერი ღონისძიება წესიერების აღსადგენად მართვა-გამგეობაში და მშვიდობიანობის დასამყარებლად ქვეყანაშიო.⁸⁾

მაისის ცხრას სტალი ჩავიდა სოფ. მულანლოს, მდინარე იორზე. თანა ჰყავდა ექვსი როტა ყაბარდოს პოლკისა და ორი ესკადრონი. ქვედა ნოვგოროდელებისა. აქვე მოუვიდა ორი ესკადრონი ამავე პოლკისა ყარა-ალაჩიდან. ყაბარდოელები სულ 500 იყო იარაღიანი, დანარჩენი ასი ჯარის-კაცი უიარაღო იყო, რადგან ბოღბისხეველებმა წარსულ თებერვალში იარაღი დააყრევინეს. ჯარის სიმცირეს არ მოერიდა სტალი და 13 მაისს ველისციხისაკენ გაემართა. სოფელი დააფიცა ერთგულობაზე და შემდეგ გამობრუნდა სიღნაღისაკენ. აქ გაფანტა მეამბოხენი, დაამშვიდა ხალხი და რაკი საქმე მოაწესრიგა, გაგზავნა თელავს მიტროპოლიტი ბოდბელი მთავარ-მართველის პროკლამაციით. ბედკრულ და ძალაგამოღეულ პროკლამაციას ვერც არაფერი ბოდბელმა უშველა. აღარა სჭირდა დაპირება მთავარ-მართველისა.⁹⁾ ეს ამბავი რომ მოახსენეს გენერალ სტალს, აიყარა სიღნაღიდან და 19 მაისს ავიდა თელავს და დაიჭირა ქალაქი. მეორე დღეს გომბორის გზით ჩავიდა თელავსავე გენერალ-მაიორი დიმიტრი ორბელიანი, რომელსაც დაავალა რტიშჩევმა მიეღო უფროსი სარდლობა კახეთში დაბანაკებულ ჯარისა და ხელმძღვანელობა გაეწია ამბოხების ჩაქრობის დროს. ორბელიანმა თან მიიყვანა ერთი როტა ქართველ გრენადერთა პოლკისა, 150 ყაზახი და

• 8) Ibid. გვ. 457 - 460.

9) Утв...ტ. II. გვ. 388.

მეოცე დღევიზიის პოლკებიდან აკრეფილ ჯარის-კაცთა კამანდა, ასე რომ თელავში შეიკრიფა 1000-ზე მეტი მეომარი.¹⁰⁾

კახელები ლოდინში იყვნენ, ჯერ პასუხი არ მოსვლოდათ სპარსეთში გაგზავნილ მოციქულებისაგან. ამიტომ აჯანყების მეთაურნი მიუყუჩებულნი ისხდნენ და ამბოხების ნიშანს არ იძლეოდნენ. ზოგი მათგანი თვალის ასაბმელად კიდევაც ეახლა სტალს და მორჩილება გამოუცხადა. თუმცა გასაკეთებელი არაფერი ჰქონდა ორბელიანს, მაინც აიყარა ჯარით, გავიდა ალაზნის და ჩაუარა მარცხნივ ალაზნის პირს. ერთგულობის ფიცი მიაღებინა ხალხს და ცოდვა-დანაშაული შეუნდო. ორბელიანი მარცხენა ნაპირიდან მარჯვნივ გამოვიდა, ჯარის უფროსობა სტალს ჩააბარა და თვითონ 30 მაისს სიღნაღის გზით ტფილისს დაბრუნდა.

გენერალ ორბელიანის ჩამოსვლამ კაი გუნებაზე დააყენა მთავრობა. უხაროდათ, რომ ასე მალე დაწყნარდა ხალხი და მთავრობამ სახელოვანად გაიმარჯვა. სიხარულმა ხომ გულუხვობა იცის და კახეთის საექსპედიციო კორპუსის სარდალი დიმიტრი ორბელიანი დააჯილდოვა მთავრობამ გენერალ-ლეიტენანტის ჩინით, მიტროპოლიტ ბოდბელს უბოძეს სისხლის ჯვარი (ანნასი) პირველის ხარისხისა. უხვი წყალობა და ჯილდოები უბოძეს ერთგულ თავად-აზნაურებს და სასულიერო წოდების კაცთა.

III

რაკი ელჩებმა სასიამოვნო და გამამხნევებელი ამბავი ჩაუტანეს ბატონიშვილ ალექსანდრეს კახეთიდან და მოახსენეს, მზადა ვართ სამშობლოს მტლედ დავედოთ, მხოლოდ თქვენს მობძანებას ველითო, დახანჯება აღარ ივარგებდა და საჭირო იყო საქართველოსკენ წამოსვლა. ალექსანდრეს განზრახვა ჰქონდა, თვითონ რომ კახეთში ბრძოლას დაუწყებდა

10) Ibid. გვ. 389.

რუსებს, ერევნის სარდარს ჰუსეინ-ყული-ხანს ჯარით ყაზახ-ისაყენ უნდა წამოეწია, რომ რუსის მხედრობას, ბორჩალოსა და სომხეთში მდგომს, დახმარება ვერ აღმოეჩინა კახეთის ჯარისათვის. ამავე დროს მთავარ-მართებელი რტიშჩევი ყარაბაღში იღვა ჯარის ერთი ნაწილით და აბბას-მირზასთან ლაპარაკი ჰქონდა გამართული შერიგებაზე, მაშასადამე ამ სიშორიდან კახეთში მყოფ რუსის მხედრობას დროზე ვერ მოეშველებოდა. ნაფიქრი და განძრახული კარგად იყო, მაგრამ რა ჰქნას კარგმა მონარღემა თუ ღუშაში არ მოუვია. ერევნის სარდარი ყოყმანობდა და ზოზინობდა, ყაზახისაყენ არ იძროდა. ალექსანდრეს მოთმინება გამოეღია, აღარ მოუცადა სარდარის დაუსრულებელ საომარ მზადებას, ადგა და გამოეშურა საქართველოსკენ, რომლისთვისაც პატრონობა და ხელმძღვანელობა უნდა გაეწია. ამაღა ბატონიშვილისა მცირე იყო, სულ რაღაც ასიოდე ქართველი და თათარი. რა გზით შემოვიდა ალექსანდრე ირაკლის ძე საქართველოში, ღღესაც არ ვიცით, რადგან აქტებში არეულ-დარეულადაა ნაამბობი მისი შემოსვლის ამბავი. გარკვეულს არც არაფერს მემპტიანე ბატონიშვილი დავით გვატყობინებს.

გენერალი რტიშჩევი ყარაბაღს რომ მიდიოდა, საქართველოს სამზღვრებზე მდგარ ჯარის უფროსებს და ყაზახისა და შამშადილის მოურავებს სასტიკი ბრძანებანი დაუგზავნა - ფრთხილად იყავით, თვალ-ყური გეჭიროთ, რომ ბატონიშვილი ალექსანდრე არ შემოგეპაროთო. მარტო ბრძანებით არ დაკმაყოფილდა რტიშჩევი, შამშადილის მოურავს ესეც დაავალა: გამოუცხადე შამშადილის დისტანციის მცხოვრებთ, რომ 2000 ბაჯალლო ოქროს მიიღებს საჩუქრად, ვინც ცოცხალს მომგვრის ალექსანდრეს, ამ საზოგადო მყუდროების დამამრღვეველსაო.¹¹⁾ დისტანციის მცხოვრებთა სასახელოდ უნდა ვსთქვათ, რომ ორმა ათასმა (6000 მ.) ბაჯალლო ოქრომ ვერავინ მოხიბლა და შამშადილელ თათართა შორის არ

11) АКТЫ, ტ. V, გვ. 361 - 362.

აღმოჩნდა მუხანათი და აღმასრულებელი მზაკვრულის ბრძანებისა.

ყაზახის მოურავმა, პოლკოვნიკ თ. იოსებ ბებუთაშვილმა აცნობა რტიშჩევს, ჯაშუშის პირით შევიტყუე, რომ ბატონიშვილი ალექსანდრე ერევნიდან 25 აგვისტოს წამოვიდა საქართველოში. აპირებდა ყაზახზე გამოვლას, მაგრამ ვერ მოუხდაო, - რა არის იცოდეთ, რომ მუყაითად ვასრულებ მოვალეობას და ჩემ ყარაულებს ვერ გამოეპარებოდაო. ჩემის ფიქრით, მოახსენებს ბებუთაშვილი რტიშჩევს, ალექსანდრეს ჰსურს გამოიაროს ბოლნისსა და ქვეშე, ან არა და შევაქართლში ბორჯომის ხეობით, ან კიდევ ხოვლეს გზითო.¹²⁾

მთავარ-მართველის მაგიერობას საქართველოში გენერალ-ლეიტენანტი თავადი დიმიტრი ორბელიანი ეწეოდა. ბევრს ეცადა ორბელიანი, რომ ალექსანდრე არ შემოპარულიყო საქართველოში, ყველა შემოსასვლელ გზის პირები შეჰკრა ძლიერის ყარაულებით, მაგრამ ვერას გახდა, ბატონიშვილი გაუსხლტა ყარაულებს და, ორბელიანის სიტყვით, ვითომც 6 სექტემბერს გავიდა მტკვარში მცხეთის ზემოდ და თიანეთში ავიდა.¹³⁾

უფრო სარწმუნო და დასაჯერებელია მემატინე ბატონიშვილ დავითის მოთხრობა. აი როგორ აგვიწერს მემკვიდრე ტახტისა თავის ბიძის შემოსვლას ქართლში: რაკი აღუთქვეს კახთა პირი მტკიცე, რათა ჰყონ მეფედ თვისსა ზედან ალექსანდრე წარმოემართა ერევნით რაოდენითამე კაცითა, გარდმოვლო მთა თრიალეთისა და ჩამოვიდა ქსილისის მთაზედ. მუნ მიეგებნენ კავთისხეველნი და მოურავი მათი ივანე შატბერა-

12) Ibid, ტ. V, გვ. 361.

13) Утв... ტ. II, გვ. 391. რუსულად რაპორტის ეს ადგილი უაზრობას წარმოადგენს...
Перешагнул через Куру, выше Мухета, и, дорогами, в ущельях горь
находящихся, пробрался, через деревню Кавтисхели, в Тонеты. ს. კავთისხევი
მტკვრის მარჯვნივაა და რაკი აღმთიანი მარჯვნიდან მარცხნივ გადავა, კავთისხევეზე
როგორღა გაივლის?

შვილი და განიყვანეს მტკვარსა კოწახურის ფონზედ, განვლო მუხრანი, მივიდი ბულაჩაურს და აღვიდა თიანეთს თვესა აგვისტოს 10-სა.¹⁴⁾

ადვილი მისახვედრია, თუ რადაა არეულ-დარეული ბატონიშვილის ქართლში შემოსვლის დრო. პოლკოვნიკი ბებუთა-შვილი იწერებოდა, რომ ალექსანდრე 25 აგვისტოს წამოვიდა ერევნიდანაო. მაშასადამე ტფილისში ეგონებოდათ, რომ სექტემბერზე ადრე ვერ გაჩნდებოდა მტკვრის ნაპირას. ორბელიანი იმასაც ჰფიქრობდა, რომ ბატონიშვილი სომხეთში იმალება, და ავჭალაზე ამოივლისო და აღბად აქ აპირობდა მის დაჭერას. ეტყობა, ორბელიანმა ექვს სექტემბერს გაიგო ალექსანდრეს შემოსვლა და ამავე დღეს რაპორტით მოახსენა რტიშჩევს ეს სავალალო ამბავი. რადგან ბ-ნი ანოსოვი დიდად ენდობოდა რაპორტებს, აილო იმანაც და ექვსი სექტემბერი უჩვენა ბატონიშვილ ალექსანდრეს ქართლში შემოსვლის დღედ.

ელვასავით მოედო კახეთს, ქიზიყს, მთას და ოსეთს ბატონიშვილ ალექსანდრეს მოსვლის ამბავი თიანეთში. ჯერ წინაღვე ჩამოსულ გოჯასპირ ნათანიშვილმა და პაპუა აბელი-შვილმა მთელი საქართველო შესძრეს, დღე-ღღეზე მობძანდებდა ალექსანდრე და იარაღი აისხით რუსების გასაწყვეტადაო. რაკი ხმა გავარდა, რომ ალექსანდრე თიანეთშიაო, დაიძრა იარაღ-ასხმული ერი და გაემართა თიანეთისკენ. იმედიანად იყვნენ კახელები. იცოდნენ, რომ ნაპოლეონ პირველი ნაფოტით ამსხვრევდა რუსის მხედრობას, რომ მოსკოვი უკვე დაიპყრო მტერმა და რილას შიში ჰქონდათ. უძლეველია ქრისტეს მოყვარე რუსის მხედრობაო, რომ ამბობდნენ, ცარიელი თვალთმაქცობა და საბავშვო ზღაპარი ყოფილაო. აკლებული და აოხრებული მოსკოვი იმის მომასწავებლად მიიღეს, რომ რუსეთის ბუმბერაზობა ცარიელი გაბერილი ტიკტორა-აო.

14) იხ. მოთხრობა ახალი, შედგენილი ქართლის ცხოვრებისად, დაბეჭდილი მ. ჩანაშვილის მიერ, გვ. 112.

14 სექტემბერს ალავერდობა იცის, მთელი კახეთი, აქაური სომხობა, თუშ-ფშავ-ხევსურეთი და ლეკები ერთად იყრის თავს ალავერდობას 13-14 სექტემბერს. ალექსანდრემაც ეს ხალხისაგან სათაყვანებელი დღესასწაული აირჩია, რომ თავის თავი მეფედ გამოეცხადებინა და ერისაგან ერთგულობის ფიცი მიეღოვო, მოახსენებს უქვეშევრდომილესად გენერალი რტიშჩევი იმპერატორ ალექსანდრე პირველს. მემატთანე დავით არაფერს ამბობს იმის გამო, ჰქონდა თუ არა ბატონიშვილ ალექსანდრეს ასეთი განძრახვა. იგი მოკლედ ასე სჭრის სიტყვას: თიანეთს მოერთვნენ ფშავ-ხევსურნი და კახთა თავადნი სრულიად და გლეხნი, შთავიდა მატანს, მუნით შთავიდა შილდას, მუნ მოერთვა სრულიად გაღმა მხარი და ანწუხელნი ლეკნი და ქიზიყელნიცა სრულიად.

ჩვენც იმ აზრისა ვართ, რომ ალექსანდრე მეფობის აღდგენის გამოცხადებას მოერიდებოდა ალავერდობას. ღვინო არსად იყო, ეშმაკები ტიკებს ალბობდნენო, სწორედ ის გამოვიდოდა. ჯერ მტერი არ დაემარცხებინა და რას ეგვანებოდა მეფობის გამოცხადება? წინდახედული და ჭირნახული ბატონიშვილი ასეთს ბავშვურ შეცდომას არ ჩაიდენდა.

ალექსანდრე ირაკლის ძე რომ ძალას იკრებდა და საომრად ემზადებოდა, არც მთავარ-მართებელ რტიშჩევის მაგიერი გენერალი დიმიტრი ორბელიანი იჯდა გულზე ხელდაკრეფილი.

ორბელიანი იმასა სცდილობდა, შეეჩერებინა პატარა მანძილზე აჯანყება, რომ სრულიად საქართველოს არ მოსდებოდა. პოლკოვნიკ პეჩორსკის უბრძანა, ქართლიდან გადასულიყო არაგვის ხეობაზე, დაეჭირა სოფ. ბულაჩაური და შეეკრა გზა ანანურიდან თიანეთს მომავლისთვის და აგრედვე იმათთვის, ვინც თიანეთიდან ანანურს დააპირებდა ჩასვლას. ამგვარად პეჩორსკი სამხედრო საქართველოს გზასაც უპატრონებდა და ერთი ადგილიდან მეორე ადგილს მოხეტიალე მაშფოთართაც მისვლა-მოსვლის გზასაც მოუსპობდა, თუ საჭირო იქნებოდა, მაშველ რაზმსაც მიაშველებდა პოლკოვნიკი თიანეთის მიდამოებში მომქმედ რუსის მხედრობას.

პეჩორსკის ჰყავდა სამოქმედოდ ერთი ბატალიონი მეთხუთმეტე ეგერთა პოლკისა.

მეორე პოლკოვნიკი ტიხანოვსკი 8 სექტემბერს დაიძრა სიღნაღიდან თელავისაკენ. თანა ჰყავდა ხუთი როტა ყაბარდოელებისა. სოფ. ველისციხიდან აიყვანა ერთი როტა, თელავიდან ერთი ბატალიონი და ფეხაკრებით გაემართა ალავერდისაკენ. რადგან ორბელიანის ბრძანება იყო, რომ ტიხანოვსკი უსათუოდ ალავერდს ასულიყო 13 სექტემბერს და ხელი შეეშალა ბატონიშვილ ალექსანდრესთვის თავის თავი მეფედ გამოეცხადებინა, ტიხანოვსკი თითქმის უსვენებლივ მიეშურებოდა ალავერდობას. 14 სექტემბერს პოლკოვნიკი ეწვია მონასტერს ჭარით და ზარბაზნებით, მაგრამ ალექსანდრე არსად იყო. ამ დროს ალექსანდრე ს. შილდაში იდგა. ტიხანოვსკი გამოტრიალდა ალავერდის მონასტრიდან და 20 სექტემბერს შილდას მიადგა. აქ სოფელ შილდას მოხდა პირველი ძლიერი შეტაკება. ტიხანოვსკი იერიშით მივიდა შილდაზე, დაამარცხა და გაჰფანტა მემამბოხენი, თვით ალექსანდრე იძულებული გახდაო თავი შეეფარებინა ვიწრო ხეობაში, საიდანაც გადავიდა სოფელ საბუეს. აკტების მოწმობით, ტიხანოვსკის მომეტებული ნაწილი შილდისა დაუწვავს, ბ-ნი ანოსოვი-კი ამბობს, რომ შილდა სრულიად დასწვა ტიხანოვსკიმაო.¹⁵⁾ შილდიდან პოლკოვნიკი მივიდა ყვარლის ციხეში, აქ დასტოვა ავადმყოფი ჭარის-კაცნი და 35 დაჭრილი და ალაზანზე დაბანაკდა ფაშაანის ფონზე, რომ გზა არ მოეჭრათ თელავისაკენ.

ასე მოკლედ მოახსენებს გენერალი რტიშჩევი ხელმწიფეს შილდის ბრძოლის ამბავს. მოკლულთა რაოდენობაც არაა ნაჩვენები. დიდად განსხვავდება ამ ამბისაგან მემკვიდრე დავითის მოთხრობა. აი თვით დავითის სიტყვები, მკირედად ჩვენ მიერ შეცვლილი. "ტიხანოვსკი ღიანარაღი განვიდა პოლკითა ერთითა ჭინჭრიანის ფონზე ალაზანში და მივიდა შილდის ბოლოს. მაშინ შილდა განამაგრეს კახთა. მივიდა

15) Ахты, т. V, гл. 365. Утв. т. II, гл. 393.

ტიხანოვსკი ვენახების ორლობით და რა შიგ გევიდა ორლობეთა, ეკვეთნენ კახნი ვენახებიდან. იქმნა ბრძოლა ძლიერი, იძლივნენ რუსნი და მოსწყდნენ ორასამდე სალდათნი და მოკლეს კაპიტანი ერთი და აფიცარი ოთხი. იხილა-რა ესე ტიხანოვსკიმ უკუნქცევაი მხედრობისა თვისისა, განფიცხნა ფრიად, რამეთუ იყო ესე რუსთა შორის ყოველთა უმამაცესი, მოიკრიბნა კვალად მასვე დღესა მხედრობანი თვისნი და ეკვეთა კვალად კახთა მუნვე შილდას. იძლივნენ კახნი და ლეიანი, მოკლეს რუსთა ლეკთა მძღვანი მისაილ ბელადი და დასჭარეს ერასტიშვილი ალექსანდრე მუხლშლი, აღიღეს შილდა და მოსწყვეს სრულიად, ხოლო ალექსანდრე ძლეული მივიდა საბუეს და დადგა მუნ. ტიხანოვსკიცა განვიდა შილდით მხედრობითა თვისითა, მივიდა და დადგა ყვარელში. ვინაიღგან კახნი იქმნენ ფრიად განძვინებულ დაწვისათვის შილდისა, ვერღარა იკადრა ტიხანოვსკიმ ბრძოლაი, რამეთუ უვიდოდა მცირე მხედრობაი".¹⁶⁾

ამ მოთხრობიდან ცხადდა სჩანს, რომ პოლკოვნიკ ტიხანოვსკის შესამჩნევი ზარალი მოსვლია შილდის ბოლოს ბრძოლაში და ისე დასუსტებულა, რომ განძრევის თავი აღარა ჰქონია, ვიდრე მაშველი ჯარი არ მოუვიდოდა.

ასე თუ ისე, პოლკოვნიკმა ტიხანოვსკიმ ძალზე დააზარალა ქართველები შილდის ბოლოს და თვით სარდალი მეამბოხეთა ბატონიშვილი ალექსანდრე იძულებული გახდა დაეტოვებინა ბრძოლის ველი. პოლკოვნიკი პეჩორსკი რაღას აკეთებდა ამ ხანებში? სექტემბრის გასულს მეამბოხეები სრულიად გაბატონდნენ საქართველოს სამხედრო გზაზე და რუსის მხედრობას მოუჭრეს რუსეთის გზა. ხიდეები დაანგრის, ხერგები დააკეთეს და რუსეთიდან საქართველოსკენ არავის უშვებდნენ. კაიშაურსა და დუშეთ შორის გზას ყარაულობდა მაიორი ნიკოლსკი. გზის დასათვალიერებლად წამოსულ მაიორს ფასანაურთან დახვდნენ მეამბოხენი და ტყვედ წაიყვანეს. ნიკოლსკის თანა ჰყავდა სულ ოცი ჯარის კაცი. ამათგანი

16) მოთხრობა ახალი... გვ. 112-113.

ზოგი მოჰკლეს და ზოგიც დაატყვევეს. ტყვედ წაიყვანეს აგრედვე ხორუნყი მილლერი, რომელსაც პეტერბურგს მიჰქონდა მთავარ-მართებლის მოხსენებანი.¹⁷⁾

პოლკოვნიკი პეჩორსკი თავის ბატალიონით გაეშურა ფასანაურს ნიკოლსკის საშველად და დასახსნელად, სამი დღე უტრიალა ფასანაურს, მაგრამ ნიკოლსკი განსაცდელისაგან ვერ იხსნა. მართალია, მთელი ოთხი საათი ებრძოდა პეჩორსკი აჯანყებულთ, კიდევ მოახერხა თვით ფასანაურის ფოსტის დაჭერა, მაგრამ რა გამოვიდა. პეჩორსკი მოემწყვვრა ფასანაურში, სამხედრო გზა ვერ გახსნა, შეამბოხენი ვერ გაჰფანტა და თვითონაც დიდ განსაცდელში ჩავარდა. თუ მალე მაშველი ჯარი არ მოუვიდოდა ტფილისიდან, ცუდი საქმე დაემართებოდა.

კახეთში წასულ ორბელიანის მაგიერ ტფილისის გარნიზონს უფროსობდა იმერეთიდან გამოწვეული გენერალ-მაიორი სიმონოვიჩი. შეიტყო თუ არა პოლკოვნიკ პეჩორსკის გაჭირვება, სიმონოვიჩმა გაუგზავნა მაშველი ჯარი ბორჩალოს დისტანციიდან, სულ ერთი ბატალიონი პოლკოვნიკ ფონ კრაბბეს უფროსობით. ამავე დროს კავკავიდან დაიძრა მაშველი ჯარი, ორი როტა მეთექვსმეტე ეგერთა პოლკისა მაიორ გურღებუმის უფროსობით.

ფასანაურში მომწყვდეულ პეჩორსკის ბატალიონს სურსათი შემოაკლდა. ძნელი იყო ბანაკიდან შორს სადმე წასვლა პურის საშოვნად, რადგან სამხედრო გზა ღართისკარამდე აჯანყებულთ ეჭირათ, მაგრამ მეტი ჩარა არ იყო, და პეჩორსკიმ უბრძანა კაპიტან კურილას გასულიყო ფასანაურიდან მცირე რაზმით და ანანურიდან სურსათი მოეტანა. კურილამ წამოიყვანა 90 კაცი და გაუდგა სახიფათო გზას. ორჯელ ეტაკნენ შეამბოხენი კურილას. ჩახერგილ ადგილებში უხვდებოდნენ, ანანურამდე სროლით აწუხებდნენ, მაგრამ კურილამ მაინც მოახერხა და ანანურს მშვიდობით მივიდა. რა

ზარალი მოუვიდა ჯიუტს და მხნე კურილას, არა სჩანს აფიციალურ წყაროდან.¹⁸⁾

17 სექტემბერს გენერალი დიმიტრი ორბელიანი შეუდგა მზადებას კახეთში წასასვლელად. ტფილისსა და მის მიდამოებში დაბანაკებულ ჯარის უფროსობა ჩააბარა გენერალ სიმონოვიჩს და გაუდგა გზას 18 სექტემბერს ღამით. ორბელიანი, გენერალ პოტტოს მიერ "კახელების ღვთის რისხვად" წოდებული (რუსულად *бѣса*), სიღნაღს მივიდა 20 სექტემბერს, საღამოს პირზე. თანა ჰყვანდა სამი როტა მეცხრე ეგერთა პოლკისა, ერთი ზარბაზანი და 70 ყაზახი. აქ შეიტყო ორბელიანმა, რომ პოლკოვნიკ ტიხანოვსკის ხმას ვერ მიაწვდენს, რადგან კახელებს გზები შეეკრათ. ვერ გაბედა "ღვთის რისხვა" გენერალმა მცირედის მხედრობით ფაშაანს ასვლა და ტფილისიდან დაიბარა ერთი ბატალიონი ხერსონის პოლკისა, ერთი როტა ყაბარდოელებისა და 75 ყაზახი. ჯარი ავიდა სიღნაღს მხოლოდ 26 სექტემბერს და მეორე დღესვე, 27-ს სექტემბერს, ორბელიანი დაადგა გზას. სიღნაღიდან 12 ვერსზე დახვდნენ მეამბოხენი და ბრძოლა აუტეხეს. მთელი სამი დღე არ შეწყვეტილა თოფის გრიალი. კახელები მოსვენებას არ აძლევდნენ გენერალს არც დღე, არც ღამე.

პირველ ოქტომბერს ორბელიანი შეუერთდა ტიხანოვსკის ფაშანის ფონთან. რაკი შეერთება ჯარისა უზიფათოდ მოხდა, ორბელიანმა თვითონ იკისრა შეერთებულ მხედრობის უფროსობა და სარდლობა და გაემზადა მტრის ამოსაგდებად: ორბელიანს ძალიანაც რომ გასჭირვებოდა, მომეტებულ ჯარს ვეღარ მოიშველიებდა, რადგან საკუჭნაოში მეტი აღარ მოიპოვებოდა. სხვა-და-სხვა ალაგას გაბნეულ მცირე გარნიზონებს ხელს ვერ ახლებდა. ერთის სიტყვით, რის მოკრეფაც შეიძლებოდა, მოჰკრიფა და დანარჩენი მის უნარზე ეკიდა.¹⁹⁾

18) АКТЫ, т. V, გვ. 367.

19) УТВ. т. II, გვ. 393 - 394.

IV

აკტებსა და კაპიტან ანოსოვს მოკლედ აქვთ აწერილი გენერალ დიმიტრი ორბელიანის ლაშქრობა სიღნაღიდან ფაშა-ანის ფონამდე. მოხსენებული იყო მხოლოდ, რომ ორბელიანი სამ დღეს მოუხდა სიარულს და განუწყვეტელი სროლა ჰქონდა მტერთანაო. მემატიანე დავითი სულ სხვანაირად აგვიწერს ამ ლაშქრობასაც. მართლაც, რა დასაჯერებელია, რომ კახელები მარტო შორიდან სროლას დასჯერდებოდნენ. ცხადია, დიდად ეცდებოდნენ, რომ გენერალი არ შეერთებოდა პოლკოვნიკ ტიხანოვსკის და სათითაოდ, ცალ-ცალკე დაემარცხებინათ.

ბატონიშვილ დავითის სიტყვით, გენერალი დიმიტრი ყაფლანისშვილი (ორბელიანი) ათ დღეს იდგა ნუკრიანსა. უსაქმოდ არ დამაშვრალა ათ დღეს ორბელიანი ნუკრიანში. ეზრახა კახელებს და სთხოვა ზავი, მოსთხოვა აგრედვე თვით ბატონიშვილი ალექსანდრე. რადგან არც კახელებმა და არც ქიზიყელებმა არ ინებეს ლალატი და მიცემა ალექსანდრესი, აიყარა ორბელიანი ნუკრიანიდან და წავიდა შიგნით კახეთში ალექსანდრესთან საბრძოლველად. გურჯაანის ბოლოს, ნორჩებში, დაუხვდნენ კახნი და ეკვეთნენ ძლიერად, ხოლო ქიზიყელებმა უკანიდან მოუარეს რუსის მხედრობას და იერიში მიიტანეს. ამ ბრძოლაში რუსის ჯარს დიდი ზარალი მოსვლია, რადგან ორასამდე ჯარის-კაცი დაჰკლებია ორბელიანს და რადგან ათასზე მეტი კაცი არ ეყოლებოდა, გამოდის, რომ რუსის სარდალს ნორჩებში მეხუთედი ჯარისა დაუღუპავს.

დიმიტრი ორბელიანმა პირველად გურჯაანის ბოლოს, ნორჩებში, ისახელა თავი სისასტიკით. რუსებს შეეპყროთ ბრძოლის დროს ტყვედ ქიზიყელი იოსებ მამანიშვილი, ქედურად წოდებული. წარუდგინეს დიმიტრის ქედური. დიმიტრი ყაფლანისშვილმა, ამბობს მემატიანე, ჩამოჰკიდა ქედური ბოძზე პირის-პირ კახთა და ჩამოახრჩობინა. ცოფი

მოერიათ კახელებს და განძვინდნენო, ბოდზე ჩამოკონწიალებული იოსებ მამანიშვილი რომ იხილეს და შეემზადნენ ხელ-ახლა ბრძოლისათვის. გამწარებულ კახელებს რომ ხელავდა ორბელიანი, ველარ შესძლო ნორჩებში გაჩერება, აიყარა და წავიდა ტყე-ტყე ველისციხისაკენ. შავ-ტყეში დაუხვდნენ კახელები და შეეტაკნენ. აქაც, მემატთან სიტყვით, რუსებს მოუკლეს და დაუკოდეს უმეტეს ასისა სალდათისა. რაკი ვერ მოახერხა ორბელიანმა ტყის გზით გასხლტომა, გამოვიდა ტყიდან მინდორზე და მიადგა ველისციხეს, წაუკიდა სოფელს ცეცხლი და გადასწვა სრულიად. ღამე აქ გაათია და მეორე დღეს გაემართა შიგნით კახეთსა ზედა. მუნცა მრავალ გზის დახვდნენ კახნი და ავნეს ფრიად რუსთა. ულონოდ ქმნილი ღიმიტრი მივიდა ალაზანზე და გავიდა ფაშაანთან, რათა შეუერთდეს პოლკოვნიკ ტიხანოვსკის, ხოლო სოფელი ფაშაანი სრულიად დასწვა. კუის წყაროზე გაჩერდა ორბელიანი და აქ ელოდდა ტიხანოვსკის, რომელიც თავის მხედრობით მალე მოვიდა ყვარლიდან. კუის წყაროსთან შეერთებული ჯარი აიყარა და ავიდა შილდის ბოლოს. ამ დროს ალექსანდრე სოფ. საბუეს იდგა, მაგრამ რალაც მიზეზის წყალობით აქ ბრძოლა არ მოხდა.

ბატონიშვილი ალექსანდრე საბუედან შაქრიანს მივიდა, შაქრიანიდან კალაურს და აქედან ველისციხეში ჩავიდა, სადაც ერთ კვირას გაჩერდა. ორბელიანი ფეხდაფეხ დასდევდა ბატონიშვილს და დაწვევით-კი ვერ მოეწია. მწუხარე კილოთი მოახსენებს ორბელიანი მთავარ-მართებელს რტიშჩევს ამ უაზრო და უნაყოფო ხეტიალის ამბავს ერთი სოფლიდან მეორე სოფლამდის. ერთ ადგილს საქმეს რომ გავათავებ და ხალხს მორჩილების გზაზე დავაყენებ, გადავდივარ მეორე ადგილს, მაგრამ ბატონიშვილი გაჩნდება დამორჩილებულ სოფელში და ხელახლა გაკეთებულ საქმეს მიწეწავს და მიფუჭებსო.²⁰⁾

20) იხ. უთ. ტ. II, გვ. 359.

ასე ზოზინით მიდიოდა კახეთის დაწყნარების საქმე, რტიშჩევი რომ დაბრუნდა ყარაბაღიდან ტფილისში ოქტომბრის პირველ რიცხვებში. ჩამოსვლისთანავე რტიშჩევმა თვით გენერალი სიმონოვიჩი აფრინა საქართველოს სამხედრო გზის გასახსნელად. თან გაატანა სამი ბატალიონი და უბრძანა, რაც გზაზე ჯარია, შენთვის ჩამიბარებია და გასწმინდე გზა მემამბოხეთაგან თვით ქალაქ ქავკავამდეო. ანანურში რომ ავიდა სიმონოვიჩი, გასაკეთებელი აღარა დახვდა რა. პოლკოვნიკმა პეჩორსკიმ, კრაბბემ და მთორ გურლებუმმა მემამბოხენი დაიმორჩილეს, გზა უშიშარი ჰყვეს და მისვლა-მოსვლა განაახლეს. გულამაყრელებმა და მთიულეებმა ქელი მოიხარეს და ნიშნად მორჩილებისა თავი კაცები გაგზავნეს რუსის მხედრობის სარდლებთან. ჩვეულებისამებრ თავმა კაცებმა კისერზე ხმლები ჩამოიკიდეს და წარსდგნენ წინაშე რუსის სარდლებისა. ითხოვეს შენდობა-პატივება. ერთგულების ფიცი მიიღეს და ამანათები გადასცეს. რაკი ასეთი ამბები დახვდა სიმონოვიჩს ანანურში, გამობრუნდა ფასანაურიდან უკან, ვინც-კი შეხვდა გზაში მოხეტიალე, ზურგზე ბოლი აადინა და პირდაპირ საგურამოს გზით, მარტყოფით, ხაშმით, პატარძელუთ და საგარეჯოთი გასწია კახეთისაკენ გენერალ ორბელიანის საშველად.²¹⁾

ველისციხიდან ალექსანდრე გადავიდა ჩალაუბანს, სადაც მოერთვა დალესტნის მხედრობით ალისკანტი, დიდი ჩინებული ლეკთა მძღვანი. ხუთი ათასი საუკეთესო ლეკი მოიყვანა ალისკანტიმ თანა.²²⁾ კაპიტანი ანოსოვი ამბობს, ვინ იცის, რამდენ ხანს გაგრძელდებოდა სოფლიდან სოფლად სიარული ალექსანდრესი და უკან დევნა ორბელიანისა, რომლის დროს იღუპებოდა ორივე მხრიდან მრავალი ხალხი, იწოდა და იბუგებოდა სოფლები და ვენახები და რომლის დროს აყვავებული კუთხე იქცეოდა ერთ დაუსრულებელ და თვალუწყვენელ ცეცხლის კოცონად, - მოუფიქრებელი აზრი რომ არ

21) იბიდ. გვ. 395.

22) იხ. მოთხრობა ახალი, გვ. 113 - 114.

მოსვლოდა ბატონიშვილს თავშიო. ეს წინდაუხედავი აზრი, ანოსოვის სიტყვით, ისაა, რომ ალექსანდრემ თავი მიაწება მაგარ პოზიციების რაიონს - საბუე, შილდა, ყვარელს და სიღნაღისაკენ დაიძრაო.

ორბელიანმა რომ შეიტყო ალექსანდრეს დაბანაკება ჩალაუბანს და ალისკანტის მოსვლა დაღესტნის მხედრობით, აიყარა კახეთიდან და ჩამოვიდა ს. ანაგას. ტიხანოვსკი და ორბელიანი გაჩერდნენ ანაგის ბოლოზე, კოდაზედ.

სიღნაღის კამენდანტად ამ დროს იყო მაიორი ორბელიანი, ძმა გენერალ დიმიტრისა. კაპიტან ანოსოვის სიტყვით, სიღნაღის მეციხოვნეთა რაზმი შესდგებოდა ორას სალდათისაგან, მემატთანე დავით-კი ჰმოწმობს, რომ მაიორ ყაფლან ორბელიანს ჰყავდა რვაასი სალდათიო. ყაფლანთანვე იყვნენ ქიზიყის მოურავი იოსებ ანდრონიკაშვილი და ნინია აფხაზიშვილი და სხვანი თავადნიცა მცირენი კახეთისანი. სიღნაღის ციხეს გარს ერტყა კახელობა და ლეკობა და სრულიად მოეწყვეტათ იგი როგორც ტფილისს, აგრედვე კახეთს.

კაპიტან ანოსოვს უკვირს, ალექსანდრემ როგორ დაანება თავი მაგარ პოზიციებს და სიღნაღისაკენ რად დაიძრაო. ჩვენის ფიქრით, აქ საკვირველი არაფერია. სიღნაღის აღებით და მეციხოვნეთა ამოწყვეტით ტფილისი მოსწყდებოდა კახეთს და ორბელიანი ღვთის ანაბარად დარჩებოდა. - ან. განძრახვის სისრულეში მოსაყვანად ალექსანდრე წამოვიდა ჩალაუბნიდან და დადგა მალაროს. მაშინ ორბელიანმა გაიარა წინა მხარი, ამოვიდა ზურგით პრასიანზე, ააოხრა მირზაან-მაჩხაანი და გაემართა მალაროსაკენ. ქიზიყელებმა გზა შეუკრეს დიმიტრი ორბელიანს, მაგრამ ვერას გახდნენ, რუსებმა აჭობეს.

ალისკანტის ლეკები მხნედ ებრძოდნენ სიღნაღის მეციხოვნეთ და კინალამ დაიპყრეს ციხე. ორბელიანს ასეთი გეგმა ჰქონდა სიღნაღის გამოხსნისა. დანიშნულ დროს სიღნაღიდან მეციხოვნენი უნდა გამოსულიყვნენ და აეტეხათ ბრძოლა ალექსანდრესთვის. ამავე დროს თვით ორბელიანი ზურგიდან, ს. პრასიანიდან და ზემო მაჩხაანიდან შეუტევედა მტერსა. გეგმა მოხერხებულად აღმოჩნდა შედგენილი და

სანაქებოდ შეასრულეს რუსებმა. მომწყვედელი ორის მხრით ალექსანდრე იძლია და დამარცხდა. ზარალი დიდი მოუვიდაო, სწერია აქტებში, მაგრამ რაოდენობა ზარალისა აღნუსხული არ არის.²³⁾

თვით გენერალი რტიშჩევი უქვეშევრდომილესად ასე აუწერს იმპერატორ ალექსანდრე პირველს ნოემბრის რიცხვით ბატონიშვილის დამარცხებას. ს. შილდასთან დამარცხებული ბატონიშვილი ქიზიუში ჩაიპარა, სადაც ხელახლა შეჰკრიფა მემბოხეთა ბრბონიო. ორბელიანი უკან დაედევნა და გზაში შეიტყო, რომ მემბოხენი და ლეკები თვრამეტ ოქტომბრიდან მოყოლებული ოცდა ერთამდე გარს არტყიან სიღნაღის ციხეს და თოფებს უშენენო. ამის გამო გენერალი ორბელიანი გაეშურა სიღნაღისაკენ დახმარების აღმოსაჩენად, ხოლო ალექსანდრე მალაროში დაბანაკდაო. ამ დროს სიღნაღის კამენდანტი მაიორი ორბელიანი ციხიდან გამოვიდა, გადასწვა ს. ვაჭირი და შეატყობინა ეს ამბავი გენერალ ორბელიანს. 23 ოქტომბერს გენერალი ორბელიანი სუბუქი მხედრობით ს. პრასიანზე და ზემო მაჩხაანზე წავიდა იმ განზრახვით, რომ ბატონიშვილისთვის უკანიდან ეყელა და რაკი სროლას აუტეხდა მემბოხეებს, მაშინვე მაიორი ორბელიანიც უნდა გამოსულიყო ციხიდან და დასცემოდა ალექსანდრეს მეორე მხრიდან, ესე იგი პირისპირ. ახლო მდებარე სოფლებიდან ზოგიერთნი მიეგებნენ გენერალ ორბელიანს, მორჩილება მოახსენეს და სთქვეს, შიშმა გვაიძულა და ავჯანყდით, თორემ ამბოხების გუნებაზე არა ვართო. ორბელიანი გორაკს რომ მიუახლოვდა, რომელზედაც ს. პრასიანია დაფენილი, მემბოხეებმა სროლა დაუწყეს, მაგრამ რუსის მხედრობამ დაუბრკოლებლივ დაიჭირა გორაკიც და თვით სოფელიცაო. მაშინათვე მაიორი ორბელიანი გამოვიდა ციხიდან ქვეითა ჯარით და სომხებით, და მარდად და მარჯვედ აიჭრა გორაზე, მალაროს პირთან რომაა. რაკი ორივე მხრივ მტერი მოადგა და საშიშო შეიქმნა აქ გაჩერება, ალექსანდრე აიყარა და გაიქცა. სომხები

23) АКТЫ, т.V, кк. 367, утв. кк. 396.

სამი ვერსის მანძილზე უკან მისდევდნენ გაქცეულ ბატონი-შვილს, რომელსაც დიდი ზარალი მოუვიდაო.

ყველა ეს რომ გაითვალისწინა ქიზიყელობამ და იხილა თვისი დაღუპვა და მოტყუება ბატონიშვილის მიერ, რომელმაც ათასი სიკეთე აღუთქვა ქიზიყსაო, სთხოვა გენერალ ორბელიანს, ცოდვები შეგვინდეთ. ამის გამო ორბელიანი, როგორმე რომ დააცხროს თავხედობა და სიშმაგე ქიზიყელებისა, სცდილობს და აქეზებს ქიზიყელებს ბატონიშვილის მომხრეების და ლეკების წინააღმდეგ, ვინაიდან ლეკთა დაუხმარებლივ აღექსანდრე ვერას გახდებაო.²⁴⁾

სიღნაღთან დამარცხებული ალექსანდრე მივიდა ჩალაუბანს და იქ გაჩერდა. ბატონიშვილ დავითის სიტყვით, ჩალაუბანი ფრიად მაგარი ადგილი ყოფილა.

ვიდრე აქაურ ამბებს მოუთხრობდეთ მკითხველს, საჭიროდ მიგვაჩნია დაუბრუნდეთ შილდას და რამდენიმე ეპიზოდი მოვიხსენიოთ. თავის თავად ეს ეპიზოდები ბევრს არაფერს წარმოადგენს, მაგრამ შესამჩნევად ახასიათებს თითო-ოროლა ქართველს, რომელთაც რუსთაგან დიდი წყალობა, ჭილდო და ჩინები გაიკრეს. გვიკვირს, უყურადღებოდ რად დასტოვეს პოლკოვნიკ თ. ერისთავის ვაჟკაცობა მემატინე დავითმა და კაპიტანმა ანოსოვმა.

ზემოდ დასახელებულ უქვეშევრდომილეს მოხსენებაში მთავარ-მართველი ასე აუწერს იმპერატორს შილდის მეორედ აკლების ამბავს: ცხრა ოქტომბრამდე არაფერი არ იცოდა ტფილისში მყოფმა გენერალ სიმონოვიჩმა, თუ რა კეთდებოდა და რა ხდებოდა კახეთშიო. ცხრა ოქტომბერს კი

ორბელიანიდან მოუვიდა ცნობა სიმონოვიჩს ჯაშუშების პირით²⁵⁾, რომ შილდასთან დამარცხებული ალექსანდრე ველის ციხესთან გაჩერდაო. აქ შეიკრიფა ლეკთა ოცი დროშაო. სუზდალის პოლკის შეფი პოლკოვნიკი ერისთავი²⁶⁾ უფროსობდა მოწინავე რაზმს და ეკვება ალექსანდრეს, რომელსაც 2000 მეტრძოლი ჰყავდაო. იერიში ერისთავმა ხიშტით მიიტანა, დაამარცხა ბატონიშვილი, ბევრი მეომარი გაუჟღიჭა და წაართვა ბარგი, იარაღი და რვა დროშა. ასეთი დამარცხების შემდეგ ორბელიანი აპირობდა თელავში ჩასვლას და იქ დატოვებას მიმეტებულ ბარგისას და დაჭრილ სალდათებისას, მაგრამ განძრახვა შეიცვალა და შილდას წავიდა, რადგან ცნობა მოუვიდა, რომ ალექსანდრე იქ არისო. შილდისაკენ ჯარი სამ რაზმად დაეწყო და გაემართა. ორს უფროსობდნენ თ. ერისთავი და პოლკოვნიკი ტიხანოვსკი. ორბელიანმა ხიშტით მიიტანა იერიში ისეთის სისწრაფით, რომ ლეკები აირივნენ, დაიბნენ და სროლას თავი მიანებეს. შილდაში ბატონიშვილს ეყოლებოდა 6,000 კაცი, მათ შორის 2000 ლეკიო. რადგან შილდელებმა ორჯერ მიიღეს ბატონიშვილი და ორჯერ აისხეს იარაღი მათის იმპერატორობითის უდიდებულესობის მხედრობის წინააღმდეგ, ორბელიანმა სასტიკად და ულმობელად დასაჯა სოფელი. დასწვა სრულიად იგი, რაც რამ სახლი და ვენახი იყო, სულ ერთიან გაანადგურა,²⁷⁾ ხოლო პური ნაზინის სასარგებლოდ ჩარიცხა.

11 ოქტომბერს ორბელიანმა შენიშნა, რომ ტყეებიდან და სოფლებიდან ხალხი გამოდის და ბატონიშვილისაკენ მიდის საბუესა და ენისელის ახლო-მახლო. გზის მოსაჭრელად

25) ცხადია, რომ ეს ჯაშუშები ქართველები იქნებოდნენ.

26) თავ. ერისთავის პოლკი კავკასიის ლინიაზე იდგა, ხოლო ერთი ბატალიონი ამ პოლკისა ჩვენში. ამ ბატალიონის დასახედად ჩამოსულიყო ერისთავი და თავად ორბელიანს წაუყოლია კახეთის ექსპედიციამო. იქნება ერისთავი კახეთს თავის სურვილით წავიდა ამბოხების ჩაქრობაში მონაწილეობის მისაღებად, ან შეიძლება, ესლა რომ იტყვიან, ორბელიანთან პრიკამანდიროვანი იყო (прикомандированъ).

27) რუსულად Селенде предаю огню, весь дома и сяды истреблены до основания, а хлѣбъ забрагъ въ казну.

ორბელიანმა გაგზავნა ყაზახთა პოლკოვნიკი მილლერი ყაზახებით და 50 სალდათით. მოხერხებულ ალაგას ჩაუსაფრდა მილლერი და ელოდა ბატონიშვილისაკენ წამსვლელთ. აგერ გამოჩნდა პატარა რაზმი, ასე 54 კაცი; ისე სწრაფად ეცა მილლერი მოახლოვებულ რაზმელებს, რომ ერთი თოფის დაცლაც ვერ მოასწრეს. ნახევარი რაზმელებისა დაიხოცა, მეორე ნახევარი რაზმისა ტყისაკენ გაიქცა და ტყის პირში ჩამალულ ქვეითა ჯარს წააწყდა და სულ ყველანი ხიშტებზე იქმნენ აგებულნი. რუსებს ერთი ჯარისკაციც არ დაჰკლებიათ.

ცამეტ ოქტომბერს ბატონიშვილს მოუვიდა 2000 ლეკი და დააპირა თავს დასხმოდა საკვების მოსაგროვებლად გასულ რაზმსა, რომელსაც დარაჯობდა და იცავდა პოლკოვნიკ ერისთავის კამანდა. სროლა ისმოდა დილიდან დაწყობილი შუადღის პირველ საათამდე. ორბელიანმა მაშველი ჯარი გაუგზავნა ერისთავს. სწორედ იმ დროს, ჯარი რომ ბანაკიდან დაიძრა, ალექსანდრე დაეცა ერისთავს სამის მხრით. ერისთავი მაგრად იდგა და ფეხს არ იცვლიდა, თავდამსხმელთ მხნედ უმასპინძლებოდა ხიშტით და ზარბაზნის საფანტით. რაკი მაშველი ჯარი მოუვიდა, ეკვეთა ერისთავი ბატონიშვილის მხედრობას. ბევრი მათგანი ხიშტების წვერებზე ააგო და დამარცხებულნი ალალა სოფლის თავში. გზა-გზა ორი ჩახერგილი ადგილი აიღო და მრავალი ხიშტით დაკოდა: ამ გვარად პოლკოვნიკმა ერისთავმა დაამარცხა მეთამბოხენი და დაიჭირა შილდის ციხე.

ასეთი თვალსაჩინო იყო პოლკოვნიკ ერისთავის მონაწილეობა კახეთის ამბოხების ჩაქრობის საქმეებში და რად უგულვებელ ჰყო იგი კაპიტან ანოსოვმა, არ გვესმის.

სიღნაღთან დამარცხებული ალექსანდრე ჩალაუბანს დაღდა.²⁸⁾ ექვსი ათასი მეომარი ჰყავდა ბატონიშვილს შეგროვ-

28) რტიშჩევი ბრძანებს, რომ სიღნაღთან გაქცეულ ბატონიშვილს სამი ვერსის მანძილზე სომხები მისდევდნენო. ბატონიშვილის ცხენოსან ჯარს სიღნაღის მოქალაქენი ფეხით როგორ გამოეკიდნენ, აკტებიდან არა სჩანს. ისიც შეუძლებელია, რომ მოქალაქეთ იმოდენა ცხენები ჰყოლოდათ, რომ დღით ცხენოსანი რაზმი დაეღვენებინათ, პატარა კლდე დევნას ვერ გაბედავდა. სიღნაღელ სომხების ორგულობის შესახებ ბატონიშვილი დავით კრიხტს არა სძრავს. შემდეგ დაეინახავთ, როგორ გამოიყენა რტიშჩევა სომხების ვითომ და ორგულობა ალექსანდრესადმი და ერთგულობა რუსებისა.

ილი ჩალაუბნის ხეობაში. ჩალაუბნის ხეობა, როგორც ბ-ნი ანოსოვიც ეთანხმება მემატიანე დავითს, ბუნებით ძლიერ მაგარი ადგილი ყოფილა. ვიწრო, ტყით დაფენილი ხეობა, მრავალ შტოდ იყოფებოდა და აქ გამაგრებულ მებრძოლს დიდ ხანს შეეძლო თავდამსხმელ მტრის მოგერება. იერიშით აღება რომ მოგვენდომა ჩალაუბნისა, დიდი მსხვერპლის შეწირვა დასჭირდებოდა რუსის მხედრობასაო. საბედნიეროდ ორბელიანისა, ამბობს ანოსოვი, ალექსანდრე აიყარა და მანავისაყენ გაემართა, რადგან შეიტყო, რომ არაგვიდან და საგურამოდან წამოსული სიმონოვიჩი საგარეჯოს მოსულაო. ალბად შეეშინდა ალექსანდრეს, როგორც სიღნაღს, აქაც ორივე მხრიდან არ მომიარონ რუსებმა და შუაში არ გამსრისონო. ამის გულისათვის დასტოვა ბუნებით მაგარი ჩალაუბანი და მანავს გაემურა, რათა ჯერ სიმონოვიჩი დაემარცხებინა და შემდეგ ორბელიანს მობრუნებოდაო. ორბელიანმა რომ შეიტყო ალექსანდრეს წასვლა მანავს, ტიხანოვსკი გაგზავნა ველისციხეს და თვითონ 26 ნოემბერს 1812 წელს 450 სალდათით გაემურა მანავს.²⁹⁾

გამოდის, რომ ჩალაუბანში ბრძოლა არა ყოფილა, ალექსანდრეს დაუცლია ბუნებით მაგარი ადგილი უომრად და მანავს წასულა. ბატონიშვილი დავით-კი აგვიწერს ჩალაუბანში მომხდარ ამბავს. რითი ავხსნათ ასეთი უთანხმოება? ვფიქრობთ, ალბად, შერცხვა ორბელიანს და არაფერი მისწერა რტიშჩევს. რაკი შესაფერი რაპორტი არ დაიწერა თავის დროზე, ისტორიაც ცალმხრივი გამოდის, რუსებისთვის საამო და ქართველთა წარსულ თავგანწირულობისთვის სათაკილო.

მაღაროსა, ქედელისა და ნუკრიანის დაწვის შემდეგ ორბელიანისა და ტიხანოვსკის მიერ, ალექსანდრე კვალად ჩალაუბანს დადგა, ამბობს დავითი. მხილველი ამისი დიმიტრიცა უკან შეუდგა. მისრულმან ჩალაუბნის ბოლოს, გაჰყვნა მხედრობანი თვისნი ორად, წინა მხრით წარავლინა ღიანარალ ტიხანოვსკი მხედრობითა თვისითა, რათა უყოს

ზედა დასხმაი ალექსანდრეს ჩალაუბანს, ხოლო თვით დიმიტრი მივიდა უკანა მხრით. ეკვეთნენ ლეკნი კახითურთ და იქმნა ბრძოლა ძლიერი. თუმცაღა მხნედ უყვეს ზედა დასხმაი რუსთა, გარნა იძლივნენ მუნ რუსნი ორსავე მხარესა და მოსწყდნენ უმეტეს სამასისა რუსნი, ხოლო დიმიტრი, ვერა რისა მყოფელი, უკუნეჲცა და მოვიდა კელმეჲურს და დადგა ლაკბეზენდან.³⁰⁾

ასე გათავებულა ჩალაუბნის ხეობაში ბრძოლა.

V

ს. მანავი გაშენებულია ტიტველა კლდიან მთის ძირობაზე. სიმაღლე მთისა სჭარბობს სამი ათას ფუტსა, თითქმის აღარა აკლია-რა ერთ ვერსსა. ძველის-ძველად მანავის კლდიან მთის წვეროზე აუგიათ ციხე-სიმაგრე, ამბობენ თამარდედლოფლის ნაშენია ციხეო. შეურყეველ ბურჯად და დარაჯად ედგა მანავის ციხე წამებულ საქართველოს, ბევრჯელ შეხეთქებია მის კლდესა და კალთებს მტრის მკერდი, მრავლად დაღვრილა ქართველის სისხლიც მანავის ციხის უბე-კალთაში. მინგრეულ-მონგრეული, დაშლილი და უპატრონობისაგან გაოხრებული და ხავს-მოკიდებული ეხლაც აპირობდა უკანასკნელად პატრონობა გაეწია წამებულ ქართველთათვის. ბატონიშვილ ალექსანდრეს დიდ ხანს შეეძლო აქ გამაგრება და ბრძოლა მტერთან, მაგრამ როგორ, ან რითი? ზარბაზნები ალექსანდრეს არა ჰქონდა, სწამაო სურსათის აზიდვა დარღვე-

30) იხ. ახალი მოთხრობა. გვ. 114. ამ მოთხრობაში ხშირად გვხვდება ისტორიული სახელები: ლაკბე, შავი-ტყე, კუის-წყარო, კელმეჲური, კოდა, ნორჩები, კოწახურის ფონი, ფაფრის მინდორი და მრავალი სხვა. სამხედრო ოლქის შტაბის როჲას არაგვის გვათხოვებს, ქართული არა გვაქვს და ამის გამო არ შეგვიძლიან დანაშაულებით აღვნიშნოთ მაგ ადგილების მდებარეობა. ადგილობრივ მყოფ ისტორიის მოყვარულნი კარგს იზამენ. აღწერონ გეოგრაფიული მდებარეობა მათი და გამოგ ხავნონ ზეხს სახელზე. ლაკბეს აღწერა უკვე გამოგვიგზავნა მღვ. ნათიძემ.

ულ ციხეში შეუძლებელი იყო, რადგან ზურგიდან ფეხდაფეხ მოსდევდა ორბელიანი და წინიდან ელობებოდა სიმონოვიჩი.

რუსის გენერლები შეიყარნენ მანავის არე-მარეს 28 ნოემბერს 1812 წელს. მაშინდელ ღროის მიხედვით დიდი ჯარი ჰყავდათ რუსებს, არა ნაკლებ ორი ათასი სალდათისა. მართალია, რაოდენობა არც აგრე დიდია, მაგრამ ნუ დაგვავიწყდება, რომ ჯარი გაწვრთნილი ჰყავდა მტერსა და სამხედრო დისციპლინით შებოჭილ-გამაგრებული. მეამბოხეთა უბედურება უფრო ის იყო, რომ რუსებს ზარბაზნები ჰქონდათ და ქართველებს არა. საერთოდ მილიციას ღონე ვერ შესწევს დიდ ხანს ებრძოლოს რეგულიარულ ჯარს და არტილერიას. მარტო ვაჟაკობა და მამულისშვილობა მილიციონერისა ხშირად ვერას აწყობს სამხედრო წესზე გაწვრთნილ ჯართან.

ბატონიშვილმა ალექსანდრემ მიანება თავი მანავის ციხეს და გადავიდა ჩაილურს, იქვე მანავის ახლოს. აქ მოხდა ძლიერი ბრძოლა რუსთა და ქართველთა შორის. ბატონიშვილ დავითის სიტყვით, ამ ბრძოლაში მოსწყდნენ რუსნი ვიღრე ორასამდე და განიყარნენ ღამესა მას თვის თვისად. მთავარ-მართველი რტიშჩევი კი ატყობინებს გრაფ რუმიანცევს, რომ ალექსანდრეს ზურგზე მტვერი ავადინეთო.³¹⁾

მანავის მიდამოებში მომხდარ ბრძოლას გენერალი რტიშჩევი დიდ მნიშვნელობას აძლევს და ამ სიტყვებით აღნიშნავს მის სიდიადეს. დავბრუნდი თუ არა საქართველოში, მაშველი ჯარი გაუგზავნე ორბელიანს. ჯარი სხვა და სხვა მხრიდან მიესია ბატონიშვილს, რომ მეამბოხეთა ძალა გაყოფილიყო და დაქსაქსულიყო. ამით ისარგებლა სამსახურში მუყაითობით განთქმულმა გენერალ-ლეიტენანტ ორბელიანმა,³²⁾ მკვეთრად და სწრაფად ესხმოდა მეამბოხეთა უმთავრეს ძალას, მრავალჯერ ამარცხებდა და ბოლოს, სოფ. მანავთან, ბატონიშვილს ზურგზე ბოლი აადინაო. ორბელიანმა გაუფანტა ალექსანდრეს მოზიარენი, რომელთაც თავი მიანებეს და

31) რუსულად: Разбитъ в прахъ.

32) რუსულად: отлично-усерднымъ къ службѣ.

თავიანთვის წავიდ-წამოვიდნენო. ამ გვარად გენერალ ორბელიანმა ბოლო მოუღო უსასტიკეს რევოლუციას, თუმცა ისიც სათქმელია, რომ თვით გენერალ ორბელიანმა თავის ხელქვეით მყოფ მამაცი ჯარით მთელი ოთხი თვის განმავლობაში საშინელი დაბრკოლება, ტანჯვა და მწუხარება გამოიარა მტრის დევნით და დაუსრულებელ ბრძოლით მთებსა, ხეობებში და ტყეებში და მერე ისიც შემოდგომის საძაგელ ტაროსის დროსაო. ერთის სიტყვით, ყოველი საქმე ორბელიანისა ამ ექსპედიციაში დაგვირგვინდა გამარჯვებით. მისმა საქციელმა ნათლად დაამტკიცა, რომ იგი თავგამოდებული სამსახურის სარგებლობისა და მათის იმპერატორების ღიღებულების იარაღის სახელისათვის, რომ იგი მოქმედობდა და მოღვაწეობდა როგორც შეპფერის სამშობლოსა და ხელმწიფე იმპერატორის განუსაზღვრელ ერთგულ შვილსაო.³³⁾

პირისპირ ბრძოლა, ვაჟკაცურად, იარაღით ხელში, დასრულდა ჩაილურთან. გამარჯვება ორბელიანისა რტიშჩევმა ფერად-ფერადი სიტყვებით შეატყობინა გრაფ რუმიანცევს ხელმწიფის მოსახსენებლად, მაგრამ ის კი აღარ მოახსენა რტიშჩევმა რუმიანცევს, თუ რა საძაგლობა და ვერაგობა ჩაიღინეს რუსებმა და მოლალატე ქართველებმა ჩაილურში. აბა ამას რად დასწერდნენ, თავის მტერი ვინაა?

როგორც ზემოდ მოვიხსენიეთ, ძრიელი ბრძოლა ჩაილურთან დასრულდა საღამოს. ბატონიშვილ დავითის სიტყვით, ღამესა ამას შეუჩინეს რუსებმა კაცი ალისკანტის ბელადსა და მისცეს ქრთამი ღიდი და აღუთქვეს უვნებლად მხედრობითა თვისითა განტევება, რათა წარვიდეს იგი შინა. ხოლო ალისკანტიმაც დაუტევა ალექსანდრე და განიპარა ღამესა მას მხედრობითა თვისითა. მხილველთა კახთა ამისთა იწყეს განბნევა თვის თვისად სახლთა შინა. მაშინ ორგულ ექმნა ალექსანდრეს ბარძიმ ჩერქეზიშვილი, მოვიდა დიმიტრისთანა და უთხრა, უკეთუ მომცემთ ჯილდოსა, მიგიყვანთ ტყე-ტყე და ხელთ ვიგდებთ ალექსანდრეს. მსმენელმან

დიმიტრიმ მისცა როტა ერთი და ზარბაზანი ორი. გაუძღვა ბარძიმ, მისრულთა უკანით, უყვეს ზედა დასხმაი კახთა და განაბნივენეს კახთა მხედრობანი, ხოლო დანაშთთაცა ლეკთა გარდავლეს მთა ჭერამისა. შთასრულთ ფაფრისა მინდორსა შინა მუნ დახვდა ტიხანოვცკი რუსთა მხედრობითა და მოსწყვიტა მრავალნი ლეკნი. ხოლო კახთაცა, ურცხვინობის სამოსლისა შემმოსელთა, ამათაცა მოსწყვიტეს ლეკნი იგი, რომელნიცა გამოხსნისათვის კახეთისა სისხლსა აქცევდნენ. მხილველი ამისი, უღონო ქმნილი კახთაგან ალექსანდრე წარვიდა მთის გზით და აღვიდა ფშავშია, ხოლო იქიდან ხევსურეთს და იყო ყამი რაოდენიმე მუნ.

აღშფოთებული დავით ასე განაგრძობს ჩვენის ზნეობის დაცემის და სიწამხდრის ამბავს. მყოფობასა დიმიტრისასა მანავსა შინა, მაშინ ორნი მეცხვარენი თუშნი, მომავალნი, იორის პირით, იხილა ერმილ მუხრან ბატონიშვილმან, ძემან სვიმონ ნასახჩიბაშისამან. რომელთა აქენდათ იარალი თუშთა მათ კეთილი, შემკული ვერცხლითა. მიზეზისა ამისთვის შეიპყრნა იგინი და მიგვარა დიმიტრის და შეჰსწამა ტყუილად ფიცითა, ვითარმედ ესენი იყვენენო ალექსანდრესთან და გვესროდნენ თოფსაო, რომელსაცა ერმის არა ეხილვა ბრძოლა იგი. ოი უსჯულო სვინიდისი მისიო ხოლო ჰკითხეს რა თუშთა მათ, იწყეს ფიცილი, რომელ იგინი თვინიერ ცხვრისა თვისისა არაოდეს სადმე ყოფილან, გარნა არა უსმინა დიმიტრი ტირანმან, და მოაშთვა იგინი და მერმე დაწვნა ცეცხლსა შიგან მანავს.³⁴⁾

მანავ-ჩაილურს დაბანაკებულ ალექსანდრეს მოერთვა ძირობა საგარეჯოდან დაწყებული ვიდრე მარტყოფამდე. ეს კუთხე საქართველოსი შიდა კახეთსავით ამბოხების ქარცეცხლში იყო გახვეული. ალექსანდრე მოელოდა დაღესტნიდან მაშველ ჯარსაც. სწორედ 28 ნოემბერს, როდესაც ჩაილურთან ბრძოლამ დილიდან საღამომდინ გასტანა და მებრძოლნი ბინდმა განაშორა, ველისციხესთან მოხდა მეორე ბრძოლა.

34) იხ. ახალი მოთხრობა... გვ. 115 - 116.

კახეთში დატოვებული პოლკოვნიკი ტიხანოვსკი გადაეღობა დაღესტნიდან წამოსულ ლეკების რაზმს და გაფანტა, მაშველი ჯარის მოუსვლელობამ, ბელად ალისკანტის და ბარძიმ ჩერქეზიშვილის დალატმა განსაცდელში ჩააგდო ალექსანდრე და იძულებული გახდა მოშორებოდა მანავ-ჩაილურის არემარეს. ალექსანდრე აიყარა და გომბორის გზით გადავიდა კახეთში და დადგა კისისხევს. აქედან წავიდა სოფელ ფშაველს და შემდეგ ავიდა თიანეთს.

დიდხანს არც ორბელიანი გაჩერებულა მანავს. რაკი ბატონიშვილი კახეთს დაბრუნდა, აიყარა მანავიდან ორბელიანი სვიმონოვიჩითურთ და დადგა ლაკბეზე. ლაკბეზე ორბელიანმა ხელახლა გამოიჩინა ვერაგობა. დაარწმუნა ფიცით კახელი თავადიშვილები, ვინც ალექსანდრეს ემხრობოდა, რომ ოღონდ მოდით ჩემთან და უვნებელნი იქნებითო.

ბევრმა ირწმუნა ფიცი ორბელიანისა და გამოცხადდა მასთან. ორბელიანმა შეიპყრო მოტყუებით მოწვეულნი, გათოკა და გაუგზავნა ტფილისში მთავარ-მართებელს, რომელმაც იგინი გაისტუმრა ციმბირს.

ლაკბედან აიყარა ორბელიანი და შევიდა ქიზიყში. აქ ორბელიანმა შეიპყრა ჯალია ჯალიაშვილი, უმამაცესი ყოველთა ქიზიყელთა შორის და ჩამოაღრჩო სიღნაღს. ქიზიყიდან ორბელიანი შევიდა შიდა კახეთს და იავარ ჰყო ყოველნივე ნაქონებნი თავადთა და აზნაურთანი. ბატონიშვილ ალექსანდრეს მომხრე თავად-აზნაურობას არბევდა ორბელიანი ქიზიყის მოურავის იოსებ ანდრონიკაშვილის და ნინია ერასტიშვილის რჩევითა. მემატიანე დავითის სიტყვით, იოსებმა და ნინიამ უფრო მეტად აიკლეს კახეთი, ვიდრე ორბელიანმა და რუსებმაო. დასამტკიცებლად თავისის აზრისა სწორედ რომ შემადრწუნებელ ამბავს გვიამბობს ბატონიშვილი. სიტყვა სიტყვით მოვიყვანთ ბატონიშვილის ნათქვამს, რათა გადაჭარბება არავინ დაგვწამოს. "ნინია ერასტიშვილმან ძმისა თვისისა ცოლი, რძალი თვისი სალომე, ესრე სირცხვილელულ ჰყო, რომელ ჩახადა ნიფხავი და განუჩხრიკა, უკეთუ აქვს რაიმე დამალული მას შინა ნივთი, რათა მოსტაცოს მას. ეგრეთვე

მოურავმან ქიზიყისამან იოსებმაც უყო ცოლსა ნინია ზურაბ-
იშვილისასა, ქალსა დავით სარდლისასა ბარბარეს”.

ეტყობა, მემატიანე შეწუხებულა და აღშფოთებულა ამ
საძაგლობის მაგალითით და სიტყვას მოკლედ მოსჭრის:
"რომელთაცა არა შვენოდათ ძმათა თვისთა ესე ვითარისა
უგვანისა ქმნაი და უკეთუ წვრილად აღმეწერა მათ მიერ
ტირანობაი, დაკლებაი კახთა თავადთა სახლთასა და გლეხთა,
ფრიად გავრცელდებოდა ისტორია ესე და სიგარძისათვის
დავიღუმეო”.

დამარცხებულ კახელობას, რაღა თქმა უნდა, არც კარის
წინამძღვარი არქიმანდრიტი ელევთერ ზუჟაკიშვილი დააყრი-
და ხეირსა. ელევთერმა დაიჭირა რაოდენიმე მღვდელნი და
ღიაკონნი უბრალონი, რომელთაც ხელითა თვისითა ჰსცემდა
და აგლეჯდა წვერთა. ნაცემ-ნაგვებნი გაგზავნა ქალაქს
მიტროპოლიტ ვარლამ ერისთვიშვილთან, რომელმაც გაკრიჭ-
ნა და წარგზავნა ციმბირს სრულიად უდანაშაულონი. ხოლო
უკეთუ მღვდელმან რომელმამე მისცეს ასი თუმანი მიტროპ-
ოლიტ ვარლამს ქრთამი, იგი განტევებულ იქნებოდისო.
რადგან მაშინდელ მღვდელთაგან ძვირად თუ ვინმე ქრთამად
მოახერხებდა ასის თუმნის გაღებას, ცხადია, რომ გაკრეჭილი
მღვდელ-ღიაკონნი ციმბირს თავიდან ვერ აიცილდნენ.

ასე და ამგვარად, რუსეთს ნაპოლეონი იკლებდა და
აოხრებდა, აქ, ჩვენში-კი საკუთარი მთავრობა ტურფა კახეთს
აწიოკებდა და ავერანებდა. 1812 წლის განმავლობაში დამშე-
ული კახეთი სამჯერ აჯანყდა და უკეთესის მომავლის
მომლოდინე იარაღით სცდილობდა ბედნიერების დამყარებას,
მაგრამ ცდამ ცულად ჩაუარა. მთავრობამ, ჯარმა და მეზობელმა
შეერთებული იერიში მიიტანა კახეთზე, მთელი წელიწადი
სწიწქნა და საკუთარი ხორცი საკუთარის კბილით აგლეჯინა.

განცხრომაში არც ბატონიშვილი ალექსანდრე გახლდათ.
მანავთან ბრძოლის შემდეგ, რომელსაც რტიშჩევი ისე
უყურებს, როგორც ალექსანდრეს ბედის სამუდამოდ გადამწ-
ყვეტ ბრძოლას, ლტოლვილი მხლებლების მცირე რიცხვით
გაიქცაო, სწერს მთავარ-მართებელი გრაფ რუმიანცევს. ფე-

ხდაფეხ დასდევენ გაქცეულს ორბელიანი და სიმონოვიჩი და მოსვენებას არ აძლევენ. მოზიარენი სულ შემოეფანტნენ და ამის გამო იძულებული გახდა ფშავ-ხევსურეთში გადასულიყო. ხევსურებიო, ბრძანებს რტიშჩივი, თითქმის კერპ-მსახურნი არიან; ვაჟკაცი და მეომარი ხალხია. ნაწილი ხევსურეთისა სრულებით არ ემორჩილება ჩვენს მთავრობას, ხოლო მეორე ნაწილი, მართალია ექვემდებარება საქართველოს, მაგრამ რა მორჩილებაა ასეთი მორჩილება. სურსათი და სანოვაგე საქართველოდან მიაქვთ ხევსურებს, ამის გამო იძულებული არიან ურთიერთობა არ გასწყვიტონ ქართველებთან. აი, ეს ხევსურები გაუმასპინძლდნენ გაქცეულ ბატონიშვილს და ბინა გაუჩინესო.

მშვიდობა და მყუდროება ჩამოვარდა კახეთში, რომელიც უსიტყვოდ დაემორჩილა მთავრობას. მომეტებულმა ნაწილმა ცოდვები მოინანია, ტყეში გახიზნულები დაუბრუნდნენ თავთავიანთ ოჯახს და ხმის ამოუღებლივ იხდიან ზომიერ კონტრიბუციას, მე რომ დავადგო. ბევრი გაბოროტებული და გაალმასებული მემამოხე შევიპყარით გენერალ ორბელიანის წყალობით და მაგრადა მყავს დამწყვედიულნი და სამხედრო სამართალს მივეციო. ზოგი-კი გადიხვეწა სამშობლოდან, ზოგი სპარსეთს, ზოგი ლეკეთს და ზოგიც ტყეებში იმალებაო.

ფშავ-ხევსურეთიდან კახეთში გამოსასვლელი გზები შეეკარი ჯარით, ასე რომ ალექსანდრე აქეთ ველარ იკადრებს წამოსვლას. რადგან ხევსურებმა და ფშავლებმა ბინა მისცეს საქართველოს მშვიდობისა და მყუდროების დამარღვეველს, ამისათვის აუკრძალე საქართველოში სიარული, საიდანაც ყოველ სანოვაგეს და პურს ეზიდებიან. ამას გარდა ჩამოვართვი საზამთრო საძოვრები დაბლობ ადგილებში, სადაც ფშავ-ხევსურნი ჰკეცბავენ ხოლმე დიდძალ საქონელსა და ცხვარსა. დავემუქრე, თუ ბატონიშვილს არ დაიჭერენ და არ მომიყვანებენ, გაზაფხულზე იმათ საქონელს ბარში არ გამოუშვებ. ასეთი ღონისძიება იმოდენათ საგრძნობელია ფშავ-ხევსურებისთვის, რომ იმედი მაქვს, შიმშილის მოლოდინით და ცოლ-შვილის გაწყვეტით, ლტოლვილ ალექსანდრეს ჩამაბარებო.

გენერალ ორბელიანმა დაარხია ამბავი, თუ ბატონიშვილი ცოდვებს შეინანიებს და თავის სურვილით დამორჩილდება მთავრობას, წარსულ ცოდვებს მიუტევებენ და ისეთსავე ულუფას გაუჩენენ, როგორც დანარჩენ ბაგრატიონთა, რუსეთში რომ გადაასახლეს. ბატონიშვილი ამბობს, წერილობითი საბუთი უნდა მეჭიროს მთავარმართებლისაგან, რომ ვირწმუნო მთავრობის სიტყვა და დაპირებაო. ამის გამო წერილი მივწერე ბატონიშვილს, ოღონც მოდი ჩემთან, შფოთზე ხელი აიღე და ცოდვები შეინანიე და გაძღვე სიტყვას, შრომას და მეცადინეობას არ დავზოგავ, რომ იმპერატორმა შეგიწყალოს და უხეად დაგაჭილდოვოსო.³⁵⁾

მართალია, გენერალი რტიშჩევი ტკბილად ესაუბრებოდა ალექსანდრეს, წერილებს უგზავნიდა ორბელიანის ხელით, მაგრამ ამავე დროს ყოველ ღონეს ღონობდა, რომ ხელში როგორმე ჩაეგდო, ან წუთისოფლისთვის გამოესალმებინა (რუს. *встретить*) ბატონიშვილი. მისი დალუპვა საჭიროა საზოგადო სიკეთისათვის და აქაურ ქვეყნის დასაწყნარებლად, პფიქრობდა რტიშჩევი. გრაფ რუმინცევს ისიც მისწერა რტიშჩევმა, გაიხსნება თუ არა გზა,³⁶⁾ ჯარს გავგზავნი ხევსურეთს, თუ მანამდე თავის სურვილით არ გამოცხადდა ჩემთანაო და მოსვენებას არ მივცემო. ან კი რა ცხოვრებაა ალექსანდრესი, ბრძანებს მთავარ-მართებელი დასასრულ თავის რაპორტისა, ენით არ ითქმის და სიტყვით არ აიწერება ის მწუხარება და უნუგეშობა, რასაც ბატონიშვილი ითმენს. მეგობრებმა უღალატეს და თავი მიანებეს. სიცივესა და შიმშილში ატარებს სიცოცხლესაო.

მთავარ-მართებელი რტიშჩევი ისე უყურებდა კახელებს, როგორც მეომარ მოწინააღმდეგეს, ესე იგი სხვა სახელმწიფოს მკვიდრს და რაკი გაიმარჯვა, ადგა და კონტრიბუცია დაადო კახელებს, თითო კომლს შეაწერა სამი კოდი პური, ერთი კოდი ქერი და სამი მანათი. სოფლის ნაცვლებს ორჯელ

35) იხ. *Акты* т. V, გვ. 464.

36) რაპორტი რტიშჩევისა დაწერილია 5 იანვარს 1813 წელს.

და სამჯერ მეტი. ხალხს გადაახდევინა აგრედვე დანაკლისი ჯარისა. აკრეფილი ფულით შეავსო ხაზინის ზარალი, მარკიზ პაულუჩჩის დროს ბევრი რომ დაურიგეს პურის ფასში, პური და ქერი კი ჯარს გადასცა ღვინისა და პურის კერძის გასაუმჯობესებლად, თითქოს ვინმე უშლიდა ჯარს ღვინის სმას და პურის წალებას, სოფლებს რომ იკლებდნენ და სწვავდნენ. ამავე 1812 წელს რტიშჩევმა გადაახდევინა კახეთს ამ წლის ხვედრი პური.

ადვილად წარმოიდგენს ადამიანი, რა მწუხარებას მიეცემოდა ერი ამ კონტრიბუციის გამო. ჯერ იყო და წინა წლის შიმშილით შეწუხდა კახეთი, მერმე აუტანელმა ბეგარამ საქონლისაგან გააჩანაგა, მთელი წლის აჯანყებამ ხომ სულ გააოხრა და გაავერანა ქვეყანა და სწორედ ამისთანა დროს კონტრიბუცია მიაყენეს კარსა. ერთ ჟამდოთხი კოდი ხორბლის გაღება და სამი მანათის გამოტანა კომლზე ადვილი არ იყო მაშინდელ დროს, მაგრამ უცხო მთავრობა რას დაგიღვეს, რა ენაღვლება სხვისა აკლება და აწიოკება. მართალია, არც თავისიანსა ზოგავს გაწუწუებული მოხელე, მაგრამ სხვისა ტანჯვაში უფლებით გასიებული კაცი ხშირად ავადმყოფურ ნეტარებას გრძნობს ხოლმე.

იმპერატორმა ალექსანდრემ არ მოუწონა რტიშჩევს კონტრიბუციით დასჯა კახეთისა. კონტრიბუცია გაალატაკებს ხალხსა, სწერდა იმპერატორი რტიშჩევს, უფრო გააბოროტებს და ხელახლა ააჯანყებსო. ამისათვის გიბრძანებ კვლავ აღარ მიმართო კონტრიბუციასო.

იმპერატორის ბრძანება მაშინ მოვიდა საქართველოში, როცა კონტრიბუციად დაღებულნი ხორბალი და ფული უკვე შეკრებილი და კახეთი ტყავ-გამძვრალი იყო. 37)

VI

უსასტიკესი რევოლიუცია, ლტოლვილ ალექსანდრე ბატონიშვილმა რომ ასტენა კახეთში, მადლობა უფალსა, ჩაქრაო. ასე მისწერა გენერალმა რტიშჩევმა გრაფ რუმინც-ევს 5 იანვარს 1813 წელსა. ახლა ჭერი რეპრესია-სასჯელზე მიდგა. ღვთის მოყვარე და უფლის მმოსავ რტიშჩევმა არ იკმარა კონტრიბუციის აღება და ახალ-ახალ რეპრესიებზე ჰფიქრობდა.

ქვეყანაზე ასეა მიღებული, ურემი რომ გადაბრუნდება, გზა მაშინ გამოჩნდება ხოლმე. კახეთის ამბოხებამ ნათლად გამოაჩინა, რა საძაგელი და აუტანელი მართვა-გამგეობის წესი იყო გამეფებული ჩვენში, რა უდიერად იტანჯებოდა გარყვნილ და ბილწ მოხელეებისაგან ერი, რა გესლიანი ბოროტებით და ზიზლით ეპყრობოდა უცხო თესლის მოხელეობა ჩვენებურ კაცსა. ასე გასინჯეთ, პირუტყვი რა არის, იმასაც-კი არ ინდობდნენ და შებრალება არა ჰქონდათ. დიახ, ყველა ეს სიკეთე ვარდის გულივით გადაშალა კახეთის ამბოხებამ და მარტო ბრმა თუ ვერ დაინახავდა, თორემ ხილულს არ გაუჭირდებოდა დანახვა იმ აზიურის ბარბაროსობისა, რასაც სჩადიოდა ახალი მთავრობა და ქრისტეს მოყვარე მართლმადიდებელი მხედრობა მართლმადიდებელსავე ქვეყანაში.

პირველ აჯანყების ჩაქრობის შემდეგ ელამმა მარკიზ პაულუჩჩიმ მოისურვა გაეგო მიზეზი კახელების გამწარებისა და დააწესა კამისია, რომელსაც დაავალა - დაწვრილებით გამოეძია და გამოეკვლია, თუ რამ გააბოროტა კახეთი იქამდისინ, რომ გასტენა ერთგულობის ფიცი და იარალი იხმარა მათის იმპერატორებით უდიდებულესობის უძლეველ მხედრობის წინააღმდეგ. გენერალმა რტიშჩევმა ესეც-კი არ ინება. სხვაგან თუ გადაბრუნებული ურემი გზას გამოაჩენს ხოლმე. ეს სხვაგანაა და არა ჩვენში. აქ, საქართველოში, ასის

წლის განმავლობაში, ჯერ მაგალითი არა ყოფილა, რომ მთავრობას ერის გაჭირვების ნამდვილი მიზეზი შეეტყოს და შემდეგ გამოძიებული დაედოს თავის მოქმედებისა და მოღვაწეობის საფუძვლად.

მარკიზის კამისიის ნამოქმედარმა უნაყოფოდ ჩაიარა რტიშჩევისათვის, ზედაც არ შეხელა იმ ჯოჯოხეთურ ყოფას, კახეთი და სრულიად საქართველო რომ ჩავარდა, და სამოქმედოდ გზა თელილი აირჩია. ასე გაშინჯეთ, კრავივით უვნებელი დაწესებულება, როგორცაა ჩვენებური მაზრების და გუბერნიის მარშლობა, დროებით გააუქმა. არ იფიქროთ, რომ საბაბი ამ უკანონო განკარგულებისა ახალს რამეს წარმოადგენდეს. უკანონობას ამ ასის წლის წინადაც ისე ასაბუთებდნენ, როგორც დღეს. ვიდრე კახეთში, უბრძანებს მთავარმართველი რტიშჩევი საქართველოს უმაღლეს მთავრობის საზოგადო კრებას, არ ჩამოვარდება სრული სიმშვიდე და ვიდრე მართვა-გამგეობაში არ გამეფდება ძველებურად საქირო წესი და რიგი; და განა მარტო კახეთში, თვით სრულიად საქართველოში, მანამდის თავად-აზნაურთა არჩევნები არ უნდა მოახდინოთ.³⁸⁾ სწორედ თილისმიან და ჯადოიან ჯურღმულს მოაგონებს ადამიანს მთავრობის კაცის ასეთი მსჯელობა და აზროვნობა. არა, რა გააჩერებს და დააწყნარებს კუდ-აბზეკილ ბოჩოლას, ბევრიც რომ ეხვეწო და ულოლიავო, ვიდრე ტანიდან არ მოაცლი სისხლის მწოველ კრაზანას?

დიახ, იმის მაგიერ, რომ კრაზანა მოეცილებინა ქვეყნისათვის, და ამ სახით დაეწყნარებინა აბობოქრებული და გატყავებული კახეთი, გენერალი რტიშჩევი რეპრესიების გამოგონება-გაძლიერებას შეუდგა. მრავალი თავადი და აზნაური, აჯანყებაში მონაწილეობა რომ მიიღეს; უკვე ტფილისში ჰყავდა დამწყვდეული, ზოგი კიდევ გზაში იყვნენ და

38) იხ. АКТЫ, т. V, стр. 466 - 467. რუსულად ასეა: пока въ Кахетин не водворится совершенно спокойствіе и не восстановится, въ управленіи по прежнему должный порядокъ, да и по всѣмъ частямъ Грузіи, до того времени выборы дворянскихъ производить, не слѣдуетъ.

ყარაულებს მოჰყავდათ ტფილისისაკენ. აი მათი სახელი და გვარები: სილნალის მარშლად ნამყოფი ივანე ანდრონიკაშვილი შვილითურთ; ზურაბ ანდრონიკაშვილი ძმითურთ; რევაზ, აბელ, დიმიტრი, სიმონ და დავით მზეჭაბუკის ძე ანდრონიკაშვილები; კაკაბეთის მოურავად ნამყოფი ნინია ჩერქეზიშვილი; ნინია ნიკოლოზის ძე ჩერქეზიშვილი; ბარძიმ ჩერქეზიშვილი; სოლომონ და პეტრე ავალიშვილები; დიმიტრი გლახის ძე თარხნიშვილი; ნიკოლოზ აბაშიძე; ნინია ონანოშვილი; დიმიტრი გურგენის ძე ვაჩნაძე; გორჯასპი ალათოშვილი; სარიდან ალათოშვილი; ერასტი ანდრონიკაშვილი; ნინია მალალაშვილი; გიორგი თუხარელი; დიმიტრი საგინაშვილი; ზებედე მღვდლის ძმა ფილიპე შატბერაშვილი; დავით ჩოკაშვილი; დიმიტრი ჩოლაყაშვილი ალაურიდან; კოლექსკი ასესორი ნიკოლოზ ჩოლაყაშვილი; იოსებ და ომან ჩოლაყაშვილები; გრიგოლ, სიმონ, ნინია, ჭანდარ და ედიშერ ჯანდიერი; დიმიტრი ქობულაშვილი; დიმიტრი ჭავჭავაძე; პაატა ჭავჭავაძე; ნოდარ, დიმიტრი და დავით ჯორჯაძე; არსენა მაყაშვილი; იოსებ მაყაშვილი; რევაზ ვახვახიშვილი; ნოშრევიან ჯორჯაძე; ივანე ჯორჯაძე, ენისლელი მოურავი; ნინია რუსიშვილი; დიმიტრი აბელაშვილი; პაატა აბელაშვილი; დავით აბაშიძე, სახელმწიფო ექსპედიციის სოვეტნიკად ნამყოფი; ასლან ონანოშვილი; ერასტი ანდრონიკაშვილი; ნინია გურგენიძე და თადია ჩოლაყაშვილი (ესენი გაქცეულან სპარსეთს); დავით კალატოზიშვილი; ჩერქეზ ჩერქეზიშვილი; ეკატერინე ჩოლაყაშვილი ყარაბულაღელი; ლტოლვილ გორჯასპი ნათალაშვილის მეუღლე გუქა.

ამ სიას მოსდევს მეორე დამატებითი: იოსებ ერისთავი; რევაზ საგინაშვილი; იასე მაყაშვილი; ომან მაყაშვილი; სიმონ ჭავჭავაძე; გლახა საგინაშვილი; დიმიტრი ჯანდიერი; დიმიტრი ჭავჭავაძე; ედიშერ ამილახვარი; ნინია ალათოშვილი, დიმიტრი ვახვახიშვილი; პაატა სულხანიშვილი; გოგია მუშრებიშვილი; პაატა რუსიშვილი; სიმონ ნათალაშვილი; გლახა სულხანიშვი-

ილი; ტაპია ნინია ჩაპარაძე³⁹); გლაზა აბელაშვილი; პაატა მგალობლიშვილი; გორჯასპი ნათალაშვილი; იოსებ კოდოლაშვილი; ზებედე შატბერაშვილი.

ეს ამოღენა წარჩინებულ გვარის თავად-აზნაურნი გადახვეწილთ გარდა მსწრაფლ სამხედრო სასამართლოს მისცეს, რომელმაც სხვა და სხვა ვადით ციმბირში უკრა თავი.

მათი დანაშაულის ამბავი ამ ნაირად შექკრიბა გენერალმა რტიშჩევმა. კახეთში მყოფ გენერლებს თ. ორბელიანს და სიმონოვიჩს უბრძანა: - აქ ჩამოთვლილ თავად-აზნაურთა მოღალატობის მოწმობანი ჩამოართვით იმათ, ვინც უერთგულესად ითვლება რუსის მთავრობისაო. თელავის მემამბოხეებისა - თელავის მარშალს და მოურავსა; სიღნაღის მემამბოხეებისა, სიღნაღის მოურავსა და სიღნაღის კამენდანტ მაიორ ორბელიანს, ქიზიყში დაბანაკებულ ჯარს რომ უფროსობდა. რა მიუდგომლობას გამოიჩინდნენ ეს პატიოსანი მოხელენი, მოწმობების წერას რომ შეუდგებოდნენ ორბელიანისა და სიმონოვიჩის ბრძანებით, ადვილი მისახვედრია.

მემამბოხეებს ციმბირი არ აკმარეს სასჯელად. საქართველოს უმაღლეს მთავრობის საზოგადო კრებამ რტიშჩევის ბრძანებით მამულ-დედული ჩამოართვა და სახაზინოდ ჩარიცხა. ვისაც მამული გაუყოფელი ჰქონდა სახლიკაცობაში, რტიშჩევისავე ბრძანებით გაჰყვეს მამული და მემამბოხეთა წილი ხაზინამ ჩაიბარა.

ბოლოს აღმოჩნდა, რომ ზოგიერთი სამხედრო სამართალს მიცემული, უდანაშაულო ყოფილა და ამბოხებაში მონაწილეობა არ მიუღიათ. მეზობლურ შურისა და მტრობის გამო გულისხმეთქა და ვარამი ბევრი ნახეს, მაგრამ ამას ვილა ინალვლიდა, რაკი ციმბირი აიცდინეს თავიდან და მამული დაიბრუნეს. აი დაბეზლებისა და ჯაშუშობის წყალობით ტანჯულთა სახელი და გვარები: დიმიტრი ქობულაშვილი; პაატა ქავჭავაძე; ნოდარ, დიმიტრი და დავით ჯორჯაძენი; იოსებ მაყაშვილი; რევაზ ვახვახიშვილი; ნოშრევან ჯორჯაძე; ნინია

39) სახელი დამახიჩებულია. ვგონებთ არც გვარია სწორედ მოხსენებული აქტებში.

რუსიშვილი; ასლან, ყაფლან, ნინია, ზაქარია და ქაიხოსრო
ვაჩნაძენი; ზაალ აბაშიძე; ნიკოლოზ, მერაბ, ესტატე და
მიხეილ ანდრონიკაშვილები; გოგია ქობულაშვილი; ჩერქეზ
ჩერქეზიშვილი; თავადნი ბებურიშვილები სავსებით.

საქმის გარჩევის დროს ბრალდებულებმა დაასახელეს
მეზობლები, ესენიც მონაწილეობას იღებდნენ აჯანყებაში.
სიმონოვიჩსა და ორბელიანს ებრძანა ამათი დაქერა და ტფ-
ილისში გამოგზავნა. დიდ ხანს იმალებოდნენ, მაგრამ მაინც
შეიპყრეს. ესენი ყოფილან, ასლანი, ყაფლანი, ნინია, ზაქარია
და ქაიხოსრო ვაჩნაძენი; ზაალ, ნიკოლოზ, მერაბ, მიხეილ,
ანდრონიკ და ალექსანდრე ანდრონიკაშვილები; გოგია ქობულ-
აშვილი. როგორც მეორე სიიდანა სჩანს, ბევრი მათგანი
უდანაშაულო აღმოჩენილა და გაანთავისუფლეს სასჯელისაგ-
ან. თურმე ზოგიერთ მათგანს შიშის გამო მიუღია მონაწილე-
ობა: ამბოხებაში, ან ისეთ გარემოებაში ჩაეარდნილა, რომ
მონაწილეობა რომ არ მიეღო, შეუძლებელი იქნებოდა.

ვისაც საბოლოოდ გადაუწყვიტეს ციმაბირი, ისინი
რტიშჩევმა გაისტუმრა ცივ ქვეყანაში. საღ დააბინავეს ჩვენი,
ეს პიჩრევილი შეგნებული პოლიტიკური დამნაშავენი, ანუ
განმათავისუფლებელ მოძრაობის მოღვაწენი, რომელთაც
სიცოცხლე და ქონება არ დაიშურეს დღეს ათვალწუნებულ
და მაშინ კი სანეტარო სამშობლოს გულისათვის, იმ სამშო-
ბლოსა, რომელსაც უწყალოდ და მხეცურად აოხრებდა და
აჩანაგებდა შემოსეული მტერი, არ ვიცით. არც ის ვიცით, თუ
როგორ ეპყრობოდა მთავრობა გაციმაბირებულ მოღვაწეთ,
როგორ ექცეოდნენ ტუსალებს გზაში, ან ბინაზე, რას აკმ-
ევდნენ და ასმევდნენ, ბორკილით, თუ უბორკილით მიჰყავ-
დათ, ეტლით თუ ფეხით. მბრთალია, საბუთები და მასალა არაა
ყველა ამის გასაგებად და შესატყობად, მაგრამ გონების
თვალთ ადვილად წარმოვიდგინოთ სამშობლოსათვის თავდად-
ებულთა მწუხარებას და ტანჯვა-ვაებას. დღევანდელი
პოლიტიკური დამნაშავენი კიდევაც თავილობდნენ ქართვ-
ელობას, რუსული ზედ მიწევნიდნენ და შესამჩნევად მიეჩვივნენ
რუსულ სასმელ-საჭმელს და ტანსაცმელს. ამის გამო საფიქ-

რებელია, რომ ადვილად უნდა შესძლონ ატანა ციმბირის ჰავისა და ბუნებისა, მაგრამ ასე არ არის ნამდვილად. დღევანდელელებიც დიდად იტანჯებიან ნარიმისა და ტურუხანის ქვეყნებში, შიმშილი და სიცივე მალე უმოკლებს სიცოცხლეს და ელუპება სამშობლოს მრავალი სიცოცხლით სავსე და იღვით აღფრთოვანებული ახალგაზღობა.

თუ ასეთია დღევანდელ პოლიტიკურ დამნაშავეს ბედი, აბა რა იქნებოდა მაშინდელის ყოფა, ადვილად შეგვიძლიან წარმოვიდგინოთ. მარტო ის გარემოება, რომ რუსული არავინ იცოდა, ერთი-ათად გაუმწარებდა ისედაც ძალღუმადურ ბედსა...

ოთხმა წელიწადმა განვლო და მხოლოდ მაშინ მოუღბა გული იმპერატორ ალექსანდრე პირველს, რომელმაც 12 სექტემბერს 1801 წ. მანიფესტით ანუგეშა ქართველობა.⁴⁰⁾ 16 აგვისტოს 1816 წ. იმპერატორმა უბრძანა უმართებულეს სენატს, გაარჩიე - ვის რა დანაშაული აქვსო. ვისაც მონაწილება მიუღია ორსა, ან სამ აჯანყებაში, დასტოვეთ ციმბირში, ხოლო თავისუფლება მიეცითო, დანარჩენები კი დააბრუნეთ საქართველოშიო. ამათ ეპატიათ დანაშაული და მიენიჭათ თავისუფლება.

დარჩა ციმბირს თვრამეტი კაცი: იორამ თარხნიშვილი,⁴¹⁾ პეტრე ავალიშვილი, ნინია ალექსიშვილი, სამსონ ნათალაშვილი, იპპოლიტე ყურბალი თუხარელი, სიმონ ციმაკურიძე, ივანე ჩერქეზიშვილი, შვილი ალადაგისა (?); ივანე ალათოშვილი, დიმიტრი ჩოლაყაშვილი, დავით ჩოკაშვილი, იოსებ ერასტიშვილი, პაპუა აბელიშვილი, არსენ მაყაშვილი, პაატა მგალობლიშვილი, გრიგოლ ჯანდიერი, ჟარდან ჯანდიერი და ივანე ვაჩნაძე.

40) პრივტ-ლოცენტი ი. ა. ჯავახიშვილი საქართველოს შეერთების მანიფესტს "თეატრალურს" ეძახის. იხ. Полит. и социальное движение в Грузии в XIX в., გვ. 9. ოლონდაც რომ ზედ გამოკრილია ეს კობტასახელი.

41) თარხნიშვილი, პეტრე ავალიშვილი, ამილახვარი, შატბერაშვილი, ციმაკურიძე და თუხარელი ქართლიდან არიან.

სრული ამნისტია ამ თვრამეტმა კაცმა მიიღო მხოლოდ 1 დეკემბერს 1820 წ. ამ რიცხვით ავსტრიის ქალაქ ტროპაუში მოწერილია უმაღლესი ბრძანება სენატისადმი. მოწყალების თვალსა და ქართველებსაც (რუსულად: Грузины) მივაპყართო, ნათქვამია ბრძანებაში და თანახმად მთავარმართებელ ინფანტერიის გენერალ ერმოლოვის ვედრებისაო (რუსულად: ходатайство), უმაღლესად ვბრძანებთ - ეპატიოთ სასჯელი და დაბრუნებულ იქმნენ სამშობლოშიო; მოგვინიჭებია თავისუფლება და დაგვიბრუნებია მამულ-დედული, სახაზინოდ რომ იყო შერიცხულიო.⁴²⁾ ასე გათავდა ერთგულ მამულიშვილთა საქმე. ნამდვილად მოინანიეს ცოდვანი, თუ არა, არაფერი ვიცით. ეს კია, რომ ციმბირისა და "მსწრაფლ" (რუსულად: скорый) სამხედრო სასამართლოებისა ბევრს არ შეშინებია. გენერალი რტიშჩევი 18 თებერვალს 1813 წ., როდესაც ჯერ კიდევ დაქერილების საქმე წარმოებაში იყო, სწერს თუშფშავ-ხევისურეთის მოურავ თ. გრიგოლ ჩოლაყაშვილს, თვალყური გეჰიროს, თორემ ათი ჯაშუში დაძრწის და ლტოლვილ ბატონიშვილ ალექსანდრეს წერილებს უზიდავს შაჰ-ზადეს, მირზა ბეზიურგს, ერევნის სარდარს და ხუდად-ბეგს. წერილებიდან სჩანს, რომ ბატონიშვილი თებერვალში აპირებს "ბუნტის" მოხდენასო. ჯაშუშთა შორის ურევია თ. იოსებ ბარათაშვილი და ეს იცოდევო.

ფრთხილად იყავ, დროზე ყველაფერი მაცნობე და პოლკოვნიკ ყაზბეგსაც შეატყობინე ხოლმე, რასაც გაიგებ, რადგან მეამბოხენი ყაზბეგსა და საქართველოს სამხედრო გზას უპირობენ თავზე დასხმასაო.⁴³⁾

აქედანა სჩანს, რომ მებრძოლთა ჯერ კიდევ გული არა ჰქონდათ გატეხილი.

42) იხ. Акты, т. VI, № 1, გვ. 115.

43) Ibid т. V, გვ. 467.

VII

მთავარ-მართველ რტიშჩევმა საილდანაც წარმოიღვინა, რომ კახეთის აჯანყების და სრულიად საქართველოს არევ-დარევის თავი მიზეზი სოფლის მოურავები იყვნენო. ცხენს რომ ვერა დააკლეს რა და, კეხსა სწვდნენ, სწორედ ასე დაემართა გენერალ რტიშჩევს. როგორც ღლეს, ისე მაშინ, ამ ასის წლის წინად, მეისრე აღმოჩნდა დამნაშავე. დაბალი ღობე იმის დაბალია, რომ ყველა ვეგინდარამ ადვილად გადააბიჯოს ფეხი. მართალია, რუსის მთავარ-მართველები დიდ ბობოლე-ბსაც არ ინლობდნენ, მაგრამ წვრილხეხა ქართველ მოხელე-ებს, სოფლის მოურავებს სწნსილა გაუქრო რტიშჩევმა და მათი გასაგფსი ძირიან-ფესვიანად ამოაგდო.

ჯერ ისევ მთავარ-მართველ თ. პავლე ციციშვილის ღროს გამოვიდა ბრძანება 29 იანვარს 1804 წ. ხელმოწერილი იმპერატორ ალექსანდრე პირველის მიერ, რომ საქართველოში სოფლის სამოურავოები მოისპოსო. გარდაცვალებულ სოფლის მოურავის შემდეგ ხლარავინ უნდა დაენიშნათ, ან კიდევ გლეხის საჩივრის გამო თუ ვისმეს გადააყენებდნენ, მოადგილე არ უნდა გაემწესებინათ. აგრედვე აღარ უნდა დაეყენებინათ მოურავი იმ შემთხვევაშიც, უკეთუ სიყალბეს და უკანონობას შეამჩნევდნენ სამსახურის ასრულების ღროს და შენიშნულ მოურავს სამსახურიდან გადააყენებდნენ.

ხელმწიფის ბრძანება საქართველოს უმაღლეს მთავრო-ბას სისრულეში არ მოეყვანა და ახლა გენერალი რტიშჩევი შეუღდა იმპერატორის ბრძანების აღსრულებას. ვინაიდგან უმაღლესი ბრძანება აღსრულებელიაო, სწერს გენერალი რტიშჩევი ორბელიანს და სიმონოვიჩს, და რადგან სოფლის მოურავები აჯანყების თავი და თავი მიზეზები არიან, გლეხ-კაცობას ტყავს აძრობენ, ავიწროებენ და თვითნებობენ, ამ ბოროტების აღმოსაფხვრელად გიბრძანებთ მოურავები არ ააამწიხით იმ სოფლებში, რომელთაც კმბრხებაში მონაწილე-

ობა მიიღეს. ამ გვარ სოფლებში მთავრობის ბრძანებათა და განკარგულებათა ასასრულებლად დააყენეთ ზედამხედველები თავად-აზნაურთაგანი, კაცნი ღირსეულნი და მთავრობის სამსახურის ერთგულობაში განთქმულნი და გამოცდილნიო. ნუ მიხედავთ იმას, თუ ზედამხედველი სხვა მაზრიდან იქნება, რადგან ზედამხედველი ინიშნება მთავრობისაგან მეგკვიდრობის ძალით კი არა, არამედ დამსახურების მიხედვითო. ზედამხედველები უნდა მოქმედობდნენ ისე კი არა, როგორც იქცეოდნენ მოურავები მეფეების დროს და საქმესა სჭირდნენ ჩვეულებისამებრ, არა, ივინი მოვალენი არიან პირდაპირ და კაფიოდ ასარულონ ხოლმე ბრძანებანი მთავარ-მართებლისა და კახეთში დაბანაკებულ ჯარის გამგე გენერლებისაო.

ამით არ დაკმაყოფილდა მთავარ-მართებელი და მოისურვა მოხელეთა ძველი ინსტიტუტების ამოგდება სრულიად საქართველოში და თათრების დისტანციებში. ჩვეულება და კანონი ღიღმა და პატარამ ზედმიწევნით იცოდა. ასეთი ცოდნა მეტის-მეტად უადვილებდა ერსა სამართლის პოვნას. მოურავების მაგიერ გამწესებული ზედამხედველნი, თუმცა ქართველები იყვნენ, ყურმოჭრილ ყმებად უნდა გამხდარიყვნენ მთავრობისა და აესრულებინათ შორიდან მოსული ბრძანება, ხშირად გაუგებარი და ზნესა და ერის ხასიათს შეუფერებელი. ისიც ხომ საფიქრებელია, რომ ბევრჯელ თვით ახლად გამოჩეკილი მოხელეები ვერც თავს გაუგებდნენ და ვერც ბოლოს უფიც გენერლების ბრძანება-განკარგულებას. რა სამართლიანობა დატრიალდებოდა ამის შემდეგ სოფლად, ადვილი გამოსაცნობია, მაგრამ გენერალი რტიშჩევი რისთვის შეიწუხებდა თავსა. კახეთის აჯანყებამ საბაბი გაუჩინა მოესპო სოფლის მოურავები და დანარჩენს არას დასდევდა.

საქართველოს უმაღლეს მთავრობის საზოგადო კრებას წინადადება გადასცა - მტკიცედ ასარულე ასეთი ჩემი განკარგულებათაო. სადაც კი შეამჩნიოთ, რომ რაიმე დანაშაული ჩაიდინა მოურავმა, ან არ ასარულა ბრძანება და განკარგულება სათემო პოლიციისა, ან ტახტის მოურავისა დისტანციაში (რუსულად: коронный муравь), ასეთი მოურავი სამსახური-

დან გადააყენეთ და კანონისამებრ მოეპყარით, ხოლო მის ადგილზე ნულარავის გაამწესებთო. მთელ საქართველოს მოჭფინეთ ეს ამბავი და შეატყობინეთ ყველას, რომ რომელი სოფლის მოურავიც არ შეასრულებს ოლქის უფროსის, ან ტახტის მოურავის ბრძანება-განკარგულებას, რაც უნდა დიდი გვარის შვილი ბრძანდებოდეს, სასჯელს ვერ ასცდებაო. თვით ოლქის უფროსები და ტახტის მოურავები სასტიკად დაისჯებიან, თუ გაჰბედეს და სიმრუდე გამოიჩინეს ამ ჩემის განკარგულების აღსრულებაშიო, იმუქრება გენერალი რტიშჩევი. უმაღლეს საქართველოს მთავრობას ვავალებ, ბრძანებს რტიშჩევი, სასტიკი ყურადღება ეჭიროს, რომ ნამდვილად აღსრულდეს ეს დადგენილებაო. უკეთუ სიმრუდე შევამჩნიე, არ დავინდობ უმაღლეს საქართველოს მთავრობას და განსაკუთრებით აღმასრულებელ ექსპედიციას და ჯეროვან პასუხს მოვსთხოვო.

სჩანს, დიდსა და უაღრეს მნიშვნელობას აძლევდა მთავარ-მართებელი რტიშჩევი მოურავების მოსპობას სოფლად, ასე რომ გაწიწმატებულა და ყოველი თავაზიანობა და ზრდილობა დაჰკარგა. საქართველოს უმაღლეს მთავრობის საზოგადო კრებას ისეთი კილოთი ელაპარაკება და ისე ემუქრება, თითქოს ეს დაწესებულება ქვეყნის უპირველესი გამგე და პატრონი კი არ იყვეს, არამედ უბრალო ვიღაც ვიგინდარა სოფლის გზირი, ან იასაული.

მიზეზი ასეთის უზომო გაცხარებისა და გაბრაზებისა, ალბად, ის თუა, რომ სოფლის მოურავობა ძველი, მეფეთა დროის, ინსტიტუტი იყო და სოფელს უვლიდა თანახმად ძველისავე ჩვეულებისა და ქართულ კანონებისა. რტიშჩევმა ალღო აიღო, რომ ეს დაწესებულება მტრულად ეპყრობა რუსის მთავრობის მიერ ახლად შემოღებულ პოლიციურ წესსა, რომელიც დღესაც იმითია სახელოვან-განთქმული, რომ სულ თავისკენ ითლის ხეჩოსავით და ერჩს კეთილდღეობას აგრუნშიაც აჲ აგდებს. დამახასიათებელი თვისება პოლიციურ წესის მართვად-გამგეობისა ისაა, რომ ერის დარღსა

და ვარამს უგულებელ ჰყოფს და მარტო უმადლეს მთავრობის ნება-სურვილითა ხელმძღვანელობს და არსებობს.

დიახ, ვამბობთ, რომ რტიშჩევმა არ იცოდა, რა ხილი იყო სოფლის მოურავობა, შიგ რა ეყარა, რას აკეთებდა, ან რა კანონს ემორჩილებოდა. სწორედ ალლოთი თუ გრძნობდა, რომ სოფელს ვერ გავტეხ, თუ დღე არ დავუბნელებ რაღაც მოურავობააო. რომ არაფერი იცოდა რტიშჩევმა ამ ინსტიტუტისა, იქიდანა სჩანს, რომ საქართველოს უმადლეს მთავრობის საზოგადო კრებას საყვედურს უთვლის, წინადაც მოვითხოვე ცნობანი შესახებ იმისა, თუ რა საფუძველზეა აშენებული სოფლის მოურავობა, მაგრამ რადგან არაფერი შემატყობინეთ, ვავალებ კრებას განიხილოს დაწერილებით საქმე და გამომიგზავნოს შემდეგი ცნობანიო. პირველი, რა და რა სოფელშია დაწესებული მოურავობა, და ვინაა იქ მოურავად? მეორე, - ვისის ბრძანებით არიან იგინი დაყენებულნი, მთავრობამ იცის მათის არსებობის ამბავი და უგზავნის მათ რაიმე ბრძანებას, თუ არა; რაიმე საქმეს ანდობს მოურავებს, თუ არა; ვის ემორჩილებიან მოურავები? მესამე, - რა საფუძველით ატარებენ იგინი მოურავის სახელს, რა უფლება აქვთ; აქვთ რამე შემოსავალი, თუ არა?

ეს ცნობანი მალე შემატყობინეთ, რადგან უქვეშევრდომილესად უნდა მოვახსენო ხელმწიფე იამპერატორს სოფლის მოურავების საქმეო, ასე ათავეებს გენერალი რტიშჩევი თავის წინადადების მეექვსე მუხლსა.⁴⁴⁾

საოცარი და თან სამწუხარო აქ ისაა, რომ რტიშჩევმა ჯერ გაანადგურა სოფლის მოურავობა, მოსპო მისი სახსენებელი, დასწამა მოღალატეობა, მოურავების მაგიერ გაამწესა სოფლებში ზედამხედველები, ანუ ურიადნიკები და მხოლოდ ასეთ აწიოკების შემდეგ შეუდგა იმის გამოძიებას, თუ რა მოხელენი არიან მოურავები, თუ რა უფლება აქვთ, რას აკეთებენ, ან რა ჯამაგირს იღებენ. იმის გაგებაც კი არ მოისურვა მთავარ-მართებელმა, თუ რამ დაუშალა თ. ციციშვილ-

ილს სისრულეში მოეყვანა იმპერატორის ბრძანება, ან რატომ არ მოსპეს სოფლის მოურავები ბულგაკოვმა, გულდოვიჩმა, ტორმასოვმა და მარკიზ პაულუჩჩიმ.

ასე, ერთის ხელის მოქნევით ირღვეოდა და იფუშებოდა ჩვენი საპოლიციო, საადმინისტრაციო და სამსჯავრო დაწესებულებანი და მათ მაგიერ შემოდინოდა კამენდანტობა, კაპიტანისპრავნიკობა, სათემო პოლიცია და სამსაჯულო და მრავალი სხვა წესი და რიგი, ერთი-მეორეზე უმზგავსი და შეუფერებელი ხალხის ზნისა და ჩვეულებისა. ბუნებრივი მიმდინარეობა საქართველოს საზოგადო დაწესებულებათა ხელოვნურად შესწყდა. იმის მაგიერ, რომ შეეკეთებინათ და გაეუმჯობესებინათ დროსა და ჟამის მიხედვით ძველი დაწესებულებანი, ახალი კანონი და განკარგულება ჩამოესხათ ძველს ყალიბზე, გენერალმა რტიშჩევმა და იმის წინა მოადგილეებმა ამჯობინეს სარეგოლიუციო გზა: მიანგრ-მოანგრიეს ძველი დაწესებულებანი, მკვიდრად დამარხეს საფლავში და მათ მაგიერ შემოიღეს ისეთი დაწესებულებანი, რომელთაც ერთი-ათად გაუმწარეს ბედი მრავალტანჯულ საქართველოს.

VIII

ომიანობა დასრულდა, ამბოხება ჩაქრა. მოლაღატე და მუხანათნი სასტიკად დასაჯეს. ერთგულობის ფიცის გამტეხთ იგემეს მაშინდელ დროის რეპრესიების სუსხი. ვინც გადარჩა მათრახებს და ეგზეკუციას, ან მშვიდობით გაუსხლტა ჩქარ სამხედრო სასამართლოს და სამხედრო ყარაულებს, სამშობლოდან გადიხვეწა სპარსეთსა და ოსმალეთში. სპარსეთი და ოსმალეთი გვერდზე ეკრა საქართველოს და ემიგრაცია მაშინ სახიფათოს არას წარმოადგენდა. თავის შენახვაც ადვილი იყო ქართველისთვის მეზობელ ქვეყნებში, რადგან ყიზილბაშები და ოსმალონი სიამოვნებით უმასპინძლებოდნენ მოუსვენარ ქართველებს. გადახვეწილთ მხოლოდ სამშობლოს დარდი უღრღნიდა გულს და მოსვენებას არ აძლევდა: ამ "სენით" რომ

არ ყოფილიყო შეპყრობილი მაშინდელი ქართველი, შენი მტერი, სამშობლო დაგვიცარიელდებოდა და დღეს თავში სამტვრევად აღარ გვექნებოდა ერის მოწყობის და შენახვის "წყეული საქმე", რომლის ჩაქრობასაც ასე ერთგულად სცდილობს სხვის გემოვნებაზე აღზრდილი ერთი ჯგუფი ახალგაზრდობისა. თანდაყოლილი გრძნობა სამშობლოს სიყვარულისა და დარდი, როცა ფიზიკური ძალა აიძულებდა ხოლმე ქართველს დროებით გადახვეწილიყო სადმე, მოსვენებას არ აძლევდა ემიგრანტს და ბრუნდებოდა შინ ქურდულად. შემოპარული ემიგრანტები ძილს უფრთხობდნენ მთავარ-მართველებს და მათ ძებნა-პოვნაში ცოტა დროს არა ჰკარგავდნენ ესენი.

მაგრამ ბოლონდელი ემიგრანტები აგრე მალე ვერ დაბრუნდებოდნენ და გენერალ რტიშჩევს შეეძლო მოსვენებით ყოფილიყო და ვრცელი რაპორტები ეგზავნა პეტერბურგში. კახეთის ამბოხებამ ნათლად დაანახვა რუსის მთავრობას, რომ მას საქართველოში მეგობრები არა ჰყავს. მღვდელი და ბერი, თავადი და აზნაური, გლეხი და მოხელე, თითქმის სრულიად საქართველო თითო-ორთა მუხანათს გარდა, ფეხზე დადგა, იარალს წაავლო ხელი და მთელი წელიწადი ებრძოდა დაწვრთნილ რუსის მხედრობას სამშობლოს თავისუფლებისათვის და უცხო ტომის ტლანქ ბატონობის თავიდან ასაცილებლად. ასეთმა აღმოჩენამ რტიშჩევის მთავრობა დიდ საგონებელში ჩააგდო. გადაკარგულ, ცენტრზე სამის ათასი ვერსით დაშორებულ ქვეყანაში უმეგობროდ ცხოვრება ძნელია. თუ ერთგული მოკეთე არა გყავს გვერდზე, თუ არავის ენდობი, ტკბილად ერთ ღამესაც ვერ გაათევ. შეუძლებელი იქნებოდა, რომ ჯარი მუდამ თოფ-იარაღში ყოფილიყო და გამვლელ-გამომვლელისთვის თვალ-წარბში ეცქირა, ჩემს სამტროდ ხომ არაფერს აპირობსო. უსათუოდ რუსის მართვა-გამგეობის ბატონობას მალე ბოლო მოეღებოდა, უკეთუ რტიშჩევი და მისი მთავრობა მეგობარს ვერ იშოვნოდა. რა-კი ეს აზრი გამოარკვია გენერალ-ლეიტენანტ რტიშჩევმა და ჰემშარიტად აღიარა, საშუალებაც მალე გამ-

ოსძებნა მარტოდ დარჩენის მოსასპობად. ამ საშუალების პოვნას არც დიდი ჰქუა უნდა, არც დიდი ადმინისტრაციული ნიჭი, რადგან ძველის-ძველადვე ნაცადია და ხმარებული, როგორც უებარი წამალი. მთავარ-მართებელი რტიშჩევი დიდის სწავლა-განათლებით განთქმული არ იყო, მაგრამ ის მაინც ეცოდინებოდა, რომ რომაელები დაპყრობილ ქვეყნებს უვლიდნენ იმ ხერხით, რომელსაც მოკლედ უწოდეს: "დივიდე ეტ იმპერა", ესე იგი ადგილობრივ მკვიდრთა ინტერესი გაჰყავი და ისე იბატონეო. რადგან ქართველებს ერთი ინტერესი ჰქონდათ და გლეხი და თავად-აზნაურობა ერთის აზრით გაიმსჭვალა 1811-1812 წლებში, მათი გაშორება და ერთმანეთის შეჯახება იმ უამად არა ხერხდებოდა. ამის გამო რტიშჩევმა გამოსძებნა საქართველოში ძველადანვე დაბინავებული სომხობა, იფიქრა, რომ ესენი ქართველების მტრები არიანო და გადასწყვიტა - ვისარგებლებ ამ მტრობითაო. ქართველების დაჩაგვრა "ბუნტის" შემდეგ და სომხების წაქეზება სხვა-და-სხვა წყალობის დაპირებით სამუდამოდ გადაჰყიდებს მეზობლებს და რუსის მთავრობას გაუადვილებს ამ სამტრო ქვეყანაში ბატონობასაო.

გესლიანი აზრი რტიშჩევმა მალე მოიყვანა სისრულეში. სომხების ერთგულობის საბუთი სუსტი ჰქონდა რტიშჩევს, მაგრამ საბუთის სისუსტემ არ შეაჩერა იგი. აბა რა ერთგულობის ნიშანია, გეთაყვათ, ისა, რომ გაჭირვების დროს ტფილისის, სომხებმა რვაასი "ჩეტვერტი" ხორბალი ჩააბარეს სასურსათო მალაზიასა მაშინდელი ტფილისის სომხები ვაჭრობით და ხელოსნობით სცხოვრობდნენ, ხორბლის ყიდვა და მალაზიაში მიტანა მაშასადამე ჩვეულებრივი საქმე იყო მათი და განა ამ ფაქტით რა უნდა დამტკიცდეს იმის მეტი, რომ ვაჭარმა სასურსათო მალაზიაში ხორბალი მიიტანა და ხვედრი ფული მიიღო. ვსთქვათ, რომ სახეირო ფასებში ჩააბარეს პური ხაზინას. ვინ იცის, ეგები ასე რომ არ მოქცეულიყვნენ, ძალა დაეტანებინათ და ძალას ნებაყოფლობა არჩიეს.

მაინც და მაინც ორიოდ ამისთანა საქციელი მაშინდელ სომხობისა საბუთს არ აძლევდა გენერალ რტიშჩევს ქება-დიდებათ მოეხსენებინა საერთოდ მაშინდელი სომხობა და განსაკუთრებული წყალობა გამოეთხოვა იმპერატორისაგან. თუ ერთგულობაზე მივარდებოდა საქმე, განა თითო ოროლა ქართველმა უფრო სამაგალითო ერთგულობა არ გამოიჩინა რუსის მთავრობისა, აი თუნდ გენერალ ორბელიანმა და არქიმანდრიტ ელევთერმა? არც ისაა მართალი, ვითომც სომეხთაგანი არავინ ერია ამბოხებაში. სომეხს კაცო ოხანოვს მთელი ჭგუფი ჰყავდა და ებრძოდა რუსობას ქართველებთან ერთად. ავეტიქ-ბეგი, ტომით სომეხი, დიდ სამსახურს უწევდა ალექსანდრე ბატონიშვილს და ელჩის საპატიო თანამდებობას ასრულებდა. მართალია სიღნაღთან დამარცხებულ ბატონიშვილ ალექსანდრეს გამოეკიდნენ სიღნაღის სომეხები, მაგრამ ეს ამბავი იმას გვიჩვენებს მხოლოდ, რომ თუ მოღალატობა გამოიჩინა სომხობის ერთმა ნაწილმა, მეორემ ქართველების და სამშობლოს ერთგულობით ისახელა თავი. ასევე იყო ქართველებშიც. მორჩა და გათავდა.

ნამდვილი სახელმწიფო მოღვაწე სწორედ ასე მოიქცეოდა და ორიოდ მცირე ამბავს არ გაჰბერავდა, მაგრამ მაშინ რტიშჩევი საწადელს ველარ მიაღწევდა და ბოროტების თესლს ველარ დასთესდა. ასეა თუ ისე, მთავარ-მართებელმა ცამდის ასწია სომეხების ერთგულობა ქართველების ამბოხების დროს და სთხოვა იმპერატორ ალექსანდრეს, ჩინებულად და სამაგალითოდ დააჯილდოვე ეს ერთად ერთი ჩვენი მეგობრებით. თვით დღევანდელი აფიციალური ისტორიკოსი კაპიტანი ანოსოვი მოხიბლულია რტიშჩევის უქვეშევრდომილეს რაპორტით და სავსებით ეთანხმება იქ გამოთქმულ აზრსა.

აი რა სიტყვებით აღნიშნავს ბ-ნი ანოსოვი თავის სიხარულს. მთავარ-მართებელი რომ სჯიდა მოღალატესა და მუხანათს, ამავე დროს აჯილდოვებდა იმათ, ვინც ჩვენი ერთგული იყო და თვის შეურყვეველ ერთგულობით ხელს უწყობდა ჩვენის ჯარის გამარჯვებას. სხვათა შორის რტიშჩე-

მა გამოსთხოვა იმპერატორს უმაღლესი ღრამატა საქართველოში სრულიად სომხის ხალხისათვისო (რუსულად: *всему армянскому населению Грузии*).

ნუ გაგიკვირდებათ, რომ სომხები დიდად აფასებდნენ ჩვენის მართვა-გამგეობის უპირატესობას. ეს მართვა-გამგეობა საშუალებას აძლევდა სომხობას უვნებლად და თავისუფლად ეწარმოებინათ ვაჭრობა და გულდამწვიდებით განეგრძოთ მყუდრო, მშვიდობიანი ხელობა და ამიტომ ჩვენ მხარეზე იყვნენო. რადგანაც სომხები შიშობდნენ, ვაი თუ ძველი საქართველოს დრო დაბრუნდეს და თან მოჰყვეს აურზაურიო, ყოველ ღონის ძიებას ხმარობდნენ და მეცადინეობდნენ, რომ მალე ჩაგვექრო აჯანყებაო.⁴⁵⁾

უქვეშევრდომილესი მოხსენება რტიშჩევისა 1813 წ. 13 მაისისა იმდენად საყურადღებოა, რომ საჭიროდ მიგვაჩნია მისი სავსებით თარგმნა და აქ მოყვანა.⁴⁶⁾

”ბედნიერადა ვსთვლი ჩემს თავსა, მოახსენებს რტიშჩევი იმპერატორს უქვეშევრდომილესად, რადგან საბუთი მეძლევა გაცნობით, რომ სომხის ერი, რომელიც საქართველოს მკვიდრთა შესამჩნევ ნაწილს შეადგენს, ყელთამდე ჭავსეა ერთგულ უქვეშევრდომილეს მადლობით იმ უმაღლეს მფარველობისა და ენით გამოუთქმელ სიუხვე-წყალობისათვის, რომელიც ევლინება თქვენის უდიდებულესობისაგან სომხობას (ღედანში на всю сію Націю). ამის გამო სომხობა რუსეთის იმპერიისათვის უმაგალითოდ თავდადებულთა და შეურყეველ ერთგულობას იჩენსო. თავიდანვე, დაიწყო თუ არა მოქმედობა საქართველოში რუსის მთავრობამ, სომხის საზოგადოება თვალსაჩინოდ ააშკარავებდა მთავრობის ერთგულობას. მრავალჯერ უფეთქნია საქართველოში ბოროტ განძრახვას, მრავალჯერ სამეფოს სახლის წევრნი ასისიანებდნენ და აგულიანებდნენ ბრბოებს მთავრობის საწინააღმდეგოდ;

45) იხ. утм... ტ. II, გვ. 399 - 400.

46) Ibid. გვ. 400 - 401. Акты, ტ. V, გვ. 221 - 222.

აქაური თავად-აზნაურობა, გატაცებული ამო იმედით, ჰღელავდა და სცილობდა აღედგინა წარსული დაწესებულებანი ხალხის საკეთილოდ, თვით ქარაფშუტა ერი ხშირად ასდევდა ხოლმე სხვის ფეხის ხმასა, მაგრამ სომხის ერთგულობა მთავრობისადმი სალის კლდესავით უცვლელი და გაუტეხელი იყოვო. ვერავითარი დაპირება-მოხიბვლით (რუსულად; обиа-შიе) სომხის ერთგულობას ვერა სტეხდნენ და აქაური სომხები თავდადებით უწევდნენ სამსახურს თქვენის უდიდებულესობის საქმესაო. მაგრამ ყველაზე დიდად თავი ისახელეს წარსულ კახეთის ამბოხების დროს. როდესაც მთელ საქართველოში კაცი აღარ დარჩა ჩვენი ერთგული, მარტო სომხებმა არა თუ არ მიიღეს არავითარი მონაწილეობა ამბოხებაში, არამედ სიცოცხლესა და ქონებასაც არა ზოგავდნენ. ჩვენ ჯარებთან ერთგულ და ერთსულ იყვნენ, ამხედრდნენ მეამბოხეთა წინააღმდეგ და რუსის მხედრობასთან ერთად იბრძოდნენ მაშფოთართა გასაწყვეტად. სომხებმა ბრძოლაში გამოიჩინეს სამაგალითო ვაჟკაცობა და გულწრფელი თავდადება თქვენის იმპერატორების უდიდებულესობისადმი. ამას გარდა აქაური მთავრობა სომხებს უნდა უმადლოდეს, რომ ღროზე და წინდაწინ იტყობდა, რას აპირობდნენ მეამბოხენი და სადა ჰქონდათ ბინა. კახეთის სხვა და სხვა კუთხეს გაბნეული, ერთმანეთს მოწყვეტილი ჯარი თუ რამეს იგებდა ერთმანეთისას, ეს სულ სომხების წყალობითა, რომელნიც სიამოვნებით და ხალისით ასრულებდნენ ასეთ სახიფათო მინდობილებას და ხშირადაც სიცოცხლეს ესალმებოდნენ სამსახურის ერთგულობის გამოვო.

არ შემძლიან არ გავხადო თქვენის იმპერატორების უდიდებულესობის უმადლეს ყურთა სმენის ღირსად შემდეგიც. ყველაზე ძრიელ რომ გაგვიკირდა ამბოხების დროს და ტფილისში სრულიად აღარ შემოდიოდა პური შარშანდელ მოუსავლობის გამო და როდესაც თქვენის დიდებულების ტფილისში დაბანაკებულ ჯარს შიმშილი მოელოდა, სწორედ მაშინ ტფილისის სომხის საპატიო მოქალაქეთ გაკირვებისაგან დაგვიხსნეს. ამ დროის მიხედვით ასეთი სამსახური უდიდებულო-

ეს სამსახურად უნდა ჩაითვალოს. ერთი კი უთხარი და მაშინვე გააჩინეს 800 ჩეტვერტი პური (ჩეტვერტი 7-8 ფუთია). ფასიც პურისა დიდად სახეირო იყო მთავრობისათვის. ამგვარად თავიდან მოვაშორეთ დიდი გაჭირვება ტფილისში დაბანაკებულ ჯარს და პირველ ხანს მაინც იოლად წავედით.

რადგან ყოველ საქმის აღსრულების დროს, რომელიც კი თქვენმა უდიდებულესობამ დამაკისრა, ვხელმძღვანელობ ვიქნა ქვეშაირებით, აუცილებელ მოვალეობად მივიჩნიე ვაუწყო თქვენს უდიდებულესობას, თუ რაოდენ ერთგულნი, თავდადებულნი და მოტრფიალენი არიან საქართველოში მცხოვრები სომეხნი თქვენის უდიდებულესობისა.

დარწმუნებული ვარ, რომ ყოველ გვარი წაქეზება და წათამამება სომეხებისა მოუტანს უფრო მეტს სარგებლობას როგორც აქაურ ქვეყანას, ისე სამსახურსა, რადგანაც ასეთი წაქეზება გააორკეცებს სომეხთა ერთგულობას და თავდადებას და თვით ქართველთა ტომის ხალხებში დაჰბადებს ჯიბრსა და გამოიწვევს წაბადვას. ამის გამო მოვმართავ თქვენის უდიდებულესობის გულკეთილობას და უქვეშევრდომილესად გთხოვთ - გააბედნიერეთ საქართველოში მყოფ სომხის ერის ყველა წოდებათა საზოგადოება თქვენის უდიდებულესობის მონარქულის წყალობით, რომელიც გამოიხატება ამ საზოგადოების სახელზე ბოძებულის უმაღლესის ღრამატით.

ბედნიერად ვსთვლი ჩემს თავს, რომ თქვენის უდიდებულესობის მოწყალე ყურადღების ღირსად ვხდი ჩემის თხოვნის ბედსაო".

სწორედ საოცარია ეს ბიზანტიურის კილოთი და ბიზანტიელების გემოვნებაზე დაწერილი ქებათა-ქება, რომლის გადმოქართულებამ სული კბილით დაგვაგლეჯინა. მთელი რაპორტი მხოლოდ ექვსი წინადადებისაგან შედგება და აბა ეხლანდელი ლიტერატურული ქართული როგორ გამოხატავს ამ დაუსრულებელ და სიტყვა მრავალ ხობა-შესხმას ექვსისავე წინადადებით. ენად რომ გაიკრიფა გენერალი რტიშჩევი და მტრედევით აღუღუნდა, მაინც და მაინც რა ნახა ისეთი სომეხების საქციელში, რომ რაჭულ ჭიანურსავით გააბა და

ველარ გაათავა თავისი ლოცვა-კურთხევა. საქართველომ მთელი ქვეყანა მიართვა საიმპერატორო ტახტსა და უბრალო მადლობის ღირსიც ვერ გახდა. მადლობას ვინა სჩივის, დღესაც საყვედურით გვახრჩობენ: ჩვენ რომ არ ვიყვეთ, თქვე ქეციანებო, წყალი წაგიღებთო. მაშ რამ მოუღბო გული რტიშჩევსა?

დღევანდელი სომხები, განათლებული და გაუნათლებელი, უსათუოდ შეუკურთხებენ რტიშჩევს, რომ საქართველოში დაბინავებულ სომხებს ჯამუშის დამლა დააკრა და სათაკილო სახელით შეაცურა ისტორიაში.

მიზეზი სწორედ ისაა, რომელიც ამ კარის დასაწყისშივე აღვნიშნეთ. ქართველების მიერ ათვალწუნებულ მართვამგებობას მეგობარი ეჭირვებოდა და რტიშჩევმაც ჯონი სომხებს მიაყუდა, რადგან იმათზე მეტი სხვა აღარავინ იყო. არხეინად ბატონობისათვის საჭირო იყო მეზობლების ინტერესის გაცალკეება და რტიშჩევმაც არ იუკადრისა დაეთესა განხეთქილება, თუმცა წყნარი და ღვთის მოსავე ადამიანი იყო. მუდამ ძნელი იყო და დღესაც ადვილი არაა გაუმადლარ პოლიტიკის დაპურება. სამწუხარო მხოლოდ ისაა, რომ მაშინდელი სომხები ვერას მიხვდნენ, ან არ მოისურვეს მიხვედრა და ოსტატურად დაგებულ კაკანათში გაებნენ.

IX

გულითადი სურვილი აუსრულდა რტიშჩევსა. იმპერატორმა ალექსანდრე პირველმა უბოძა სომხის ერს უმაღლესი ღრამატა. ღრამატა ხელმოწერილია 15 სექტემბერს 1813 წ., უმთავრეს სამხედრო ბანაკში, ბოქეშიის ქალაქ ტეპლიცას. ხელს აწერს აგრედვე ღრამატას სახელმწიფო კანცლერი გრაფი რუმიანცევი.

აი თვით ღრამატა: "წყალობითა ღვთისათა, ჩვენ ალექსანდრე პირველი, იმპერატორი და თვითმპყრობელი სრულიად რუსეთისა და სხვათა, და სხვათა, და სხვათა. სასურველ

და ერთგულ ქვეშევრდომ, სრულიად სომხის ერს და საერთოდ ამ ერის ყველა წოდებას, ჩვენი იმპერატორებითი წყალობა.

"საქართველოს მთავარ-მართებლის მოხსენებიდან გულწრფელის სიამოვნებით ვიხილეთ ჩვენთვის ფრიად სასიამოვნო ახალი ღამტკიცება იმისი, რომ საქართველოში დაბინავებულ სომეხთა ყველა წოდებზე მუდამ აღვსილი იყო მაღლობითა და ერთგულობის მგრძნობელობით (чувствование) იმ მაღალ მფარველობისა და მამაშვილურ მზრუნველობისათვის, რომელთაც ჩვენ ვუჩინდით მანდაურ ხალხსა. მრავალ გზით დაამტკიცეს იმათ თავიანთი გრძნობა და შეურყეველი ერთგულობა. განთქმულნი იყვნენ სამაგალითო პირიანობით და სიმტკიცით და თავი ისახელეს ერთგულობით იმ დროს, ოდეს ქარაფშუტა და არა კეთილის მოსურნენი ამაოდ ცდილობდნენ შეერყიათ ჩვენ მიერ დამკვიდრებული მყუდროება საქართველოში. შფოთიან და მღელვარებით სავსე დროს გული არ შეიცვალეს და კლდესავით მაგრად იდგნენ ჩვენის ტახტის და ჩვენს ერთგულობაზე. არამც თუ ქონება და საცხოვრებელს, სიცოცხლესაც არ ზოგავდნენ ჩვენს სამსახურში და საერთო სარგებლობისათვის. ამგვარი ერთგულობა და თავგანწირულობა სრულიად სომხის ერისა საქართველოში და სრულიად ამ ერის წოდებათა გარჯილობა და ღვაწლი, მიზეზია იმისი, რომ სასიამოვნო მოვალეობად მიგვაჩნია წინაშე მთელის ქვეყნისა შევამოწმეთ მათი სამსახური და ერთგულობა და გამოუცხადოთ იმათ მაღლობა და წყალობა (признательность и благоволение) და დარჩეს ესე მოწმობა ჩამომავალთა ხსოვნაში მათ სასახელოდ და სადიდებლად.

"საიმპერატორო წყალობითა ჩვენი და ვშთებით მწყალობელი მათი".⁴⁷⁾

ენატანიანობა რომ მაინცა და მაინც დიდად არაა საქებური, ეს ამ უმაღლეს ღრამატრიანაც სჩანს. იმპერატორმა აღექსანდრემ და სახელმწიფო კანცლერმა რუმიანცევმა

უხერხულად მიიჩნიეს ამ თვისების საჯაროდ აღნიშვნა. დარჩა მარტო რტიშჩევის მოხსენებიდან 800 ჩეტვერტი პურის მიზიდვა და სილნალიდან გაქცეულ ბატონიშვილ ალექსანდრეს უკან დევნა. გულწრფელად მოგახსენებთ, სწორედ ვერ გაგვიგია, ეს ორი მცირედი სამსახური რა ისეთი ბედენაა, რომ მაგის გამო ბოჭემის ქ. ტეპლიცაში, შესანიშნავ ნაპოლონ პირველთან ბრძოლის დროს, ხელი მოაწერინეს იმპერატორს რესკრიპტზე და აუწყეს მთელ ქვეყანას საქართველოში მყოფ სომხების ერთგულობა. მოხსენებული გვქონდა უკვე, რომ წელიწადში ქართლ-კახეთს ჯარის საჭიროებისათვის გამოჰყავდა 112,154 ხარ-კამეჩიანი ურემი და 99,780 სასაპალნე ცხენი, მაგრამ მადლობის მაგიერ სახლებში დრაგუნები ჩაუყენეს, რომელნიც ქმრების თვალწინ დედა-კაცებს ნაშუსსა ჰხდიდნენ. ისტორიული საბუთები ბევრი ვჩხრიკეთ, მაგრამ ვერაფერი აღმოვაჩინეთ ისეთი რამ, რომელსაც შესძლებოდა ასე უზომოდ მოეხიბლა რტიშჩევი რუმიანცევი და თვით იმპერატორი ალექსანდრე პირველი. ძალღის თავი, ალბად, იმ "დივიდე ეტ იმპერაში" ჰმარხია, რომელიც ზემოდ მოვიხსენიეთ. სხვა ჩვეულებრივი ლოლიკა და ისტორიული კრიტიკა არ უდგება ამ გაუგებარ ქებათა-ქებას რტიშჩევისას და იმპერატორ ალექსანდრესას.

გენერალ რტიშჩევი მეტის-მეტად იყო ნასიამოვნები და გახარებული, ღრამატა რომ ჩამოიტანეს ტფილისში. არ ვიცი, რა ჭეფრო უხაროდა მთავარ-მართველს, ისა, რომ ხელმწიფემ მისი ვედრება და მუდარა შეისმინა, ღრამატა უბოძა სომხებს და ამით პირადი ნდობა გამოუცხადა თვითმპყრობელმა, თუ ისა, რომ სომხები და ქართველები გადაჰკიდა და სამეზობლო შურსა და გესლს ფართო გზა გაუხსნა. გრაფ რუმიანცევს გაუგზავნა იანვრის ორს 1814 წ. რტიშჩევი მოხსენება და დიდი მადლობა გადაუხადა მეცადინეობისა და გარჯისათვის. ღრამატის ბოძება ნიშანია იმისი, სწერდა გენერალი რტიშჩევი რუმიანცევს, რომ თქვენი ბრწყინვალეობა მოწყალე თვალით უცქერის აქაურ საქმეებს. ასეთი გარემოება მავალეებს გამოუცხადო თქვენს ბრწყინვალეობას გულწრფ-

ელი მადლობა იმ დიდ შუამდგომლობისათვის, რომელიც თქვენ იხმარეთ იმპერატორის ყოვლად მოწყალე ტახტის წინაშეო. აქედან სჩანს, რომ სახელმწიფო კანცლერიც დიდად გარჯილა და ხელი შეუწყვია, რომ ღრამატა ებოძებინათ ქართველ სომხებისათვის.

უმალესი ღრამატა, 15 სექტემბერს ხელმოწერილი ქ. ტეპლიცაში, ტფილისში მოვიდა 11 ნოემბერს. ტფილისის სომხები სიხარულით ცას დაეწივნენ და აღარ იცოდნენ, როგორ გამოეხატათ თავიანთი სიხარული და აღტაცება. ღრამატა მთავარ-მართველის სასახლიდან ისეთის ამბითა, ზეიმითა და ცერემონიით გადიტანეს ვანქის ტაძარში, რომ უცხო და შორეულ მაყურებელს ეგონებოდა, ალბად სომხობას უდიდებულესი ხარტია მიაქვთ სამღვთო ტაძარში სამშობლოს პოლიტიკურად აღდგომისათ და არა ბობოლა მოხელე გრაფ რუმინანცევის მიერ გაშალაშინებული რაპორტი რტიშჩევისა, რაპორტი, რომელიც აშკარად ჩირქსა სცხებდა სომხობის ეროვნულ თავმოყვარეობას და სახელს უტეხდა ისტორიულ და კულტუროსან ერს.

გენერალი რტიშჩევი ამგვარად აღგვიწერს ღრამატის ჩაბარების და გამოცხადების ამბავს, რომელსაც სიტყვა სიტყვით ვთარგმნით, ვინაიდან საყურადღებოდ მიგვაჩნია მკითხველებისათვის ღრამატის ჩაბარების ცერემონიალი.⁴⁸⁾

"საქართველოს სამხედრო და სამოქალაქო გუბერნატორმა გენერალ-მაიორმა სიმონოვიჩმა პოლიციის პირით აუწყა ტფილისელ სომხებს, რომ ღრამატა გადაეცემა მათ 22 ნოემბერს. დილის 8 საათზე შეიკრიბნენ გუბერნატორის სახლში სომხის თავადნი⁴⁹⁾ და საპატიო მოქალაქენი. აქედან პროცესია დაიძრა და გაემართა მთავარ-მართველის სასახლისაკენ. წინ მიუძღვოდნენ სამოქალაქო გუბერნატორის კანც-

48) Ibid. ტ. V, გვ. 231, 232. უთ... ტ II, გვ. 402 - 404.

49) რუსულად: армянские князья ეს შეკლობა. ბეგთაბეგვანი, ბეჭუთაშვილნი, თუმანიშვილნი, ისე როგორც იელიგაროვი, ქართველი თავად-აზნაურნი არიან. ასეც არიან შეტანილნი ქეროღიაში. სომხის თავადი ისტორიული ტერმინია და რტიშჩევის დროს სომხის თავადები არა სცხოვრობდნენ საქართველოში.

ელარიის მოხელენი. მთავარ-მართებელი დახვდა პროცესიას სასახლეში და შესაფერი სიტყვა უთხრა. სიტყვის შემდეგ რტიშჩევმა გადასცა ღრამატა სომხის ერთ უპირველეს თავადთაგანს. არჩეულ კაცს პირით საზოგადოებამ მოახსენა ენით გამოუთქმელი მადლობა სომხის ყველა წოდებათა სახელით უავგუსტოესს მონარქს, რომელმაც ასე თვალსაჩინოდ და სამაგალითოდ გააბედნიერა სომხის ხალხი თვის ყოვლად მოწყალე წყალობით. ამის შემდეგ უმაღლესი ღრამატა დასდეს მდიდრად ნაკერ ფარჩის ბალიშზე, რომელიც ეჭირათ ოთხ საპატიო სომხის თავადს და ორ უპირველესს მოქალაქეს. ბალიშის მჭერელნი, რომელთაც წინ მიუძღვოდა პოლიციებისტერი და პოლიციის მოხელენი, ცერემონიალის მსვლელობით გაემართნენ ვანქის ტაძრისაკენ. პროცესიას უკან მისდევდა მთავარ-მართებელი რტიშჩევი მთელის თავის შტატით და სამხედრო მოხელეობით და აგრედვე გუბერნატორი სამოქალაქო მოხელეებით. მთავარ-მართებლის სასახლის ყარაულმა, გამოჩნდა თუ არა უმაღლესი ღრამატა, სამხედრო პატივი სცა. აუარებელი ხალხი მისდევდა უკან პროცესიას. ვანქის მონასტრის ზღუდესთან ღრამატას შეეგება შემოსილი სომხის არქიეპისკოპოსი მინასა მრავალრიცხოვან სამღვდელოებით, ჯვრებითა და წმიდა ხატებით. მინასამ ჩამოართვა თავადებს და მოქალაქეთ უმაღლესი ღრამატა, დაიღო თავზე და ასე გაემართა სობოროსაკენ. მომხიბლავი და ცრემლების მომგვრელი სურათი იყო, სობოროსაკენ მსვლელობის დროს გაისმოდა შესაფერი საგალობელთა გალობა, ზართა რეკვა და სასიხარულო განცვიფრება ხალხისა. სობოროს შესავალ კართან ღრამატას მოეგება შემოსილი უპირველესი სომხის არქიეპისკოპოსი ასტვაცატური მრავალსაეკლესიო მოსამსახურეებით და შესაფერის საეკლესიო წესითა, მიიღო ღრამატა-არქიეპისკოპოს მინასასაგან, დაიღვა თავზე და ამ გვარად განვლო ეკლესია და მივიდა სამღვთო ტრაპეზამდე, მუხლი მოიყარა წინაშე ტრაპეზისა და დასდო ღრამატა განსაკუთრებულად მისთვის მომზადებულ ადგილზე. შემდეგ არქიეპისკოპოსმა ასტვაცატურმა შესაფერისი სიტ-

ყვით მიმართა სომხის ხალხს. შემდეგ ამისა გადაიხადა მუხლმოდრეკით სამადლობელი პარაკლისი საბედნიეროდ მათის იმპერატორების დიდებულებისა და სრულიად უავგუსტოვისის გვარეულობისა. გულწრფელი მოწიწება და სულიერ ღმობიერობის ცრემლნი სომხის ერის ყველა წოდებისა სწორედ რომ ნამდვილი გამომხატველია გულითად გრძნობისა და მადლობისა მათის უდიდებულესობისადმი. ამის შემდეგ უპირველესმა არქიეპისკოპოსმა ასტვაცატურმა გადაიხადა თავიანთი წესისამებრ სამღვთო ლიტურგია. მე ჩემის შტატით და უპირველესი არქიეპისკოპოსი ასტვაცატური მიგვიპატიუეს სადილად, აგრედვე რუსის მოხელეობა და საპატიო ქართველი თავადიშვილნი. დაპატიუებული იყო სადილად აგრედვე საქართველოს ეგზარხოსი ვარლაამი (ერისთავი), რომელიც დაესწრო ვანქის ტაძარში სამადლობელ პარაკლისსა. ეგზარხოსი ვარლაამი კეთილმსახურებით და ნამდვილ ერთგულობით მათის იმპერატორების უდიდებულესობისადმი მაგალითს აძლევს ქართველ საზოგადოებას. სამადლობელ პარაკლისსაც იმისთვის დაესწრო, რომ პარაკლისზე დასწრებითუ პატივი ეცა სომხებზე მოვლენილ მონარქის სიუხვისათვის.

ამავე საღამოს სომხის საზოგადოებამ გამართა ბალი. მიწვეულნი იყვნენ საპატიო რუსის მოხელენი სახლობით და ქართველი თავადიშვილნი. ბალს მოჰყვა აქაურ მხარეს იშვიათი და საუცხოვო ვახშამი (ყЖИШНЫЙ СТОЛЪ). ვახშამს დაესწრო ორასზე მეტი გვამი ორთავე სქესისა. ის სახლი, სადაც ბალი და ვახშამი იყო გამართული, მშვენიერად გააჩაღეს. სახლს ამშვენებდა გამჰვირვალე სურათი, რომელიც წარმოადგენდა ჭავარიან კლდის პირამიდას. პირამიდაზე იყო დამკვიდრებული ვენზელიანი სახელი მათის იმპერატორებითის უდიდებულესობისა. ვენზელიან სახელს ასხივოსნებდა დიდება, რომელიც ყოველ კუთხეს ჰფენდა რუსეთის ძლევა-მოსილობას და ბუმბერაზობას და ჰმოწმობდა, რომ ყველას გული და სული მადლობელია დიდებულის მონარქისა. ქალაქის ყოველი ნაწილი, სადაც სომხები სცხოვრობენ, შესანიშნავად იყო გაჩირალდნებული, აგრედვე ციხის ზოგიერთი ადგილი. შუაგულ

ქალაქის დუქან-ბაზარი, მორთული საუკეთესო ფარჩითა და იშვიათის ნივთებით, გაანათეს ღიღებულად და თვალწარმტაცად.

ხალხი გათენებამდის ქეიფობდა და სეირნობდა. ცხადად ეტყობოდა, რომ სომხის ხალხის სიხარული გულწრფელი იყო. ასეთს სიხარულს თანა სდევდა გულწრფელივე მადლობა მათის უღიღებულესობის მფარველისადმი.

ესეც უნდა მოგახსენოთ, სწერს რტიშჩევი რუმინეცს, რომ სომხობა არ დაკმაყოფილდა თავის გრძნობის გარეგანის გამოხატვით და თავის სიუხვისაგან შესწირა ჯერ-ჯერობით 4000 მანათი ასიგნაცია სამადლო სახლს ღარიბ-ღატაკთა სასარგებლოდ და მოსახმარად, რათა საქმით დაუმტკიცონ უავგუსტოეს მონარქს თავისი უღრმესი მოწიწება და მადლობა ენით გამოუთქმელ სიუხვისათვის. კურიერსაც, რომელმაც უმაღლესი ღრამატა ჩამოიტანა, ფეშქაშად მიართვეს 1000 მანათი ასიგნაცია”.

ასე იღვწასწაულეს ტფილისის სომხებმა რუსის მთავრობისადმი თავიანთი ერთგულობის ატესტატის მიღება. ასე თეატრალურად თავიანთ გრძნობის გამოხატვა ტფილისის მოქალაქეთ და სომხის სამღვდლოებას რაღაც სენად გადაექცათ. ათის წლის წინად, გენერალ კნორრინგის ღროსაც, ასეთისავე ”ცერემონიალის სიარულით” მიიღეს უმაღლესი ღრამატა. თუ კნორრინგის ღროინდელ საქციელს რაიმე გასამართლებელ საბუთს უპოვნით, რადგან ვინ იცოდა, ახალი მთავრობა რას მოიტანდა, ცამეტი წლის შემდეგ ცხაღზედ უცხადესი შეიქნა კაპიტან-ისპრავნიკების სუსხიანი რეჟიმი და ამის გამო 22 ნოემბრის მატაოცობა სრულიად გაუგებარი ხდება.

ეს კიდევ არაფერი. რაც ეპატივება მაშინდელ ღროის პოლიტიკურ განუვითარებლობას, ის როგორ უნდა ვაპატიოთ ღღევანდელ ისტორიკოსს? ცნობილმა ჩვენებურმა ისტორიკოსმა ა. დ. ერიცოვმა სავსებით შეიტანა თავის წიგნში

15 სექტემბრის ღრამატა და თითქოს სომხის ერს შარავანდელს ადგამსო, უკრიტიკოდ დასტოვა.⁵⁰⁾

ჩვენის ფიქრით, რაც მალე დაივიწყებს რტიშჩევის ატესტაციას სომხობა, ისა სჯობიან. განმეორება მისი სწორედ რომ სათაკილოა.

~

50) იხ. Патриархъ всѣхъ Армянъ Нерсѣсъ. ტფილისი, 1898 გვ. 117 - 129.

ს ა რ ჩ ე ვ ი

ნაწილი პირველი

შესავალი

5 - 10

კარი პირველი

11 - 20

ქვეყნის მოვლა-პატრონობის სიძნელე. მთავრობამ მრუდე გზა აირჩია. წარსულის უარყოფა. რუსული მართვა-გამგეობის შემოღება უცვლელად. უხეირო კანონი და საძაგელი მოხელენი. რა თვალთ უცქეროდნენ მოხელეობას ციციშვილი, პაულუჩი და ტორმასოვი. ანოსოვის აზრი "до Бога высоко, до царя далеко". "ტუზემცები". დახასიათება მოხელისა. ფეოდალურ-არ-

ისტოკრატული წესწყობილება.
მოხელე-ბიუროკრატი.

კარი მეორე

20 - 30

ღვთის რისხვა და თავლათ დასხმული სასურსათო მოხელენი. დარბევა ქვეყნისა. შიმშილი 1811-1812 წ.პურის ასაკრეფად სოფლად ეგზეკუციას აყენებენ. სამხედრო კამანდები. ანოსოვის აზრი. როგორი უნდა იყვეს ერის მმართველი. გენერალ სტალმა მარკიზი მახეში გააბა. ტანჯვა-ვაება ერისა. ხორბლის მაგიერ კახელები ძეთა და ასულთ აძლევდნენ კამანდებს. ჯარი ულმობელად და სასტიკად ეპყრობოდა მკვიდრსა, ზნეობა შებღალა, სიბილწე შეიტანა სოფლად. ხალხი კვნესოდა, გამკითხავი არავინ იყო.

კარი მესამე

30 - 38

სასამართლოს რეფორმა კახეთში. მოსამართლე ამორჩეული უნდა ყოფილიყო. სურვილი ამბოხების პირდაპირ მიზეზის გაგებისა. კამისია ამბოხების მიზეზთა გამოსაკვლევად.

ბოდბისხვევლთა მოხსენება - უსამართლობამ სული ამოგვხადა, ლეკოა, ყიზილბაშთა და ოსმალთა ბატონობის დროსაც არ გვიხილავს ამდენი შავი დღენიო. ბეგარაზე გვერეკებოდნენ ფოთს, ერევანს, გუმბრს, განჯას და სხვაგან. მოხელეთა მეჭრთამეობა, ბავშვებს პირიდან პურსა ჰგლეჯდნენ, დედა-კაცებს კისერზე ქვებსა ჰკიდებდნენ. მოხსენება პრასიანელებისა. სალდათები მეურმეებს ურმებში აბავდნენ. ბეგარაზე შიმშილით ხოცავდნენ, საჭმელს რომ მოსთხოვდნენ, დედა-მიწაზე უთითებდნენ - სჭამეთო. ცოლ-შვილის გაუპატიურება და ნამუსის ახდა. განძრახ დავის ატეხა და სოფლების გადაკიდება მამულის გამო. სიღნაღელთა ტირანობა.

კარი მეოთხე

39 - 48

მირზაანელების მოხსენება. ცოლების მოტაცება. მაჟაროვის ავკაცობა. სასტიკი ბეგარა. სიმრუდე ზომისა. ქრთამი. მოხსენება არქიეპისკოპოს რუსთველისა. ჯარის სასტიკობა. ხალხის დარბევა. კამისიონერების ოინები.

მიტროპოლიტ ბოდბელის მოხსენება, მოხელეთა აღვირ ახსნილი საქციელი. უსამართლობამ სასოება დაუკარგა ხალხს. დიდი ხანია ხალხს ცეცხლი წაეკიდა, მაგრამ მის ჩაქრობას და განვლებას არავინ ფიქრობდა. გუბერნიის მარშალთ. თამაზ ორბელიანის მოხსენება. ტორმასოვი ხალხის კვნესას ყურს არ უგდებდა, ერთი რაღაც მიუკარებელი ადამიანი იყო.

კარი მეხუთე

48 - 57

თ. თამაზ ორბელიანის ნაობახტში ჩაგდება. ორბელიანის გლახ-კაცობას დარჩენილი სასურსათო გადასახადი მოსთხოვა მარკიზმა. დატუქსვა თ. კონსტანტინე მუხრან-ბატონისა. პროკურორი პლახოტინი, მეჭიანურე და მეთარე.

კარი მეექვსე

57 - 67

ჟამი. ქურდ-ბაცაცა ყაზახები. მცირე ჯამაგირი ყაზახისა. კარანტინები. თ. დარჩია ბებუთაშვილი და მცხოვრებთა ჯანმრთელობაზე

მზრუნავი კამიტეტი. კარანტინებმა ხალხი დიდად შეაწუხა.

კარი მეშვიდე

87 - 75

საერთო უკმაყოფილება. სამღვდლოება და საეკლესიო აზნაურები. ერთობა-სიმტკიცის უქონლობა. ინგლისის ხრიკები. ბატონიშვილი ალექსანდრე. მისი სააგიტაციო წერილები. ძლიერი გავლენა წერილებისა. წერილების თავაზიანი კილო და რუსის მოხელეთა სიტყვა-პასუხი, მათი შედარება.

კარი მერვე

78 - 84

გაბრიელ ყაზბეგი და საქართველოს სამხედრო გზა. წერილები ბატ. ალექსანდრესი მთიულებისადმი. ავეტიქას წერილი. წერილი ალექსანდრესი თელავს ზევით თემისადმი. აზრი ბატონიშვილისა რუსებზე. გენერალი ერმოლოვი და მისი აზრი ალექსანდრეზე. ერევნის სარდარ ჰუსეინყული-ხანი.

კარი მეცხრე

84 - 94

უზომო ბეგარა. პაულუჩჩიმ ამბოხების ატეხა არა საიმედო კაცებს მოახვია. ბიოგრაფია მარკიზისა. პაულუჩჩი, როგორც ქვეყნის გამგე. ერეკლესა და გიორგის ძეგლები. თ. პ. ციციშვილის გვამის მოსვენება.

კარი მეთე

94 - 103

თიანეთი და ფშავ-ხევსურეთი. სოფ. ახმეტა. "ზეკუცია". აჯანყება. თიანეთში კამანდის ამოწყვეტა. თელავისკენ დაიძრა ჯარი საშველად. ტფილისი შეჰკრთა. ვრონსკისა და ესიპოვის კამანდები ძალზე დაზარალდნენ. ტფილისიდან კიდევ გაგზავნეს მაშველი ჯარი. თელაველ სომხებმა მიიღეს მონაწილეობა "რევოლიუციისაში". თელავის ალყა. ლეკები მოეშველნენ ქართველებს. ბატ. გრიგოლ მეფედ დაადგინეს.

კარი მეთერთმეტე

103 - 112

აჯანყება კახეთს მოედო და გადავიდა ივრის ხეობაზე. აბბას-მირზას პრ-

ოკლამაცია, თელაველ მეციხოვნეთა გაჭირვება. კამენდანტის და მუამბოხეთა მიწერ-მოწერა. ქართლიდან და ბამბაკიდან მაშველი ჯარი წამოვიდა. შეტაკება ანაგაში და კაკაბეთში. კრიტიკული მომენტი. პურის აკრეფა შეაჩერეს. ერთგული ქართველები აფრინეს სოფლად. ენატანიებს მზეს უბნელებენ მუამბოხენი.

კარი მეთორმეტე

113 - 121

ქიზიყი. სიღნაღის აკლება. ბარბაროსობა აჯანყებულთა. ყაბარდოს პოლკის ერთის ბატალიონის დამარცხება ს. ბოდბისხევს. ჯარის ნაშთი თავს იყრის ყარა-ალაჯის ციხეში. სიკვდილი სვიმონ ბებურიშვილისა და ოთარ ონანოშვილისა. გაჭირვება ყარა-ალაჯისა. ოთარ ქობულაშვილმა შეუტია საგარეჯოში გამაგრებულ გენერალ პორტნიაგინს. გენერალი ტფილისს წავიდა. კახეთმა გაიმარჯვა. ახლად არჩეული მეფე სიმხნევს იჩენს და ყაზახ-ბორჩალოს ატყობინებს - დადგა უამი რუსების გარეკისაო.

კარი მეცამეტე

121 - 129

პორტნიაგინი ტფილისის გამაგრებას შეუდგა. პოლკოვნიკმა ტიხანოვსკიმ ს.ხაშმთან დიდად დაამარცხა მემბოხენი. დარიალის ვიწრო ხეობა. მთა აჯანყდა, ფასანაურის პოსტზე რუსები გაჟლიტეს. ანანურის ამბები. ქართლიდან პოდპოლკოვნიკი უშაკოვი დაიძრა ანანურის საშველად. რუსებს ეხმარება კონსტანტინე მუხრან-ბატონი და თორნიკე ერისთავი. უშაკოვმა ღუშეთი აიღო იერიშით. კაპიტან საგინაშვილის გაჭირვება. ღართის კარს დაბრუნდა, რადგან ღუშეთის გზა ვერ გაარღვია. მუხრან-ბატონის ვერაგობა.

კარი მეთოთხმეტე

130 - 138

გაბრიელ ყაზბეგის დაუფასებელი ღვაწლი. უშაკოვმა ანანური დაიხსნა. 70 ქართველის ამოწყვეტა. საქართველოს სამხედრო გზის გახსნა. პაულუჩჩის დაბრუნება ტფილისს. გენერალი პორტნიაგინი სამსახურიდან გავიდა. საექსპედიციო ჯარის უფროსობა

თვით მარკიზმა იკისრა. უშაკოვმა დიდად დაამარცხა მეამბოხენი საშაბუროსთან. ქართლმა მხარი არ დაუჭირა კახეთს. ფეოდალებმა დიდი ერთგულობა გამოიჩინეს ახალის მთავრობისა.

კარი მეთხუთხმეტე .

139 - 150

პაულუჩჩიმ მოუწოდა კახელებს - ჭკუაზე მოდით, იარაღი დაჰყარეთ და დამორჩილდით მთავრობასო. კახელების პასუხი. მარკიზის მეორე პროკლამაცია. ზოციქულები: ნინოწმინდელი, პატრი ონოფრე და სოლომონ ავალიშვილი. არქიმანდრიტი ელევთერ ზუკაკიშვილი. ღვაწლი და მოქალაქობა ელევთერ ბერისა.

კარი მეთექვსმეტე

150 - 166

მარკიზი ს. ხაშმს წავიდა. ახალციხელი შერიფ-ფაშა და კარელი აბდულა-ფაშა. რუსებმა შერიფ-ფაშა დაამარცხეს ახალქალაქთან. მაიორ სავარსამიძემ სასტიკად დაამარცხა კარელი ფაშა აბდულა. მარკიზმა მონასტერ სამებასთან დაამარცხა კახელები.

ტყვედ აყვანილი ორი მეამბოხე ბრძოლის ველზე ჩამოაღრჩეს. ხაშმის აკლება. ხიშტით მოიკლა 80 წლის მონაზონი მარიამ აბაშიძე, დედიდაშვილი მეფე ირაკლისა. საგარეჯომ ქელი მოიხარა. მაიორ ორბელიანის გამარჯვება ყარა-ალაჯთან, ქართველებს წაართვა ერთადერთი ზარბაზანი რომ ჰქონდათ. ქართლის სამზღვარს მოადგა იმერეთიდან წამოსული ყაბარდოს პოლკის ერთი ბატალიონი. მარკიზი ქიზიყისაკენ გაემართა. უშაკოვი თიანეთისაკენ წავიდა. ტიხანოვსკიმ დაიხსნა ქოდალოს ციხეში გამომწყვდეული 80 რუსის ჯარის-კაცი. ორი მეამბოხე ჩამოაღრჩეს. ქიზიყმა მორჩილება გამოაცხადა. პაულუჩი პირველ მარტს თელავისაკენ მიდის. მეფე გრიგოლის წერილები. ბატონიშვილ დავითის მოთხოვნა შესახებ მარკიზის ექსპედიციისა ქიზიყში. ღვაწლი იოსებ ანდრონიკაშვილისა მთავრობის წინაშე. ბრძოლა ს. . ჩუმლაყთან. სიკვდილი პოლკოვნიკ თ. ვახტანგ ორბელიანისა. დაიჭრა პოეტი თ. ალექსანდრე ჭავჭავაძე. ტყვეთა ჩამოღრჩობა. უბედურობა მეფე გრიგოლისა. ბევრმა

თავადიშვილმა უღალატა. ჩვენნი
ეროვნული სენი.

კარი მეჩვიდმეტე

166 - 177

უშაკოვის გამარჯვება. რვა თიან-
ელის ჩამოღრჩობა. არტანის დაწვა.
რუსების ზარალი. პაულუჩის მაგიერ
გენერალი რტიშჩევი. თავად-აზნაურო-
ბა თხოულობს მარკიზის საქართვე-
ლოში დარჩენას. თავგადასავალი
არქიმანდრიტ ელევთერისა. ბატონიშვი-
ლი გრიგოლ ანწუხს გაიქცა. თ.ვ.ი.
ბებუთაშვილმა და პრაპორშჩიკ თ. ბა-
რათაშვილმა წაიყვანეს საქართველო-
დან რუსეთს დატყვევებული გრიგოლ
პეტრეზავოდის ციხეში ერთი წელი-
წადი დაჰყო.

ნაწილი მეორე

კარი პირველი

178 - 181

საზოგადო მიმოხილვა.

კარი მეორე

181 - 188

გენერალი რტიშჩევი. სპარსეთის პოლიტიკა. შფოთი განახლდა. ჯორჯაძე და ერისთავი ხალხს აჯანყებენ. კახელები ელჩებს გზავნიან ბატ. ალექსანდრესთან სპარსეთს. გენერალი სტალი კახეთში. აჯანყების ჩასაქრობად კახეთს წავიდა გენერალი დიმიტრი ორბელიანი და მალე დაბრუნდა.

კარი მესამე

188 - 196

რტიშჩევი ყარაბაღს წავიდა. ბატონიშვილი ალექსანდრე შემოდგომის პირზე კახეთში გაჩნდა. აჯანყებამ ხელ-

ახლა იფეთქა. ტიხანოვსკი გამოეკიდა ალექსანდრეს. ძლიერი შეტაკება ს. შილდაში. ფასანაური მემამბოხეებმა დაიჭირეს. მოადგილე რტიშჩევისა ორბელიანი ტიხანოვსკის შეუერთდა ფაშაანის ფონთან.

კარი მეოთხე

197 - 208

ბრძოლა ნორჩებში, გურჯაანის ბოლოს. ორბელიანმა ჩამოაღრჩობინა ქიზიყელი იოსებ მამანაშვილი, ქედური. ბრძოლა შავ-ტყეში. რტიშჩევი ტფილისს ჩამოვიდა. სიმონ-ოვიჩი ანანურს წავიდა, აქედან საგურამოს გზით კახეთს გაემართა. ლეკთა ბელადი ალისკანტი ეახლა ალექსანდრეს. ტიხანოვსკი და ორბელიანი დადგნენ კოდაზე, ანაგის ბოლოს. კახელებმა სიღნაღს ალყა შემოარტყეს. ალექსანდრეს დამარცხება სიღნაღთან. ალექსანდრე ჩალაუბანს დადგა. შილდის მეორედ აკლება. პოლკოვნიკი ერისთავი. ორბელიანმა დასწვა მალარო, ქედელი და ნუკრიანი. დიდი ბრძოლა ჩალაუბნის ხეობაში. ორბელიანი მივიდა კელმეჩურს და დადგა ლაკბეზე.

კარი მეხუთე

208 - 214

მანავის ციხე. ჩაილურის ბრძოლა. ალისკანტის ღალატი და ალექსანდრეს დამარცხება. ღალატი ბარძიმ ჩერქეზიშვილისა. ფაფრის მინდორზე ტიხანოვსკიმ ამოწყვიტა ლეკები, ხერი არც კახელებმა დააყარეს შინ მიმავალ ლეკებს. ალექსანდრე ავიდა ფშავში, აქედან გადავიდა ხევსურეთს. გენერალ ორბელიანის სისასტიკე და ვერაგობა. ბიწიერება ნინია ერასტიშვილისა და იოსებ ანდრონიკაშვილისა. ბოროტება ელევთერისა. ალექსანდრე და ხევსურები. კონტრიბუციი.

კარი მეექვსე

215 - 221

რეპრესიები. გაციმბირებულ თავად-აზნაურნი. დანაშაულის პატიება.

კარი მეშვიდე

222 - 226

სოფლის მოურავების მოსპობა.

კარი მერვე

226 - 233

”რევოლიუციამ“ აღმოაჩინა, რომ რუსებს საქართველოში მეგობრები არა ჰყავთ. ძებნა მეგობრებისა. რტიშჩევმა ქებათა-ქება შეასხა სომხობას და სთხოვა ხელმწიფეს უწყალობოს მათ ერთგულობისათვის ღრამატა. უზნეო და გაუმადლარი პოლიტიკა.

კარი მეცხრე

233 - 240

ღრამატა იმპერატორ ალექსანდრე პირველისა სომხის ერის სახელობაზე. ღრამატის ჩაბარება ”ცერემონიალის მსვლელობით“. ბალი და ვახშამი. ჯავარიან კლდის პირამიდა. სურათი-ემბლემა რუსეთის დიდებისა და ბუმბერაზობისა. სომხების მატაოცობა. ა. გრიცოვი.

ალექსანდრე ფრონელი

ამბოხება კახეთისა

რედაქტორი
ნ. ლოგუზაშვილი
მხატვარი
ი. ვასილკოვსკი
კომპიუტერული დიზაინი
ა. ბერდიშევის
ტექნიკური რედაქტორი
ი. ბუაჩიძე
კორექტორი
თ. დახუნდარიძე

გადაეცა ასაწყობად 10.05.92. ხელმოწერილია და-
საბეჭდად 17.11.92. ფორმატი 60x84 1/16. ქალა-
ლდი ოფსეტური. გარნიტურა ჩვეულებრივი.
ბეჭდვა ოფსეტური. ტირაჟი 5.000.

ფასი სახელმწიკრულებო

გამომცემლობა "ამირანი"

თბილისი, მ. კოსტავას ქ. 69, კორპ. 5.